

Pexanialivaisi Jesucristo pelivaisi, San Lucas pey aquina elivaisi

*Pacuenia Lucas taxuxuaba mapabaxutotaje
Jesucristo pelivaisi, petoyaquinaejava
Teófilovënëjavabelia, yabara pelivaisi*

¹⁻² Pamatacabí abaxé Jesús ponapona mapanacuataje, jivi ayaibitsaëtoxaneto tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranëjava Jesús pelivaisi, pexanialivaisi. Nexata tomaranëjava Jesús pelivaisi pejumetaevi, ayaibitsaëto, baja cajena yaquina juya mataropotsia petsipaebinexa itsamonaejavabelia. Pacuenia Jesús petaevitsi vajunupaebatsi, bajarapamonae yaquina baja cajena Jesucristo pelivaisi.

³ Nexata xanë ata mapamatacabitaje yanijobaponajë bajarapalivaisi daxita peyapëtaevijavabelia. Yanijobaponajë xaniavaetsia tayapëtaenexa pacuenia Jesús exanaponapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xamë ata xaniavaetsia neyapëtaenexa daxita bajarapalivaisi, Jesucristo pelivaisi. Netsitaxanepana tacatoyaquinaenexa daxita bajarapalivaisi neyapëtaenexa pacuenia

jumai tsaponae caelivaisi canacujitsia Jesú斯 pexanaponaejavanë yabara, caejava canacujitsia.

⁴ Copiaya baja picani itsamonaе catsipaeba bajarapalivaisi. Itsiata icatsia xanë catoyaquinatsi neyapëtaenexa jane baja xaniavaetsia bajarapalivaisi pexaniajailivaisicuene.

*Pacuenia ángel tajévelia jumaitsi Zacaríasjavabelia:
“Nexénatonëyo raja xainaename,” jai yabara pelivaisi*

⁵ Pamatacabи abaxë Herodes eveta Judeanacula, bajarapamatocabи ponapona sacerdotenë Zacarías. Bajaraponë sacerdotevi Abíasvënëviyajuvënëñë. Zacarías pijava pevëñë Elisabet. Bajarapova sacerdotenëmi Aarónpijinë pemomoxiyajuvënëva.

⁶ Bajarapajivibeje xaniavaetsia aneconijibia Dioso pitabarata toponaponabeje. Dioso jumecovënëtsiaya ponaponabeje pacuenia Dioso itorobatsi judíovi xaniavaetsia pejinavanapaenexa.

⁷ Itsiata bajarapajivibeje pexi apo xainaebeje. Tsipaji Elisabet mavecova. Nexata bajarapajivibeje bitso baja perujujiviyobeje.

⁸ Nexata itsamatocabи Zacarías templobota nanacuenebijitsia sacerdotevi penacuenebicuene Dioso pitabarata. Pasemanata daxita sacerdotevi, Abíasvënëvi, nacobenaevetsijitsia templobo, bajarapasemana Zacarías daxitasemana nanacuenebijitsia templobota.

⁹ Nexata abaxë sacerdotevi petaxuxuabivajënaeya penacuenebijava, pijacujirucuenia exana penayapëtaeponaenexa xua caenë

canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa baja yapétane xua caenë canacujitsia nacuenebijitsia templobota, nexata Zacarías tocopatatsi temploboënëalia petajuitsinexa inciensovënëjava, petuxujuvijava. Bajaraxuata Zacarías joneya temploboyalia petajuitsinexa jane baja inciensovënëjava temploboënëalia.

10 Paepatota Zacarías tajitanuca inciensovënëjava temploboënëalia, jivi ayaibitsaëtoxaneto templobojumavelia vajëcanubena Diosojavabelia.

11 Nexata Zacarías temploboënëalia, altarvënëjava muxuneneta, tsitanaitajëtatsi ángel. Paaltarvënëjavajumata incienso tajuitabiaba Diosonexa, bajarapaaltarvënëjava pecujuanenia pamuxunenejavata, Zacarías taenuta ángel.

12 Nexata Zacarías itsa taenuta ángel, apo yapétae pacuenia exanaejitsia Zacarías. Bitso jamatabëcuenenajunaviaca.

13 Nexata ángel jumaitsi Zacaríasjavabelia:

—Zacarías, pëtsa junavame. Dioso baja cajena cajumetane nevajëtsijava. Nexata nijava Elisabet catonacoxitsiana. Nexënatonëyo baja xainae-name. Vénérubianame bajaraponëyo Juan.

14 Pinijicuenia, jivi ayaibitsaëto yajava, barëyamë tsane bajaraponëyo itsa catonaexanaena.

15 Tsipaji bajaraponëyo ayaijamatabëcuenenë tsane Dioso pitabarata. Apo apae tsane piataneranë. Vinora ata apo apae tsane. Penaexanaejaveliacujinae tsijamatabëvënëcaenatsi Espíritu Santo. Nexata Espíritu Santo pitorobicueniatsi,

exanabiabiana.

¹⁶ Bajaraponë, Juan, Israel nacuapijivi naja-matabëcuenecopatsiaexanaena Diosojavabelia.

¹⁷ Bajayata Diosojumepaebinëmi, profeta Eliaspijnë, ayaijamatabëcuenenëmi, Dioso pesaë yajavaponapona. Espíritu Santo ata pitorobicueniatsi, exanaponapona. Bajara icatsia itsane Juan ata. Bajaraponë pejamatabëcueneta, penacoxxitoyavimi ata, icatsia nacoxiasiva tsane. Bajaraponë pejamatabëcueneta, itsamonaе pijinia pibisia-jamatabëcuene pexainaevi ata, jamatabëcuene xanepanaeyaexanaena pexaniajamatabëcuene pexainaenexa. Bajarapacuenia bajaraponë jivi jamatabëcuene xanepanaeyaexanaena pepo petuxanenë penajetarucaevajënaeya. Nexata bajarapamonae xaniavaetsia copiapitsiana pepo petuxanenë pamatacabí najetarucaena, jai ángel Zacaríasjavabelia.

¹⁸ Zacarías nexata yanijoba ángeljavabelia. Jumaitsi:

—Itsa taxënato xainaejitsianë, ¿detsa peneta pitsicuene taenajë tayapëtaenexa? Tsipaji rabaja xanë perujunënë. Tajava ata baja perujuva, jai Zacarías.

¹⁹ Nexata ángel jumaitsi Zacaríasjavabelia:

—Xanë raja Gabrielnë, Dioso pijajivitonënë. Dioso baja cajena nitoroba tacatsipaebinexa mapapexanialivaisije.

²⁰ Xamë saya nejumeaebame, xaniavaetsia cat-sipaebi atatsi xua pepacuene catocopiajopaejitsia. Nexata baja aeconoxae apo cacaéjëpae tsane

necuaicuajaijava. Matapania jane baja pamat-acabi catocopiajopaena xua yabara najumeca-panepaeya catsipaebatsi, natsipaebianame icat-sia, jai ángel Zacaríasjavabelia.

21 Bajarapaepatota jivi templobo jumavelia evetanubenatsi Zacarías pepitsapaejavarena. Naju-maitsti bajarapamonae:

—¿De meta xuajitsia Zacarías bepija apo pitsapaerena templobovecua? najai bajarapamonae.

22 Itsa jane baja Zacarías pitsaparena templobovecua, apo caëjëpaetsi pecuaicuajaijava. Nexata pamonae evetanubenatsi templobo jumavelia, najumaitsi:

—Zacarías raeta bemajitsinaebota tem-ploboënëlia itsacuene tane, najai.

Nexata Zacarías apo pecaëjëpaexaetsi pecuaicuajaijava, pecobeta tsipaeba besiyanëcuenia jivi peyapëtaeyaxanaenexa.

23 Itsa baja Zacarías vereta penacuenebijava templobota pamatacabibeje itorobatsi penacuenebinexa, naviata baja pijaboyabelia.

24 Bajaraxuacujinae Zacarías pijava, Elisabet, nacoxita jane baja. Nexata bajarapova penacox-itsijava itsa yapëtane, cinco pajuametobejecuenia itsajavabelia pijabovecua apo ponaponae.

25 Elisabet jamatabëjumaitsi:

—Dioso raja taneitaxutotsoniataexae, neyavenona tanacoxitsinexa mapacueniaje. Nexata baja apo auranë tsane tacoxibijava yabara, jamatabëjai Elisabet.

*Pacuenia ángel tajëvelia jumaitsi Maríajavabelia
yabara pelivaisi*

26 Elisabet baja seis pajuametobeje pepuaxainae penacoxitsicujinae, Dioso icatsia itoroba pijaángel Gabriel. Pijaángel itoroba Nazaret tomarabelia, Galilea nacuata peecaetomarabelia. **27** Dioso itoroba ángel petsipaebinexa Maríajavabelia. María abaxë pebi apo pequenetsiataevatsi. Angel pepatsivajënaeya Maríajavabelia, Maríabeje baja cajena Josébeje nabarëcuacuajaibeje penapitsinexabeje. Nacuaevetsinëmi Davidpijinë pemomoxiyajuvënënë José.

28 Angel nexata joneya María peponaponaebo-ta. Angel jumaitsi Maríajavabelia:

—María, cabajacobatsi. Pexaniajamatabëcuenia Dioso pecataeva. Dioso cayajavaponaponaena. Bitsos cayavenonaena xamë daxita nevëna petir-avi matatoxenetsia, jai ángel.

29 Nexata María itsa jumetane bajarapacuenia ángel pejumaitsijavatsi, María jamatabëjumaitsi:

—¿Detsa meta pitsijamatabëcuenie yabara neju-maitsi ángel mapacueniae? jamatabëjai María.

30 Icatsia ángel tajëvelia jumaitsi Maríajavabelia:

—María, pëtsa junavame. Tsipaji raja Dioso pex-aniajamatabëcuenia catane.

31 Xamë raja nacoxtisaname. Cavecuan-naexanaena raja pebinëyo. Bajaraponëyo vënérubianame Jesús.

32 Bajaraponëyo ayajamatabëcuenenë tsane. “Piniji Dioso, athëbëtsia peecaenë, mapexënatoje,” jaitsi tsane jivi. Nexata

vajatuxanenë Dioso nacuaevetsinë exanaenatsi. Pacuenia pijasalinainëmi Davidpijinë bajayata nacuaevetsinëmi, bajara icatsia itsane.

³³ Bajaraponë evetsiana Israel nacuapijivi daxita matacabijavabelianexa, jai ángel tajévelia Maríajavabelia.

³⁴ Nexata María jumaitsi ángeljavabelia:

—¿Detsa pacuenia nacoxitsipajë? Xanë raja tamona apo xainaenë, jai María ángeljavabelia.

³⁵ Angel nexata tajévelia jumaitsi Maríajavabelia:

—Espíritu Santo raja patsianica xamëjavabetsica. Nexata Espíritu Santo Dioso pesaëta caevetsiana. Bajaraxuata panacuetonëyo cavecuanaexanaena, tsatsianatsi Diosonexa. “Dioso ra mapexënatoje,” jaitsi tsane jivi.

³⁶ Nijamonaeva ata Elisabet, perujuva ata, exanaena penacuetonëyo. “Mavecova raja,” jai atatsi jivi, itsiata baja penacoxitsicujinae xaina baja seis pajuametobeje.

³⁷ Dioso raja caëjëpatsi daxitacuene pexanaenexa, jai ángel tajévelia Maríajavabelia.

³⁸ Nexata María jumaitsi ángeljavabelia:

—Xanë raja Dioso pijajivitovanë. Pacuenia nejumaitsimë, bajarapacuenia Dioso xanëjavaberena exanaena, jai María.

Nexata baja María vecuaponatsi ángel.

Pacuenia María sivaxaina Elisabetjavabelia yabara pelivaisi

³⁹ María penacoxitsijavanexa petsipaebicujinaetsi ángel, caematacabibejecujinae, María pona petsutonënacuata peecaetomarabelia. Bajarapatomara eca Judea nacuata.

40 Nexata María joneya Zacarías pijaboyalia. Ba-jacobanuta pijamonaeva Elisabet.

41 María itsa bajacobanuta Elisabet, nexata Elisabet peyacotajinaenacuetoyo tsicotonayucutajarabatsi. Nexata jane baja Elisabet tsijamatabëvënëcätsi Espíritu Santo.

42 Nexata Elisabet Espíritu Santo itorobatsi pini-jijumeta Maríajavabelia pejumaitsinexa mapacueniaje:

—Dioso cajena bitso cayavenona daxita petiriavi matatoxenetsia. Panacuetonëyo ata exanaename, bajarapanacuetonëyo Dioso bitso peyavenonabiabinëtsi tsane.

43 Xamë tajatuxanenë penamë tsane. ¿Detsa xuajitsia beveliajamatabëcueneva atanë, nesivaxainamerë?

44 Itsa nebajacobanutame, tayacotajinaenacuetoyo nayucutajaraba pebarëyaxae.

45 Barëyamë Dioso pecajumaitsicuenia nejumecovënëtsiva. Tsipaji pepacuene catocopiapatsiana daxita pacuenia vajatuxanenë Dioso pitorobinëtsica ángel tajëvelia catsipaeba, jai Elisabet Maríajavabelia.

46 Nexata María jumaitsi Elisabetjavabelia: Tajamatabëéthetojavavetsina jumaitsinë Diosojavabelia: “Ayajamatabëcuenenëmë bitso,” janë.

47 Sivajamatabëcuenebarëyanë Dioso taneca-panepaenënexa.

48 Sivajamatabëcuenebarëyanë. Tsipaji pijajivito-vanë, beveliajamatabëcueneva atanë, Dioso nitapeta. Tatëpaecujinae ata tsane, tavënamuto, pevajënaeyabelia daxitajivi xanë yabara jumai tsabi-

abi tsane: “Dioso bitso peyavenonaevamitsi,” jai tsabiabi tsane.

49 Bajarapacuenia daxitajivi jumai tsabiabi tsane xanë yabara. Tsipaji ayaijamatabëcuenenë Dioso netoexanabiabiana ayaicuene pexanaejavanë. Dioso raja apo pejitsipaenë jivi pibisiacuene pexanaejava.

50 Daxita pamonae Dioso yaiyataena, bajarapamona juya Dioso itaxutotsoniataeyabiabiana.

51 Dioso raja pecaejëpaenëtsi pinijicuene ata pexanaenexa pecobeta. Pamonae jamatabëjumaitsi tsavanapae: “Vaxaitsi cajena ayaijamatabëcuenevitsi,” jamatabëjai tsavanapae, bajarapamona Dioso nacayajatsiaexana baja.

52 Pinijinacuanë pevetsivimi ata, bajarapanacuanë pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana bajarapanacuanë beveliajamatabëcuenevimi ata.

53 Pamonae pijinia bitso piajani, bajarapamona Dioso rajuta pexanianabanijava. Pamonae pijinia bitso pexainaevi mapanacuapijicuene, bajarapamona Dioso apo pejumecovënëtsixae, bajarapamona Dioso apo rajutsi.

54 Dioso yavenona pijajivi, Israel nacuapijivi. Apo nacofënëtsi cajena. Dioso itaxutotsoniataeyabiaba Israel nacuapijivi.

55 Bajarapacuenia Dioso pijajivi itaxutotsoniataeyabiaba daxitamatocabijavabelianexa. Tsipaji baja cajena bajarapacuenia Dioso najumecapanepaeya jumaitsi vajasalinainëmi Abrahampijinëjavabelia, daxita pemomoxijavabelianexa ata pitaxutotsoniataeyabiabijavanexa

yabara,
jai María Elisabetjavabelia.

56 Nexata María acueyabi pajuametobeje naponapona Elisabet pijabota. Bajaraxuacujinae María baja naviata pijaboyabelia.

*Pacuenia Juan naexana jivibautisabinënexa
yabara pelivaisi*

57 Juameto baja ecaica, pajuametota Elisabet penacueto vecuanaexanaejitsatsi. Penacuetonëyo jane baja vecuanaexanatsi.

58 Itsa Elisabet yapëtane Dioso pitaxutotsoniataecuenetsi, bitso Elisabet jamatabëcuenebarëya. Daxita pamonae ata ena imoxoyo, pijabo muxuneneta, bajarapova pijamonaeyajuvënëvi ata, sivajamatabëcuenebarëyatsi.

59 Itsa baja penacuetonëyo caesemana xaineca penaexanaecujinae, Elisabetbeje Zacaríasbeje pexënatonëyo perabëcaucutsiaexanabeje judíovicuenia. Baitsi boupiperabëcaucutsiaexanabeje. Nexata daxita bajarapamonae pata Elisabetbeje Zacaríasbejejavaberena. Bajarajota picani penacuetonëyo tovënérubijitsatsibeje paxa pevënëcuenia paxa picani pevënëxainaenexa.

60 Itsiata Elisabet jumaitsi pamonaejavabelia picani tovënérubijitsatsibeje:

—Jume. Pevënë raja tsane Juan, jai Elisabet bajarapamonaejavabelia.

61 Nexata bajarapamonae jumaitsi:
—¿Detsa xuajitsia jitsipame bajarapavënë?
Itsanë ata cajena nijamonaeyajuvënëñë apo

xainae bajarapavënë, jai bajarapamonaë Elisabetjavabelia.

62 Nexata bajarapamonaë penacuetonëyo jane baja paxa junata. Pecobeta yanijoba pavënë Zacarías jitsipa petovënérubinexatsi.

63 Nexata Zacarías vajëta tablapayo peyaquinaenexa. Nexata yaquinaruta: “Juan rabaja pevënë,” pejaiitane. Nexata daxita bajarapamonaë jamatabëcuenenabenajaca.

64 Bajarajota jemata icatsia Zacarías cuaicuajai baja. Nexata jivi pitabarata Zacarías jumai tsaponae Diosojavabelia:

—Diosomë, ayaijamatabëcuenenëmë bitso, jai tsaponae.

65 Daxita pamonaë bajarapatomarata imoxoyo penaevi, itsa jumetane pacuenia Zacarías Dioso yavenonaponatsi, pinijicuenia jamatabëcuenenabenajaca. Itsamonaë bajarapanacuata petsutonëjava penaevi ata, daxita bajarapamonaë ata, vënëlivaisitane bajarapacuene yabara.

66 Daxita pamonaë jumetane bajarapacuene yabara, apo nacofënëtsi. Jamatabënajinavanapabiaba bajarapacuene. Nexata bajarapamonaë nayanijobabiaba.

—¿De meta jamatabëcuenetsi tsane bajarapanacuetonëyo itsa vitsabiana? najai tsabiabi bajarapamonaë.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonëyo.

Pacuenia Zacarías tajëvelia jumaitsi yabara pelivaisi

67 Zacarías, Juan jivibautisabinënexa paxa, tsijamatabëvënëcatsi Espíritu Santo. Nexata Zacarías Espíritu Santo itorobatsi jivijavabelia pejumaitsinexa mapacueniae:

68 Pexaniajamatabëcuene rajutatsi vaxaitsi pepo vajatuxanenëjavabelia, Israel nacuapijivitsi vajaDiosojavabelia. Tsipaji pijajivitsi nacatoitorobianica vajanacacapanepaenënexa vajaneconiveua.

69 Dioso cajena nacatoitorobianica pinijicuene pexanaejava pecaejëpaenëtsi vajanacacapanepaenexa. Bajaraponë Dioso pijajivitonëmi Davidpijinë pemomoxiyajuvënë tsane.

70 Bajayata Diosojumepaebivimi profetavi, Dioso pitorobicuenatsi pejinavanapaevi, tajëvelia najumecapanepaeya jumaitsi bajaraponë vajanacacapanepaejavanexa yabara.

71 Tajëvelia profetavimi najumecapanepaeya jumaitsi bajaraponë vajanacacapanepaejavanexa vajavajabitsaëvivecua, daxita vajanacaitoyavi atavecua.

72 Dioso nacaitaxutsoniataena pacuenia tajëvelia najumecapanepaeya jumaitsi vajasalinaivimijavabelia. Dioso cajena apo nacofënëtsi pacuenia najumecapanepaeya jumaitsi vajasalinaivimijavabelia.

73 Bajayata copiaya bajarapacuene yabara Dioso najumecapanepaeya jumaitsi vajasalinainëmi Abrahampijinëjavabelia.

74 Dioso baja najumecapanepaeya jumaitsi vajanacacapanepaenexa vajavajabitsaëvecua. Bajarapacuenia Dioso nacacapanepaena ajunavijibia vajatonacuenebavanapaenexa.

75 Nexata bajarapacuenia Dioso itsa tonacuenebavanapaenatsi, jinavanapaenatsi pibisiacuene exanaenejevatsi Dioso pitabarata vajaasaëtsavanapaeepato abaxë mapanacuataje, jai Zacarías jivijavabelia tajëvelia pevajunupae-bijavata Jesús Dioso pitorobijavanexatsitsica vajanacacapanepaenexa.

76 Icatsia Zacarías jumaitsi pexënatonëyojavabelia mapacueniaje:

Taxënatonëyo, xamë yabara itsamonaе jumai tsabiabi tsane: "Mara ponëje pinijiDioso, athëbëtatsia peecaenë, pijaprofetanëje," jai tsabiabi tsane. Xamë raja itsaxuayo pepo petuxanenë najetarucae{jits}ia, pevajënaeya jivi tsipaebanajetarucaename pesivanajamatabëcuene{copats}inexa bajaraponëjavabelia pamatacabì bajaraponë najetarucaena.

77 Tsipaebanajetarucaename jivijavabelia pacuenia Dioso bajarapamonae capanpae{jits}iatsi. Tsi-paji bajarapamonae pibisiacuene pexanaenecon-imì Dioso vecuaajibiaexanaenatsi.

78 Dioso vajanacaitaxutotsoniataexae, nexata nacayapëtaeyaxanaena vajanacacapanepaenënexa athëbëvetsica pepatsijavanexatsica.

79 Nexata bajaraponë jivijavabelia itsa tsipaebanajetarucaena pexaniajailivaisi, jamatabëcueneitayotsiana daxita piaja-matabëcueneitaquirivimi. Baitsi pamonaе picani cujunava petëpaejava, bajaraponë petsipaebilivaisi pejamatabëcuene{ta}, bajara-pamonae yapëtaena jamatabëcuene{pana}eya

pejinavanapaenexa,
jai Zacarías pexénatonëyojavabelia tajévelia peva-
junupaebijavata Jesús jivijavabelia Dioso pejume-
livaisi petsipaebanajetarucaejavanaxa.

⁸⁰ Nexata jane baja xuacujinae Juan
jivibautisabinënexa vitsabananajetaruca. Yajavaa-
jamatabécuenesaë baja cajena tsanajetarucae
Dioso pejumelivaisi yabara. Nexata baja
Juan itsa penaveretsinë, ponapona petusato
nacuata. Matapania itsa taxuxuabijitsia
jivi petsipaebinexa Jesús pelivaisi, naitajéta
jivijavabelia pevénëlivaisitaenexatsi daxita Israel
nacuapijivi.

2

Pacuenia Jesús naexana yabara pelivaisi (Mt 1.18-25)

¹ Imoxoyo baja pevajënae Jesús penaexanae-
javanexa. Nexata bajarapamatacabijava Ro-
manonacua pepo pevetsinë, Augusto, taxuxuaba
pijajivi pitorobijava jivi petonamataëjëtsinexatsi.
Jumaitsi pijajivijavabelia:

—Daxitajivi, pamonae taevetsinacuanëjava jina-
vanapa, panetonamataëjëtsianame, jai.

² Bajarapamatacabi pijinia nacuaevertsinë
Cireniovënëne saicaya itsanacua eveta,
Siriavënëncua.

³ Nexata nacuaevertsinë Augusto pevetsi-
nacuanëjava penaetomaranëta pejinavanapaevi,
apo jinavanapae épijatomaranëjava. Itsamona
najinavanapa itsatomaranëjava. Bajaraxuata
pamonae najinavanapa itsatomaranëjava,

caejivi canacujitsia, pijasalinaivimi pijatomananëjavabelia pona. Bajarapamonaе pona penamataëjëtsinexatsi pijasalinaivimi pijatomananëjava.

⁴ Bajaraxuata José ata barëpona Belén tomarabelia. José barënaropota Nazaret tomarata, Galilea nacuata peecaetomarata. José barëpona Belén tomarabelia, Judea nacuata peecaetomarabelia. Tsipaji baja cajena José pijasalinainëmi, Davidpijinë, bajayata Belén tomarata ponapona.

⁵ José barëpona María, pova pita pijavanexa. Bajarapova yacotapona itsa baja imoxoyo pevajënae penacueto pevecuanaexanaenexatsi.

⁶⁻⁷ Nexata baja itsa patabeje Belén tomarata, ponaponabeje dajubi pevetabiabibota. Tsipaji baja pabota jivi patabiaba, pevajënaebeje baja jivi yavënëca. Nexata apo nayacaëjëpaetsibeje bajarapabota penaecaenexabeje. Bajaraxuata patabeje dajubi pevetabiabibota. Nexata dajubi pevetabiabibota María Jane baja vecuanaexanatsi penacuetonëyo, copiaya penacoxitsinacueto. Barëeca dajubi pevetabiabibota. Jumaquioneta papaëbërëpanaxita. Buateta dajubi pexaejavanexa pemitsaothocabiabimoënëta.

Pacuenia ángelevi patsica Jesús penaexanaelivaisi petsipaebinexa oveja pevetsivijavabeliyabara pelivaisi

⁸ Belén tomarajumlahaverena imoxoyovayafota, oveja pevetsivi evetavanapa. Bajarapamonaе meravi nacobenaevetabiaba pijaovejabitsaëtonë.

⁹ Jemata oveja pevetsivi tsitanaitajëtatsi Dioso pijaángel. Nexata Dioso pijapenivenivenaecotia

oveja pevetsivi matatoyorotsia itayotatsi. Naju-naviaca bajarapamonaes pinijicuenia.

10 Nexata ángel jumaitsi oveja pevetsivijavabelia:

—Pëtsa panajunaviacame. Pexanialivaisi raja pacatocanajetarucatsi pesivabaréyanexa daxitajivi.

11 Ajena rabaja, mapameravitaje, naexana baja daxitajivi pecapanepaenénexa. Naexana Belén tomarata, patomarata bajayata nacuaevetsinémi Davidpijinémi ponapona. Ponë naexana, bajara-ponë pepo petuxanené Cristo, Dioso athëbëvetsica pitorobinétsitsica jivi pecapanepaenexa.

12 Paneyapétaenexa pacuenia pacatsipaebatsi, penacuetonéyo pataeyabuatsianame mapacueniaje. Penacuetonéyo pataeyabuatsianame papaëbërëpanaxita pejumaquionaaenacuetonéyotsi. Boquecaena dajubi pexaejava pemitsaothocabiabimoënëta, jai ángel oveja pevetsivijavabelia.

13 Bajara saya jota jemata oveja pevetsivi tsitanaitajétatsi ayaibitsaëtooxaneto ángelevi, copiaya petsipaebiángelnétsijavata. Bajarapamonaes ángelevi pexaniajamatabëcuene rajuta Diosojavabelia. Penaxëanaejavata ángelevi jumaitsi mapacueniaje:

14 ¡Dioso, athëbëtatsia peecaenë, pinijicue ne rabaja exana! Pamonaes Dioso jumecovënëta, Dioso sivajamatabëcuenebaréyatsi. Daxita bajarapamonaes jamatabëcuenexanepanae ya jinavanapaeyaexanaena Dioso, jai ángelevi penaxëanaejavata.

15 Itsa baja ángelevi naviaba athëbëabetsia, oveja pevetsivi ángelevi pecovëta najumaitsi:

—Ponaliatsi Belén tomarabelia. Taenatsi pecopiapatsijava pacuene yabara vajatuxanenë Dioso pitorobiángelnëtsica nacatsipaeba, najai oveja pevetsivi ángelevi pecovëta.

16 Nexata bajarapamonae bepijiayo ponalia Belén tomarabelia. Pata itsajota Maríabeje Josébeje barëecabeje penacuetonëyo. Penacuetonëyo boqueca dajubi pexaejava pemitsaothocabiabimoënëta. **17** Oveja pevetsivi itsa taeyabuateta penacuetonëyo pacuenia baja cajena ángelnë tsipaebatsi, nexata pona petsipaebaponaenexa daxitajivijava pacuenia bajarapanacuetonëyo taeyabuateta.

18 Nexata daxita pamonae jumetane oveja pevetsivi pepaebilivaisi, jamatabëcuenenabenajaca.

19 María baja cajena pejamatabëëthëtotä yapëtaeponapona daxita bajarapacuene yabara.

20 Oveja baja pevetsivi naviabaponalia. Oveja pevetsivi namutualia jumai tsanajetarubenaë Diosojavabelia:

—Diosomë, bitso ayajamatabëcuenenëmë. Pexaniajamatabëcuene pacarajutatsi patanetoexanaexaemë pexaniacuene, jai tsaponaelia oveja pevetsivi.

Bajarapacuenia jumaitsi tsipaji baja tane daxita pacuenia ángelnë tsipaebatsi.

*Pacuenia Jesúsnëyo caponaliatsi temploboya-
belia yabara pelivaisi*

21 Jesúsnexa penaexanaecujinae, ocho matacabita, perabëcaucutatsi judíovicuenia. Baitsi

boupiperabëcaucutatsi. Vënérubatsinua jane baja pevënë pexainaenexa. Vënérubatsi "Jesús," pejaivënëta. Tcipaji baja cajena abaxë María nacoxitsinejeva Jesúsnexa, tajëvelia ángel jumaitsi Maríjavabelia: "Bajaraponëyo vënérubianame Jesús," jai.

²² Nexata jane baja tocopiajopatsibeje Josébeje Maríabeje pexanaenexabeje pacuenia bajayata Dioso Moiséspijinëta penajumecopatsilivaisi itorobatsi daxita judíovi pexanaenexa penacuetonëyo itsa tonalexanatsi. Nexata Jerusalén tomarabelia barëponabeje penacuetonëyo. Nexata Jerusalén tomarata, templobota, María ofrenda rajuta Diosojavabelia penajamatabëcuene xaniavaetsinexa Diosojavabelia. Rajutabejenua penacuetonëyo Diosojavabelia pijajivitonënexa petonacuenebinexa itsa penaveretsinë.

²³ Bajarapacuenia Josébeje Maríabeje exanabeje tsipaji Dioso Moiséspijinëta penajumecopatsilivaisi jumaitsi: "Penacasabijivibeje pexi itsa xainabeje, nexata copiaya panacuetonëyo xainabeje, totsatsibeje Dioso pijajivitonënexa," jai.

²⁴ Josébeje Maríabeje rajutabeje ofrenda Diosojavabelia pacuenia Dioso Moiséspijinëta penajumecopatsilivaisi itorobatsibeje. Rajutabeje tsiquiriviria ucucutoyobeje. Itsa jume, rajutabeje meta pinijiyoviria ucucutobeje.

²⁵ Bajarapamatacabí ponapona Jerusalén tomarata Simeónvënënë. Bajaraponë jumecovënëtsiaponapona pacuenia Dioso pejumelivaisibaxutota jumaitsi. Nexata bajarapamatacabí Israelnacua eveta Romano nacuaverena ëpepatsivi. Nexata Romano

nacuaverena pepatsivi pevetsixae Israelnacua, bejiobiaexanabiabatsi Israel nacuapijivi. Bajaraxuata Simeón copiaevetaponapona Dioso pejamatabëcueneta petovecuajutsinexatsi Israelnacua pevetsivi. Nexata baja Romano nacuaverena pepatsivi, pevecuapitsapaenexa Israelnacua pevetsicuene. Espíritu Santo yajavaponaponatsi Simeón.

²⁶ Nexata Espíritu Santo pejamatabëcueneta Simeón tajévelia yapëtaeyaexanatsi pacuenia Simeón petëpaevajënae taejitsia Cristo, ponë Dioso athëbëvetsica itorobiapaebica jivi pecapanepaenexa.

²⁷ Nexata Espíritu Santo pejamatabëcueneta Simeón joneyaexanatsi temploboyabelia. Bajaraxuata Simeón tane Mariabeje Josébeje pebarëjonejavatabeje Jesúsnëyo temploboyarena pexanaenexabeje pacuenia Dioso Moisëspijinëta penajumecopatsilivaisi itorobatsibeje.

²⁸ Nexata Simeón isapita Jesúsnëyo. Pexaniajamatabëcuene rajuta Diosojavabelia. Pexaniajamatabëcuene Simeón perajutsijavata Diosojavabelia, Simeón jumaitsi mapacueniaje:

²⁹ Tajatuxanenë, baja rajane netocopatsianame nijajitonënë jamatabëcuenexanepanaeya tatëpaenexa. Tcipaji baja netaeyaexaname pacuenia baja cajena tajévelia najumecapanepaeya nejumaitsimë.

³⁰ Taitaxutota rabaja taniji maponëje, ponë itorobimica jivi pecapanepaenënexa xamëjavabelia.

³¹ Ponë itorobimica jivi pecapanepaenënexa, daxitajivi taenatsi.

³² Maponëje petsipaebilivaisita, pamonae

apo judíovi ata, jamatabëcueneitayotsiana. Yapëtaeyaxanaena pacuenia jamatabëcueneitsimë. Nexata maponëje pejamatabëcueneta apo judíovi yaiyataena nijajivi judíovi, jai Simeón templobota Diosojavabelia pexaniajamatabëcuene perajutsijavata Jesúsnëyo yabara.

33 Nexata Josébeje Maríabeje itsa jumetanebeje bajarapacuenia Simeón pejumaitsijava Jesúsnëyo yabara, jamatabëcuenenabenajacabeje.

34-35 Bajaraxuacujinae Simeón tovajëta Diosojavabelia peyavenonaenexatsibeje Josébeje Maríabeje, Jesúsnëyo yajava. Bajaraxuacujinae Simeón jumaitsi Maríajavabelia:

—Mapanacuetonëyoje, Dioso itapetatsi. Maponëje petsipaebilivaisi jivi ayaubitsaëtoxaneto apo jumecovënëtsi tsanetsi. Nexata jivi ayaubitsaëtoxaneto naxuabiana, Israel nacuapijivi. Ayaubitsaëtoxaneto pijinia jumecovënëtsianatsi. Nexata pijinia ayaubitsaëtoxaneto capanepaena. Maponëje Dioso pesaëta pinijicuene pexanaejava, tsitaexanaena jivi peyapëtaenexa Dioso pitorobinëtsitsica. Maponëje itajëtsiana pacuenia jivi ayaubitsaëtoxaneto, caejivi canacujitsia, bëpënëa pibisiajamatabëcuene najamatabëxainabiaba. Jivi ayaubitsaëtoxaneto apo jumecovënëtsi tsanetsi. Pibisiacuenia saya baranatsipaebianatsi. María, xamë nexata pepo nejamatabëëthëtojavavetsina bitso sivajamatabëcuenebëjamë tsane itsa yapëtaename pacuenia exanaejitsiatsi, jai Simeón Maríajavabelia Jesús yabara tajëvelia pevajunupaebijavata pacuenia Jesús exanaejitsiatsi.

36-37 Bajara pijinia pamatacabí templobota ponapona Diosojumepaebiva profetava, Anavënëva. Bajarapova Fanuelpijinë pexénatoyo, Aserpijinë pemomoxiyajuvënëva. Bajarapova bitso baja perujuva. Ochenta y cuatro baja pavaibeje xaina. Nacasaba picani abaxë itsa pejanava. Penacasabicijinae siete pavaibeje pepuaxainae pamonajavabelia, vecuatépatsi pamona. Itsajavabelia apo vecuaponabiabi templobo. Matacabijebi, meravijebi yajava, Dioso tonacuenebabiba templobota. Itsajavata pexaejava apo xaeyabiabi pamatacabibeje vajécabiaba Diosojavabelia.

38 Nexata bajarapova ata pata itsajota Josébeje Maríabeje nucabeje templobota. Simeón pisanucaejavata Jesúsnëyo, isataenuta bajarapova. Nexata bajarapova pexaniajamatabëcuene rajuta Diosojavabelia Jesúsnëyo yabara. Romano nacuaverena pepatsivi Israelnacula pevetsixae, Israel nacuapijivi copiaevetavanapa Dioso pejamatabëcueneta petovecuajutsinexatsi, nexata baja Romano nacuaverena pepatsivi pevecuapitsapaenexa Israelnacula pevetsicuene. Nexata daxita pamonae copiaevetavanapa Dioso pejamatabëcueneta petovecuajutsinexatsi Israelnacula pevetsivi, daxita bajarapamonaejavabelia, bajarapova tsipaebabiaba Jesúsnëyo pelivaisi.

Pacuenia Jesús ponapona Nazaret tomarata pebarënaviatsicujinaetsi templobojavaverenayabara pelivaisi

39 Josébeje Maríabeje Jerusalén tomarata templobota exanaeveretabeje baja daxita pacuenia Dioso Moiséspijinëta penajumecopatsilivaisi

itorobatsibeje. Nexata baja pijatomarabelia Jesúsnëyo barënaviatabeje, Nazaret tomarabelia, Galilea nacuata peecaetomarabelia.

40 Nexata jane baja Jesúsnëyo vitsaba Nazaret tomarata. Ajamatatabécuenesaë tsaponae Dioso pijacuene yabara. Jamatabécuenevitsabaponanua. Dioso yavenonaponatsi ayaicuenia.

*Pacuenia Jesúsnëyo templobota barëcuaicuajai
judíovi pecujarubivijavabelia yabara pelivaisi*

41 Caevai canacujitsia Josébeje Maríabeje ponabi-ababeje Jerusalén tomarabelia. Ponabiababeje pascuavënëfiesta penataeyabiabinexabeje.

42 Nexata baja Jesúsnëyo doce pavaibeje itsa xaina, barëponabeje icatsia Jerusalén tomarabelia pascuafiesta penataenexa.

43 Itsa baja copiaruca pascuafiesta, daxita baja penataevi bajarapafiesta, naviaba baja pijabonëjavabelia. Nexata Jesúsnëyo nacopatanucalia Jerusalén tomaratalia. Maríabeje Josébeje abaxë apo yapëtaebeje Jesúsnëyo pevecuanacopatsijavatsiliabeje.

44 Jamatabëjumaitsibeje saya:

—Jesúsnëyo raeta nanajetaruca vajanajuapon-aevita, jamatabëjaibeje.

Bajaraxuata caematacabí baja pepuapon-aebeje namutua, itaxanabeje Jesúsnëyo. Nexata yanijobabeje pijamonaejavabelia, peyapëtaevitsibejejavabelia ata.

45 Itsiata apo caxitajarabibeje. Nexata navi-atecabeje Jerusalén tomarabelia pejaitsinexabeje Jesúsnëyo.

46 Acueyabi matacabita caxitajarababeje templobota. Jesúsnëyo naeca judíovi pecujarubivi tuatuajëta. Jumetaeyeca bajarapamonae penabarëcuaicuajailivaisi. Nexata Jesúsnëyo yanijobapona bajarapamonae penabarëcuaicuajailivaisi yabara.

47 Nexata daxita Jesúsnëyo pejumetaeye-naevitsi, taeyena Jesúsnëyo xaniavaetsia pejumeyapëtaejava judíovi pecujarubivi penabarëcuaicuajailivaisi. Taeyenanua xaniavaetsia pejumecanaviataponaejava, abaxë tsiquirinëyovajëto ata. Bajaraxuata jamatabëcuenenabenajaquena bajarapamonae.

48 Josébeje Maríabeje itsa tanebeje bajarajota Jesúsnëyo penaecaejava, nexata jamatabëcuenenabenajacabeje. María nexata jumaitsi:

—Taxënato, ¿detsa xuajitsia panevepénacoparemenabeje? Paxanëbeje pataca-jitarutsijavatabeje, bitso pacaitaxanatsibeje, jai María.

49 Nexata Jesúsnëyo jumaitsi penajavabelia:

—¿Detsa xuajitsia bajarapacuenia panejitarutamebeje? Panejaitsipamebeje raja mapabotaje. Tcipaji raja xanë taxa Dioso pijacuene taexanaenexa mapabotaje, nejamatabëcueneenabiaba, jai Jesúsnëyo.

50 Itsiata bajarapajivibeje apo jumeyapëtaebeje pajamatabëcuene yabara jumaitsi Jesúsnëyo.

51 María baja cajena pejamatabëëthëtota yapëtaeponapona daxita bajarapacuenie yabara. Nexata baja bajarapajivibeje pepëta

Jesúsnëyo napona baja Nazaret tomarabelia. Nazaret tomaraata Jesúsnëyo xaniavaetsia jumecovënëtsiaponapona pacuenia Josébeje Mariabeje itorobabiababeje.

⁵² Jesús abaxë vitsabanajetaruca. Jamatlabécuene vitsabanajetarucanua. Nexata Dioso pexaniajamatabécuenia tanetsi. Daxita pamonae Jesúsnëyo yapëtanetsi, pexaniajamatabécuenia tanetsi.

3

*Pacuenia Juan jivibautisabinë jivi livaisi tispaeba petusato nacuata yabara pelivaisi
(Mt 3.1-12; Mr 1.1-8; Jn 1.19-28)*

¹ Pamatacabí pepo nacuaevertsinë Tiberiovënëna xaina quince pavaibeje pevetsicujinae Romanonacua, bajara pijinia pamatacabí itsanacuanë eveta itsamonae. Bajarapamatacabí nacuaevertsinë Poncio Pilato eveta Judeanacua. Bajara pijinia pamatacabí nacuaevertsinë Herodes eveta Galileanacua. Bajara pijinia pamatacabí Herodes pejuyapijinë, nacuaevertsinë Felipe, eveta Itureanacua, Traconitenacua yajava. Bajara pijinia pamatacabí nacuaevertsinë Lisania eveta Abilinianacua.

² Bajara pijinia pamatacabí Anásbeje Caifásbeje Israel nacuata sacerdotevi pepo penamatacaitorobinëbeje tsaponapona. Bajara pijinia pamatacabí Juan, Zacarías pexénato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi.

3 Nexata Juan jivi tsipaebanajetaruca Dioso pitorobilivaisi daxita Jordánmene imoxoyo penaenacuanéta pejinavanapaevijava. Juan jumai tsanajetarucae jivijavabelia:

—Panajamatabëcuenepënëyorore Diosojavelia. Pacopabare pibisiacuene paneexanabiabijava. Nexata pacabautisabianatsi Dioso papecavecuajibiaexanaenexa pibisiacuene paneexanaeneconimi, jai tsanajetarucae Juan jivijavabelia.

4 Bajarapacuenia Juan jivi itsa tsipaebanajetaruca, copiajopa jane baja pacuenia Diosojumepaebinëmi profeta Isaíspijinë bajayata tajëvelia yaquina Juan yabara. Juan jivibautisabinë Dioso pitorobilivaisi jivijavabelia petsipaebanajetarucaejavnexa yabara, yaquina. Profeta Isaíspijinë peyaquinaelivaisita tajëvelia jumaitsi mapacueniaje:

Tanejumelivaisipaebinë vavajai tsane petusato nacuata. Jumai tsane jivijavabelia: “Jivi baxaneba panamutoverena najetarucaejenisia petuxanenë. Batoroviaexananua namuto.

5 Daxita namutua pafotonë rubena, atsa baothoca penamatajëpaeyaexanaenexa namuto. Daxita petsutonëmi, pinijiibotsutoxanetonëmi ata, banamatajëpaeyaexana. Baroviayaexananua penatxorotsinamutomi ata. Banamatajëpayaexananua namutua pebobe-naemëthëanëmi ata. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya paxamëjavaberena.

6 Nexata daxitanacuanëpijivi yapëtaena Dioso pecapanepaejavnexatsi pijaneconivecua,” jai baja cajena profeta Isaíaspijinë bajayata peyaquinaelivaisita, Dioso pitorobilivaisi, Juan jivi petsipaebanajetarucaejavanaxa yabara.

7 Jivi ayaibitsaëtoxaneto pata Juanjavaberena Juan picani pebautisabinexa bajarapamonae. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacaca-panepaena, jamatabëjai.

Nexata Juan jumaitsi bajarapamonaejavabelia:
—¡Panejamatabëcuenenavëxaniabivi! Pacuenia jomo rëcëpeca itsa tane isoto petajuenajetarucaejava, bajara saya paitsimë. Dioso rabaja papecananeconitsia exanaematacabinexa pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexavecua.

8 Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtsiajinavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia. Jamatabëcuenenavëxaniabiaya pëtsa panajumaitsimë: “Vaxaiti cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi

tsipae papecacapanepaenexa Diosojavabelia. Dioso baja cajena caëjëpatsi jivi pexanaenexa mapaitotonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijavami papecacapanepaenexa Dioso.

⁹ Peubinaenë pexainaenë itsa apo tonacuait-sitsi pexaniacuai, nicata sipalita daxita ponaenë apo tonacuait-sitsi pexaniacuai. Nexata baja pen-catsicujinae, itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana infiernojavabelia papecata-juenexa, Dioso apo panejumecovënëtsivi, jai Juan bajarapamonaejavabelia.

¹⁰ Nexata bajarapamonae jumaitsi Juanjavabelia:

—¿Detsa nexata pacuene paexanaenajë daxita-jivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹¹ Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xainae camisa. Pajivi pexaejava xaina, tsico-betsatsi pajiviyojavabelia apo xainae pexaejava, jai Juan.

¹² Gobierno pejamatabëcuene impuestomatamo pemamatoyanijobabiabivi ata, pata Juanjavaben-ena Juan picani pebautisabinexa bajarapamonae. Nexata bajapamonae ata jumaitsi Juanjavabelia:

—Juan, ¿detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹³ Nexata Juan jumaitsi bajarapamonaejavabelia:

—Itsa pamatamoyanijobabiabame impuestomatamo, pamatamoyanijobabiabare pamatamota papecaitorobivi pacatocopata paneyanijobabiabinexa. Pëtsa matatoxenetsia bajarapamatamovecua yamaxëitojorobiaya payanijobabiabame paxamë saya panepitsinexa bajarapapalata, jai Juan bajarapamonaejavabelia.

¹⁴ Nexata icatsia vajabitsaë ata jumaitsi Juanjavabelia:

—Juan, ¿jica paxanë tsane? ¿Detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai vajabitsaë.

Nexata Juan jumaitsi vajabitsaëjavabelia:

—Pëtsa panejumesaëta itsajivi ata palata payacajérëtame. Pëtsa najumetsënëtsiaya itsajivi ata pananeconitsiaexaname saya palata papecarajutsinexa pecajunavi. Saya pasivabarëyamëre pacueneta pacamatamotapona papecaitorobivi, jai Juan vajabitsaëjavabelia.

¹⁵ Jivi itatsacajinaeya copiaevetavanapa Cristo, ponë Dioso athëbëvetsica itorobijitsia pepatsijavatsica jivi pecapanepaenexa. Nexata bajarapamonae Juan itsa tanetsi, bajarapamonae jamatatabëcuenenavëxaniabiaya jamatabëjumaitsi Juan yabara:

—Baja raeta jane maCristoje, daxitajivi pecapanepaenënexa, jamatabëjai bajarapamonae Juan yabara.

¹⁶ Nexata Juan jumaitsi daxita bajarapamonaejavabelia:

—Xanë raja saya pacabautisabtsi merata. Itsata baitsi jane itsanë tacovëverena najetarucaena. Bajara jane ponë pacatsijamatabëjoneyaexanaena Espíritu Santo, pitarunutsicotia yajava. Xanë raja saya beveliajamatabëcuenenënë bajaraponëvecua. Nexata bajaraponë vecuaauranë pijazapato ata tataxujonotsinexa bepijajivitonëcuenianë.

¹⁷ Arrozzainaenë baja itsa vereta arroz penotsijava, jéaba arroz pejéabijavata ëpexu pepitsinexa. Nexata pijarroz pejéabijavata, tsatapona saicaya ëpexu pesivecua. Ñexata ëpexu xaniavaeteta peetsibojavabelia. Pesi pijinia penetapona vaya-fuabelia petajuitsinexa. Bajara pijinia pacuenia paxamë ata, Dioso pejumecovénëtsivivecua Dioso pacatsatsiana papecaxuabinexa infierno-javabelia panenaxuabinexa baja daxitamatocabijavabelianexa. Pamonae pijinia Dioso pejumecovénëtsivi, Dioso capanepaenatsi pijanacuayabetsia. Pamonae pijinia Dioso apo jumecovénëtsi, Dioso naneconitsiaexanaenatsi daxitamatocabijavabelianexa apo pevereverecaeisotojavabelia, jai Juan daxita bajarapamonaejavabelia.

¹⁸ Bajarapacuenia ayailivaisianëta Juan muxujiobapona jívi. Tsipaebanajetaruca pexanialivaisi pecapanepaelivaisinexatsi Diosojavabelia.

¹⁹ Bajaraxuacujinae icatsia Juan itaveta nacuaevertsinë Herodes. Tsipaji Herodes pejuyapijinë pijava yacajérëta, Herodíasvënëva.

Daxita Herodes pibisiacuene pexanaejavanë ata, itaveta Juan.

20 Itsiata baitsi jane Juan Herodes apo jume-covënëtsitsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinexatsi, penaneconitsivi pejebabiabibota peetsinexatsi.

*Pacuenia Juan bautisaba Jesús yabara pelivaisi
(Mt 3.13-17; Mr 1.9-11)*

21 Juan pevaetabivajënaetsi penaneconitsivi pejebabiabibota peetsinexatsi, jivi bautisabaponapona. Bajarapamatocabi Juan bautisaba Jesús ata. Jesús pebautisabujinaetsi itsa vajëta Diosojavelia, athëbëtatsia itaboxo napatsia.

22 Athëbëvetsica Espíritu Santo naitajëtsiaya Jesús tsimatarunaicatsi beucucuto. Nexata Jesús jumetane athëbëvetsica Dioso pejumaitsijavatsi: "Xamë raja taxënatomë, bitso tacaasivanë. Bitso casivajamatabëcuenebarëyatsi," pejajavatsi.

*Jesucristo pijasalinaivimi pevënëanë yabara pelivaisi
(Mt 1.1-17)*

23 Itsa baja Jesús xaina bejamatabëcuene treinta pavaibeje, taxuxuaba jane baja jivi Dioso pitorobilvaii petsipaebijava. Jivi tanetsi Jesús beJosé pexénato. José paxapijinë pevënë Elí.

24 Elí paxapijinë pevënë Matat. Matat paxapijinë pevënë Leví. Leví paxapijinë pevënë Melqui. Melqui paxapijinë pevënë Jana. Jana paxapijinë pevënë José.

25 José paxapijinë pevënë Matatías. Matatías paxapijinë pevënë Amós. Amós paxapijinë pevënë

Nahum. Nahum paxapijinë pevënë Esli. Esli paxapijinë pevënë Nagai.

²⁶ Nagai paxapijinë pevënë Maat. Maat paxapijinë pevënë Matatías. Matatías paxapijinë pevënë Semei. Semei paxapijinë pevënë Josec. Josec paxapijinë pevënë Judá.

²⁷ Judá paxapijinë pevënë Joanán. Joanán paxapijinë pevënë Resa. Resa paxapijinë pevënë Zorobabel. Zorobabel paxapijinë pevënë Salatiel. Salatiel paxapijinë pevënë Neri.

²⁸ Neri paxapijinë pevënë Melqui. Melqui paxapijinë pevënë Adi. Adi paxapijinë pevënë Cosam. Cosam paxapijinë pevënë Elmadam. Elmadam paxapijinë pevënë Ěr.

²⁹ Ěr paxapijinë pevënë Josué. Josué paxapijinë pevënë Eliezer. Eliezer paxapijinë pevënë Jorim. Jorim paxapijinë pevënë Matat.

³⁰ Matat paxapijinë pevënë Leví. Leví paxapijinë pevënë Simeón. Simeón paxapijinë pevënë Judá. Judá paxapijinë pevënë José. José paxapijinë pevënë Jonam. Jonam paxapijinë pevënë Eliaquim.

³¹ Eliaquim paxapijinë pevënë Melea. Melea paxapijinë pevënë Mena. Mena paxapijinë pevënë Matata. Matata paxapijinë pevënë Natán.

³² Natán paxapijinë pevënë David. David paxapijinë pevënë Isaí. Isaí paxapijinë pevënë Obed. Obed paxapijinë pevënë Booz. Booz paxapijinë pevënë Sala. Sala paxapijinë pevënë Naasón.

³³ Naasón paxapijinë pevënë Aminadab. Aminadab paxapijinë pevënë Admin. Admin paxapijinë pevënë Arni. Arni paxapijinë pevënë Esrom.

Esrom paxapijinë pevënë Fares. Fares paxapijinë pevënë Judá.

³⁴ Judá paxapijinë pevënë Jacob. Jacob paxapijinë pevënë Isaac. Isaac paxapijinë pevënë Abraham. Abraham paxapijinë pevënë Taré. Taré paxapijinë pevënë Nacor.

³⁵ Nacor paxapijinë pevënë Serug. Serug paxapijinë pevënë Ragau. Ragau paxapijinë pevënë Peleg. Peleg paxapijinë pevënë Heber. Heber paxapijinë pevënë Sala.

³⁶ Sala paxapijinë pevënë Cainán. Cainán paxapijinë pevënë Arfaxad. Arfaxad paxapijinë pevënë Sem. Sem paxapijinë pevënë Noé. Noé paxapijinë pevënë Lamec.

³⁷ Lamec paxapijinë pevënë Matusalén. Matusalén paxapijinë pevënë Enoc. Enoc paxapijinë pevënë Jared. Jared paxapijinë pevënë Mahalaleel. Mahalaleel paxapijinë pevënë Cainán.

³⁸ Cainán paxapijinë pevënë Enós. Enós paxapijinë pevënë Set. Set paxapijinë pevënë Adán. Adánpijinë Dioso pexanaenëtsi.

4

*Pacuenia picani Jesús jamatabëcueneëjëbatsi
dovathi yabara pelivaisi
(Mt 4.1-11; Mr 1.12-13)*

¹ Jesús baja naviarena Jordán meneverena Juan pebautisabícu(jina)etsi. Tsijamatabëvënëcatsi bitso Espíritu Santo. Nexata Espíritu Santo ponae(ya)ex-anatsi petusato nacuayabelia.

² Bajarajotalia Jesús ponapona cuarenta pamatacabibeje. Bajara pijinia pamatacabibeje

Jesús pexaejava apo xae. Jesús nexata bitso piajani. Dovathi nexata jamatabëcueneëjëbatsi pibisiacuene picani pexanaenexa.

³ Dovathi jumaitsi Jesúsjavabelia:

—Itsa pepacuene Dioso pexënatomë, itorobare mapaibotoyoje penaexanaenexa panbë, jai dovathi Jesúsjavabelia.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae épexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo pevereverecaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi bepijia daxitanacuanë.

⁶ Nexata icatsia dovathi jumaitsi Jesúsjavabelia:

—Xanë raja carajutsianatsi daxita mapanacuanëje nevetsinexa. Daxita bajarapanacuanëta paitabëcuene taneme, cayajavarajutsianatsi. Nexata bitso nexainaenë tsane nexainaenexa. Daxita tanerajutsijavanëmi, necaëjëpa juya tarajutsinexa pajivijavabelia jamatabërajutajë.

⁷ Ayajamatabëcuenenënë netaeya taitabarata nematabacabëta itsa netonucajunuame, nexata daxita mapanacuanëje nijanacuanë tsane, jai dovathi Jesúsjavabelia.

⁸ Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajécae pematabacabëta caenë, pepo petuxanenë Diosojavabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

⁹ Bajaraxuacujinae abaxë icatsia Jesús barëliatsi dovathi Jerusalén tomarabelia. Jerusalén tomarata barëjunayatsi temploboxaneto matatuyabetsia. Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexénatomë, jirevaremeca irabereca.

¹⁰ Bajarapacuenia jirevaremeca irabereca. Tspaji xamë peitsacueneyaniva pecaevertsínexa, Dioso pejumelivaisibaxutota jumaitsi mapacueniaje:

Dioso itorobianica pijaángelivi pecaevertsínexa.

¹¹ Nexata ángelevi pecobeta cayotsiana pecataxutsaquisyaniva ibotonëjavabelia, jai Dioso pejumelivaisibaxutota xamë pecaevertsínexa ángelevi, jai dovathi Jesúsjavabelia.

¹² Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcueneëjëtsianajë. Nexata natoexanaenajë pacuene bitso netsiayai tatëpaenexa. Itsiata Dioso neyavenonaena tavecuapanepañexa bajaraxua. Nexata bajarapacuenia yapëtaenajë Dioso

taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

¹³ Bajaraxuacujinae itsa baja dovathi daxitacuene Jesús jamatabëcueneëjëbiveretatsi pibisi-acuene picani Jesús pexanaenexa, nexata abaxë yatucopatatsi itsamatacabijavabelia icatsia pejamatabëcueneëjëtsinexatsi.

*Pacuenia Jesús Galilea nacuata taxuxuaba
Dioso pitorobilivaisi jivi petsipaebijava yabara
pelivaisi*

(Mt 4.12-17; Mr 1.14-15)

¹⁴ Jesús baja itsa naviata petusato nacuaverena, Galilea nacuayaberena, Espíritu Santo pesaë yajavaponapona. Nexata daxita Galilea nacuapijivi vënëlivaitsitanetsi Jesús.

¹⁵ Judíovi penacaetuatabiabibonëjava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: “Maponëje bitso ayaijamatabëcuenenë,” jai tsabiabi.

*Pacuenia Jesús naviata pijatomarabelia,
Nazaret tomarabelia, yabara pelivaisi*

(Mt 13.53-58; Mr 6.1-6)

¹⁶ Nexata Jesús naviata pevitsabito-marabelia, Nazaret tomarabelia. Nexata pepatsicujinae Nazaret tomarata, judíovi penacueraevetsimatacabita Jesús najoneya judíovi penacaetuatabiabiboyalia. Tsipaji baja cajena Jesús bajarapacuenia exanabiaba. Nexata judíovi penacaetuatabiabibota Jesús nonotapuna Dioso pejumelivaisibaxuto petsimuxulebinexa daxita bajarajota penaevi pejumetaenexa.

17 Nexata Jesús tsicoberutatsi profeta Isaíspijinë bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajarajota penaevi pejumetaenexa, Jesús tsimuxuleba itsajota bajarapabaxutota tajëvelia Jesús yabara jumaitsi mapacueniae:

18 Dioso pijaEspíritu Santo netsijamatabëeca.

Tsipaji Dioso nitapeta tatsipaebinexa pexanialivaisi pibisiacuene pexanabiabijava bepeyajamatatabëcuenejiobivijavabelia. Nitorobanua tajamatatabëcuenexaniavaetsinexa bajarapamonae pibisiacuene pexanabiabineconi yabara bepeyajamatatabëcuenejiobijavavecua. Nitorobanua tajamatatabëcuenexaniavaetsinexa pamonae piabajamatatabëcueneitaquirivi, pamonae abaxë apo yapëtae pexaniajailivaisi. Nitorobanua tacapanepaenexa pamonae jamatabëcuenebejiobitabiabatsi pijavajabitsaë.

19 Nitorobanua tatsipaebinexa pacuenia baja Dioso najamatatabëcuenevereta pecapanepaenexa pijajivi, pejaiitanejavata tajëvelia Jesús yabara Isaíspijinë peyaquinaebaxutota Jesús tsimuxulebanuca daxita bajarajota penaevi pejumetaenexa.

20 Bajaraxuacujinae Jesús baja bajarapabaxuto baxuacata. Tocanaviata baja judíovi penacaetuatabiabibota penacuenebinëjavabelia. Bajaraxuacujinae Jesús baja icatsia ecareca. Daxita pamonae judíovi penacaetuatabiabibota ena, Jesús asaëyata taeyenatsi.

21 Nexata icatsia Jesús jumaitsi bajarapamonaejavabelia:

—Aeconoxae Dioso pejumelivaisibaxuto pacat-simuxulebiveretatsi. Xua yabara bajarapabaxutota jumaitsi, bajaraxua baja aeconoxae mapamatacabitaje copiapata baja, jai Jesús bajarapamonaejavabelia.

22 Nexata daxitajivi pexaniajamatabëcuenia Jesús yabara cuaicuajai. Jamatabëcuenenabenajaca pexanialivaisi Jesús petsipaebixae. Nexata bajarapamonae Jesús jamatabëcueneabiatanetsi. Nexata bajarapamonae nayanijobena. Najumaitsi:

—¿Matsa baja ponë Josépijinë apo pexënatoje? na-jai tsenae bajarapamonae Jesús yabara.

Tsipaji saya bajarapamonae jamatabëjumai tsenae:

—Josépijinë raja pexënato, jamatabëjai tsenae.

23 Nexata Jesús jamatabëcueneyapëtane pacuenia sivanajamatabëxainatsi bajarapamonae. Nexata Jesús jumaitsi bajarapamonaejavabelia:

—Xaniajanë cajena pacuenia pacatsipaebijitsatsi. Pacuenia pajumaitsimë tsabiabi pajiviyojavabelia pajamatatabëcueneabiataneme, bajara pijinia pacuenia xanëjavaberena ata panejumaitsimë tsane patanejamatabëcueneabiaxaemë. Panejumaitsimë tsane mapacueniaje: “Pacuenia pacavënélivaisitanetsi Dioso pesaéta pinijicuene nexanaejava Capernaum tomarata, bajara icatsia pitsicuene exanare majotaje nevitsabitomarata,” panejamë tsane, jai Jesús judíovi penacaetuabiabibota penaevijavabelia.

24 Icatsia Jesús jumaitsi bajarapamonaejavabelia:

—Xaniajanë cajena pacuenia pacatsipaebijitsatsi. Itsanë ata Diosojumepaebinëmi profetanë pijanacuapijivi apo jumecovënëtsitsi petsipaebilivaisi. Jamatabëcuene aebiataeyabiabatsi pijanacuapijivi.

25 Bajayata profetanëmibeje pinijicuene exanae atabeje, pinijicuene apo exanaebeje pijanacuata. Bajara pijinia pacuenia xanë ata pinijicuene apo exanaenë tsane tavitsabitomarata. Bajayata, abaxë pamatacabí profeta Elíaspijinë ponapona Israel nacuata, bajarapamatacabí, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanëjava bitso janibo. Bajarapamatacabí janibovajënaeya pamonajivi pevecuatëpaevanëtsi ayaibitsaëto jinavanapa Israel nacuata. Bitso bejiobi tsavanapae.

26 Itsiata Elíaspijinë Dioso apo itorobitsi peyavenonaenexa bajarapamonaeyajuvënëva. Elíaspijinë Dioso itorobatsi peponaenexa Sarepta tomarapijivijavabelia, Sarepta tomarata pamona pevecuatëpaevatsi Elíaspijinë peyavenonaenexa. Sareptatomara eca Sidón nacuata.

27 Bajayata, Elíaspijinë pevënamuto, profeta Eliseopijinë ponapona Israel nacuata. Bajayajebi bitso peperabëtsabanaevi, ayaibitsaëto picani jinavanapa Israel nacuata. Itsiata bajarapamatacabí profeta Eliseopijinë caenë ata pijanacuapijинë, bajayajebi bitso peperabëtsabanaeviyajuvënë, apo jamatejemayaexanae. Caenë bajayajebi bitso peperabëtsabanaenë Naamán, Siria nacuaverena pepatsinë, jamatejemayaexana, jai Jesús judíovi

penacaetuatabibota penaevijavabelia.

28 Nexata bajarapamonae itsa jumetane bajarapacuenia Jesús pejumaitsijava, bitso Jesús baraanaepanatsi bajarapamonae.

29 Bajarapamonae nonobapuna. Vaetabatsi Jesús. Caponaliatsi tomarajumabelia. Patsu-toyenepanata eca Nazarettomara, bajarapatsuto-jumabetsia Jesús caponayatsi pexuabinexatsireca picani bajarapatsuto itapajanitojavareca.

30 Itsiata baitsi jane Jesús bajarapamonae tuatua jëta najetarucae ata, pëtaenejevatsi vecuapona baja Capernaum tomarabelia. Nexata baja Jesús vecuapanepa bajarapamonae.

*Pacuenia pebi, dovathi peyajavaponaponaenë,
Jesús jamatejemayaexana yabara pelivaisi
(Mr 1.21-28)*

31 Jesús pata Capernaum tomarata. Capernaum tomara eca Galilea nacuata. Nexata Capernaum tomarata Jesús jivi livaisi tsipaeba judíovi penacueraevetsimatacabita.

32 Itsa bajarapamonae jumetane palivaisi Jesús tsipaeba, jamatabëcuenenabenajaca. Tsipaji xanavaetsia tsipaeba Dioso pitorobinëtsicuenia.

33 Bajarajota judíovi penacaetuatabibota pebi, dovathi peyajavaponaponaenë, naeca. Nexata bajaraponë Jesúsjavabelia vavajai tsaxuabi. Jumaitsi:

34 —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso

pexënatomë, pepo pexaniajamatabëcuenenëmë, jai dovathi peyajavaponaponaenë Jesúsjavabelia.

35 Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

Nexata dovathi pebi xuabatsi irata daxita bajarapamonae pitabarata. Dovathi baja pebi vecuapitsapatsi itsiata itsacuene exanaenejеватси.

36 Nexata daxitajivi bajarapacuene itsa tane, bitso jamatabëcuenenabenajaca. Najumaitsi bajarapamonae:

—¿De meta pacuenia maponë caëjëpatsi pijumeta pexanaenexa mapacueniae? ¡Maponëje Jesús, beDioso pitorobinëtsitsical! ¡Itaveta dovathi pepitsapaenexa jivivecua! ¡Nexata baja dovathi pitsapa jivivecua! najai bajarapamonae.

37 Nexata Jesús vënélivaisitanetsi daxita bajaranacuapijivi.

Pacuenia Simón Pedro pijava pena Jesús tojamatejemayaexana yabara pelivaisi

(Mt 8.14-15; Mr 1.29-31)

38 Judíovi penacaetuatabiabibo pevecuapitsapaecujinae, Jesús joneya Simón Pedro pijaboyalia. Nexata bajarajota Jesús pevajënae, Simón pijava pena bitso romaebanucatsi. Nexata bajarajota itsamonaе Jesús tsipaebärëcëpatsi bajarapova peromaebanucaejavatsi.

39 Jesús nexata cujilia peromaebanucaeavatsi. Vecuaitaveta peromaebijavatsi. Nexata bajarajota peromaebanucaeavatsi domae baja vecuaajibi tsanajetsitsireca. Bajarapova baja jamatejema.

Nexata bajarapova Jesúsbana pexaejavanexa toex-anatsi.

*Pacuenia ayaibitsaëto jivi, piavitanevi, Jesús jamatejemayaexana yabara pelivaisi
(Mt 8.16-17; Mr 1.32-34)*

40 Itsa baja ajena meravitsia, jivi piavitanevi, daxitaviriavitane pexainaevi, tocapatatsi Jesúsjavaberena. Jesús nexata perabëjayatapona caejivi canacujitsia, piavitanevi. Bajarapacuenia Jesús jamatejemayaexana daxita piavitanevi.

41 Itsamonaе ayaibitsaëto, dovathi peyajavajinavanapaevi, Jesús vecuacapitsapaponia. Nexata dovathi itsa pitsapa, vavajai tsabiabi Jesúsjavabelia.

—Xamë raja Dioso pexënatomë, jai tsabiabi.

Nexata Jesús jumeitavetabiaba dovathi. Apo tocopatabiabi pecuaicuajainexa petsipaebiyaniva itsamonaеjavabelia. Tsipaji dovathi xaniavaetsia yapëtanetsi Cristo athëbëvetsica Dioso pitorobijavatsi jivi pecapanepaenexa.

*Pacuenia Dioso pitorobilivaisi Jesús jivi tsipaeba Galilea nacuata yabara pelivaisi
(Mr 1.35-39)*

42 Bajayacunua, ajena baja matacabi tsarucaponae, Jesús pitsapa tomaravecua. Pona pesaicaeyojavabelia. Nexata jivi pëjaitatsi. Yapënapatatsi itsajota Jesús eca. Asivatsi bajarapamonae Jesús pevecuaponaeyaniva itsajavabelia.

43 Nexata Jesús jumaitsi bajarapamonaejavabelia:

—Itsatomaranëjava ata raja tsipaebijitsianë pexanialivaisi pacuenia Dioso evetsijitsia pijajivi mapanacuataje. Bajarapalivaisi tatsipaebinexa jivi, Dioso baja cajena nitoroba, jai Jesús bajarapamonaejavabelia.

⁴⁴ Bajarapacuenia Jesús Judea nacuajava livaisi jivi tsipaebanajetaruca judíovi penacaetuatabiabibonëjava.

5

*Pacuenia dujuai bitso ayaijavaxaneto juta peyamatajucaejavata yabara pelivaisi
(Mt 4.18-22; Mr 1.16-20)*

¹ Itsamatacabí Jesús nuca Genesaret pucaxaneto itapata. Nexata jivi ayaubitsaëtoxaneto cënénaponatsi imoxoyo pejumetaenexatsi Jesús petsipaebilivaisi, Dioso pitorobilivaisi.

² Nexata Jesús anijajerabeje taeruta bajarajota pucaitapata. Bajarapamobeje dujuai peyamatajucaevi Simónbana vecuanonobajunarëcëpa. Nexata bajarajota imoxoyo Simónbana quiatanubena dujuai peyamatajucaejava.

³ Nexata Jesús runareca jera ènëabereca, Simón pijajera ènëabereca. Jesús itoroba Simón jera peyatorotsinexatsilia tsiquirijavayo puca tuatajéyojavabelia. Jesús eca jeraënëta. Nexata Jesús jera ènëjavaverena livaisi tsipaebeca bajarapajivi bitsaëtoxanetojavabelia.

⁴ Itsa baja Jesús copata jivi livaisi petsipaebi-java, nexata jumaitsi Simónjavabelia:

—Pavaeremelia jera piavajubuajavabelia. Pacoparemeca dujuai paneyamatajucaejava. Payamatajutsianame dujuai, jai Jesús Simónjavabelia.

⁵ Nexata Simón jumaitsi Jesúsjavabelia:

—Jesús, payamatajucajé rabaja picani meravijebi. Itsiata apo payamatajutsinë caenëyo ata. Itsiata pacuenia paneitorobame, pacopatsiarecajé dujuai patayamatajucaejava, jai Simón Jesúsjavabelia.

⁶ Nexata copareca pitorobicueniatsi. Itsa jutsina dujuai peyamatajucaejava, ayaijavaxaneto bitso dujuai yajutsina. Nexata dujuai peyamatajucaejava imoxo peyamaëcuucucae.

⁷ Nexata itacovaebarena penajuaya-matajucaevi peponaenexarena itsamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vënëta bajarapamobeje dujuai. Imoxo dujuai peyabubunae bajarapamobeje.

⁸ Nexata Simón Pedro itsa tane bajarapacuene, pematabacabéta tonuca Jesús pitabarata. Jumaitsi Jesúsjavabelia:

—Tajatuxanenë, nevecuanatixire. Tsipaji xanë pibisiacuene taexanaenë, jai Simón Jesúsjavabelia.

⁹ Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vëncuenia Simón jumaitsi tsipaji penajuayamatajucaevi yajava bitso jamatabëcuenenabenajaca, bitso ayaijavaxaneto dujuai peyamatajutsxae.

¹⁰ Ponëbeje Simón yanatatsi, Santiago beje Juanbeje. Bajaraponëbeje Zebedeo pexénatobeje.

Bajaraponëbeje ata jamatabëcuenenabenajacabeje. Nexata Jesús jumaitsi Simónjavabelia:

—Pëtsa najunaviacame. Cacujarubianatsi jivi nejucaenexa. Nexata pacuenia dujuai jucabibame, bajarapacuenia jivi jucaename Dioso pijavinxexa, jai Jesús Simónjavabelia.

¹¹ Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavanapaejavaximi rajuta itsamonaejavabelia. Bajaraxuacujinae pënpona baja Jesús.

*Pacuenia Jesús jamatejemayaexana bajayajebi
bitso peperabëtsabanaenë yabara pelivaisi
(Mt 8.1-4; Mr 1.40-45)*

¹² Jesús itsa ponapona tomarata, nexata bajarajota patajopa pebi, bajayajebi bitso peperabëtsabanaenë. Itsa bajaraponë tane Jesús, pematabacabëta irataeya bocajunua Jesús pitabarata. Vajëta pinijicuenia Jesúsjavabelia. Jumaitsi:

—Tajatuxanenë, cacaëjëpa raja tanejamatejemyayaexanaenexamë mapavitanevecuaje. Itsa jit-sipame, nejamatejemayaexanare mapavitanevecuaje, jai bitso peperabëtsabanaenë Jesúsjavabelia.

¹³ Nexata Jesús pecobeta perabëjayalia bitso peperabëtsabanaenë. Jumaitsi bajaraponëjavabelia:

—Jäjä, jitsipajë cajena. Jamatejemamë rabaja, jai Jesús peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca.

14 Nexata Jesús jumeitaveta bajayajebi bitso peperabëtsabanaenëmi petsipaebiyaniva itsajiviy-ojavabelia ata pacuenia Jesús jamatejemayaexana bajaraponë. Jesús jumaitsi:

—Naitajëremelia Jane sacerdotenëjavabelia, templobota penacuenebinëjavabelia. Nexata sacerdotenë cataena pecavecuaajibijava baja niavitanejavami. Diosonexa rajuremelia ofrenda sacerdotenëjavabelia pecavecuaajibixaë niavitanejavami. Bajara tsipaji pacuenia bajayata vajasalinainëmi Moisëspijinë nacitoroba. Nexata jivi yapëtaena pepacuene baja pecavecuaajibijava niavitanejavami, jai picani Jesús bajayajebi bitso peperabëtsabanaenëmijavabelia jivi ayaubitsaëto pevënélivaisitaeyanivatsi.

15 Itsiata Jesús vënélivaisitanetsi daxita bajarapanacuapijivi. Nexata Jesús jivi itsa vënélivaistanetsi, ayaubitsaëtoxaneto patapona Jesúsjavaberena penamuxunaevetsinexatsi petsipaebilivaisi. Bajarapamonaë pata Jesús pejamatejemayaexanaenexanua piavitanjejavavecua.

16 Itsiata Jesús itsajavata jivivecua natixitabiaba pesaicaeyojavabelia. Bajarajota vajëtabiaba Diosojavabelia.

Pacuenia Jesús jamatejemayaexana petabusipacuenabinëtsiyabara pelivaisi

(Mt 9.1-8; Mr 2.1-12)

17 Itsamatacabí Jesús jivi livaisi tsipaeba. Bajarajota naena fariseovi. Naenanua judíovi pecujarubivi ata. Bajarapamonaë pata Galilea nacuata penaetomaranëjavaverena, Judea nacuata pe-

naetomaranëjavaverena ata, Jerusalén tomaraverena ata. Nexata bajarapamatocabi Jesús Dioso pesaëta caëjëpaeyaexanatsi jivi pejamatejemayaexanaenexa piavitanéjavavecua.

18 Nexata bajarajota Jesúsjavaberena pebijivi camayota yavëtacaraparena petabusipacuenabinëtsi. Bajarapamonae picani bajaraponë boyalia yavëtacarajonejitsialia peyabuatsinexa Jesús pitabarata.

19 Itsiata acuenebi boyalia pecajonejava. Tsipaji bitso jivi bajarapabo yavënëca. Nexata bajarapamonae petabusipacuenabinëtsi bojumabetsia cajunaya. Bomatatujavavetsica vojoexana. Nexata bajarapavojojotsica petabusipacuenabinëtsi camayota yacopatsicatsi jivi tuatuajëatsica Jesús pitabarayatsica. **20** Jesús jamatabëcuneyapëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjajavatsi Jesús jamatabëcuneyapëtane. Bajaraxuata petabusipacuenabinëtsijavabelia Jesús jumaitsi mapacueniaje:

—Pibisiacuene rabaja nexanaeneconimi cavecuaajibiaexanatsi, jai Jesús bajaraponëjavabelia.

21 Nexata judíovi pecujarubivi, fariseovinua, itsa jumetaeyena Jesús pejumaitisijava bajarapacuenia, najamatabëxainena bëpënëa mapacueniaje:

—¿De meta maponëje? Maponëje Dioso apo pejitsipaecuenia cuaicuajai. Itsanë ata cajena apo caëjëpaetsi itsajivi pibisiacuene pexanaeneconimi pevecuaajibiaexanaenexa. Caenë Dioso caëjëpatsi

itsajivi pibisiacuene pexanaeneconimi pevecuaajibiaexanaenexa, jamatabëjai tsenae bajarapamonae bëpënëa Jesús yabara.

22 Nexata Jesús jamatabëcuneyapëtane bajarapamonae bëpënëa pesivanajamatabëxainenaejava bajarapacuenia. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeneconi tavecuaajibiaexanaenexa.

23 Paxamë apo pacacaëjëpae ata itsajivi pibisiacuene pexanaeneconi panevecuaajibiaexanaenexa, pacacaëjëpa picani saya jema panejumaitsinexa pejamatejemavijavabelia mapacueniaje: “Cavecuaajibiaexanatsirabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsinexa. Itsita baitsi jane itsa pepacuene apo pacacaëjëpae panejamatejemayaexanaenexa petabusipacuenabinëtsi, nexata acuenebi panejumaitsinexa bajaraponëjavabelia mapacueniaje: “Nonotapunare. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpaecuene panejamatejemayaexanaenexa bajaraponë, jai nexata Jesús bajarapamonaejavabelia.

24 Icatsia Jesús jumaitsi bajarapamonaejavabelia:

—Xanë, Daxitajivi Pematapijinëñë, mapanacuata necaëjëpa tavecuaajibiaexanaenexa

itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapétanexamë tanecaëjëpaejava tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëje, jai Jesús bajarapamonaejavabelia.

Nexata icatsia Jesús jumaitsi petabusipacuenebinëtsijavabelia:

—Xamë cajumaitsitsi. Nonotapunare. Nijacamayo pire. Nijaboyabelia baja ponare, jai Jesús.

²⁵ Nexata bajarapacuenia Jesús pejumaitisijavata, petabusipacuenebinëmitsi nonatabapuna baja daxitajivi pitabarata. Pebocaecamayo pita. Pona baja pijaboyabelia. Penajetarucaejavata namutua, Diosojavabelia jumai tsanajetarucae: “Diosomë, pexaniacuene netoexaname,” jai tsanajetarucae bajaraponë.

²⁶ Nexata daxita pamonae tane petabusipacuenebinëmitsi baja pejamatejemajava, pinijicuenia jamatabëcuenenabenajaca. Nexata bajarapamonae jumaitsi Diosojavabelia:

—Diosomë, pexaniacuene bitso nexanaenë, jai Diosojavabelia.

Daxitajivi itsa tane bajaraponë pejamatejemajava, pejamatabëcueneta bëpënëa bitso junava. Nexata bajarapamonae najumaitsi:

—Ajena, mapamatacabitaje, tanetsi Dioso pinijicuenepexanaejava, najai bajarapamonae.

*Pacuenia Jesús pijajivitonënexa junata
Levívënënyabara pelivaisi
(Mt 9.9-13; Mr 2.13-17)*

²⁷ Jesús baja vecuapona pabota jamate-jemayaexana petabusipacuenabinëtsi. Nexata Jesús penajetarucaejavata taeyeta Levívënë. Bajaraponë pemamatoyanijobinë impuestomatamo gobierno pejamatabëcuene. Pabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaitsi Levíjavabelia:

—Leví, nepënaponare, jai Jesús.

²⁸ Jejai Leví. Nexata nonotapuna. Copata baja daxita pacuene bajarajota nacuenebabiba. Pënapona Jesús.

²⁹ Bajaraxuacujinae Leví pijabota napata Jesús. Nexata Leví pinijifiesta toexana Jesúsneda. Tsimpaji Leví jamatabëcuenebarëya Jesús pejunatsix-aetsi pijajivitonëneda. Nexata Leví pijabota naena ayaibitsaëto jivijavabelia impuestomatamo pemamatoyanijobivi gobierno pejamatabëcuene. Itsamonaes ata Leví pijabota naena mesa mux-uneneta.

³⁰ Nexata fariseovi, judíovi pecujarubavinua, Leví pijabo jumapënëvelia penubenaevi, jamatabëcuenenavëxaniabiaya baracuaicuajaitsi Jesús pijajivijavabelia. Bajarapamonae Jesús yabara jumaitsi:

—Jesús rabaja nanecónita Diosojavabelia. Tsimpaji gobierno pejamatabëcuene impuestomatamo pemamatoyanijobabiavijavata, piajamatabëcuenebejevijavatanua, naxaeyeca pexaejava, jai bajarapamonae jamatabëcuenenavëxaniabiaya Jesús pijajivijavabelia.

³¹ Jesús itsa jumetane fariseovi, judíovi pecujarubivinua, pebaracuaicuajaijavatsi,

nexata Jesús jumaitsi bajarapamonaejavabelia mapacueniae:

—Pevaëbinë raja apo vaëbi pejamatejemavi. Pevaëbinë raja piavitanevi vaëba.

³² Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava, penajamatabëcuenepënëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëtaponá Diosojavabelia pexaejava apo pexaeyabiabixae yabara pelivaisi

(Mt 9.14-17; Mr 2.18-22)

³³ Fariseovi, judíovi pecujarubivinua, jumaitsi Jesúsjavabelia:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëcapona. ¿Detsa xuajitsia xamë ni jajivi pexaejava xaeyabiaba Diosojavabelia pevajëcaematacabianë ata? jai bajarapamonae.

³⁴ Jesús nexata comparacióncuenia jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë.

³⁵ Itsiata baitsi jane itsa pejananacasabinë tsimaxëpatsipatsi pijavajabitsaë pevecuacopon-aenexatsi itsajavabelia, nexata pecovëta bajarapamonae apo xae tsipae pexaejava. Tsipaji

bitso najamatabëxainaejitsipa. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabí xanë necaponaena bajarapamonaevectua, nexata jane baja bajarapamatocabi pexaejava apo xae tsane bitso tanesivanajamatabëxainaexae, jai Jesús peyanijobivitsijavabelia.

³⁶ Nexata bajarapamonae perujujamatabëcuene baja penavecuacopatsinexa, Jesús livaisi tsipaeba comparacióncuenia, bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijajamatabëcuenebeje pexainaeyaniva, perujujamatabëcuene baja penavecuacopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaitsi bajarapamonaejavabelia mapacueniaje:

—Itsajivi ata apo caucutsi pejananaxatatsijava pejanapana pecatsatarutsinexa perujunaxatatsiesetojavabelia. Itsa caucutsipa pecatsatarutsinexa pejanapana perujunaxatatsiesetojavabelia, nexata bijianaejitsipa pejananaxatatsijava. Apo itajitsipaenua tsipae pejanapana perucaejava perujunaxatatsiesetojavabelia.

³⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tcipaji perujubocodoruanë apo yanayeretsi tsipae xaniavaetsia. Tcipaji pejanavinoranë pejumalitsëxë abaxë xaina. Nexata itsa

yatititibia tsipae, naxuabijitsipa vinoranëmi.

³⁸ Bajaraxuata bepaca pejanavinoranë pejan-abocodoruanëjavabelia.

³⁹ Itsajivi perujuvinora piapaecujinae, apo jitsipae piapaenexa pejanavinora. Tsipaji jamatabëjumaitsi: “Perujuvinora bitso xanepana pejanavinora matatoxenetsia,” jamatabëjai, jai Jesús bajarapamonaejavabelia comparacióncuenia. Bajarapacuenia Jesús jumaitsi comparacióncuenia tsipaji bajarapamonae catsiteca perujujamatabëcuene. Nexata Jesús jitsipa bajarapamonae pejumecovënëtsinexa ëpejanalivaisi, palivaisi Jesús tsipaeba.

6

Pacuenia Jesús pijajivi namutua siricanajetarubena trigoxu judíovi penacueraevetsimatacabita yabara pelivaisi

(Mt 12.1-8; Mr 2.23-28)

¹ Judíovi penacueraevetsimatacabita Jesús, pijajivi yajava, najetaruca namutua trigo pabinëjava. Nexata Jesús pijajivi piajanixae, trigoruanë siricanajetarubena. Xunacobenacaquiatana-jetarubena. Xuxaeyabuatapona.

² Nexata fariseoviyajuvënëvi jumaitsi Jesús pijajivjavabelia:

—Paxamë raja paexaname Dioso Moiséspijinëta penajumecopatsilivaisi vajanacaitavetsicuene. Apo nacaitavetsi ata trigoxu vajaxaeyaniva, itsiata ajena penacueraevetsimatacabixae, apo bepaexanaemë mapacueniaje, jai fariseovi Jesús pijajivjavabelia.

3 Jesús nexata jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapétaenexa pacuenia vajasalinainëmi Davidpijinë, pebarëponaponaevi yajava, exana pamatacabti bitso piajani?

4 Bajaraponë Davidpijinë joneya Dioso pijatemploboyalia. Nexata Dioso pijatemploböönëta, mesajumata bobena Diosonexa ofrendacuenia petojebibanbëanë. Bajarapapanbëanë itsajivi ata apo tocopatsitsi pexaenexa penaneconitsiyativa Diosojavabelia. Ësacerdotevi picani pexaenexa tocopatatsi. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia, jai Jesús fariseovijavabelia.

5 Icatsia pematatsënëa Jesús jumaitsi fariseovijavabelia:

—Xanë, Daxitajivi Pematapijinënë, netoxanepana cajena tatsipaebinexa pacuenie xanepana jivi pexanaenexa penacueraevetsimatacabita ata, jai Jesús.

Pacuenia Jesús jamatejemayaexana pebi pecobetsa quenaenë yabarä pelivaisi

(Mt 12.9-14; Mr 3.1-6)

6 Itsamatacabti Jesús joneya judíovi penacae-tuatabiabiboyalia judíovi penacueraevetsimatacabita. Nexata bajarajota Jesús jivi livaisi tispaeba. Bajarajota pebi pecujuanenia pecobetsa quenaenë naeca.

7 Nexata Jesús naitaxutocaevetenatsi judíovi pecujarubivi, fariseovinua, petaenexatsi Jesús pejamatejemayaexanaejava pecobetsaquenaenë judíovi penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja pibisiacuene exana,” pejainexa bajarapamonae.

8 Nexata Jesús yapétane pacuenia bajarapamona sivanajamatabéxainatsi. Nexata Jesús jumaitsi pecobetsaquenaenëjavabelia:

—Nonotapunare. Nucare majotaje mapamona pitabarataje, jai Jesús.

Nexata pecobetsaquenaenë nonotapuna. Nuca bajarapamona pitabarata.

9 Nexata Jesús jumaitsi penaitaxutocaevetenae-vitsijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús penaitaxutocaevetenae-vitsijavabelia.

10 Jesús matatoyorotsia naëcoba daxita pamona ena bajarajota. Jesús jumaitsi pecobetsaque-naenëjavabelia bajarapamona pitabénejeva:

—Namaxërovire, jai Jesús.

Nexata baja pecobetsaquenaenë namaxërovita. Bajarajota cobexanepananajereca baja. Pecobetsaquenaejavami ajibi.

11 Nexata judíovi pecujarubivi, fariseovinua, itsa tane Jesús pecobexanepanaeyaexanaejava pecobetsaquenaenë, bitso anaepana. Nexata jane baja najumejaita pacuenia Jesús beyaxuabijitsatsi.

*Pacuenia Jesú斯 pijajivi ayaibitsaëtoxaneto yajuvënëvi itapeta saya doce ponëbeje apóstolevinexa yabara pelivaisi
(Mt 10.1-4; Mr 3.13-19)*

¹² Jesú斯 pijajivi ayaibitsaëtoxaneto yajuvënëvi, doce saya ponëbeje, itapeta apóstolevinexa. Jesú斯 pitapetsivajënaeya apóstolevinexa, junaya petsutojumabetsia pevajëtsinexa Diosojavabelia. Nexata Jesú斯 meravijebi bajarapatsutojumatatsia vajëtaponá Diosojavabelia.

¹³ Bajayacunua, ajena baja matacabi tsarucaponae, Jesú斯 junata daxita pijajivibitsaëtoxaneto bajaraponëjavabelia. Nexata bajarajota itapeta pijajivibitsaëtoxaneto yajuvënëvi, doce saya ponëbeje. Bajarapamonae Jesú斯 vénéruba apóstolevi.

¹⁴ Pamonae Jesú斯 itapeta apóstolevinexa mapevënëanëje. Copiaya ponë, pevëñë Simón. Bajaraponë Jesú斯 vénéruba itsavënë, Pedro. Itsanë Andrës, Simón Pedro Jane baja pejuyapijinë. Itsanë Santiago. Itsanë Juan. Itsanë Felipe. Itsanë Bartolomé.

¹⁵ Itsanë Mateo. Itsanë Tomás. Itsanë Santiago, Alfeo pexënato. Itsanë Simón, celotenë.

¹⁶ Itsanë Judas, Santiago pejuyapijinë. Itsanë Judas Iscariote. Bajaraponë bexëajavabelia Jesú斯 canajetsijitsiatsi pijavajabitsaë pecobeyabelia pebeyaxuabinexatsi.

*Pacuenia Jesú斯 jivi ayaibitsaëtoxaneto livaisi tispaeba yabara pelivaisi
(Mt 4.23-25)*

¹⁷ Jesú斯 baja, pijajivi ayaibitsaëtoxaneto yajava, runaica petsutojumavetsica. Nexata

epatua petsutoyenepanajavata, itsajota ira namatajëpa, Jesús yajavanuca pijajivi ayaibitsaëtoxaneto. Bajarajota nexata jivi naacaetuata ayaibitsaëtoxaneto. Bajarapamonae Judea nacuapijivi, itsamonae Jerusalén tomarapijivi, itsamonae Tiro tomarapijivi, itsamonae Sidón tomarapijivi. Tiro tomarabeje Sidón tomarabeje, manuameneitapata ecabeje. Daxita bajarapatomaranëpijivi naacaetuata pejumetaenexa Jesús petsipaebilivaisi. Bajarapamonae patanua Jesús pejamatejemyaexanaenexa piavitanejavavecua.

18 Bajarapamonaeyajuvënëvi itsajamatatabëcuene tsabiabi dovathi pejamatabëcueneta. Bajarapamonaenua Jesús jamatejemayaexana.

19 Daxita pamonae bajarajota naacaetuata, Jesús picani jamatabëjayabatsi. Tsipaji Jesús daxitajivi piavitanejavavecua jamatejemayaexanaponá pecäjëpaejamatabëcuenetatsi.

Pacuenia Jesús pijajivi tsipaeba Jesús pijajivi pejamatabëcuenebarëyajavanexa, apo pejamatabëcuenebarëyajavanexanua, yabara pelivaisi (Mt 5.1-12)

20 Jesús pijajivi naëcota asaëya. Jumaitsi bajaramonaejavelia:

—Panajamatatabëcuenecopabame
Diosojavabelia paneponaenexa Dioso
pijatomarabetsia. Bajaraxuata paxamë bepanejamatatabëcuenejiobivimi panijaneconi yabara,
aeconoxae baja pajamatatabëcuenebarëyamë
Diosojavabelia.

21 'Pajitsipame Dioso pijacuene. Pajamatabëcuenebarëyamë baja. Tsipaji Dioso athëbëtatsia pacarajutsiana daxitacuene xua panamatavenoname.

'Paneyanuevimi pibisiacuene paneexanaeneconi yabara, pacavecuajibiaexana baja bajarapanaconi. Bajaraxuata itsamatacabipajamatabëcuenebarëyamë tsane.

22 'Xanë, Daxitajivi Pematapijinënë, patajajivixaemë, itsa pacaitoya tsane jivi, itsiata pasivajamatabëcuenebarëyamë tsane. Bajarapamonae pacanavecuaítavetsi ata tsane, itsiata pasivajamatabëcuenebarëyamë tsane. Pibisiacuenia pacabijatae ata tsane, pibisiacuenia pacabaracuaicuajai ata tsane, itsiata pasivajamatabëcuenebarëyamë tsane.

23 Bajarapacuenia pacalexanae ata tsane, itsiata pasivajamatabëcuenebarëyamë tsane. Tsipajiraja Dioso athëbëtatsia pacarajutsiana bitso pexaniacuene jivi papecaitoyajamatabëcuene. Pamona pacaitoya tsane, bajarapamonae pijasalinaivimi bajayata itoya Diosojumepaebivimi profetavi. Nexata bajarapamonae pijasalinaivimi bajayata beiobiaexanapona Diosojumepaebivimi profetavi. Bajarapamonae aeconoxae ata pijasalinaivimi cuenejëpavanapa. Bajaraxuata paxamë ata icatsia bajarapamonae pacaitoya tsane pijasalinaivimi pecuenejëpavanapaexae.

24 'Daxitacuene mapanacuata panexainaevi, Dioso bitso ayaicuenia pacabejiobiaexanaena. Tsipaji pacabarëyamë tsavanapae ëpanexainaeva mapanacuataje.

25 'Bitso bepajamatabëcuenejiobimë tsane daxitacuene mapanacuata panenatojitsipaecuene panexainaevi. Pasivajamatabëcuenebarëyamë picani tsavanapae panexaina/java. Itsita baitsi jane itsamatocabi itsa patëpaename, panetëpaecujinae panajamatabëxainaename ayacuenia.

'Bepajamatabëcuenejiobimë tsane panejéajéajaitsabiabivi sivabarëyaya mapanacuapijicueneje. Paneasaëtsavanapaeepato abaxë mapanacuataje panesivajamatabëcuenebarëya tsabiabixae bajarapacuene, panetëpaecujinae bitso payanuename pibisiacuene paneexanaeneconi.

26 'Mapanacuapijivi pexaniacuenia pacabaracuaicuajai tsabiabi saicayacuenia Dioso pejumelivaisivecua panetsipaebabibabixae. Itsita baitsi jane pamatacabì Dioso pacananeconitsiaexanaena, bitso bepajamatabëcuenejiobimë tsane. Tsipaji pacuenejépame bajayata pamonaemi jinavanapa. Bajarapamonaemi bajayata jivi tsipaebabiba saicayacuenia Dioso pejumelivaisivecua. Nexata bajarapamonaemi pexaniacuenia baracuaicuajaitsi tsabiabi mapanacuapijivije, jai Jesús pijajivi ayaubitsaëtoxanetojavabelia.

*Pacuenia Jesús pijajivi muxujioba piasivanexa pitoyavi atatsiyabara pelivaisi
(Mt 5.38-48; 7.12)*

27 Icatsia Jesús jumaitsi petsutoyenepanajavata pijajivi ayaubitsaëtoxanetojavabelia:

—Pacatsipaebijitsiatsi icatsia patanenamux-unaevetsivimë. Pasivamëre papecaitoyavi ata. Pexaniacuene patoexanare pamonae pacaitoya.

²⁸ Payavenonare pamonae pacabijatane pibisi-acuenia. Pamonae pacabaracuaicuajai pibisi-acuenia, patovajëre Diosojavabelia peyavenon-aenexatsi.

²⁹ Itsajivi itsa pacaitabarapacabiaxuaba anaeya, nexata icatsia itsanenia ata patonaitabaracaevere papecaitabarapacabi-axuabinexa. Itsajivi itsa pacayacajérëta panijacamisajumavelia panenaxatatsijava, nexata patocopare panijacamisa ata papecayacajérëtsinexa.

³⁰ Pajivi itsacuenejavayo amoneya pacavajëta, parajure. Itsajivi itsa pacayacajérëta itsacuenejavayo, pëtsa payanijobame papecatocanaviatsinexa.

³¹ Xua pexaniacuene, paxamë pajitsipame itsamonaes papecatoexanaenexa, copiaya paxamë bajarapapexaniacuene patoexanare bajarapamonaejavabelia, jai Jesús pijajivi ayaubitsaëtoxanetojavabelia.

³² Icatsia Jesús jumaitsi pijajivijavabelia:

—Itsa pasivamë tsipae ëpapecasivavi, nexata pexaniacuene apo paxainaemë tsipae Diosojavabelia. Tsipaji piajamatabëcuenebejevi ata, pamonae asivatsi, banamataenetsianasiva.

³³ Pexaniacuene itsa patoexanaejitsipame pexaniacuene ëpapecatoexanaevijavabelia, nexata apo paxainaemë tsipae pexaniacuene Diosojavabelia. Tsipaji piajamatabëcuenebejevi ata, pexaniacuene batoexana penajamatabëcuenejëpaevijavabelia.

34 Itsa patsicopatsipame ëpanejamatabëcuene yapëtaevijavabelia baja, papecatocanaviatsinexa pacuenia patsicopatame, nexata apo paxainaemë tsipae pexaniacuene Diosojavabelia. Tsipaji piajamatabëcuenebejevi ata, batsicopata penajamatabëcuenejëpaevijavabelia, pamonae jamatatabëcuneyapëtane baja petocanaviatsinexatsi.

35 Nexata pasivamëre panijavajabitsaë ata. Bajarapamonaejavabelia pexaniacuene patoexanare. Bajarapamonae patsicopare panajamatabëxainaenejevamë papecatocanaviatsinexa panetsicopatsicuenia. Bajarapacuenia bitso paxainaename pexaniacuene Diosojavabelia papecarajutsinexa athëbëtatsia. Bajarapacuenia itsa paexananavanapaename, Dioso, athëbëtatsia peecaenë, pexicuenia pacaexanaena. Tsipaji Dioso pitaxutotsoniataenë piajamatabëcuenebejevi ata. Itsamonaes Dioso yavenonae atatsi, itsiata apo canaëjëtsi Dioso peyavenonaejavatsi. Bajarapamonae apo canaëjëtsi ata Dioso peyavenonaejavatsi, itsiata tsiteca Dioso itaxutotsoniataeyabiaba.

36 Pacuenia Dioso daxitajivi itaxutotsoniataeyabiaba, bajarapacuenia paxamë ata itsamonaes ata paitaxutotsoniataename, jai Jesús pijajivi ayaibitsaëtoxanetojavabelia.

*Pacuenia Jesús pijajivi muxujioba pitaxutotsoniataenexa itsamonaes ata, pacuenia bajarapamonae ata Dioso itaxutotsoniatanetsi, yabara pelvaisi
(Mt 7.1-5)*

37 Icatsia Jesús jumaitsi pijajivi ayaibitsaëtoxanetojavabelia petsutoyenepanajavata:

—Pëtsa panataneme pepacuene bepananeconijibivi. Nexata itsamona pibisiacuene pexanaejava xaniavaetsia payapëtaenejevamë, pëtsa pabaracuaicuajamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Nexata paxamë ata juya bajarapacuenia itsamona apo pacabaracuaicuajai tsane pibisiacuene paneexanaejava yabara. Itsamona pibisiacuene pacaexanae ata, pajamatabëcuenecaevare. Pabarajamatabëcuenexanepanarenua. Nexata pijinia Dioso pitabarata pibisiacuene paneexanaejava Dioso jamatabëcuenecaeviana. Pacabarajamatabëcuenexanepanaenanua.

38 Parajutaponare itsamona/javabelia penamatavenonaejavaxi. Nexata juya paxamë Dioso pacarajutaponaena pacuenia jitsipa papecarajutsinexa. Pacarajutsiana xuavajéto itsamona parajutame matatoxenetsia, jai Jesús daxitajivjavabelia petsutoyenepanajavata.

39 Jesús icatsia comparacióncuenia tsipaeba bajarapamonaejavabelia mapalivaisije:

—Ponë bitso itaxutotsécëna, apo caëjëpaetsi pematacaponaenexa itsanë, ponë pijinia bitso itaxutotsécëna. Itsa matacaponaejitsipa, nexata najuajopaejitsiparecabeje bajaraponëbeje caemëthëxanetojavareca.

40 Itsajivi pijinia itsa nacujaruba, yapëtae ata baja penacujarubijava, apo jamatabëcuenematatoxenetsi pecujarubinëtsi. Itsa baja penacujarubijivi vereta xaniavaetsia penacujarubijava, nexata saya

najamatabëcuenejëpabeje pecujarubinëtsibeje, jai Jesús pijajivijavabelia.

41 Jesús pijajiviyajuvënëvi pepacuene bepianeconijibivi natane. Nexata itsa cujurutane itsamonaе itsacuenejavayo pexanaejava, jumai tsabiabi: “Mapitsicuene pexanaeovi Dioso bitso ayaicuenia naneconitsaexanaenatsi,” jai tsabiabi. Nexata bajarapacuena pejumaitsabiabixae, Jesús pijajivi piurabinexa jumaitsi mapacueniaje:

—Pëtsa paxamë pepacuene bepaneaneconi-jibivi nataeya pamuxujiobame itsajivi pijaneconi yabara. Tsipaji raja apo payapëtaemë paxamë ata pijinia paneconivajëto paxainame.

42 Nexata paxamë ata ayaineconixaneto itsa paxainame, nexata itsanëjavabelia apo bepajumaitsimë: “Tajabananë, papibisiacuene exaname, copare,” apo bepajamë. Yamaxëitojorobiaya saya bepexaniajamatabëcuenevi nataeya pacuaicuajamë tsabiabi. Itsamonaе pijaneconi yabara pabaracuaicuajamë tsabiabi. Itsita pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonaе ata pibisiacuene pexanaejava penavecuacopatsinexa, jai Jesús pijajivijavabelia.

Pacuenia peubinaenë itsa nacuaita, nayapëtane pavirianaecuene yabara pelivaisi

(Mt 7.17-20; 12.34-35)

43 Icatsia Jesús jumaitsi pijajivi ayaibitsaëtojanetojavabelia petsutoyenepanajavata:

—Pexaniavirianaenë itsa ubatsi, nacuaita pijinia pexaniacuai. Apo nacuaitsi pibisiacuai. Ponae pijinia pibisianaæ, apo nacuaitsi pexaniacuai.

44 Caevirianaæ canacujitsia yapëtanetsi itsa nacuaita. Higovënecuaito apo paucutsimë cucunanaeta. Uvaru pijinia apo paucutsimë saya pejuviënëbotota.

45 Bajara pijinia itsi jivi ata. Pexaniamatabécuenenë pexaniacuene yabara cuaicuajai. Tsipaji pexaniajamatabécueñe xaina pejamatabëëthétota. Pibisiajamatabécuenenë pijinia pibisiacuene yabara cuaicuajai. Tsipaji pibisiajamatabécueñe najamatabëxaina pejamatabëëthétota. Nexata pacuene yabara pebi pecuaibovojotota cuaicuajai, bajarapacuene pitsapa pejamatabëëthëtojavavetsina, jai Jesús pijajivijavabelia.

*Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi
(Mt 7.24-27)*

46 Icatsia Jesús jumaitsi pijajivi ayaibit-saëtoxanetojavabelia petsutoyenepanajavata:

—¿Detsa xuajitsia: “Tajatuxanenë,” panejamë tsabiabi ata, itsiata apo panejumecovënëtsimë pat-acaitorobicuenia?

47-48 Pajivi xanëjavaberena pata tanenamuxunaevetsinexa, tanejumecovënëtsinexanua, bajarapajivi apo nacueratsi tsane. Bajarapajivi pitatajairata bo bepexanaenë tsane. Bajarapajivi yabara pacatsipaebianatsi. Bo pexanaenënexa,

peyapëtaexae itsajota pijabo exanaejitsia pebubutsijavanexa, nexata naesituru atajaya xaniavaetsia mëthëca piatajairata. Nexata pijabo toyabubutsi ata, petojopaeyanivatsi. Bajaraxuacujinae bo baja vereteta. Itsa baja mene avajubuatsica, pijabo toyabubutatsi. Mera asaëtsica bojavabetsica. Itsiata pijabo apo tonanequetsitsi. Tspajji naesituru xaniavaetsia mëthëca piatajairata. Nexata bajaraponë apo nacueratsi bo pexanaejava.

⁴⁹ Pajivi nejumetae ata tsane tatsipaebilivaisi, itsiata itsa apo nejumecovënëtsi tsane tatsipaebilivaisi, nacueratsiana. Bajarapajivi tajetabota bo beplexanaenë tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava. Tspajji bo peveretetsicujinae, mene avajubuatsica. Nexata pijabo toyabubutatsi. Bo nexata jopaica. Pepacuene baja nexata abeje, jai Jesús pijajivijavabelia.

7

Pacuenia vajabitsaë pijacapitán pijabota petonacuenebaponaponaenëtsi, Jesús tojamatejemayaexanayabara pelivaisi

(Mt 8.5-13)

¹ Jesús baja itsa najumevereta pijajivi ayaubitsaëtoxaneto livaisi petsipaebijava petsutoyenepanajavata, poná baja Jesús Capernaum tomarabelia.

² Capernaum tomaraata ponapona Romano nacuapijinë, vajabitsaë pijacapitán. Bajaraponë

pijajivitonë, bitso piasivanë, toavitanetsi. Totëpaejitsiatsi baja.

³ Bajaraponë capitán vënélivaisitanetsi Jesús pejamatejemayaexanaponaejava piavitanevi. Nexata capitán jumaitsi judíovi pijaancianovijavelia:

—Panetojunaremelia Jesús. Pabarëpatsiaremema tajaboyeraberena tanetojamatejemayaexanaenexa tajajivitonë, jai capitán judíovi pijaancianovijavelia.

⁴ Nexata bajarapamonaе pona Jesúsjavabelia. Itsa pata Jesúsjavabelia, pinijicuenia junata. Jumaitsi Jesúsjavabelia:

—Bajaraponë capitán bitso pexaniajamatabëcuenenë. Nexata tojamatejemayaexanaename piwijitonë.

⁵ Tsipaji raja bajaraponë nacaasiva vaxaitsi judíovtsi. Matamota cajena pijapalatata vajanacatoexanetsinexa vajanacaetuatabibonexa, jai judíovi pijaancianovi Jesúsjavabelia.

⁶ Nexata Jesús nalia bajarapamonaе pepëta. Itsa baja imoxoyotanajetarubena capitán pijabo, nexata capitán icatsia peyapëtaevitsi itoroba Jesús pemataenenaenexatsi. Capitán peyapëtaevitsi itoroba Jesúsjavabelia pejumaitsinexa mapacueniaje:

—Petuxanenë, pëtsa paremena tajaboyeraberena. Apo caquenetsiataejitsipaetsi. Beveliajamatabëcuenenënë raja saya xanë xamëvecua. Nexata apo xanepanaе tsipae nenajonejava tajaboyeraberena.

⁷ Apo nejamatabëcuenecaëjëpaenua taponaejava xamëjavabelia ata. Saya bajaraverena itorobare

ënijume. Nexata tajajivitonë netojamatejema tsane.

⁸ Xanë ata xainajë taneitorobabiabivi taneitorobicuenia tajumecovënëtabiabinexa. Xanë ata juya xainajë vajabitsaë, tajajivi, taitorobicuenia tanetoexanabiabinexa. Nexata itsa itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa maberenaaje, bajaraponë patabiabarena. Itsa itorobajë tajajivitonë tanetoexanaenexa itsacuenejavayo, nexata netoexanabiaba. Bajara pijinia pacuenia xamë ata nexanaenexa, cacaëjëpa. Nexata saya bajaraverena ënijume itorobare saya ënijumeta tajajivitonë tanetojamatejemayaexanaenexamë, jai capitán mapacueniaje petonajumeitorobiame Jesúsjavabelia.

⁹ Jesús itsa jumetane bajarapacuenia capitán petonajumeitorobiujumetsi, jamatatabécuenenabenajaca capitán petonajumeitorobiujumetsi yabara. Nexata napënëyorotaxuaba Jesús. Jumaitsi pepénanajetarubenaevitsijavabelia:

—Xaniajanë pacuenia pacatsipaebijitsiatsi. Caeto ata cajena Israel nacuapijinë apo caxitajarabaxuabinë xanëjavaberena bitsotanesivanajamatatabécuenecopatsinë pacuenia mapacapitán nesivajamatatabécuenecopatsiaya jumaitsije, jai Jesús capitán yabara.

¹⁰ Nexata baja pamonae capitán itorobalia Jesús petsipaebinexatsi capitán penajumeitorobilivaisi, naviabarena baja capitán pijaboyerena. Itsa baja pata boyaberena, caxitajaraba baja capitán pijajivitonë pejamatejemanë.

*Pacuenia pamona pevecuatëpaevatsi pexënato
Jesús toasaëyaexana, petëpaenëmi, yabara pelivaisi*

11 Jesús pona Naín tomarabelia. Nexata yanatatsi pijajivi, itsamonaе yajava, ayaibitsaëtoxaneto.

12 Itsa baja Jesús patanajetaruca Naín tomara imoxoyojavata, nexata camataenenatsi petëpaenë pecanajetarubenaevi. Bajarapamonaе petëpaenë tomaravelia capitsapa peméthëtsinexa tomarapënëyabelia. Ponë tēpa, bajaraponëmi pamona pevecuatëpaevatsi pexënato, pepo cainë. Nexata pamona pevecuatëpaevatsi pexënato, petëpaenë, itsa caponaliatsi peméthëtsinexatsi, tomaraverena jivi ayaibitsaëtoxaneto pënaponatsi.

13 Nexata Jesús itsa tane bajarapova, tsitabejio-bitsi bitso. Nexata Jesús jumaitsi bajarapovajabelia:

—Matanueyabijitsipame, jai Jesús.

14 Nexata Jesús cujitalbia petëpaenë peyacajoniacanajetarubenaevi. Pecobeta jayata cajoni. Nexata petëpaenë peyacajoniacanajetarubenaevi, nubenaothopa. Nexata Jesús jumaitsi petëpaenëjavabelia:

—Pevëjëato, xanë raja cajumaitsitsi. Namata-core, jai Jesús.

15 Nexata baja petëpaenëmi namatacota. Cuaicuajai. Jesús baja tocanaviata piasaënë penajavabelia.

16 Nexata daxita petaevitsi ja-matabëcuenenabenajaca. Najumaitsi bajarapamonaе:

—Dioso bitso ayaijamatabëcuenenë. Pinijiamatabëcuene pexainaenë, profeta, nacatsitanajamatabëcueneitajëta. Dioso pinijicuene pexanaejava ata nacatsitajëta vajataenexa, najai bajarapomonae Jesús yabara.

¹⁷ Daxita Judea nacuapijivi, imoxoyo nacuanëjava ata pejinavanapaevi, Jesús vënëlivaisitanetsi xua exana.

*Pacuenia Juan jivibautisabinë itoroba pijajivitonëbeje Jesúsjavabelia yabara pelivaisi
(Mt 11.2-19)*

¹⁸ Juan jivibautisabinë naneconitsia ponapona penaneconitsivi pejebabibota. Nexata pijajivi tsipaebatsi daxita Jesús pexanaponaejava yabara. Nexata Juan junata anijanëbeje pijajivitonëbeje pitorobinexa Jesúsjavabelia.

¹⁹ Juan pitorobivajënae pijajivitonëbeje, jumaitsi bajaraponëbejejavabelia:

—Pajumaitsimëbeje tsane Jesúsjavabelia: “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë athëbëvetsica Dioso pitorobinexatsicatsi jivi pecapanepaenexa?” jai raja Juan,” pajamëbeje tsane Jesúsjavabelia, jai Juan pijajivitonëbejejavabelia.

²⁰ Nexata Juan pijajivitonëbeje itsa patabeje Jesúsjavabelia, Juan pijajivitonëbeje jumaitsibeje Jesúsjavabelia:

—Juan raja jivibautisabinë paneitorababeje patacayanijobinexabeje. “¿Xamë

tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsijavanexatsica?" jai raja Juan, jaibeje jane baja Jesúsjavelia.

²¹ Nexata bajaraponëbeje pitabëta Jesús jamate-jemayaexanapona ayaibitsaëtoxaneto piavitanevi. Dovathi peyajavajinavanapaevi ata vecuacapitsapa dovathi. Itaxutoxanepanaeyaexananua pamonae bitso itaxutotsëcëna.

²² Nexata Jesús jumaitsi Juan pijajivitonëbejejavabelia:

—Paponarebeje baja. Patsipaebianamebeje Juanjavabelia pacuenia baja patanemebeje taexanaponaejava. Patsipaebianamebejenua pacuenia baja pajumetanemebeje tatsipaebilivaisi jivijavabelia. Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaelvainua vecuaajibiaexanaponaëjë baja. Bitso pemuxusipanaevinua jumetaeyaexanaponaëjë baja xaniavaetsia pejumetaenexa. Petëpaevimi ata icatsia asaëyaexanaponaëjë. Pexanialivaisinua pecapanepaelvainexatsi pibisiacuene pexanaeneconimivecua, tsipae-baponajë bepejiobivijavabelia. Daxita bajaraxua taexanaponaejava patanetaejavamëbeje, patsipaebianamebeje Juanjavabelia.

²³ Pajumaitsimëbejenua tsane Juanjavabelia: "Jesús raja jumaitsi: 'Jamatabëcuenebarëya pajivi tsiteca nejumecovënëta xanë Dioso

pexënatocuenenë' jai raja Jesús," pajamëbeje tsane Juanjavabelia, jai Jesús Juan pijajivitonëbejejavabelia.

24 Itsa baja Juan pijajivitonëbeje naviatabeje, nexata bajaraponëbeje pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia:

—Itsa paponame petusato nacuayabelia pamatacabi Juan ponapona petusato nacuata, ¿detsa pitsicuene pajamatabënaponaremilia panetaenexa bajarajotalia? ¿Paponaremilia tsaja saya panetaenexa musuli penajëabijava jovibota?

25 Itsa apo paponaemëlia panetaenexa musuli penajëabijava jovibota, ¿detsa nexata pitsicuene panetaenexa paponaremilia? ¿Paponaremilia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueneje. Pamonae naitabëtsiaya pexaniajava naxatababiaba, pamonae ata nabanebiaba pexanianabanijavanë, bajarapamonae jinavanapa nacuanë pevetsivi pijabonëjava.

26 ¿Detsa nexata xua pajamatabënaponaremilia panetaenexa petusato nacuayabelia? Paponaremilia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja pepo profetanë, Diosojumepaebinë, pataneme. Nexata saya bevelia profetanë apo pataemë.

27 Juan pexanaejavanexa, bajayata tajëvelia Dioso pejumelivaisibaxutota vajunupaeba.

Dioso tanejumaitsijava ata xanëjavaberena, Dioso pejumelivaisibaxutota jumaitsi mapacueniaje: Itorobianajë nevajënaeyabelia tanejumelivaisipaebinënexa jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota athëbëvetsica tapatsivajënaeyatsica Juan tanelivaisi paebanajetarucaejavanexa yabara.

28 Juan ayajamatabëcuenenë mapanacuataje. Nexata bajayata Juan pevajënaeya paprofetavimi jinavanapa, itsanë ata Juan apo jamatabëcuenemataxenetsitsi. Itsiata baitsi jane pajivi beveliajamatabëcuenejivi ata, itsa najamatabëcopata baja Diosojavabelia pijatuxanenë pexanaenexa, bajarapajivi juya Dioso ayajamatabëcuenejivi exanaenatsi Juan matatoxenetsia, jai Jesús Juan jivibautisabinë yabara.

29 Juan vënëlivaisitanetsi daxitajivi. Impuestomatamo pemamatoyanijobivi ata gobierno pejamatabëcuene, vënëlivaisitanetsi. Bajarapamonae jumecovënëta palivaisi Dioso najumecopata Juanjavabelia. Nexata Juan bautisaba bajarapamonae.

30 Itsiata fariseovi, judíovi pecujarubivinua, namuxujemata bajarapalivaisi. Nexata picani pacuenia Dioso tojitsipatsi bajarapamonae pexanaenexa, apo exanae. Nexata Juan apo bautisabi bajarapamonae.

31 Jesús icatsia jumaitsi jivijavabelia:
—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë

pajamatabëcueneitsimë tsavanapae? Jumaitsinë meta tsane paxamë yabara mapacueniaje:

³² “Bajarapamonae abaxë saya bepejvaxijivixi, pajivixi tomara tuatuajéjava banamuxusitenavanapa. Pejvaxijivixi itsa namuxusitenavanapa, bavavajai tsenae penajua namuxusitenaejivajabelia. Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxéanecatsi picani panemuxunanuevajinexa ata. Itsiata apo panuemë’ bajai tsenae pejvaxi penajua namuxusitenaejivixijavabelia. Bajara saya jamatabëcueneitsi pamonae aeconoxae jinavanapa mapanacuataje,” janë meta tsane paxamë yabara.

³³ Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi pamatacabibeje Diosojavabelia vajétapona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya.

³⁴ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënya. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piaitajbinexa. Barënjamatatabëcuenejépanua gobierno pejamatabëcuene impuestomatamo pematamoyanijobabiabivi. Pamonae ata piajamatabëcuenabejevi, barënjamatatabëcuenejëpa,” pajamë tsabiabi xanë

yabara.

³⁵ Itsata baitsi jane itsamonaे xaniavaetsia yapëtaena paxanëbeje Juanbeje Dioso pejamatabëcuena bitso pataneyapëtaeyaexanaejavabeje. Nexata daxita bajarapamonaе yapëtaena pacuenia Dioso paneyapëtaeyaexanabeje pepacuene pepo pexaniajaijamatabëcuene, jai Jesús mapacueniaje jivijavabelia.

Pacuenia Jesús exanatsi Simón pijabota yabara pelivaisi

³⁶ Fariseonë, Simónvënënë, pijabota Jesús penanabaninexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabaninexa.

³⁷ Bajarapatomarata ponapona petiriva, pibisiacuene pexanabiabiva pevitota palata pepitsinexa. Bajarapova itsa jumetane penanabanijavanexa Jesús Simón pijabota, nexata bajarapova capata alabastrovënë ibotota pexanaebotellabë. Pevënëcaebë pexaniapetuxujiviaceitera. Bajarapova capata bajarapaaceitera Jesús petsitaxuepacanexa.

³⁸ Nexata bajarapova Jesús petaxusalibënenia, pematabacabëta nucajunua petsitaxuepacanexa jane baja bajarapaaceitera. Nexata saya bajarajota itacarajeta bajarapova nua. Tsipaji pibisiacuene pexanabiabineconi bitso yanajamatabëxaina. Nexata bajarapova pitaxutobarëmene othopa Jesús petaxujavabereca. Nexata bajarapova pematanata taxuiquica.

Bajaraxuacujinae yaiyataeya taxutsutsune. Tsitaxuepacá Jane Baja petuxujuviaceitera.

³⁹ Nexata Simón, poné Jesús junatatsi, itsatane pacuenia petiriva exana Jesúsjavabelia, nexata Simón jamatabejumaitsi mapacueniae:

—Itsá peneta pepacuene maponé Jesús, pepo profetané tsipaeje, nexata yapétaejitsipa pitsijamatabécueneva taxujayabatsi. Yapétaejitsipa bajarapova pibisiacuene pezanabia bivacuene. Nexata apo tocopatsi tsipae petaxujayabine xatsi, jamatabejai Simón Jesús yabara.

⁴⁰ Nexata Jesús jumaitsi Simónjavabelia:

—Simón, xainajé livaisiyo tacatsipaebinexa, jai Jesús.

Simón nexata jumaitsi:

—Jesús, netsipaebare, jai.

⁴¹ Nexata Jesús jumaitsi Simónjavabelia comparacióncuenia:

—Palata petsicopababiabiné amoneyabatsi anijanébeje. Caené amoneyabatsi quinientos padenariobeje. Itsané amoneyabatsi saya cincuenta padenariobeje.

⁴² Nexata bajaraponébeje apo xainaebuje juya petocanaviatsinexabeje petsicopatsimamatotsibeje. Nexata palata petsicopatsiné jumaitsi bajaraponébejejavabelia: “Iquinajé Baja bajaraxuami pataniamoneyabijavamébeje. Naxuabi Baja jema,” jai. ¿Detsa nexata poné bitso sivajamatabécuenebarëya palata petsicopatsinétsibejejavabelia? jai Jesús Simónjavabelia.

⁴³ Simón nexata jumaitsi Jesúsjavabelia:

—Ponë meta picani ayaijava amoneyaba, sivajamatabëcuenebarëya palata petsico-patsinëtsijavabelia, jai Simón.

Nexata Jesús jumaitsi:

—Xaniajamë rabaja, jai Jesús Simónjavabelia.

⁴⁴ Jesús napënëyorota petirivajavabelia. Nexata jumaitsi Simónjavabelia:

—Simón, ¿taneme tsabaja pacuenia exana xanëjavaberena mapovaje? Xanë junuajë nijaboyerena. Itsiata yaiyataeya xaniavaetsia apo necopiapitsimë. Apo nerajutsimë mera ata tanataxuquiatsinexa. Mapovaje netaxuquiata baja pitaxutobarëmeneta. Netaxuiquicanua pematanata.

⁴⁵ Xamë nijabota patsi atanë, apo nitabaratsutsunimë tanecopiapitsinexamë xaniavaetsia. Mapovaje tapatsicujinae apo copatsi cajena yaiyataeya tanetaxutsutsuneponaejava.

⁴⁶ Xamë xaniavaetsia tanecopiapitsinexamë, apo netsimataepanaemë aceitera. Mapovaje netsitaxuepaca pexaniapetuxujiviaceitera.

⁴⁷ Nexata catsipaebatsi neyapëtaenexa mapacueneje. Mapovaje pinijicuenia nesivajamatabëcuenebarëya. Tsipaji ayaineconi ata pibisiacuene pexanaeneconimi, vecuaajibiaexanajë. Pajivi saya tsiquirineconiyò vecuaajibiaexanajë, pibisiacuene pexanaeneconí, nayapëtane. Tsipaji saya bajarapajivi tsiquirijavayo nesivajamatabëcuenebarëya, jai Jesús Simónjavabelia.

⁴⁸ Nexata Jesús jumaitsi petirivajavabelia:

—Pibisiacuene rabaja nexanaeneconimi cavecuaajibiaexanatsi, jai Jesús.

49 Itsamonae ata, pamonae Simón junata penanabandinexa Simón pijabota, naena mesa muxuneneta. Nexata bajarapamonae najumai tsenae Jesús yabara:

—¿Detsa meta maponéje? Ja-matabécuenenavéxaniabiaya natane bepejamatabécuenecaëjëpaenëtsi jivi pibisiacuene pexanaeneconi pevecuaajibiaexanaenexa, najai tsenae bajarapamonae.

50 Nexata Jesús jumaitsi petirivajavelia:

—Dioso pecacapanepaeva tsane pibisiacuene nexanaeneconimivecua. Tsipaji nesivanaja-matabécuenecopatame xanëjavaberena. Jamatejema baja ponare. Cavecuaajibiaexanatsi rabaja pibisiacuene nexanaeneconimi, jai Jesús petirivajavelia.

8

Pacuenia Jesús, pijajivi, pebijivi, petiriavinua, yajavanajetaruca yabara pelivaisi

1 Simón pijabota Jesús penanabanicujinae, na-jetaruca pinijitomaranéjava, tsiquiritomaraxijava ata. Tsipaebanajetaruca pacuenia Dioso pijajivi evetsijitsia. Jesús, pijajivi doce ponëbeje, apóstolevi, yajavanajetaruca.

2 Jesús yajavanajetaruca petiriavinua, papetiriavi dovathi vecuacapitsapa yajuvënëvi. Papetiriavi ata piavitanejavavecua Jesús jamatejemaya exana yajuvënëvi, Jesús yajavanajetaruca. Bajarapapetiriaviyajuvënëva, caeva pevënë María, Magdala tomarapijiva. Bajarapova Jesús vecuacapitsapa siete

ponëbeje dovathivi. Bajarapadovathivi Jesús pevecuacapitsapaecujinae, María pënaponatsi.

³ Itsava pevënë Juana, Cuzavënënë pijava. Bajaraponë Cuzavënënë, nacuaevetsinë Herodes pijajivitonë. Itsava pevënë Susana. Bajarapape-tiriavi pematasenëa, itsapetiriavi, ayaubitsaëto, yajavanajetaruca Jesús. Bajarapapetiriavi pexainaepalatayajuvënëjava, rajuta Jesúsjavabelia. Nexata xuaxi Jesús pijajivi barënamatavenona pebarëcomuatsinexa bajarapapalatata.

Pacuenia Jesús jivi livaisi tsipaeba peubinë pelivaisicuenia yabara pelivaisi

(Mt 13.1-9; Mr 4.1-9)

⁴ Jivi naropoba tomaranëjavaverena. Pata Jesúsjavaberena petaenexatsi. Itsa baja ayaubitsaëtoxaneto nacaetuata Jesúsjavaberena, nexata Jesús livaisi tsipaeba peubinë pelivaisicuenia. Jesús jumaitsi mapacueniaje:

⁵ —Peubinë pona pabiabelia peubinexa. Nexata itsa pata pabita, peubixu pexucayabajarabicuenia ubanajetaruca. Nexata itsaxu othopa pabi tutuajëjava penajetarucaenamutojumata. Bajrapaxu jivi taxunanonoba. Nexata bajarapaxumi juvinejeva baratsui xane.

⁶ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu juvi ata, tsaquenapona. Tsipaji ira tseva.

⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënénatsi peubijavami.

8 Itsaxu pijinia othopa pexaniairata. Bajara-paxu itsa juva, vitsaba. Nexata xaniavaetsia nacuaita. Itsabotonë capitsapa cien paxutoyobejata, jai Jesús jivi ayaibitsaëtoxanetojavabelia.

Itsa Jesús tsipaeba bajarapalivaisi, pinijijumeta jumaitsi:

—Pajivi jamatabëjumeyapëtane patacatsipaebilivaisi, nemuxunaevetsi xaniavaetsia, jai Jesús bajarapalivaisi petsipaebivijavabelia.

*Pacuene yabara Jesús jivijavabelia livaisi tsipaeba écomparacióncuenia yabara pelivaisi
(Mt 13.10-17; Mr 4.10-12)*

9 Nexata Jesús pijajivi yanijobatsi. Jesús pijajivi jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai Jesús pijajivi Jesúsjavabelia.

10 Jesús nexata jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuene abaxë daxitajivi apo yapëtae. Bajaraxuata bajarapamonae itsa tsipaebajë livaisi, écomparacióncuenia tsipaebaponajë. Nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi, jai Jesús pijajivijavabelia.

*Pacuenia Jesús yapëtaeyaexana pijajivi
pajamatabëcuene xaina palivaisi tsipaeba peubinë
pelivaisicuenia yabara pelivaisi
(Mt 13.18-23; Mr 4.13-20)*

11 Icatsia Jesús jumaitsi pijajivijavabelia:

—Mara pajamatabëcuenelivaisi xainaje, palivaisi pacatsipaebatsi pabita peubinë pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi jivi pejamatabëéthétota. Dioso pitorobilivaisi jivi itsa tsipaebatsi, tsijamatabëubatsi Dioso pitorobilivaisi.

12 Nexata pacuenia itsi pabita peubixu, paxu othopa pabi tuatuajéjava penajetarucae-namutojumata, bajara tsijamatabëcueneitsitsi itsamonaе Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, petsijamatabëubilivaisitsi dovathi baja vecuapitatsi bajarapalivaisimi. Vecuapitatsi pevajénaeyabelia Dioso pejumecovënëtsiyaniva, Dioso pecapanepaeyanivatsi pibisiacuene pexanaeneconiveua.

13 Pacuenia pijinia itsi paxu othopa ibopananéjumata, itsajota bitso ira apo aitayaë, bajara tsijamatabëcueneitsitsi itsamonaе Dioso pitorobilivaisi. Bajarapamonae Dioso pitorobilivaisi jumetane. Nexata picani bajarapalivaisi barëyaya jumecovënëta. Itsiata baitsi jane pacuenia irabereca apo

atabunepepiareca paxu othopa ibopananëjumata, nexata nabijiana, bajara tsijamatatabëcueneitsitsi bajarapamonae Dioso pitorobilivaisi. Tsipaji saya caeepatoyo jumecovënëta bajarapalivaisi. Nexata paepatota dovathi jamatabëcueneëjëtatsi, copaba baja bajarapalivaisi pejumecovënëtsijavami.

14 Pacuenia pijinia paxu othopa xanëebacabomijavata, itsa juva, bitso matacënénatsi xanëebotonë, bajara tsijamatatabëcueneitsitsi itsamonaes Dioso pitorobilivaisi. Jumetane picani bajarapamonae Dioso pitorobilivaisi. Itsita baitsi jane bitso jamatabëcueneenatsi mapanacuapijicuene yabaraje. Tsipaji najamatatabëxaina ayaijava palata pexainaenexa. Najamatatabëxainanua pexanaenexa pacuene mapanacuapijivi exana saya jema pebarëyanexa. Bajaraxuata Dioso pitorobilivaisi apo tovitsabitsi pejamatabëëthétota. Nexata pacuenia itsi pabita piacuajibitonë, bajara itsi bajarapamonae. Tsipaji Dioso xaniavaetsia apo tojinavanapae.

15 Pacuenia pijinia itsi paxu othopa pexaniairata, bajara tsijamatatabëcueneitsitsi itsamonaes Dioso pitorobilivaisi. Bajarapamonae ajamatatabëcuenexuirajibi. Épexaniajamatabëcuene najamatatabëxaina. Casaë tsavanapae pevajënaeyabelia Dioso pejumelivaisi pejumecovënëtsijava. Nexata Dioso pejumelivaisi tsijamatatabëcuenevitsabaponatsi pevajënaeyabelia. Tsipaji exanavanapa Dioso pitorobicueniatsi, jai Jesús pijajivijavabelia itsa tsipaeba peyapëtaeyaexanaenexa palivaisi jivijavabelia tsipaeba pabita peubinë pelivaisicuenia.

*Pacuenia Jesús pijajivijavabelia livaisi tsipaeba lámparabë pelivaisicuenia yabara pelivaisi
(Mr 4.21-25)*

16 Icatsia Jesús jumaitsi pijajivijavabelia:

—Itsajivi ata lámparabë pitanojotsicujinae, apo mataacatetsi itsacuenejavata. Cama bëxëpanalia ata apo etsi. Biji rajane athëbëyo etsia jivi boyaberenä pejonevi petsivajëna itayotecaenexa.

17 Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumemata yatsia apo tsipaebaponaeñë. Itsamonaë nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë, jai Jesús pijajivijavabelia.

18 Icatsia Jesús jumaitsi pijajivijavabelia:

—Panejumecanaëjëre patacatsipaebilivaisi. Itsamonaë ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto panejumeyapëtaename. Itsiata icatsia pematsenëa bajarapitsilivaisivajëto Dioso pacayapëtaeyaxanaena. Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematsenëa Dioso jumeyapëtaeyaxanaenatsi. Itsiata pajivi apo jitsipae pematsenëa pejumeyapëtaeponaenexa, bajarapajivi palivaisiyovajëto picani

jumeyapötane, nacofënëtsiana, jai Jesús
pijajivijavabelia.

*Pacuenia Jesús pejuyapijivi, pena yajava,
nubena bojumavelia yabara pelivaisi
(Mt 12.46-50; Mr 3.31-35)*

¹⁹ Jesús pejuyapijivi, pena yajava, pata Jesúsjavaberena. Itsiata acuenebi bajarapamonae pimoxoyotsijava Jesús. Tsipaji bitso jivi ayaubitsaëto Jesús matatoyorotsia vënëcatsi.

²⁰ Nexata pamonae Jesús petsipaebilivaisi mata-toyorotsia jumetaeyenatsi, jumaitsi Jesúsjavabelia:
—Patajatuxanenë, ena raja, nejuyapijivi yajava, nuca patapënëverena. Bajarapamonae pina jitsipa pecataejava, jai Jesúsjavabelia.

²¹ Nexata Jesús jumaitsi daxita bajarapamonae-javabelia:

—Pamonae jumetane Dioso pejumelivaisi, jumecovënëtanua pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

*Pacuenia Jesús itaveta joviboxaneto, malataca
yajava, piayaijavami yabara pelivaisi*

(Mt 8.23-27; Mr 4.35-41)

²² Itsamatacabí Galilea nacuata Jesús, pijajivi yajava, runareca jera ënëabereca. Jumaitsi pijajivi-javabelia:

—Nicabaliatsi mapapucaxaneto itsapanabeli-aje, jai Jesús.

²³ Itsa baja naropobalia, Jesús majitanuca. Nexata pinijijoviboxaneto jemata najetaruca. Malataca nexata bitso ayai. Nexata malataca jera ënëaberena mera epabajarabapona. Mera nexata

vënëcapona jera ënëaberena. Bubunaejitsia baja bajarapamo. ²⁴ Nexata Jesús pemajitanucaenë pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopae-natsi! jai Jesús pijajivi.

Nexata Jesús pemajitanucaenëmi naëcotapuna. Pinijijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuuba.

²⁵ Nexata Jesús jumaitsi pijajivijavelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavelia.

Nexata Jesús pijajivi itsa tane Jesús pitavetsi-java jovibo, malataca yajava, Jesús pijajivi ja-matabëcuenenajunaviaca bëpënëa. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Nexata jumecovënëtatsi! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia pebi, dovathivi peyajavaponapon-aenë, Jesús vecuacapitsapa Gerasa nacuata yabara pelivaisi

(Mt 8.28-34; Mr 5.1-20)

²⁶ Jesús pijajivi barëyaëta pucaxaneto itsapanabelia, Gerasa nacuayabelia. Gerasanacula boca puca itsapanaverena, Galileanacula pecanacujitsalia.

²⁷ Itsa Jesús jeravecua nonotajunaya, mataenenarenatsi bajarapanacuapijinë, dovathivi peyajavaponaponaenë. Bajaraponë

bajayajebi baja jumasa ponaponabiaba. Pijabota apo ponaponae. Jivimëthëanëjavata saya ponaponabiaba.

28 Nexata bajaraponë itsa pata Jesúsjavaberena, pematabacabëta nucajunua Jesús pitabarata. Pinijijumeta aëjai.

—Jesús, Dioso athëbëtatsia peecaenë pexënatomë. ¿Detsa xua jaitame xanëjavaberena? Pexaniacuene bitso cavajëtatsi. Nejamatabëcuenebejiobitsipame, jai dovathivi peyajavaponaponaenë Jesúsjavabelia.

29 Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataenenaejavatatsi, Jesús itaveta dovathivi. Jesús jumaitsi dovathivijavabelia mapacueniaje: “¡Dovathivi, bajaraponë baja pavecuapitsapare!” jai. Bajaraponë anijatonë dovathivi vaetababiabatsi. Jivi picani bajaraponë cadenamaëtonëta cobecëtabiabatsi. Yajavataxucëtabiabatsi cadenamaëtonëta xaniavaetsia picani peecaenexa. Itsiata baitsi dovathivi peyajavaponaponaenë ucubabiaba cadenamaëtonëmi. Dovathivi pejamatabëcueneta najetabajiravabiaba petusatuabelia.

30 Nexata Jesús jumaitsi bajaraponëjavabelia:

—¿Detsa pavënëmë? jai Jesús.

Nexata bajaraponë navënëpaeba.

—Tavënë raja Legión, jai.

Bajarapacuenia navënëpaeba tsipaji dovathivi ayaubitsaëtoxaneto tsijamatabëjinavanapatsi.

31 Bajarapadovathivi vajëta Jesúsjavabelia infier-nojavabelia Jesús pitorobiyaniva.

³² Nexata bajarajota, imoxoyo petsutojavata, marranobitsaëtoxaneto xaevanapa. Dovathivi bitso vajëta Jesúsjavabelia.

—Panetocopare patajonenexa marranobitsaëtoxanetojavabelia, jai dovathivi.

Jesús nexata pevajëtsicueniatsi tocopata.

³³ Nexata dovathivi pebi vecuapitsapecatsi. Nexata marranobitsaëtoxanetojavabelia baja junua dovathivi. Nexata daxita bajarapamarranobitsaëtoxanetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoxanetomi meneta bubuna.

³⁴ Marrano pevetsivi itsa tane bajarapacuene, rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata.

³⁵ Nexata jivi ponarena petaenexa bajarapacuene. Jivi itsa parena Jesúsjavaberena, taejeta dovathivi peyajavaponaponaenëmi peecaejava Jesús pemuxuneneta. Penaxatatsijava baja bajaraponë naxatateca. Jamatejema baja. Xaniavaetsia eca. Nexata bajarapamonae cujunavatsi Jesús.

³⁶ Pamonae cuenetanetsi Jesús pejamatejemyayaexanaejava dovathivi peyajavaponaponaenëmi, bajarapamonae paeba pepatsivijavabelia daxita pacuenia tane.

³⁷ Bajarapamonae bitso cujunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

Nexata baja Jesús runareca jera ënëabereca. Ponaejitsia baja.

³⁸ Nexata dovathivi peyajavaponaponaenëmi bitso picani navajëca Jesúsjavabelia penapon-aenexa picani Jesús pepëta.

—Petuxanenë, netocopare tanaponaenexa nepëta, jai picani Jesúsjavabelia.

Itsiata Jesús apo jejai. Jumaitsi bajaraponëjavabelia:

³⁹ —Ponare nijamonaejavabelia. Tsipae-bianame pacuenia ayaicuene nijatuxanenë Dioso catoexana, jai Jesús.

Nexata baja bajaraponë pona. Tsipaebapona daxita pijatomarapijivijavabelia pacuenia Jesús jamatejemayaexanatsi.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovalyo, petëpaevayomi, yabara pelivaisi

(Mt 9.18-26; Mr 5.21-43)

⁴⁰ Jesús icatsia pecovëyaberena naviarena jerata pucaxaneto itsapanaverena. Nexata jivi ayaibit-sätoxaneto copiapitatsi barëyaya. Tsipaji baja ca-jena copiaevertavanapatsi pepatsijavarena.

⁴¹ Nexata bajarajota napatajopa Jairovënënë. Bajaraponë judíovi penacaetuatabiabibo pevetsinë. Jairo pematabacabëta yaiyataeya Jesús pitabarata nucajunua. Pinijicuenia junata. Jumaitsi Jesúsjavabelia:

—Tapëta ponare tajaboyabelia, jai.

⁴² Bajarapacuenia Jairo jumaitsi Jesúsjavabelia tsipaji caevayo pexënatovalyo totëpaejitsiatsi.

Bajarapovayo xaina doce pavaibeje. Itsa Jesús napona Jairo pepëta, jivibitsaëtoxaneto Jesús pepënaponaevitsi matatoyorotsia cënënanajetarubenatsi.

43 Bajarapajivibitsaëtoxaneto tuatuajëta, itsava pijanacuene pecapunaevatsi nanajetaruca. Bajarapova pijanacuene pecapunaecujinaetsi, doce baja pavaibeje xaina. Beyajiobi tsabiabi bajarapaja. Daxita pexainaejavaximi navecuavereta pemamatamobita pevaëbivitsi. Itsiata baitsi jane itsanë ata pevaëbivitsi apo jamatejemayaexanaetsi bajarapavitanevercua.

44 Nexata bajarapova ponataba Jesús pepënëvelia, jivibitsaëtoxaneto tuatuajëalia. Nexata bajarapova tojayataba Jesús penaxatatsijavacopia. Nexata bajarapaepatota pijanacuenemi vecuaajibitsi baja.

45 Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanë cajena apo cajayatabitsi, jai.

Nexata Pedrobana jumaitsi:

—Patajatuxanenë, jivibitsaëtoxaneto raja camatatoyorotsia cënënanajetarubena. Apo becaajayatsijibi. ¿Detsa xuajitsia: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrobana.

46 Nexata Jesús jumaitsi:

—Itsajiviyo baja cajena tanaxatatsijava netojayataba. Yapëtaniji bajarapajiviyo tajamatejemyaexanaejava tasaëta, jai Jesús.

47 Nexata petiriva jamatabëjumaiti:

—Jesús baja yapétane tanejamatejemayaexanaejava, jamatabejai.

Nexata bajarapova najetabarena Jesús pitabarayaberena. Neconeojai pecajunavi. Pematabacabëta tonucajunua Jesús pitabarata. Bajarapova nexata navajunupaeba daxitajivi tuatuajëta pacuene yabara tojayataba Jesús penaxatatsijava. Navajunupaebanua pacuenia jamatejemayaexanatsi pejayatabijavata.

48 Nexata Jesús jumaitsi bajarapovajavelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanjavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema, jai Jesús bajarapovajavelia.

49 Bajarapacuenia Jesús pejumaitsanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavavelia:

—Jairo, nexénatoyo rabaja tēpa. Pëtsa baja matavëjëa jamatabëitonotaponame Jesús, jai bajaraponë Jairojavavelia.

50 Jesús jumetae ata bajarapajume, itsiata jumaitsi Jairojavavelia:

—Jairo, pëtsa najamatabëxainame. Njamatabëcuene copare saya ëxanëjavaberena. Nexénatovayo raja jamatejema tsane, jai Jesús Jairojavavelia.

51 Itsa Jesús pata Jairo pijabota, apo tocopatsi ayaubitsaëto penajonenexa Jesús pepëta petëpaevayo pebocaejavavelia. Tocopata saya penajonenexa mapamatabëxëyoje. Pedro, Santiago, Juan, petëpaevayo paxa, pena, bajara saya pamatabëxëyo tocopata penajonenexa

Jesús pepëta. Pamonae Jesús pevajënae ena Jairo pijabota, bajarapamonae Jesús pitsapaeyaexana.

52 Daxitajivi pinijicuenia matanueyaba petépanucaevayo. Nexata Jesús jumaitsi:

—Pëtsa pamatanueyabame. Pejanava raja apo tēpae. Saya raja majitanuca, jai Jesús bajarapamonaejavabelia tsipaji yapëtane Jesús piasaëyaexanaejavanexa bajarapovayo.

53 Bajarapacuenia Jesús pejumaitsijava, bajarapamonae saya Jesús jumecapocaponatsi. Tsipaji bajarapamonae yapëtane bajarapovayo baja picani pepacuene petépaejava.

54 Nexata Jesús petépaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

55 Nexata bajarapacuenia Jesús pejumaitsijavata, petépanucaevayomi nonotabapuna. Asaë baja icatsia petépaevayomi. Nexata Jesús jumaitsi pejanavayo penajavabelia:

—Nexénatovayo pexaejava rajure, jai Jesús.

56 Nexata pejanavayo paxa, pena ata, bitso jamatabécuenenabenajacabeje. Nexata Jesús jumaitsi bajarapajivibejejavabelia:

—Pëtsa papaebamebeje itsajivijavabelia ata pacuene pacatoexanatsibeje, jai Jesús.

9

Pacuenia Jesús pijajivi itoroba Dioso pitorobili-vaisi jivi petsipaebanajetarubenaenexa yabara pelivaisi

(Mt 10.5-15; Mr 6.7-13)

¹ Jesú junata pijajivi, doce ponëbeje, penacaetusinexa. Nexata Jesú jumaitsi bajarapamonaejavabelia mapacueniae:

—Pacajamatabëcuene caëjëpaeyaexanatsi rabaja papecacaëjëpaejamatabëcuene dovathi peyajavajinavanapaevi ata panevecuacapitsapaponanexa. Pacajamatabëcuene caëjëpaeyaexanatsinua piavitanevi ata panejamatejemayaexanapponaenexa.

² Patsipaebanajetarubenaename daxitajivijava pacuenia Dioso pijajivi evetsjitsia. Piavitanevi ata pajamatejemayaexanapponaename, jai Jesú pijajivijavabelia.

³ Jesú jane baja pijajivi penaropobivajënae, Jesú jumaitsi pijajivijavabelia mapacueniae:

—Pëtsa itsacuenejava ata pacaponame panjanamutonexa. Pëtsa pacaponame naebo, doro ata, panemarue ata, palata ata. Caejava saya panenaxatatsijava pajumaponare. Pëtsa anijacamisabeje pacaponame.

⁴ Itsa papatabiabianame tomarata, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponnaename, bajarapabovetua papitsapaename.

⁵ Patomarata apo pacacopiapitsi tsane pexanialivaisi panetsipaebinexa, nexata pavecuapponaename bajarapatomara. Panevecuapponaevajënae bajarapatomara, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, yapëtaena bajarapatomarapijivi Diosojavabelia penaneconitsicuene apo papecacopiapitsixa

papecanamuxunaevetsinexa panetsipaebilivaisi,
jai Jesús pijajivijavabelia.

⁶ Bajaraxuacujinae Jesús pijajivi naropoba
jane baja. Najetarubena daxitatomaraxijava.
Tsipaebanajetarubena jane baja pexanialivaisi
jivi pecapanepaelivaisinexatsi pibisiacuene
pexanaeneconimivecua. Jamatejemayaexanapo-
nanua piavitanevi daxitajava.

*Pacuenia Juanpijinë jivibautisabinëmi beyaxua-
batsi yabara pelivaisi*
(Mt 14.1-12; Mr 6.14-29)

⁷ Herodes, Galileanacua pevetsinë,
vënëlivaisitanetsi daxita Jesús pinijicuene
pexanaponaejava. Nexata Herodes
najamatabëcueneepatajérérëcaeya naja-
matabëxaina Jesús yabara. Tsipaji itsamonae
jamatabëcuenenavëxaniabiaya Jesús yabara jumai
tsaponae: “Juanpijinë raeta jivibautisabinëmi
petëpaecujinae icatsia asaë,” jai tsaponae
Jesús yabara. Nexata bajarapacuenia
itsamonae pejumaitsaponaejava Herodes
pejumetaexae, najamatabëcueneepatajérérëcaeya
najamatabëxaina Jesús yabara.

⁸ Itsamonae pijinia jumai tsaponae Jesús
yabara:

—Bajayata raeta ponëmi ponapona, profeta
Elíaspijkenëmi, icatsia asaë, jai tsaponae itsamonae.

Itsamonae pijinia jumai tsaponae Jesús yabara:

—Bajayata raeta pamonaemi jinavanapa, profe-
tavimiyajuvënënë, icatsia asaë, jai tsaponae itsa-
monae Jesús yabara.

Bajarapacuenia itsamonaе ja-matabëcuenenavëxaniabiaya pejumaitsaponaejava Jesùs yabara, Herodes jumetane.

⁹ Nexata Herodes jamatabëjumaitsi:

—Xanë bajayata tajajivi itorobajë Juanpijinë jivibautisabinëmi pebeyaxuabinexa. Nexata baja tajajivi Juanpijinëmi vësiucutaxuaba. Beyaxuaba baja. ¿De tsaeta nexata ponë pinijicuene pex-anaponaejava, vënëlivaisitaeyabiabajë? jamatabëjai Herodes Jesùs yabara.

Bajaraxuata Herodes bitso jamatabëtane Jesùs.

Pacuenia Jesùs pexaejava rajuta cinco mil ponëbeje yabara pelivaisi

(Mt 14.13-21; Mr 6.30-44; Jn 6.1-14)

¹⁰ Jesùs pitorobivi, apóstolevi, jivi pexanialivaisi petsipaebanajetarubenaecujinae, naviabana-jetarubena baja Jesùsjavaberena. Nexata bajarapamonae pepatsicujinae Jesùsjavaberena, navajunupaeba Jesùsjavabelia daxita pacuenia exanavanapa. Nexata Jesùs barëpona pijajivi pesajinaejavabelia, Betsaidatomara imoxoyojavabelia.

¹¹ Itsiata baitsi jane jivi ayaubitsaëtoxaneto pëtanetsi. Nexata bajarapamonae Jesùs pecovëvelia pëjaitatsi. Nexata bajarapamonae itsa pata Jesùsjavata, Jesùs copiapita xaniavaetsia. Nexata Jesùs tsipaeba bajarapamonaejavabelia pacuenia Dioso eveta pijajivi mapanacuataje. Jesùs jamatejemayaexananua piavitanevi.

¹² Itsa baja caniviyo tsaponae, Jesùs pijajivi doce ponëbeje cujbarenatsi. Jumaitsitsi:

—Itorobaremelia baja jivi peponaenexa imoxoyo penaetomaraxijavabelia, imoxoyo penaebonëjavabelia ata. Bajarabelia bajarapamonae namajitsiana. Pexaejavanua namitsavajëtsiana. Majotaje ajibi pexaejava. Tsipaji itsajivi ata pijabo apo xainae majotaje, jai Jesús pijajivi.

¹³ Nexata Jesús jumaitsi pijajivijavabelia:

—Paxamë parajure pexaejava, jai Jesús.

Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava. ¿Jitsipame tsaja patacomuacaenexa pexaejava daxita mapamonae penaxaenexaje? jai Jesús pijajivi.

¹⁴ Bajarapajivibitsaëtoxaneto bejamatabëcuene cinco mil ponëbeje. Nexata Jesús jumaitsi pijajivijavabelia:

—Paenaeyaexanare pepobitsaëtonë, bejamatabëcuene cincuenta ponëbeje tsaponaë caebitsaëtota, jai Jesús pijajivijavabelia.

¹⁵ Nexata Jesús pijajivi bajarapacuenia exana. Enaeyaexana jane baja daxita jivibitsaëtoxaneto.

¹⁶ Nexata Jesús pita cinco papanbëbeje, anijanëyobeje dujuainëyobeje yajava. Athëbëa beñaëcotsia. Jumaitsi Diosojavabelia:

—Pexaniacuene panetoexaname. Paneraju-tame pataxaejava, jai Jesús.

Bajaraxuacujinae Jesús pan epatsicacapona, dujuainëyobeje yajava. Pepatsicacaejava pijajivijavabelia rajutapona petsicobetsanaenexa daxitajivi.

¹⁷ Daxita xaniavaetsia nabane. Bajaraxuacujinae jivi peyajuvënëcopabejebijavanë, Jesús pijajivi

vënëba doce xuabeje bemapirecuenia pexanaejanvanë.

*Pacuenia Pedro jumaitsi Jesúsjavabelia: “¡Xamë raja Cristomël” jai yabara pelivaisi
(Mt 16.13-19; Mr 8.27-29)*

18 Itsamatacabí Jesú斯 caenë vajëta Diosojavelia pijajivi pitabëta. Nexata xuacujinae Jesú斯 jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesú斯 pijajivijavabelia.

19 Nexata Jesú斯 pijajivi jumaitsi:

—Itsamonae xamë yabara jumai tsabiabi: “Juanpijinë raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta. Profeta Elíaspipinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënëne icatsia asaë,” jai tsabiabi xamë yabara, jai Jesú斯 pijajivi.

20 Nexata icatsia Jesú斯 jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesú斯 pijajivijavabelia.

Nexata Pedro jumaitsi Jesúsjavabelia:

—Xamë raja cajena Cristomë, athëbëvetsica Dioso pecaitorobinëtsica jivi necapanapaenexa. Xamë cajena Dioso pexénatomë, jai Pedro Jesúsjavabelia.

*Pacuenia Jesú斯 tajëvelia navajunupaeba pebeyaxuabijavanexatsi yabara pelivaisi
(Mt 16.20-28; Mr 8.30-9.1)*

21 Jesú斯 jumeitaveta pijajivi. Jumaitsi mapacueniaje:

—Pëtsa pajumaitsimë jivijavabelia: “Jesú斯 raja Dioso pexënato,” pajamë pëtsa, jai Jesú斯.

22 Nexata Jesú斯 pebeyaxuabijavanexatsi, tajévelia navajunupaeba. Jumaitsi pijajivijavabelia mapacueniaje:

—Xanë, Daxitajivi Pematapijinënë, pinijicuenia beiobinë tsane. Judíovi pijaancianovi, sacerdotevi penamatacitorobivinua, judíovi pecujarubivinua, apo nejumecovënëtsi tsane xanë Cristonëcuñenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matacabita, icatsia asaënë tsane, jai Jesú斯 pijajivijavabelia tajévelia penavajunupaebijavata pebeyaxuabijavanexatsi.

23 Bajaraxuacujinae Jesú斯 jumaitsi daxitajivijavabelia:

—Pajivi jitsipa tanepënaponaejava, bajarapajivi copatsi penatojitsipaecuenia pexanaenexa penajamatatabëxainabiabijavami. Exanaponapae taitorobicuenia. Bajarapajivi caematacabí canacujitsia najamatatabëcuñeveretsinua, beiobiaexanaejitsia atatsi, beyaxuabijitsia atatsinua, Dioso pejumelivaisi yabara piajamatabëcuñenesaë tsaponaponaenexa. Nexata jane baja xuacujinae nepënaponena.

24 Pajivi exanaponapona penatojitsipaecuenia, apo xainae tsane matacabí apo pevereverecaejava. Pajivi xanë tajamatatabëcuñeta copata penatojitsipaecuenia pexanaejavami, bajarapajivi xainaena matacabí apo pevereverecaejava.

25 Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueneje, itsiata nacuerata. Tsipaji pexainaecuene apo capanepae tsanetsi Diosojavabelia.

26 Pajivi tajajivitonë ata, navënélivaisicaura tsane jivijavabelia xanë tajajivitonëcuene, tanejumecovënëtsijava ata yabara, nexata juya xanë, Daxitajivi Pematapijinënë, bajarapajivi tajajivitonë ata, tajajivitonëcuene vënélivaisicauranë tsane taxa Diosojavabelia. Bajarapajivi vënélivaisicauranë tsane pamatacabí icatsia patsianicajé taxa Dioso pijapenivenivenaecotia yajava, tananeconitsiaexanaenexa daxita pijaneconi pexainaevi. Yajavapatsianicajénua Dioso pijáangelevi.

27 Xaniajanë pacuenia pacatsipaebijitsatsi. Daxita paxamë patëpaenejevamë, Dioso taxuxuabiana daxita pijajivi pevetsicuene mapanacuataje. Nexata paxamëyajuvënëvi pepuatae tsane Dioso petaxuxuabijava daxita pijajivi pevetsicuene mapanacuataje, tēpaena, jai Jesús bajarapamonaejavabelia.

*Pacuenia Jesús caeepatoyo perabënivenivenataba
yabara pelivaisi
(Mt 17.1-8; Mr 9.2-8)*

28 Jesús petëpaejavanaxa tajëvelia penaya-junupaebicujinae, bejamatabëcuene ocho pamatacabibejecujinae, Jesús pijajivi, acueyabi ponëbeje, barëjunaya petsutojumabetsia. Barëjunaya mapamatatabëxëyoje: Pedro, Santiago,

Juan. Bajarapamatabëxëyo Jesús barëjunaya petsutojumabetsia pevajëtsinexa Diosojavabelia.

29 Diosojavabelia pevajëtsijavata, Jesús itabaranivenivena. Penaxatatsijava ata bitso nivenivenaeya niojai.

30 Bajarajota jemata naitajëta anijanëbeje, ponëmibeje bajayata tēpa. Bajaraponëbeje Jesús barëcuaicuajaitsi. Bajaraponëbeje tsaena Moiséspijinëbeje Elíaspijinëbeje.

31 Bajaraponëbeje matatoyorotsia nivenivenabeje. Jesúsbana nabarëcuaicuajai Jesús petëpaejavnexa yabara. Pacuenia Jesús bejiobiaexanaejitsiatsi Jerusalén tomarata, bajarapacuene yabara nabarëcuaicuajai.

32 Pedrobana penajuajinavanapaevi bitso itamajitsipanae ata, itsiata naëcotavanapa. Nexata bajarapamonae tane Jesús matatoyorotsia penivenivenaejava. Tanenua Moisésbeje Elíasbeje pebarëcuaicuajavatsi Jesús.

33 Itsa baja Moisésbeje Elíasbeje Jesúsvuela ponajitsiatsibeje, nexata bajarapaepatota Pedro jumai tsaxuabi Jesúsjavabelia:

—¡Patajatuxanenë, pijacuaxae panebarëponame! Pacatoexanaenatsi acueyabi pabobérëtobeje. Itsabobérëto xamënexa tsane. Itsabobérëto Moisésnexa tsane. Itsabobérëto Elíasnexa tsane, jai Pedro.

Pedro xaniavaetsia najamatabëxainaenejeva, bajarapacuenia jumaitsi.

34 Pedro abaxë itsa cuaicuajai tsanucae, itarërëbo mataacataxuabatsi daxita bajarapamonae. Jesús pijajivi najunaviaca itsa mataacataxuabatsi itarërëbo.

35 Nexata bajarapaitarërëbojavavetsica Dioso jumaisitsica:

—Mara ponë taxënato, tasivanëje. Bajaraponë panamuxunaevere, jaitsica Dioso itarërëbojavavetsica Jesús pijajivijavabelia.

36 Itsa baja Dioso najumevereta bajarapacuenia pejumaitsijavatsica, Jesús pijajivi tane caenë baja Jesús penucaejava bajarajota. Jesús pijajivi tae ata bajarapacuene, moya saya jinavanapa. Bajaramonae abaxë apo tsipaebi itsamonaejavabelia, tae ata bajarapacuene.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

(Mt 17.14-21; Mr 9.14-29)

37 Jesús pebarëcuaicuiajcujinae Moisésbeje Elíasbeje, pijajivi acueyabi ponëbeje yajava, naviatsica petsutojumavetsica. Nexata mataenenatsi jivi ayaibitsaëtoxaneto.

38 Nexata caenë bajarapajivi bitsaëtoxanetoyajuvënënë pinijijumeta jumaitsi Jesúsjavabelia:

—Jesús, nitaxutotsoniataema. Netotaema taxënatonëyo. Caenëyo rabaja tsipaji xainajë.

39 Dovathi vaetababiabatsi. Nexata jemata aëjai tsabiaabi. Tëpjoneyaexanabiabatsi. Daxitanë neconeojaiya aperabëbaba tsatababiabireca. Nexata bajarajota pecuibothamu tsabiabi. Bitsobejiobiaexanabiabatsi. Dovathi abaxë apo jamatabëcopatsitsi.

40 Picani raja nijajivijavabelia jumaitsinë: “Panetovecuacapitsapare dovathi,” janë. Itsiata

apo caëjëpaetsi tanetovecuacapitsapaenexa, jai bajaraponë Jesúsjavabelia.

41 Nexata Jesús jumaitsi daxita pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatatabëcuenecaëjëpae pejevaxinë panevecuacapitsapaenexa dovathi. ¡Paneaja-matabëcuenetajavi baja rovia! ¿Detsa paepatojebi abaxë paxamëjavabelia ajamatatabëcuenesaënë tsaponaponae tsane patanejumecovënëtsinexamë? jai Jesús daxita pijajivijavabelia.

Nexata Jesús jumaitsi pejevaxinë paxajavabelia:

—Barërenamëre nexënatonëyo, jai Jesús.

42 Ajena pejevaxinë imoxoyotabarena Jesúsjavaberena, dovathi icatsia irata xuabatsi pejevaxinë. Daxitanë aperabëbaba tsatabireca. Nexata Jesús itaveta dovathi pejevaxinë pevecuacapitsapaenexatsi. Nexata baja Jesús jamatejemayaexana pejevaxinë. Tocanaviata baja pejamatejemanë paxajavabelia.

43 Daxitajivi bitso jamatabëcuenenabenajaca Dioso pesaëta Jesús pevecuacapitsapaexae dovathi bajaraponëyo.

*Pacuenia icatsia Jesús tajëvelia navajunupaeba
pebeyaxuabijavanexatsiyabara pelivaisi*

(Mt 17.22-23; Mr 9.30-32)

Jivibitsaëtoxaneto Jesús jamatabëcuenabarëyaya tanetsi daxita Jesús pexanaejava yabara. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniae:

44 —Xaniavaetsia panenamuxunaevere. Pëtsa panacofënëtame. Xanë, Daxitajivi Pematapijinënë, necanajetsiana itsamonaec pecobeyabelia, jai Jesús pijajivijavabelia tajévelia penavajunupaebijavata pebeyaxuabijavanexatsi.

45 Itsiata baitsi jane Jesús pijajivi apo jumeyapëtae xua yabara Jesús jumaitsi. Baitsi bajarapamonae Dioso apo tocopatsitsi pejumeyapëtaeyaniva xua yabara Jesús jumaitsi. Bajarapamonae ajumeura Jesúsjavabelia peyanijobijava xua yabara Jesús jumaitsi.

Pacuenia Jesús pijajivi: “¿Detsa ponë vaxaitisyajuvënëna nacavecuaaya ijamatatabëcuenenë bitso?” najai tsanajetarubenaem namutua yabara pelivaisi

(Mt 18.1-5; Mr 9.33-37)

46 Jesús pijajivi anaeya namutua najumenotsiaya nalivaisitanajetarubena. Najumaitsi tsanajetarubenaem bajarapamonae:

—¿Detsa ponë vaxaitisyajuvënëna nacavecuaaya ijamatatabëcuenenë bitso? najai tsanajetarubenaem Jesús pijajivi.

47 Nexata Jesús pijajivi jamatabëcuneyapëtane pacuenia najamatatabëxaina. Nexata Jesús cobepita pejevaxinëyo. Pemuxuneneta nuteta.

48 Jumaitsi pijajivijavabelia:

—Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyajavacopiapita. Nexata pëtsa bepaayaijamatabëcunevime panataneme. Tsipaji ponë paxamëyajuvënëna

beveliajamatabëcuenenë natane paxamëvecua, bajaraponë bitso ayajamatabëcuenenë taenatsi Dioso daxita paxamë matatoxenetsia, jai Jesús pijajivijavabelia.

*Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi
(Mr 9.38-40)*

49 Jesús pijajivitonë, Juan, jumaitsi Jesúsjavabelia:
—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënëna. Nexata paitavetajé bajaraponë dovathi jivivecua pecapitsapaponaejava, jai Juan.

50 Nexata Jesús jumaitsi Juanjavabelia:
—Pajivi pibisiajamatabëcune apo naja-matabëxaina vaxaitsijavaberena, bajarapajivi nacajamatabëcuneyavenona. Bajarapajivi bevaxaitsijamatabëcunejivi. Bajaraxuata pëtsa baja paitavetame bajaraponë xanë tavënëta jivivecua dovathi itsa capitsapapona, jai Jesús Juanjavabelia.

Pacuenia Jesús jumeitaveta Santiagobeje Juan-beje yabara pelivaisi

51 Itsa baja imoxoyo pevajënae pamatacabí Jesús athëbëabetsia Dioso caponaejitsiatsi, ajamatabëcuenesaë baja peponaenexa Jerusalén tomarabelia.

52 Jesú斯 nexata pevajënaeyabelia pijajivitonëbeje natsivajënaeitoroba, Santiagobeje Juanbeje. Bajaraponëbeje ponabeje Samaria nacuata peecae-tomarajavabelia petocovaetsinexabeje pabota picani Jesú斯 patsijitsia.

53 Itsiata baitsi jane Samaria nacuapijivi apo jamatabëcopiapsitsi Jesú斯. Tsipaji baja bajarapomonae yapëtane Jesú斯 peponaejavanexa Jerusalén tomarabelia.

54 Nexata Jesú斯 pijajivitonëbeje itsa yapëtanebeje Samaria nacuapijivi Jesú斯 apo pecopiapsijavanexatsi, nexata jumaitsibeje Jesúsjavabelia:

—Patajatuxanenë, bajayata profeta Elíaspijnë vajëta Diosojavabelia Dioso pitorobinexatsica isotocotia peverebiabinexa piajamatabëcuenebejevi. ¿Baja tsaja pitsicuene jitsipame patavajëtsinexa Diosojavabelia peveriapaenexatsi pamonae apo jitsipae pecacopiapsijava? jaibeje Jesú斯 pijajivitonëbeje.

55 Nexata Jesú斯 naëcota pijajivitonëbejejavabelia. Jumeitaveta pijajivitonëbeje. Jesú斯 jumaitsi:

—Paxamëbeje apo pajamatabëcuneyapëtaemëbeje Espíritu Santo, ponë pacayajavaponaponabeje.

56 Xanë, Daxitajivi Pematapijnënë, apo patsinëtsica taverebiabinexa jivi. Biji rajane patsicajë tacapanepaenexa jivi pibisiacuene pexanaeneconivecua, jai Jesú斯 pijajivitonëbejejavabelia.

Nexata baja Jesú斯, pijajivi yajava, pona itsatomarabelia.

*Pacuenia picani itsamonaे Jesùs ja-matabépénaponatsi yabara pelivaisi
(Mt 8.19-22)*

⁵⁷ Jesùs pijajivi namutua peyajavanajetarucaejavata, judíovi pecujarubinë jumaitsi Jesùsjavabelia:

—Jesùs, itsabelia poname, capénaponaenatsi cajena, jai judíovi pecujarubinë.

⁵⁸ Nexata Jesùs jumaitsi bajaraponéjavabelia:

—Itsa nepénaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namo pijaméthëanë xaina pepatabiabinexa pemajitabiabinexanua. Baratsui ata pematapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë, itsajota nacueraevetabiabijitsianë, jai Jesùs.

⁵⁹ Bajaraxuacujinae Jesùs jumaitsi icatsia itsanéjavabelia:

—Nepénaponare, jai Jesùs.

Nexata bajaraponé jumaitsi:

—Tajatuxanenë, caeepatoyo abaxë necopare taméthëtsinexa taxa petëpaenë, jai bajaraponé Jesùsjavabelia.

⁶⁰ Jesùs nexata jumaitsi bajaraponéjavabelia:

—Copare matacabi apo pevereverecaejava apo pexainaevinexa peméthëcaenexatsi nijamonaemi itsa têpa. Xamë saicaya nepénaponare jivi netsipae-binexa pacuenia Dioso evetsijitsia daxita pijajivi mapanacuataje, jai Jesùs bajaraponéjavabelia.

⁶¹ Bajaraxuacujinae icatsia itsanë jumaitsi Jesùsjavabelia:

—Tajatuxanenë, jitsipajë tacapënaponaejava. Itsata abaxë caeepatoyo necopare tanapëjiobinexa tjabota pejinavanapaevijavabelia, jai bajaraponë.

⁶² Nexata Jesús jumaitsi bajaraponëjavabelia:

—Pajivi Dioso tonacuenebi ata, itsiata jamatabënajinabiaba pijaperujujamatabëcuene, xua exanabiaba, bajarapajivi apo caëjëpaetsi xanavaetsia Dioso petonacuenebinexa pitorobicueniatsi. Tsipaji najamatabëcueneepatajérerëcaeya nacueneba, jai Jesús bajaraponëjavabelia.

10

*Pacuenia Jesús pijajivi itoroba, setenta ponëbeje,
Dioso pejumelivaisi jivi petsipaebanajetarubenaenexa yabara pelivaisi*

¹ Jesús icatsia itsamonaе itapeta pijajivinexa, setenta ponëbeje. Bajarapamonaе Jesús itoroba anijanëbeje tsaponae Jesús pevajënaaya Dioso pejumelivaisi jivi petsipaebanajetarubenaenexa. Itoroba petsipaebanajetarubenaenexa daxita tomaranëjava, tsiquiritomaraxijava ata, itsaxuayo Jesús najetarucaejectsia.

² Jesús pijajivi penaropobivajënae, Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Ayaipabi pexainaenë caecuenia uba ayaijava peubijava. Nexata baja itsa tonaveretatsi peubijava, caejiviyobeje tonotatsi. Nexata notsi ata, abaxë bitso ayaijava tosajinatsi penotsinexa. Bajara pijinia itsi jivi ata Diosojavabelia penajamatabëcuene necopabivinexa. Abaxë sajina ayaubitsaëtoxaneto. Itsiata baitsi jane paxamë

Dioso panetonacuenebivi pacaejiviyomëbeje saya. Bajaraxuata Diosojavabelia pavajëre icatsia Dioso pijajivi pematatsënëa itsamonae pitorobinexa papecayavenonaenexa.

³ Paponare baja Dioso pejumelivaisi jivi panetsipaebanajetarubenaenexa. Panayajivitaeyajinavanapaename. Pacaitorobianatsi raja bitso pibisi-acuene pexanabiabivijavabelia. Pacuenia ovejaxi tsiayaitsi itsa jinavanapa pianaepanaevi nevëthë tuatuajëata, bajarapaitsimë tsane.

⁴ Pëtsa pacaponame itsacuenejava ata, doro ata, palata ata, zapato ata. Itsa pabajacobianame itsajivi namutoepatota, pëtsa bajayajebi pabarëcuaicuajamë tsanunubenaе panenajematsiyaniva.

⁵ Itsa pajonejitsiamë itsamonaе pijaboyalia, panejonevajënaelia copiaya pajumaitsimë tsane Diosojavabelia: “Dioso, yavenonare mapabopijivije jamatabëcuenexanepanaeja pejinavanapaenexa,” pajamë tsane copiaya Diosojavabelia.

⁶ Bajarapabo pexainaenë itsa jitsipaena pejamatabëcuene xanepanaejaexanaenexatsi Dioso, nexata bajaraponë jamatabëcuene xanepanaejaexanaenatsi Dioso. Itsa apo muxujitsipae tsane bajarapacuenia paneju-maitsijava, nexata Dioso apo jamatabëcuene xanepanaejaexanae tsanetsi bajaraponë.

⁷ Itsajota papatabiabianame, caebota pamajitabiabianame. Pëtsa panatixitaponame itsaboxijavabelia. Aurajibia paxaeyabiabianamenua xua pacaabata bajarapabota. Pëtsa pauramë panexaejava papecarajutsijava yabara.

Tsipaji panetsipaebixae patacaitorobilivaisi, pacarajutsiana panexaejava. Tsipaji itsajivi itsa tonacueneba itsanëjavabelia, barajutatsi pexaejava.

⁸ Itsa papatabiabianame tomarata, itsa pabota bajarapatomarapijivi xaniavaetsia pacacopiapita, nexata panaxaename xua pacaabata.

⁹ Bajarapatomarata pajamatejemayaexanaename piavitanevi. Pajumaitsimë tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane.

¹⁰ Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaename. Pajumaitsimë tsane bajarapatomarapijivijavabelia mapacueniaje:

¹¹ “Panijatomarapijiiatsapërë patataxuta rubena. Nexata panavetaxuvarëbajë. Bajarapacuenia panavetaxuvarëbajë panenayapëtaenexa Diosojavabelia panenaneconitsijava. Pananeconitame Diosojavabelia. Tsipaji apo panecopiapitsimë patanenamuxunaevetsinexamë palivaisi picani pacatsipaebijitsiatsi. Itsiata panenamuxunaevere paneyapëtaenexa mapalivaisije. Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane.

¹² Xaniajanë pacuenia pacatsipaebijitsiatsi. Pamatacabí Dioso naneconitsiaexanaena daxita pijaneconi pexainaevi, bajarapamatacabí bitso ayaicuenia Dioso naneconitsiaexanaena patomarapijivi apo pacacopiapitsi

tsane. Paneconivajétota bajayata Dioso naneconitsiaexana Sodoma tomarapijivimi, bajarapanenivajéto matatoxenetsia Dioso naneconitsiaexanaena patomarapijivi apo pacacopiaipitsi tsane, jai Jesús pijajivijavabelia, setenta ponébejejavabelia.

*Pacuenia Jesús jumaitsi patomarabejepijivi
Dioso xuabijitsia infiernojavabelia apo
pejumecovénëtsixaetsi yabara pelvaisi*

(Mt 11.20-24)

¹³ Icatsia Jesús jumaitsi pijajivijavabelia, setenta ponébejejavabelia:

—¡Bitso beiobi tsane Corazín tomarapijivi! ¡Bitso beiobi tsane Betsaida tomarapijivi ata! Pinijicuene Dioso pesaëta taexanaejavanë, xua itsajivi ata apo caëjëpaetsi pexanaenexa, bajarapatomarabejepijivi tae ata, itsiata apo nejumecovénëtsi. Apo copabi pibisiacuene pexanabiabijava. Apo najamatabëcuenepënëyorotsi Diosojavabelia. Bajayata Tiro tomarapijivimi, Sidón tomarapijivimi ata, petuatuajéta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Bajarapamonaemi nexata pibisiacuene pexanaebiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjajava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso

peyajamatabëcuenebëjaixae
pexanabiabineconi.

pibisiacuene

14 Itsiata baitsi jane Corazín tomarapijivi, Betsaida tomarapijivi ata, tae ata pinijicuene Dioso pesaëta taexanaejavanë, apo nejumecovënëtsi. Nexata pamatacabí Dioso naneconitsiaexanaena daxita pijaneconi pexainaevi, bajarapamatacabí bitso ayaicuenia Dioso naneconitsiaexanaenatsi. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapanéconivajëto matatoxenetsia Dioso bitso ayaicuenia naneconitsiaexanaena Corazín tomarapijivi, Betsaida tomarapijivi ata.

15 Capernaum tomarapijivi picani najamatabëxaina Dioso pecaponaejavatsi athëbëabetsia. Itsiata baitsi jane bajarapamonae apo tanejumecovënëtsixa, Dioso xuabianatsi infiernojavabelia, jai Jesús Corazín tomarabeje Betsaida tomarabejepijivi yabara.

16 Icatsia Jesús jumaitsi pijajivijavabelia, setenta ponëbejejavabelia:

—Pajivi pacanamuxunaevetsiana, bajarapajivi taenajë xanë tanenamuxunaevetsijava. Pajivi pacanayajiviitavetsiana, bajarapajivi taenajë xanë tanenayajiviitavetsijava. Bajarapajivi Dioso ata taenatsi Dioso penayajiviitavetsijava. Bajarapacuenia Dioso ata taenatsi penayajiviitavetsijava tsipaji xanë Dioso nitoroba, jai Jesús pijajivijavabelia Jesús pijajivi setenta ponëbeje pitorobivajënaeya.

Nexata jane baja Jesús pijajivi naropoba. Dioso pejumelivaisi jivi tsipaebanajetarubena daxita

tomaranëjava. Saicaya navecuanajetarubena ani-janëbeje tsaponae.

Pacuenia Jesús pijajivi, setenta ponëbeje, naviabanajetarubena, Dioso pejumelivaisi jivi daxitanacuanëjava petsipaebanajetarubenaecujinae, yabara pelivaisi

¹⁷ Jesús pijajivi, setenta ponëbeje, Dioso pejumelivaisi jivi daxitanacuanëjava petsipaebanajetarubenaecujinae, barëyaya naviabanajetarubena Jesúsjavaberena. Nexata pepatsicujinae bajarapamonae jumaitsi Jesúsjavabelia:

—Tajatuxanenë, dovathivi baja cajena itsa paitavetaponajë nevënëta, panejume-covënëtabiaba, jai bajarapamonae Jesúsjavabelia.

¹⁸ Jesús nexata jumaitsi pijajivijavabelia:

—Xanë baja cajena taniji dovathi athëbëvetsica pejopaejavatsica pacuenia yamaxë bajopaica.

¹⁹ Xanë baja cajena pacajamatabëcuene caëjëpaeyaexanatsi papecacaëjëpaejamatatabëcuene panejamatabëcuene matatoxenetsinexa vajavajabitsaënë dovathi. Nexata jomo pacuetsacuetsanae atamë tsane, aqueto ata pacuetsacuetsanae atamë tsane, apo pacaitsacuenciabi tsane.

²⁰ Itsiata pëtsa bitso pasivajamatabëcuenebarëyamë dovathi itsa paitavetame papecajumecovënëtsijava. Bitso jane pasivajamatabëcuenebarëyamëre tsavanapae Dioso papijajivixaemë Dioso papecavënëyaquinarubijava athëbëtatsia, jai Jesús pijajivijavabelia, setenta ponëbejejavabelia.

*Pacuenia Jesús jamatabëcuenebarëya yabara pelivaisi
(Mt 11.25-27; 13.16-17)*

21 Jesús bitso jamatabëcuenebarëyayaexanatsi Espíritu Santo. Nexata Jesús jumaitsi paxa Diosojavabelia:

—Axa, nevetsinë athëbëttsia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tsipaji pamonae bitso apo penacujarubivi ata, yapëtaeyaexaname pacuenia itsamatacabi daxita nijajivi evetsijitsiamë mapanacuataje. Bajarapamonae yapëtaeyaexanaenamé pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicuene yabaraje. Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

22 Icatsia Jesús jumaitsi pijajivijavabelia, jivijabelia ata:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcuenyapëtae pacuenia xanë jamatabëcueneitsinë, Dioso pexënatonë. Caenë, taxa Dioso, nejamatabëcuenyapëtanë. Itsajivi ata apo jamatabëcuenyapëtae pacuenia taxa Dioso jamatabëcueneitsi. Caenënë, xanë pexënatonë, jamatabëcuenyapëtaniji pacuenia taxa Dioso jamatabëcueneitsi. Pamonae tojitsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata

yapëtaeyaexanaenajë, jai Jesús pijajivijavabelia, jivijavabelia ata.

23 Nexata Jesús napënëyorota. Épijajivijavabelia jumaitsi:

—Paxamë baja pajamatabëcuenebarëyamë panetaexae pacuene baja pataeponame.

24 Xaniajanë pacuenia pacatsipaebijitsatsi. Bajayata ayaibitsaëto profetavimi necopiaevetavanapa picani tanetaenexa tapatsijavatsica. Nacuaevetsivimi ata necopiaevetavanapa picani tanetaenexa tapatsijavatsica. Itsiata netaenejeva tapatsijavatsica, bajarapamonaemi tēpa baja. Jamatabëjumetaeyabiabuua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisinë, bajarapamonaemi tēpa baja, jai Jesús pijajivijavabelia.

Pacuenia pexaniajamatabëcuenenë, Samaria nacuapijinë, yavenona itsanë yabara pelivaisi

25 Itsamatacabí Jesús livaisi tsipaebanuca pijajivijavabelia. Nexata bajarajota judíovi pecujarubinë nonotapuna. Bajaraponë Jesúsjavabelia jamatabëcueneëjëbiaya jumaitsi:

—Jesús, ¿detsa xua exanaenajë Dioso tanera-jutsinexa matacabi apo pevereverecaejava? jai judíovi pecujarubinë.

26 Nexata Jesús jumaitsi judíovi pecujarubinëjavabelia:

—¿Detsa Jane jumaitsi bajarapacuene yabara bajayata Dioso Moiséspijinëta penajumecopatsilivaisi jivi pejumecovënëtsinexa? jai Jesús.

27 Nexata judíovi pecujarubinë jumaitsi Jesúsjavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Daxita panejamatabëéthëtojavavetsina, daxita panejamatabécueneta ata, daxita panesaëta ata, daxita panenajamatabëxainaesaëta ata, pasivamëre panijatuxanenë panijaDioso. Pasivamëre itsajivi ata pacuenia paxamë panijacuata panasivamë,” jai bajayata Dioso Moiséspijinëta penajumecopatsilivaisi, jai judíovi pecujarubinë Jesúsjavabelia.

28 Nexata icatsia Jesús jumaitsi judíovi pecujarubinëjavabelia:

—Xaniavaetsia nejumecanaviatame. Bajara pacuenia exanaponaponare. Nexata pepacuene xainaename matacabí apo pevereverecaejava, jai Jesús.

29 Itsiata baitsi jane judíovi pecujarubinë bijiaya jumecovënëta bajarapalivaisi. Asivaya apo tae itsamonae ata. Bajaraxuata judíovi pecujarubinë matavëjëa jumaitsi Jesúsjavabelia:

—¿Detsa nexata pitsijivi asivanë tsane? jai judíovi pecujarubinë.

30 Nexata icatsia Jesús jumaitsi judíovi pecujarubinëjavabelia mapacueniaje:

—Pebi namutua najetaruca Jerusalén tomaraverena. Naropota pepatsinexa Jericó tomabarera. Nexata jivi pecaponaejava peyacajérëbabibivi, bajaraponë epatua vaetabatsi. Daxita pecobecovë yacajérëtatsi. Penaxatabijavanëmi ata yacajérëtatsi. Nexata

pinijicuenia conibabiatsi. Puenetabuatatsi picani petépanucaenexa bajarajota.

³¹ Nexata bajarapanamutua sacerdotenë najetaruca, templobota penacuenebababinë. Nexata sacerdotenë bajaraponë itsa taeyabuata, matavaquetanucapona. Pona baja rovia.

³² Bajaraxuacujinae icatsia bajarapanamutua itsanë, templobota penacuenebababinë, najetaruca. Bajaraponë taenuc妖opa. Bajaraxuacujinae matavaquetanucapona. Pona baja icatsia rovia bajaraponë ata.

³³ Bajaraxuacujinae icatsia bajarapanamutua Samaria nacuapijinë najetaruca. Nexata bajaraponë itsa taeyabuata, tsitabejiobitsi bitso.

³⁴ Nexata bajaraponë cujilia. Vajënëvaëba aceiterata, vinorata yajava. Vajënëcëba papaëbërëpanaxita. Bajaraxuacujinae Samaria nacuapijinë pijaburrojumata buatsia. Nexata bajaraponë capona jivi pepatabiabiboyabelia. Bajarajota Samaria nacuapijinë eveta xaniavaetsia.

³⁵ Meravia pitsijavata Samaria nacuapijinë itsa baja ponaejitsia itsabelia najetaruca, juta anijapalatanëbeje, bitso penamatamotsinëbeje. Matamota bajarapabo pexainaenë. Jumaitsi bajaraponëjavabelia: "Netoevetsianame maponëje. Itsa matamovereverecaena, pematatsënëea nevetsimatamo, bajarapapalata icatsia caevëarena camatamotsianatsi," jai Samaria nacuapijinë bo pexainaenëjavabelia, jai Jesús mapacueniaje judíovi pecujarubinëjavabelia.

³⁶ Bajaraxuacujinae judíovi pecujarubinëjavabelia Jesús yanijoba bajarapalivaisi

yabara. Jumaitsi mapacueniaje:

—Pamonae, acueyabi ponëmaxëto, taeyabuata pecobecovë peyacajérëtsinëtsi. ¿Detsa ponë bajara-pamonaeyajuvënëñë asivaya tane bajaraponë? jai Jesús.

37 Nexata judíovi pecujarubinë jumaitsi Jesúsjavabelia:

—Ponë pitaxutotsoniataexae yavenona, bajaraponë asivaya tane, jai judíovi pecujarubinë Jesúsjavabelia.

Nexata Jesús jumaitsi judíovi pecujarubinëjavabelia:

—Ponare baja. Xamë ata bajarapacuenia asivaya itaxutotsoniataeyabiabianame itsamonae ata, jai Jesús judíovi pecujarubinëjavabelia.

Pacuenia Jesús jumaitsi Martabeje Maríabeje pijabota yabara pelivaisi

38 Jesús, pijajivi yajava, najetaruca pevajénaeyabelia. Nexata tomarayota pata. Bajarapatomarayota Jesús xaniavaetsia copiapitatsi petiriva, Martavënëva. Nexata Marta pijabota Jesús napata.

39 Marta pejuyapijiva xaina, Maríavënëva. Nexata María eca Jesús pitabarata penamuxunaevete-caenexa Jesús petsipaebilivaisi.

40 Nexata Marta bitso jamatabëcueneenatsi penacuenabijava, Jesús pexaejavanexa ata pemitsaexanaenexa. Nexata Marta cujilia Jesús. Jumaitsi:

—Tajatuxanenë, tajuyapijiva netocopata caevanë taexanaenexa daxita xua exanaejitsianë.

Itorobare taneyavenonaenexa, jai Marta Jesúsjavabelia.

41 Nexata Jesúsjumaitisi Martajavabelia:

—Marta, xamë bitso cajamatatabëcueneena nexanaenexa daxita xuanë jamatabëexaname.

42 Caejava bitso xanepana nexanaenexa, tane-namuxunaevetsinexamë. María baja cajena tane-namuxunaeveteaexae tatsipaebilivaisi, catsuit-apeta pexaniacuene daxitacuene matatoxenetsia. Nexata acuenebi itsajivi ata peyacajérëtsijavatsi tatsipaebilivaisi pejumetaejava, jai Jesúsj Martajavabelia.

11

Pacuenia Jesúspijajivi tsipaeba pacuenia Diosojavabelia vajëcae�itsiyabara pelivaisi

(Mt 6.9-15; 7.7-11)

1 Jesúsvajëtabiaba Diosojavabelia. Nexata itsamatacabí, itsa baja Jesúsnajumevereta pevajëtsijava Diosojavabelia, Jesúspijajiviyajuvënëñë jumaitisi Jesúsjavabelia:

—Patajatuxanenë, panejumecujarubare pacuenia pavajëtabiabijitsianë Diosojavabelia. Pacuenia Juanpijinë jivibautisabinëmi jumecujarubabiaba pijajivi pacuenia vajëtabiabijitsia Diosojavabelia, bajara pijinia pacuenia xamë ata panejumecujarubare pavajëtabiabijitsianë Diosojavabelia, jai Jesúspijajiviyajuvënëñë.

2 Jesúsnexata jumaitisi pijajivijavabelia mapacueniae:

—Itsapavajëtabiabianame Diosojavabelia, pajumaitsimëtsabiabi tsane:

Taxamë, athëbëtatsia neecaenë, jitsipajë pecayaiy-ataejava daxitajivi. Jitsipajë naxanitsi-ayo pecopiapatsijava daxita nijajivi nevet-sijava mapanacuataje. Jitsipajë daxitajivi mapanacuata nejitsipaecuenia pecatoex-anabiabijava, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje.

³ Caematacabí canacujitsia panerajure pataxaejanexa pacuenia panamatavenonajë.

⁴ Panebarajamatabëcuené xanepanarenua nitabarata pibisiacuene pataexanaejava. Nexata panevecuaajibiaexanare pibisiacuene pataexanaeneconi. Tsipaji paxanë ata itsamonaë paxanëjavaberena pibisiacuene patanexanaejava pajamatabëcueneceaevajë. Nexata pabaramatabëcueneanaxepanajë. Panevecuatsare dovathi patanejamatabëcueneejëbiyaniva. Panecapanepare jane pibisiacuenevecua, pajamë tsane mapacueniaje itsa pavajëtabiabianame Diosojavabelia, jai Jesús pijajivijavabelia.

⁵ Icatsia Jesús pijajivijavabelia jumaitsi comparacióncuenia Jesús pijajivi peyapëtaenexa pacuenia vajëcabiabijitsia Diosojavabelia:

—Paxamëyajuvënë meravi tuatuajëta ponae-jitsipa bitso peyapëtaenëtsi pijaboyabelia. Nexata jumai tsipae: “Cacovaetatsi acueyabi pa-panbëyobeje.

⁶ Itsanë raja, taneyapëtaenë, tajëverena peponaenë, aeconoxae tjabota netopata. Nexata bitso piajani. Itsiata xanë apo xainaenë

itsacuenejavayo ata pexaejava tarajutsinexa," jai tsipae paxamëyajuvënë meravi tuatuajëta peyapëtaenëtsijavabelia.

⁷ Nexata bo ënëverena bajaraponë jumepitsipatsi. Jumaitsi tsipae: "Nejamatabëitonotsipame. Baupa rabaja xaniavaetsia xatatanutajë. Taxi raja barëmajitanucajë caecamata. Nexata acuenebi tanonotapunaejava tacarajutsinexa xua nevajëtame. Itsa nonotapunaejitsipajë, yaitavabijitsipajë taxi," jai tsipae peyapëtaenëtsi. Itsiata baitsi jane bajaraponë perajutsinexatsi ajumesaëya vajëcaponaejitsipa.

⁸ Xaniajanë pacuenia pacatsipaebijitsiatsi. Bajaraponë apo jamatabënonotapunae ata, itsiata nonotapunaejitsipa perajutsinexa pecovaebijavatsi. Itsiata peyapëtaenëxaetsi, bajarapacuenia apo rajutsi tsipae. Biji rajane rajutsipa daxita pacuenia namatavenona ajumesaëya pevajëcaponaexaetsi.

⁹ Xaniajanë pacuenia pacatsipaebijitsiatsi. Itsacuenejavayo itsa pacatonaxuabijitsipa, nexata bajayajebi ata pajaitsipame matapania panecaxitajarabijavabelianexa. Bajara pijinia pacuenia bajayajebi ata pavajëtabiabianame Diosojavabelia papecajumecovënëtsinexa. Bo ata itsa baupa xatatanuta, nexata asaëyata pabaupadocodocotsipame matapania papecatobaupatsijavabelianexa. Bajara pijinia pacuenia asaëyata pavajëtabiabianame Diosojavabelia papecajumecovënëtsinexa.

¹⁰ Bajarapacuenia asaëyata pavajëtabiabianame Diosojavabelia. Tsipaji pajivi vajëtabiaba, rajutabiabatsi. Pajivi ata jaitabiaba, caxitajarababi-

aba. Pajivi ata baupa docodocotabiaba, tobau-patabiabatsi, jai Jesús pijajivijavabelia compara-cióncuenia.

11-12 Icatsia Jesús jumaitsi pijajivijavabelia:

—Paxamë papebijivimë, panexi panexainaevi. Panexénatonëyo itsa pacavajéta panbë, apo panacoxirajutsimë tsipae iboto. Itsa pacavajéta dujuainëyo, apo panacoxirajutsimë tsipae jomo. Itsa pacavajéta vacaratobëto, apo panacoxirajutsimë tsipae aqueto.

13 Paxamë paneajamatabëcuenebejevi ata, payapétaneme panenacoxirajutsinexa pexaniajava. Paneaxa, athébëtatsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itsa pavajétame. Bajaraponë rajutsiana Espíritu Santo daxita pamonae vajétatsi, jai Jesús pijajivijavabelia.

Pacuenia itsamonaे Jesùs yabara jamatabëcuenenavëxaniabiaya jumaitsi: “Beelzebú raja pesaëta Jesùs dovathi jìvivecua capitsapapona,” jai yabara pelivaisi

(Mt 12.22-30; Mr 3.20-27)

14 Pebi ponapona, dovathi pejamatabëcueneta apo penatsipaebinë. Nexata bajaraponë Jesús dovathi vecuacapitsapa. Pebi baja dovathi Jesús itsa vecuacapitsapa, natsipaeba baja. Jivibitsaëtoxaneto petaevi bajarapacuene, bitso jamatabëcuenenabenajaca.

15 Itsiata baitsi jane itsamonaе fariseovi Jesús baracuaicuajaitsi pibisiacuenia.

—Maponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pepo penamatacitorobinë, jai fariseovi jamatabëcuenenavëxaniabiaya Jesús yabara.

¹⁶ Itsamonae icatsia fariseovi Jesús picani jamatabëcueneëjëbiaya itorobatsi pinijicuene Dioso pesaëta pexanaejava Jesús petsitaexanaenexa. Bajarapacuenia picani itorobatsi fariseovi peyapëtaenexa pepacuene Jesús Dioso pitorobinëcuenetsitsica.

¹⁷ Itsiata Jesús jamatabëcuneyapëtane pacuenia fariseovi sivanajamatabëxainatsi. Nexata fariseovijavabelia Jesús jumaitsi mapacueniaje:

—Nacaenacuapijivi ata itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa daxita bajarapamonae. Bajara pijinia pacuenia nacaemonae ata itsipae. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata.

¹⁸ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaë taejitsipa pijajivi. Itsajamatabëcuene vecuaxainaejitsipa pijajivi. Pesaë ata apo xainaponae tsipae. Mapacuenia pacatsipaebatsije tsipaji paxamë xanë yabara apo pacanaëjëtsinejevamë jamatabëcuenenavëxaniabiaya pajumaitsimë: “Jesús raja dovathi jivivecua capitsapabiaba Beelzebú pesaëta,” pajamë xanë yabara.

¹⁹ Paxamë ata panijajivi dovathi jivivecua

capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detса nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitsijava xanë yabara.

20 Espíritu Santo pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatuajëta, jai Jesús fariseovijavelia.

21 Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia comparacióncuenia jumaitsi fariseovijavelia mapacueniaje:

—Ponë bitso piasaënë, aitatsacaya pijanae cobenaevetabiabijitsipa pijabo, itsamonae peyacarëjëtsiyanivatsi pecobecovë. Nexata daxita pecobecovë xaniavaetsia tobobenaejitsipatsi, jai Jesús dovathi pijajivi pevetsijava yabara.

22 Icatsia Jesús pijacuata nayabarajumaitsi mapacueniaje:

—Itsiata baitsi jane itsa najetarucaeijitsipa itsanë bitso piasaënë boxainaenë matatoxenetsia, nexata cueneamoneyabijitsipatsi. Aitatsacaya pijanae cobenaevetabiabi ata tsipae, itsiata vecuapitsipatsi pijanae, daxita pecobecovëjavaxi yajava, nayabarajai Jesús pijacuata comparacióncuenia dovathi pejamatabëcuenenamoneyabijava yabara.

23 Icatsia Jesús jumaitsi fariseovijavelia:

—Pajivi apo neyavenonaeyacaetuatsi jivi Dioso pijajivinexa, bajarapajivi betajavajabitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejume-covënëtsiviminexa, jai Jesús fariseovijavabelia.

Pacuenia dovathi jivitonë pevejamatabëpitsapaecujinaetsi, icatsia naviarena pecovëyaberena petsijamatabëecaenexatsi icatsia yabara pelivaisi
(Mt 12.43-45)

²⁴ Icatsia Jesús jumaitsi fariseovijavabelia:

—Dovathi itsa vejamatatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonenexa dovathi penacueraevetsinexa bajaraponëjavata. Itsa apo caxitajarabi, ponëjavabelia tsijamatabëjonejitsia, nexata dovathi jamatabëjumaitsi: “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonenexatsi.

²⁵ Dovathi baja caevëa itsa naviarena, caxitajaraba peyajavaponaponaenëmitsi. Nexata peyajavaponaponaenëmitsi pejamatabëéthëto, dovathi tane bepënësajinecaebo, bepënëxaniavaetetsibo, bepiracajuetetsibo.

²⁶ Nexata dovathi icatsia sivapona peyajavapatsinexarena itsadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyajavaponaponaenexa. Belia jane baja pebi dovathivi bitso bejiobiaexanatsi. Copiaya

abaxë caenë itsa tsijamatabëecatsi pacuenia bejiobiaexanabiabatsi, matatoxenetsia bejiobiaexanatsi, jai Jesús fariseovjavabelia.

Pacuenia Jesús tsipaeba xua yabara jivi jamatabëcuenebarëya yabara pelivaisi

27 Itsa abaxë Jesús livaisi tsipaeba fariseovjavabelia, petiriva bajarapajivi bitsaëtoxanetoyajuvënëva pinijijumeta vavajai tsaxuabi. Jumaitsi Jesúsjavabelia:

—¡Jamatabëcuenebarëya baja cajena ena, pecanavitaniabiva, pecavitsatsiva! jai petiriva Jesúsjavabelia.

28 Nexata Jesús jumaitsi bajarapovajavabelia:
—Xaniajamë rabaja. Itsiata baitsi jane pamonae jumetane Dioso pejumelivaisi, nexata itsa jumecovënëta bajarapalivaisi, bajarapamonae jane bitso jamatabëcuenebarëya tsavanapae taena matatoxenetsia, jai Jesús petirivajavabelia.

Pacuenia pibisiajamatabëcuenevi Jesús picani itorobatsi Dioso pesaëta pinijicuene pexanaejava petsitaexanaenexa yabara pelivaisi

(Mt 12.38-42; Mr 8.12)

29 Jivi ayaibtsaëtoxaneto Jesús itsa matatoyorotsia nacaetutatatsi, nexata Jesús jumaitsi:

—Pamonae aeconoxae jinavanapa, bitso pibisiajamatabëcuenevi. Bajarapamonae picani nitoroba Dioso pesaëta pinijicuene taexanaejava tatsitaexanaenexa, taneyapëtaenexa Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Bajayata pacuenia Diosojumepaebinëmi profeta Jonáspijinë

exanatsi, bajara ëpitsicuene taneexanaejava, tsitajëtsianajë.

³⁰ Bajayata daxita Nínive tomarapijivi yapëtane profeta Jonáspijinë Dioso pitorobinëcuenetsi. Tcipaji ayaicuene exanatsi Dioso. Bajara pijinia pacuenia xanë ata, Daxitajivi Pematapijijnënë, pinijicuene Dioso nexanaena. Nexata daxita pamonae aeconoxae jinavanapa, neyapëtaena pepacuene Dioso athëbëvetsica taneitorobinëcuenetsica.

³¹ Itsamatamacabi copiapatsiana Dioso penaneconitsiaexanaematacabinexa daxita pijaneconi pexainaevi. Bajarapamonae nubianatsi Dioso pitabarata. Nexata bajarapamatamacabi bajayata povami ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonae aeconoxae jinavanapa, Dioso apo pejumecovënenëtsivi. Bajarapova neconitsiana tsipaji bajayata bajarapovami tajë nacuatabuverena ata muxunanajetaruca pejumetaenexa Salomónpijinë, bitso daxitalivaisi peyapëtaenëmi, petsipaebilivaisi. Xanë raja majotaje ponaponajë, bitso ayajamatatabëcuenenënë Salómonpijinëmi matatoxenetsia. Itsiata baitsi jane pamonae aeconoxae jinavanapa mapanacuataje, apo nemamuxunaevetsi. Bajaraxuata ayaineconi xaina Diosojavabelia, jai Jesús.

³² Icatsia Jesús jumaitsi jivi ayaibitsaëtoxanetojavabelia:

—Bajayata Nínive tomarapijivi itsa jumetane Dioso pitorobilivaisi, Jonáspijinë petsipaebilivaisi, copaba pibisiacuene

pexanaejava. Najamatabëcuenepënëyorota
 Diosojavabelia. Pamatacabi copiapatsiana
 Dioso penaneconitsiaexanaematacabinexa
 daxita pijkeconi pexainaevi, bajarapamatacabi
 Nínive tomarapijivimi ata nonobapunaena
 Diosojavabelia peneconitsinexa pamonaes
 aeconoxae jinavanapa, Dioso apo pejume-
 covënëtsivi. Tcipaji xanë majota ponaponajë
 bitso ayajamatabëcuenenënë Jonáspijinëmi
 matatoxenetsia. Itsiata baitsi jane pamonaes
 aeconoxae jinavanapa mapanacuataje,
 tsipaebi atanë Dioso pejumelivaisi, apo
 najamatabëcuenepënëyorotsi pibisiacuene
 pexanaejavavecua. Bajaraxuata Dioso
 naneconitsiaexanaenatsi bajarapamonae, jai
 Jesús jivi ayaubitsaëtoxanetojavabelia tajëvelia
 pevajunupaebijavata itsamatacabi Dioso jivi
 penaneconitsiaexanaejavanexa.

*Pacuenia vajaitaxuto belámparabë yabara peliv-
 aisi*
(Mt 5.15; 6.22-23)

³³ Icatsia Jesús jumaitsi jivibit-
 saëtoxanetojavabelia:

—Itsajivi ata lámparabë pitanojotsicujinae, apo
 mataacatetsi itsacuenejavata. Cajoniënëalia ata
 apo etsi lámparabë. Biji rajane athëbëyo etsia. Jivi
 boyaberena pejonevi tsivajënaiteyotecaejitsia.

³⁴ Lámparabë boënëta itayoteca xaniavaetsia
 vajataenexa. Bajara pijinia itsi paneitaxuto
 ata. Paneitaxutoxanepanaexae, xaniavaetsia
 panatsivajënaetaneme. Itsä paitaxutobejemë

tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava épaxamënexa, nexata bitso pajamatabëcueneitaquirimë tsipae.

³⁵ Panaya jivitaema xua panajamatabëxainaabiabame, papecajamatabëcuene aitaquiriyaexanaeyaniva.

³⁶ Itsa paexanavanapaename pacuenia Dioso pacaitoroba, nexata pacajamatabëcueneitayotsiana Dioso. Tsiquirijavayo ata apo aitaquiri tsane panejamatabëcuene. Nexata pacuenia lámparabë daxita boënë xaniavaetsia itayoteca pecotiata, bajara pijinia pacuenia paxamë ata pacajamatabëcueneitayotsiana Dioso, jai Jesús jivi ayaubitsaëtoxanetojavabelia.

Pacuenia Jesús tsipaeba fariseovijavabelia, judíovi pecujarubivijavabelia ata, pacuenia bajarapamonae naneconita Diosojavabelia yabara pelivaisi

(Mt 23.1-36; Mr 12.38-40; Lc 20.45-47)

³⁷ Itsa baja Jesús najumevereta livaisi petsipaebijava, nexata fariseonë junatatsi Jesús penanabaninexa fariseonë pijabota. Jesús nexata na-joneya fariseonë pijaboyalia. Naeca mesa mux-uneneta penanabaninexa.

³⁸ Fariseonë itsa tane Jesús penabanijava anijatonë nacobequiatsinejeva, fariseonë

jamatabëcuenenabenajaca. Pacuenia daxita judíovi pijacuenia anijatonë nacobequiatabiaba penabanivajënae, apo itsi Jesús.

39 Nexata Jesús jumaitsi fariseovijavabelia:

—Paxamë pafariseovimë panecaxaevajënae plato, taza ata, naniavelia bapaquiatame xaniavaetsia panijacuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Bajara-pacuenia paquiatabiabi atamë xaniavaetsia panecaxaejavanënexa papecajamatabëcuene bijianaeyaniva picani, itsiata pananeconi-tapiname Diosojavabelia. Tsipaji bajara-pacuenia paquiatabiabi atamë, caranata panejamatabëëthëtotä panajamatabëxainabiabame pibisiacuene. Panajamatabëxainabiabame itsanë pecobecovë paneyacajérëtsinexa. Panajamatabëxainabiabamenua paneexanaenexa pibisiacuene ata.

40 ¡Apo paneyapëtaevi baja rovia! Dioso cajena pexanaenë daxitacuene. Dioso baja cajena pacaperabëexana. Pacajamatabëëthëexananua.

41 Pejanajamatabëcuene itsa paxainaejitsipame, nexata pexaniacuene patoexanabiabijitsipame itsamonaejavabelia. Daxita xua ata papecajamatabëcuene bijianaeyaniva, pajanijunavame panexaeyaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavabelia.

42 Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata diez xuabejeyajuvënëjava, caejavayo, parajutabiabame ofrendacuenia Diosojavabelia. Xanepana baja picani bajarapacuenia panerajutabiabijava Diosojavabelia. Itsiata bajarapacuenia parajutabiabi atamë, pepacuene apo pajitsipaemë Dioso. Bajaraxuata pananeconitame Diosojavabelia. Pananeconitamenua Diosojavabelia tsipaji pacuene ata picani xanepana panetoexanabiabinexa itsamonaejavabelia, apo pasivanajamatabëxainaemë. Bajaraxua picani paxamë bepanajamatabëxainaemë panetoexanabiabinexa itsamonaejavabelia, jai Jesús fariseovijavabelia.

43 Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! ¡Tsipaji bepaayajamatatabëcunevimë panataeyabiabame! Judíovi penacaetuatabiabibonëjava itsa panajoneyabiabame, pajitsipabiabame paneenaenexa peyaiyataevitsi penaenexa petsinubijavanëta. Pajitsipabiabamenua jivi papecabajacobinexa callejava bitso yaiyataeya, jai Jesús fariseovijavabelia.

44 Icatsia Jesús jumaitsi judíovi pecujarubivijavabelia, fariseovijavabelia ata:

—¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Paxamë itajara

jivi bepatsita pexaniajamatabëcuenevimë tsabiabi pibisiajamatabëcuene panexainaevi ata. Pacuenia itsamonaе pona jivi pemëth  an   matats  n  a apo peyap  taexae xua xaina b  p  n  areca, bajara pijinia itsi pamonaе pacayaiyatane apo peyap  taexae pacuenia pajamatabëcuenebejem   b  p  n  a. Bajarapamonae pacayaiyatane tsipaji apo yap  tae bajarapamonae b  p  n  a paneajamatabëcuenebejjava, jai Jes  s jud  ovi pecujarubivijavabelia, fariseovijavabelia ata.

⁴⁵ Nexata bajarapacuenia Jes  s pejumaitisijavata, jud  ovi pecujarubiviyajuv  n  n   jumaitsi Jes  sjavabelia:

—Jes  s, itsa mapacuenia jumaitsim  je, paxan   yabara ata pibisiacuenia jumaitsim  , jai Jes  sjavabelia jud  ovi pecujarubiviyajuv  n  n  .

⁴⁶ Jes  s nexata jumaitsi jud  ovi pecujarubin  javabelia:

—  Paxam   ata, jud  ovi panecujarubivi, ayaineconi panatsixainame Diosojavabelia! Palivaisian   ayap  beje itsajivi ata pejumecov  n  tsinexa, bajarapalivaisian   jivi patsipaebabiabame pejumecov  n  tsinexa. Bajarapalivaisian   patsipaebabiabi atam   itsamonaе pejumecov  n  tsinexa, paxam   itsiata apo panajamatab  xainaem   paneexanaenexa bajarapacuenia, jai Jes  s jud  ovi pecujarubin  javabelia.

⁴⁷ Icatsia Jes  s jumaitsi jud  ovi pecujarubivijavabelia:

—  Paxam   jud  ovi panecujarubivi, ayaineconi panatsixainame Diosojavabelia! Bajayata pamatacabu jinavanapa panijasalinaivimi,

beyaxuababiaba Diosojumepaebivimi profetavi. Nexata juya paxamë bajarapaprofetavimi pemëthëanëjumavereca bonë paexanajebame, jivi itsa tane bajarapabonë, penajamatabenapitabiabinexa bajarapaprofetavimi.

48 Bajarapacuenia paneexanaexae, pacuenejëpame bajayata panijasalinaivimi pexanaecuene. Panijasalinaivi bajayata beyaxuababiaba profetavimi. Nexata juya paxamë bonë paexanajebame bajarapaprofetavimi pemëthëanëjumavereca, jai Jesús judíovi pecujarubivijavabelia.

49 Icatsia Jesús jumaitsi judíovi pecujarubivijavabelia:

—Bajarapacuenia paneexanaejavanexa yabara, daxitacuene Dioso peyapëtaenëxae, bajayata tajëvelia jumaitsi paxamë yabara mapacueniae: “Bajarapamonaejavabelia toitorobianajë profetavi. Toitorobianajëua apóstolevi ata. Bajarapamonae itsiata beyaxuababiabiana tatoitorobiviyajuvënëvi. Bejobiaexanabiabianua tatoitorobiviyajuvënëvi,” jai baja cajena bajayata tajëvelia Dioso bajarapacuenia paxamë paneexanaejavanexa yabara.

50 Dioso baja cajena nacua pexanaejavaveliacujinae, panijasalinaivimi beyaxuabapona profetavimi. Nexata bajarapaneconi yajava paxamë pananeconitame Diosojavabelia. Nexata bajarapaneconi yajava Dioso pacananeconitsiaexanaena, paxamë aeconoxae mapamatacabitaje panejinavanapaevi.

51 Panijasalinaivimi profetavimi pebeyaxuabaponaejava, taxuxuaba Abelpijinëta.

Bajaraxuacujinae icatsia pevajënaeyabelia beyaxuabapona itsaprofetavimi ata. Nexata bexéjavaberena ata icatsia panijasalinaivimi beyaxuaba Zacaríaspjinëmi. Zacaríaspjinëmi panijasalinaivimi beyaxuaba templobopanabota, baitsi templobobeje altarvénëjavabeje petuatu-ajéta. Xaniajanë pacuenia pacatsipaebijitsiatsi. Nexata bajarapaneconi yajava Dioso pacananeconitsiaexanaena paxamë, aeconoxae mapamatacabitaje panejinavanapaevi, jai Jesús judíovi pecujarubivijavabelia.

52 Icatsia Jesús jumaitsi judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! “Vaxaitsi xaniavaetsia Dioso pejumelivaisi yapëtanetsi,” pajamatabëjamë tsabiabi picani. Itsiata baitsi jane apo payapëtaemë. Saicayalivaisi Dioso pejumelivaisivecua jivi patsipaebabiabame. Pacuenia bo baupaxatata jivi pejoneyaniva, bajara saya pacuenia paxamë paexaname jivjavabelia. Nexata itsamonaе jitsipae ata pejonejava picani Dioso pijanacuayabetsia, paxamë saicayalivaisi panetsipaebabiabixae, apo pacopatsimë pejonenexa Dioso pijanacuayabetsia. Paxamë ata apo pajitsipaemë panejonenexa Dioso pijanacuayabetsia, jai Jesús judíovi pecujarubivijavabelia.

53-54 Bajarapacuenia Jesús pejumaitsicujinae, pitsapa baja bovecua. Bajaraxuacujinae judíovi pecujarubivi, fariseovi yajava, Jesús itoyatsi. Nexata jamatabëitonotabiabatsi. Jamatabëcueneëjëbiaya livaisi yanijobabiabatsi. Nexata Jesús bijiaya itsa jumecanaviata,

bajarapalivaisi yabara peneconitsinexatsi picani nacuaevetsinëjavabelia.

12

Pacuenia Jesús tsipaeba jivi pejumecovënëtsiyani fariseovi petsipaebilivaisitsi yabara pelivaisi

¹ Penacaetuataponaejavata jivi pepo ayaibitsaëtoxaneto cajena tsaponae, baitsi miles pajivibeje. Nexata jivi nataxucuetsabataxu-abapona. Nexata Jesús pijajivijavabelia copiaya tsipaeba livaisi, pejumecovënëtsiyani fariseovi itsa tsipaebatsi saicayalivaisi Dioso pejumelivaisivecua. Jesús pijajivijavabelia jumaitsi mapacueniae:

—Xania panayajivitaema fariseovi pijalevadurayaniva. “Levadura,” itsa janë, peyamaxëitojorobilivaisi yabara pacajumaitsitsi. Fariseovi raja bepacatsita pexaniajamatabëcuene itajara tsane, pibisiajamatabëcuene pexainaevi ata.

² Daxita abaxë palivaisianë jivi aeconoxae apo yapëtae, bajarapalivaisianë itsamatacabí daxitajivi yapëtaeponaena xaniavaetsia. Pibisiacuene muetsia itsajivi pexanaejava ata, itsamatacabí xaniavaetsia yapëtaena daxitajivi.

³ Xua ata muetsia pavajunupaebame meravi, bajaraxua ata, itsamatacabí itsajivi vajunupaebiana matacabita daxitajivijavata. Xua ata pënëyatuuucsiboënëta baupa xatatsiaya muetsia vëpaxapaxajaiya pavajunupaebame, bajaraxua ata itsamatacabí itsajivi pinijijumeta

vajunupaebiana jivi penacaetuatsijavata, jai Jesús pijajivijavabelia.

*Pacuenia Jesús tsipaeba pijajivi pecujunaviyaniva jivibeviyabara pelivaisi
(Mt 10.26-31)*

⁴ Icatsia Jesús jumaitsi pijajivijavabelia:

—Tajamonae, pacatsipaebijitsatsi. Pëtsa pacujunavame jivibevi ata. Bajarapamona pacabeyaxuabi ata tsipae, acuenebi matavëjëa papecaitSacueniabinexa.

⁵ Biji rajane pacatsipaebijitsatsi panecujunavinexa Dioso. Tsipaji Dioso caëjëpatsi papecaxuabinexa infiernojavabelia papecabeyaxuabicujinae, jai Jesús pijajivijavabelia.

⁶ Icatsia Jesús jumaitsi pijajivijavabelia:

—Cinco ponëbeje baratsui saya namatamota anijapalatanëyobeje. Tsipaji amatamobi. Bajara-pacuenia amatamobi ata, itsiata caenëyo ata Dioso apo nacofënëtsi bajarapabaratsuiyajuvënëñë.

⁷ Paxamë rabiji bitso Dioso pacasiva baratsui matatoxenetsia. Tsipaji panamatamotame baratsui matatoxenetsia. Dioso bitso papecasivaxae, panematanatoxi ata, caematanatoyo canacujitsia, Dioso baja cajena namataëjëta. Bajaraxuata pëtsa pacujunavame itsacuenejava ata, jai Jesús pijajivijavabelia.

*Pacuenia Jesús pijajivi apo benayavajunuaxainaе Jesús pijajivicuene yabara pelivaisi
(Mt 10.32-33; 12.32; 10.19-20)*

⁸ Icatsia Jesús jumaitsi pijajivijavabelia:

—Pacatsipaebijitsiatsi raja. Daxita pamonae tajajivi, jivi pitabarata navajunupaebiana tajajivicuene. Bajarapamonae juya xanë, Daxitajivi Pematapijinënë, vajunupaebianajë tajajivicuene Dioso pijáangelevi pitabarata.

⁹ Pamonae jumai tsane itsamonaejavabelia: “Xanë cajena Jesús apo pijajivitonënë,” jai tsane, bajarapamonae yabara juya xanë, jumaitsinë tsane: “Mara pamonae cajena apo tajajivije,” janë tsane Dioso pijáangelevi pitabarata, jai Jesús pijajivjavabelia.

¹⁰ Icatsia Jesús jumaitsi pijajivjavabelia:

—Pajivi pibisiacuenia nebaracuaicuajai ata, xanë, Daxitajivi Pematapijinënë, bajarapaneconi yabara itsa navajéta Diosojavabelia, itsiata vecuaajibiaexanaenatsi Dioso. Itsiata baitsi jane pajivi pibisiacuenia baracuaicuajai Espíritu Santo, bajarapajivi bajarapaneconi Dioso apo vecuaajibiaexanaetsi tsane, jai Jesús pijajivjavabelia.

¹¹ Icatsia Jesús jumaitsi pijajivjavabelia:

—Itsa pacacaponaelia tomaraevetsivijavabelia, judíovi penacaetuatabiabibojavabelia ata, pacpecayanijobinexa, pëtsa pajamatatabëcuenebëjamë panenayajivicuaicuajaijavanexa yabara.

¹² Tsipaji raja bajarapaepatota, Espíritu Santo pacacuaicuajaiyaexanaena pacuenia panayajivicuaicuajamëjitsia, jai Jesús pijajivjavabelia.

Pacuenia Jesús jivi livaisi tsipaeba bitso pesivanajamatatabëxainaeyaniva ayajava pexainaejava pexainaenexa yabara pelivaisi

13 Jivi ayaibitsaëtoxanetoyajuvënënë jumaitsi Jesúsjavabelia:

—Jesús, taxapijinë picani petëpaevajënae netocopata pevënamoto tapitsinexa pecobe-covëyajuvënëjavanë. Nexata tamatapijinë pita bajaraxuanë. Nexata itorobare tamatapijinë tan-erajutsinexa taxapijinë tanerajutsiapaebijavanë, jai bajaraponë Jesúsjavabelia.

14 Jesús nexata jumaitsi bajaraponëjavabelia:

—Itsajivi ata cajena apo nitorobi jueznënexanë, tananeconitsiaexanaenexa ponë naneconita. Itsajivi ata cajena apo nitorobi axapijinë pecobe-covë patacatsicobetsatsinexabeje, jai Jesús.

15 Nexata icatsia Jesús jumaitsi daxitajivijavabelia:

—Xania pataema. Pëtsa bitso panjamatabëxainame ëpaxamënexa ayaijava panexainaenexa. Tsipaji jivi pexaina/java ayaijava xainae ata tsipae, bajarapamona pexaina/java yabara jamatabëcuenexanepanaeya apo jinavanapae tsipae, jai Jesús.

16 Nexata Jesús tsipaeba livaisi bajarapamona/javabelia mapacueniaje:

—Ponapona bitso riconë. Pijapabianë tocapsapabiabatsi ayaijava pexainaecuene.

17 Riconë nexata jamatabëjumaitsi: “¿De meta pacuenia exanaenajë? Netoajibi baja rovia tae-taponaejavabelianexa taubijava,” jamatabëjai riconë.

18 Riconë nexata icatsia jamatabëjumaitsi: “Yapëtaniji rajane baja pacuenia exanaejitsianë. Paboxita jebabiabajë taubijava, penetsianicajë taexanaenexa icatsia ayaiboxanetonë

bajarapacovëta. Bajarapaboxanetonëta jane baja jebianajë daxita taubijava, daxita tacobecovë yajava.

19 Nexata baja xainaenajë bajayajebinexa daxitacuene xua namatavenonajë. Nexata jane baja xuacujinae nacueraevetsianajë. Pexaniacuene nabanebiabianajë. Pexaniaviriaranënu matavëjëa apaeyabiabianajë taitajibinexa. Nexata barëyanë tsabiabi tsane,” jamatabëjai riconë.

20 Nexata bajarapaepatota Dioso jumaitsi riconëjavabelia: “Apo neyapëtaenë baja rovia xamë. Ajena baja, mapameravitaje, tēpaename. ¿Jipatsa nexata nevënamuto pitsiana daxita nexaniavaetejebijavanëmi?” jai Dioso riconëjavabelia, jai Jesús mapalivaisije daxitajivijavabelia.

21 Icatsia Jesús jumaitsi bajarapamonaejavabelia:

—Bajara pijinia pacuenia paxamëyajuvënëvi ata tocopiapatsianatsi pamonae ayaijava natocaetuapona ëpamonae pexainaenexa. Bajarapamonae itsiata pepacuene bepejiobivi tsane Diosojavabelia, jai Jesús bajarapamonaejavabelia.

Pacuenia Dioso pijajivi eveta mapanacuataje yabarapelivaisi

(Mt 6.25-34)

22 Jesús nexata jumaitsi pijajivijavabelia:

—Xaniajanë pacuenia pacatsipaebijitsatsi. Pëtsa pasivanajamatabëxainame ëpanexaejava panevënjinavanapaenexa. Pëtsa pasivanajamatabëxainamenua ëpanenaxatabijavanexa ata.

23 Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatinexa.

24 Pacanaëjëre pacuenia baratsui apo ubi pexaejavanexa. Apo notsinua penaveretaponaejava. Apo xainaenua penaveretaponaejava peetsibonexa. Itsiata Dioso rajutabiabatsi pexaejavanexa. ¡Paxamë rabiji bitsoyo Dioso pacaasiva baratsuimona matatoxenetsia papecarajutsinexa daxita xua panamatavenoname! Bajaraxuata pëtsa pasivanajamatabëxainame ëpanexaejavanexa, ëpanenaxatabijavanexa ata.

25 ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta. Nexata saya na-jamatabëcueneratsipa pejamatabëcuenebëjaijava penavitsabiaexanaejavanexa. Tsipaji apo tonamatamotsitsi bajaraxua.

26 Bajara pijinia pacatoitsi paxamë ata daxita xua pasivajamatabëcuenebëjamë. Apo pacatonamatamotsi. Bajaraxuata apo bepajamatabëcuenebëjamë itsacuenejavayo ata yabara, jai Jesús pijajivijavabelia.

27 Icatsia Jesús jumaitsi pijajivijavabelia:

—Pacanaëjëre pacuenia bitso pexaniamatono pitsapa, mapamatonoje. Bajrapamatono apo natsijumanacuenebi. Penaxatatsijavanexa ata apo natoexanae. Bajayata nacuaevertsine Salomónpijinë bitso pexainaenëmi. Naitabëtsiaya naxatababiaba bitso pexaniaviriajavanë. Itsiata baitsi jane Salomónpijinë penaitabëtsijava mata-toxenetsia bitso aitabë mapamatonotoxije.

28 Paxamë, bevelia Dioso panejume-covënëtsivi, asaëya bepajumecovënëtame

Dioso papecaevertsijava. Ajena pitsijavata vayafota tanetsi pexaniaponomatanotoxi. Bajaraxuacujinae, caematacabibejecujinae, tajuatsi baja bajaraponomatonotoximi. Pacuenia Dioso aitabëyaexana ponamatonotoxi, bajara pijinia pacuenia paxamë ata itsamatocabi Dioso pacaxatabiana piaitabëjava.

29 Bajaraxuata pëtsa pasivanajamatabëxainavanapame ëpanexaejavanaxa, ëpanematavëjäapaejavanaxa ata. Biji rajane pajumecovënëtavanapare Dioso.

30 Pamonae Dioso apo pejumecovënëtsivi, bitso sivanajamatabëxainabiaba ëpexaejavanaxa, ëpenaxatabijavanexa ata. Itsiata baitsi jane paneaxa Dioso paxainame. Bajaraponë yapëtane daxita xua pañamatavenoname.

31 Bajaraxuata, daxita xua panamatavenoname, matatoxenetsia Dioso pijacuene bitso pasivanajamatabëxainabiabianame Dioso pijacuene panetoexanavanapaenexa. Nexata Dioso pacarajutsiana daxita xua panamatavenoname, jai Jesús pijajivijavabelia.

*Pacuenia Jesús tsipaeba pijajivi xaniavaetsia
Dioso petonacuenebavanapaenexa itsamatocabi
ayaijava pexainaenexa athëbëtatsiayabara pelivaisi
(Mt 6.19-21)*

32 Icatsia Jesús jumaitsi pijajivijavabelia:
—Tajamonae, paxamë patajajivimë pacaejiviyomëbeje ata, pëtsa pajunavame. Tsipaji paneaxa pacaitapeta panecobenaevetsinexa pamatacabibajaraponë evetsiana daxitacuene.

33 Pacanajere panexainaeyajuvënëjava, bitso paneasivajava ata. Nexata bajarapapalata parajutsianame bitso bepejiobivijavabelia. Nexata juya Dioso athëbëtatsia pacarajutsiana bitso penamatamotsijava, apo peverevere-caejava. Bajarajotatsia acuenebi pejonejava penacobetoxotsivi papecayacajérëtsinexa. Itsanë ata ajibi papecatoucubaxaenënexa.

34 Panacuatatsia pacatoxaniavaeta panexainaevananexa, bajarapanacua panejamatabëëthëtovetsina pajamatabëñajinavanapaename, jai Jesús pijajivijavabelia.

Pacuenia Jesús pijajivi tsipaeba pacujinae icatsia patsijitsiatsica najamatabëçuenexaniavaetsiaya pevajënae pijajivi pecopiaevetavanapaenexatsiyabara pelivaisi

35 Jesús icatsia pepatsijavanexatsica tajëvelia navajunupaeba. Jesús jumaitsi pijajivijavabelia mapacueniaje:

—Icatsia raja jemata patsianicajë. Nexata najamatabëçuenexaniavaetsiaya panecopiaevetavanapaename.

36 Payapëtaneme rabaja mapacueneje. Petux-anenë itsa pona penacasabifiestajavabelia, pijajivi tonajumecopata meravijebi ata pecopiaevetavanapaenexatsi pepatsijavarena. Nexata petux-anenë pijajivi meravi ata copiaevertavanapatsi. Nexata petuxanenë jemata meravi najetarucae ata, baupa itsa docodocota, nexata bajarapamonae bepilia tobaupata pijatuxanenë.

37 Bajarapamonae barëya pijatuxanenë naëcotsiaya pecopiaevetavanapaejavata pepatsixaet. Xaniajanë pacuenia pacatsipaebijitsiatsi. Nexata petuxanenë pijajivi caecuenia petobaupatsixaetsi, petuxanenë pijajivi sivajamatabëcuenebarëya. Nexata petuxanenë pepatsicujinae xaniavaeta mesa. Enaeyaexanaena pijajivi. Nexata caranata petuxanenë bajarapamonae bepijajivitonë nataeya rajuta pexaejava pijajivi.

38 Meravi tuuatujëta petuxanenë patsi ata, itsa jume, matacabivëpata patsi ata, nexata petuxanenë pijajivi naëcotsiaya pecopiaevetavanapaejavata pijatuxanenë pecaxitajarabixaetsi, petuxanenë pijajivi barëya.

39 Pacanaëjëre mapacueneje. Bo pexainaenë itsa yapëtaejitsipa paepatota meravi pijaboyababerena patsijitsia pecobecovë petonacobetoxotsinënexatsi, nexata apo majitsi tsipae. Vajënaeevetecaejitsipa meravijebi. Apo copatsi tsipae pijaboyabererena petojoneyanivatsi penacobetoxotsinënexa.

40 Bajara pijinia pacuenia paxamë ata najamatabëcuenexaniavaetsiaya panecopiaevetavanapaename tapatsijavatsica. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús pijajivijavabelia livaisi tsipaeba, petuxanenë pijajivitonëbeje pelivaisicuenia, yabara

pelivaisi

(Mt 24:45-51)

41 Pedro jumaitsi Jesúsjavabelia:

—Tajatuxanenë, ¿palivaisi aeconoxae panetsipaebame, baja tsaja palivaisi ëpaxanë panijajivinexanë? Itsa jume, ¿itsamonaenexa ata tsaja yajava? jai Pedro.

42 Jesúsjexata jumaitsi Pedrojavabelia:

—Mara pejamatabëcueneitsivinexa yabara pacatsipaebatsije. Petuxanenë pijajivitonë, ponë xaniavaetsia pijatuxanenë pecovëta tonacuenebaponapona pijacuene, maitsije. Petuxanenë pijajivitonë itsajamatabëcuene xainaenejeva, copiaevetaponapona pijatuxanenë pepatsimatacabijavabelianexa. Bajaraponë pijatuxanenë pijajivi pecovëta toevetaponapona xaniavaetsia. Toabataponapona pexaejava caematacabí canacujitsia pacuenia itorobatsi pijatuxanenë.

43 Bajaraponë bitso barëya pamatacabí pijatuxanenë pata xaniavaetsia pijajivi pecovëta petoеветапонапонаехае.

44 Xaniajanë pacuenia pacatsipaebijitsiatsi. Ponë bajarapacuenia xaniavaetsia tonacueneba pijatuxanenë pecovëta, bajaraponë icatsia evetsiaexanatsi daxita xua xaina pijatuxanenë.

45 Petuxanenë pijajivitonë itsa pijamatatabëcuenebejenë tsipae, nexata bajaraponë pijatuxanenë pecovëta jamatabëjumai tsipae: “Tajatuxanenë ajibi tsarucae tsane bajayajebi,” jamatabëjai tsipae. Nexata pijatuxanenë pijajivi, pamonaevetsiaexanatsi xaniavaetsia picani petoеветинекса, toconibabeyabiabijitsipa. Conibabeyabiabijitsipa pebijivi, petiriavi ata.

Bajaraponë ayaijava pexaejava xaeyabiabijitsipa. Aitajibinua tsabiabi tsipae.

46 Nexata itsajota apo jamatabënajinae tsipae pijatuxanenë pepatsijavanexa, bajarapaepatota jemata patsipa pijatuxanenë. Nexata bajaraponë pijatuxanenë pinijicuenia naneconitsiaexanaejitsipatsi. Bajara pijinia pacuenia Dioso ata itsamatacabí pinijicuenia naneconitsiaexanaena pamonae Dioso apo pejumecovënëtsivi, jai Jesús Pedrojavabelia.

47 Icatsia Jesús jumaitsi pijajivijavabelia:

—Ponë itsanë pijajivitonë, yapëtae ata picani pacuenia itorobatsi pijatuxanenë petoexanaenexa, itsiata itsa apo toexanae pijatuxanenë pitorobicueniatsi, bajaraponë pinijicuenia jumaconibabejitsipatsi ayaicuerobocotota.

48 Ponë ata pijinia itsanë pijajivitonë, itsa apo jumeyapëtae xaniavaetsia petoexanaenexa pacuenia pijatuxanenë itorobatsi, nexata pijatuxanenë pitorobicueniatsi saicayacuenia itsa toexana, bajaraponë ata jumaconibabejitsipatsi. Itsiata pinijicuenia apo jumaconibabe tsipaetsi. Pajivi pijinia ayaijava rajutatsi, bajarapajivi yabara vaxaitsi basivajamatabëjumaitsitsi: “Juya meta mapajivije ayaijava rajutabiabiana itsamonaejavabelia,” basivajamatabëjaitsi. Pajivi pijinia evetsiaexanatsi ayaijava, bajarapajivi pevetsiaexanaenëtsi sivajamatabëjumaitsitsi: “Itsa netocanacuenebiana taevetsiaexanaejava, ayaijava netopitsapaena,” sivajamatabëjaitsi pevetsiaexanaenëtsi, jai Jesús pijajivijavabelia.

Pacuenia Jesús apo penajuajumecovënëtsixae,

*nacaemonae ata apo najamatabëcuenejëpae tsane
yabara pelivaisi
(Mt 10.34-36)*

49 Icatsia Jesús jumaitsi pijajivijavabelia:

—Xanë raja patajopajë daxitanacuapijivi pibisi-acuene pexanaeneconi yabara tasivatëpanexa. Nexata bajarapamonaeyajuvënëvi itsamona nejumecovënëtsiana. Nexata nacaemonae ata apo najamatabëcuenejëpae tsane. Itsa baja capanepaeya cruzata daxitajivi sivatëpaejitsipajë, jamatabëcuenebarëyanë baja tsipae.

50 Itsiata baitsi jane abaxë netosajina bajaraxua yabara tanejamatabëcuenejëtsinexa tanebeyaxuabijavata. ¡Bitso baja rovia najamatabëxainajë! ¡Matapania nebeyaxuabiana, jamatabëcuenecaevianajë!

51 Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpaea pejinavanapaeyaex-anaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaejavabelia apo nejumecovënëtsi, nacaemonae ata. Itsamonaе napijavajabitsaë tsane. Nexata apo najamatabëcuenejëpae tsane.

52 Ajena mapamatocabijavaveliacujinaeje jivi apo najamatabëcuenejëpae tsane. Cinco pajivibeje, nacaemonae ata, caebota pejinavanapaevi ata, apo najamatabëcuenejëpae tsane xanë apo tane-najuajumecovënëtsixaebje. Pamonae cinco pajivibeje nacaemonae, bajarapamonaeyajuvënëvi,

acueyabi pajivibeje, nejumecovënëtsiana. Anijajivibeje apo nejumecovënëtsi tsane. Itsa jume, anijajivibeje nejumecovënëtsiana. Acueyabi pajivibeje apo nejumecovënëtsi tsane.

53 Bajarapabopijivi, paxabeje pexënatobeje, apo najamatabëcuenejëpaebewe tsane xanë apo tanenajuajumecovënëtsixaebewe. Petirivabeje pijinia, penabeje pexënatoyobeje ata, apo najamatabëcuenejëpaebewe tsane xanë apo tanenajuajumecovënëtsixaebewe. Pamebeje pecopenabeje ata apo najamatabëcuenejëpaebewe tsane xanë apo tanenajuajumecovënëtsixaebewe, jai Jesús pijajivijavabelia.

Pacuenia Jesús asaëya jivi muxuioba apo pecanaëjëtsixaे Jesús Dioso pexënatocuene yabara pelivaisi

(Mt 16.1-4; Mr 8.11-13)

54 Jesús icatsia jumaitsi jivi ayaibitsaëtoxanetojavabelia:

—Itsa pataneme vaëvetsica itarérëbo pepitsapaejava, nexata pajumaitsimë tsabiabi: “Ajena raja emajitsia,” pajamë tsabiabi. Nexata bajarapamatacabi ema jopabiaiba.

55 Itsa pataneme jovibo pepitsapaejava epatajérëtsiarena la surverena, pajumaitsimë tsabiabi: “Ajena raja icotia ataju tsane,” pajamë tsabiabi. Nexata bajarapamatacabi icotia ataju tsabiabi.

56 Nexata itsamona pacatane bepatsita pexaniajamatabëcuenevimë itajara, papibisi-ajamatabëcuenevi atamë. Payapëtaeyabiabame

pacuenia matacabi itsijitsia itarérëbo pepitsapae-java panetaeyabiabixae. Bajarapacuenia picani payapétaeyabiabame. Itsiata baitsi jane patae atamë daxita xua Juanpijinëmi jivibautisabinëmi exanapona, patae atamënuá daxita xua xanë ata exanaponajë, caranata xanë apo paneypétaemë Dioso athëbëvetsica taneitorobinëcuenetsica, jai Jesús jivi ayaubitsaëtoxanetojavabelia.

*Pacuenia penaneconitsijivi xaniavaetsia
bebarëcuaicuajai pajivijavabelia naneconita penasi-
vajamatabëxanepanaenexabeje, peneconitsiyani-
vatsi jueznëjavabelia, yabara pelivaisi*

(Mt 5.25-26)

57 Jesús icatsia jumaitsi jivi ayaubitsaëtoxanetojavabelia:

—Pacanaëjëre panijacuata paneexanaenexa pacuene xanepana.

58 Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuajjamërebeje panenasivajamatabë xanepanaenexabeje xua yabara pacaneconitsijitsia. Bajarapacuenia xaniavaetsia panabarëcuaicuajjamërebeje papecanutsiyaniva jueznë pitabarata. Tsipaji raja jueznë itorobijitsipa policíavi panijaneconi yabara papecacaponaenexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota.

59 Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa

pacananeconitsiaexanetsipa, bajaraverena bepabajia apo papitsapaemë tsipae. Matapania pamamatomsipame daxita xua yabara pacananeconitsiaexaneta, papitsapaejitsipame, jai Jesús jivi ayaubitsaëtoxanetojavabelia.

13

*Pacuenia jivi benajamatabëcuenepënëyorota
pibisiacuene pexanabiabijavavecua yabara
pelivaisi*

¹ Itsamonae jumaitsi Jesúsjavabelia:

—Galilea nacuaverena pepatsivi, baca beyaxuaba Jerusalén tomarata templobota. Bajarapamona baca beyaxuaba ofrendacuenia pevi perajutsinexa Diosojavabelia. Nexata bajarapaepatota nacuaevertsine Pilato pibisiacuene exana. Itoroba vajabitsaë Galilea nacuapijivimi pebeyejebinexatsi templobota. Itsajota Galilea nacuapijivimi baca beyaxuababuata, bajarapacovëta icat-sia beyejebatsi bajarapamonaemi. Nexata bajarapamonaemi pijana namatajérëata bacajana yajava, jai itsamonae Jesúsjavabelia.

² Jesús nexata jumaitsi bajarapamonaejavabelia:

—“Pamonaemi bajarapacuenia beyejebatsi, bitso meta pibisiacuene pexanaevimi daxita pijanacuapijivi matatoxenetsia. Bajaraxuata beyejebatsi penaxuabinexa Diosovecua,” ¿pajamatabëjamë tsaja?

³ Jume baja cajena. Bajarapamonaemi ata picani bitso pibisiacuene apo exanae pijanacuapijivi matatoxenetsia. Itsiata Dioso tocopatatsi bajarapamonaemi pebeyejebinexatsi,

penacopabivi pecanaëjëtsinexa Diosojavabelia penaneconitsijava. Paxamë ata itsa apo pacopabimë tsane pibisiacuene peneexanabiabijava, itsa apo panajamatabëcuenepënëyorotsimë tsane Diosojavabelia, nexata bajarapacuenia paxamë ata panaxuabianame Diosovecua itsa patëpaename.

⁴ Pamatocabi ata jemata Jerusalén tomarata jopanucaya athëbëabetsia piapiabotsia, Torre de Siloévënëbo, dieciocho pajivibeje matacënëbatsi. Nexata baja tëpa bajarapamonaemi. “Pamonaemi matacënëbatsi, pibisiacuene meta bitso pexanaevimi daxita Jerusalén tomarapijivi matatoxenetsia. Bajaraxuata matacënëbatsi penaxuabinexa Diosovecua,” ¿pajamatabëjamë tsaja?

⁵ Jume baja cajena. Bajarapamonaemi ata picani bitso pibisiacuene apo exanae pijatomarapijivi matatoxenetsia. Paxamë ata itsa apo pacopabinë tsane pibisiacuene paneexanaejava, itsa apo panajamatabëcuenepënëyorotsimë tsane Diosojavabelia, nexata daxita paxamë ata bajarapacuenia panaxuabianame Diosovecua itsa patëpaename, jai Jesús bajarapamonaejavelia.

Pacuenia Jesús jivi livaisi tsipaeba piacuajibihigueranae pelivaisicuenia yabara pelivaisi

⁶ Jesús jivi livaisi tsipaeba piacuajibihigueranae pelivaisicuenia. Jesús jivi piacuajibihigueranae pelivaisicuenia petsipaebijavata, pijaperujumatabëcuene apo penavecuacopatsivi yabara Jesús jumaitsi mapacueniaje:

—Pebi pijapabi tuatuajëta caenae peubinae xainanuta, higueravënënae. Nexata picani

taeyojopalia bajarponae penacuaitisjava. Itsiata baitsi jane apo nacuaitsi.

⁷ Nexata jumaitsi pijapabi petoevetsinëtsijavabelia: “Taema maponaeje. Acueyabi picani pavaibeje taeyopajë tacuainotabiabinexa maponaecuajie. Itsiata acuajibì tsabiabi. Nexata baja netonicataxuare. Apo becopatanutsitsi bajarponae. Ira caranatanuca saya,” jai pijapabi pexainaenë.

⁸ Itsiata baitsi jane pijapabi petoevetsinëtsi jumaitsi: “Copatanutsianatsibeje abaxë mapavajie. Nexata bacatuirabianajë bacatasitoxita.

⁹ Baja raeta xuacujinae xanepanaena. Nexata aeconoxae pavai nacuaitiana. Nexata aeconoxae pavai ata itsa apo nacuaitsi tsane, nexata jane baja catonicataxuabianatsi,” jai pijapabi petoevetsinëtsi, jai Jesús.

Bajarapacuenia Jesús jumaitsi tsipaji Dioso xubijitsia pamonae pijaperujujamatabëcuene apo pecopatsivi.

Pacuenia Jesús jamatejemayaexana judíovi penacueraevetsimatacabita penajumafurutsivami yabara pelivaisi

¹⁰ Itsamatacabí judíovi penacueraevetsimatacabita, Jesús jivi livaisi tsipaeba judíovi penacae-tuatabiabibota.

¹¹ Bajarajota naeca petiriva. Dovathi pejamatabëcueneta bajarapova dieciocho pavaibeje xaina penajumafurutsicujinae. Nexata apo caëjëpaetsi tsiquirijavayo ata penaepasirovitsjava.

12 Itsa Jesús taeyeta bajarapova, nexata junarena. Jesús jumaitsi bajarapovajavabelia:

—Niatanejavami rabaja cavecuaajibi, jai Jesús bajarapovajavabelia.

13 Jesús tsimatanacobebuata bajarapova. Nexata bajarajota petiriva naepasirovitsixanepana baja. Nexata bajarapova jumai tsaponae Diosojavabelia:

—¡Diosomë, bitso pexaniacuene netoexaname ayajamatatabëcuenenëxaemë! jai tsaponae bajarapova Diosojavabelia.

14 Itsiata baitsi jane judíovi penacaetuatabiabibo pevetsinë Jesús baraanaepanatsi judíovi penacueraevetsimatacabita Jesús pejamatejemyayaexanaexae penajumafurutsiva. Tsipaji judíovi apo jitsipae itsajivi ata itsacuenejavayo pexanaenexa penacueraevetsimatacabita. Nexata judíovi penacaetuatabiabibo pevetsinë jamatabëjumaitsi:

—Jesús nacueneba penacueraevetsimatacabita. Jesús apo jumecovënëtsi patajasalinaivi patanitavetsicuene, jamatabëjai.

Nexata judíovi penacaetuatabiabibo pevetsinë najumejematsiaya jumaitsi jivijavabelia:

—Cae semana canacujitsia xainaponatsi seis pamatacabibeje vajanacuenebinexa. Bajarapamatacabijava bepatatsi vajanacajamatejemyayaexanaenexa. Nexata abaxë penacueraevetsimatacabita apo bepatsitsi vajanacajamatejemyayaexanaenexa, jai judíovi penacaetuatabiabibo pevetsinë najumejematsiaya jivijavabelia.

15 Nexata Jesús jumaitsi judíovi penacaetuatabi-abibo pevetsinëjavabelia:

—Paxamë saya jivi paneyamaxëitojorobivi. Bepatsita pexaniajamatabëcuenevimë itajara itsamonaes, papibisiajamatabëcuenevi atamë. Paxamë ata panacuenebabiambe penacueraevetsimatacabita ata. Paxamë penacueraevetsimatacabita ata panijabaca, burro ata, paisinabiabame panecaponaenexa merajavabelia mera piapaenexa.

16 Mapovaje Abrahampijinë pemo-moxiyajuvënëva jamatejemayaexanajë. Tsipaji bajarapova namatamota Dioso pitabarata dajubinë matatoxenetsia. Dovathi pejamatabëcueneta penajumafurutsicujinae, xaina baja dieciocho pavaibeje. Bajaraxuata penacueraevetsimatacabita ata jamatejemayaexanajë piatanecuenevecua, jai Jesús judíovi penacaetuatabiabibo pevetsinëjavabelia.

17 Bajarapacuenia Jesús itsa jumaitsi, nexata daxita pecueneitoyavitsi moyá ena. Aura tsenae bajarapamonae. Itsamonaes pijinia Jesús sivajamatabëcuenebarëyatsi pinijicuene Dioso pesaëta pexanponaejavanë yabara.

*Pacuenia mostazaxutoyo pejuvicujinae,
mostazanae bepijia vitsaba yabara pelivaisi
(Mt 13.31-32; Mr 4.30-32)*

18 Jesús jumaitsi jivijavabelia:

—¿De meta xua pelivaisi jëpa Dioso pijajivi beprijia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto beprijia

Dioso pijajivi penaexanaejavanexa, mostazaxutoyo meta pelivaisicuenia tsipaebianajë.

¹⁹ Pebi capona mostazaxutoyo peubinexa pijapabita. Nexata baja mostazaxutoyo pebi itsuba pijapabita, bajarajota mostazanae bepijia vitsaba. Bepijia baja mostazanae pinijinae naexana. Baratsui ata exana pematapenanë bajaraponaemaxëranaxijava. Bajara pijinia pacuenia Dioso pijajivi ata itsane. Bepijia ayaubitsaëtoxaneto naexanaena Dioso pijajivi, jai Jesús jivijavabelia.

*Pacuenia pan pexanaematabënexa, levaduravënëjava fufunaeyaexana yabara pelivaisi
(Mt 13.33)*

²⁰ Icatsia Jesús jumaitsi jivijavabelia:
—¿De meta palivaisi jëpa pecacaëjëpaejava Dioso pijajivi pevetsicuene daxitanacuanëjava?
¿De meta pacuenia jivi livaisi tsipaebianajë peyapëtaenexa Dioso pijajivi pevetsicuene peyacaëjëpaejava daxitanacuanëjava?

²¹ Levaduravënëjava meta pelivaisicuenia tsipaebianajë. Petiriva pan pexanaenexa, acueyabi patarrobeje trigobenonë matajérëaba levaduravënëjavata. Nexata pan pexanaematabënexa, ayaimatabë.

*Tsiquiribaupayo epatajërëtsialia yabara pelivaisi
(Mt 7.13-14, 21-23)*

²² Jesús jivi livaisi tsipaebanajetaruca pinijitomaranëjava, tsiquiritomaraxijava ata, pepatsinexa Jerusalén tomarabelia.

²³ Nexata Jesús jivi livaisi petsipaebijavata, itsanë yanijobatsi Jesús. Bajaraponë jumaitsi Jesúsjavabelia:

—Jesús, ¿Dioso tsaja capanepaena caebitsaëtoyo saya? jai.

Nexata Jesús jumaitsi daxita jivijavabelia:

24 —Xaniajanë pacuenia pacatsipaebijitsiatsi. Pajamatabëcuenesaëmëre bitso panevajënaeyabelia itsamatacabi athëbëtatsia panejonenexa tsiquiribaupayojavalia. Jivi picani itsamatacabi athëbëtatsia ayaibitsaëtoxaneto jamatabëjonena tsiquiribaupayojavalia. Itsiata apo caëjëpaetsi tsane pejonenexa.

25 Bo pexainaenë itsa nonotapunaena baupa pexatatsinexa, paxamë bo jumapënëvelia panubenaename. Nexata picani panejonenexa pabaupadocodocotsianame. Pajumaitsimë tsane: “Tajatuxanenë, panetobaupare,” pajamë tsane. Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë,” pacajai tsane.

26 Nexata paxamë pajumaitsimë tsane: “Xamë baja cajena panebarënanabemë. Panebarëmatavëjäapamenua. Patajatomaranëjava ata baja cajena jivi livaisi tsipaebabiabame,” pajamë tsane.

27 Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë. Pibisiacuene paneexanabiabivi, panevecuaponare baja,” pacajai tsane.

28 Dioso pijanacuatatsia pataename Abrahampijinë, Isaacpijinë ata, Jacobpijinë ata, daxita Diosojumepaebivimi profetavi ata. Daxita bajarapamonae penujuajinavanapaejava Dioso pijanacuatatsia pataename. Nexata

paxamë bajarajota pinijicuenia panatsin-
uename. Panavonosinianamenua bitso
paneanaepanaexae. Tsipaji paxamë Dioso
pijanacuavecua panenaxuabinexa pacaxuabiana
infiernojavabelia.

29 Itsaviriajumevi patsiana daxi-
tanacuanëjavaverena. Nexata daxita bajara-
pamonae naenaena penabandinexa Dioso
pijanacuatatsia.

30 Pamonae aeconoxae mapamatacabitaje
ayaijamatabëcuenevi tanetsi, bajarapamon-
aeyajuvënëvi, ayaibitsaëtoxaneto, itsamatacabi
Dioso beveliamatabëcuenevi exanaenatsi.
Pamonae pijinia mapamatacabitaje beveli-
ajamatabëcuenevi tanetsi, bajarapamonaeya-
juvënëvi, ayaibitsaëtoxaneto, itsamatacabi Dioso
ayaijamatabëcuenevi exanaenatsi, jai Jesús
daxitajivijavabelia.

*Pacuenia Jesús najamatabëxainaeya sivanua
Jerusalén tomarapijivi yabara pelvaisi
(Mt 23.37-39)*

31 Itsa baja Jesús najumevereta jivi livaisi petsi-
paebijava, fariseovi pata Jesúsjavaberena. Nexata
fariseovi jumaitsi Jesúsjavabelia:

—Jesús, mapatomara baja vecuaponareje.
Nacuaevertsinë raja Herodes cabeyaxuabiapaeba,
jai fariseovi.

32 Jesús nexata jumaitsi fariseovijavabelia:

—Paponaremilia. Bajaraponë Herodes, jivi
peyamaxëitojorobabiabinëjavabelia, pajumaitsimë
tsane mapacueniaje: “Jesús raja jumaitsi: ‘Ajena

raja abaxë, meravia ata icatsia, vecuacapitsapponaenajë dovathi peyajavajinavanapaevi. Piavitanevi ata jamatejemayaexanaponenaenajë. Nexata abaxë pameravia bajarapacuenia taexanaejava copatsianajë, jai raja Jesús,” pajamë tsane Herodesjavabelia.

33 Diosojumepaebivimi profetavimi beyejebabiabatsi Jerusalén tomarata. Tsipaji profetavi acuenebi saicayatomarata petépaejava Jerusalén tomaravecua. Bajaraxuata xanë ata ponaenajë tavajënaeyabelia Jerusalén tomarabelia. Nexata ponaenajë ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

34 Nexata Jesús najamatatabëxainaeya sivanua Jerusalén tomarapijivi. Jerusalén tomarapijivi Jesús najamatatabëxainaeya pesivanuejavata, jumaitsi mapacueniaje:

—¡PaJerusalén tomarapijivimë, pabeyaje-babiabame Diosojumepaebivimi profetavi! ¡ibotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiajë patacacaetuatsinexa, patacacapanepaenexa picani panijaneconivecua! ¡Itsiata baitsi jane paxamë apo pajejamë cajena!

35 Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponapona. Xaniajanë pacuenia pacatsipaebijitsiatsi. Paxamë baja apo panetaemë tsane matavëjëa. Matapania

itsa panejumecovënétame Cristonëcuñenë, Dioso taneitorobinëtsica, icatsia panetaename. Itsa panesivajamatabëjumaitsimënu tsane: “Dioso, bitso yavenonare maponë najetaruaje. Bajaraponë nejamatabëcuñeta najetaruca,” itsa panesivajamatabëjamë tsane, nexata jane baja icatsia panetaename itsa patsianicajë, jai Jesús mapacueniaje najamatabëxainaeya pesivanuejavata Jerusalén tomarapijivi.

14

Pacuenia Jesús jamatejemayaexana pebi, bitso daxitanë peyajinaenë, yabara pelivaisi

¹ Itsamatacabí, judíovi penacueraevetsimatacabita, Jesús pona fariseovi penamatacaítorobinë pijaboyabelia penanabaninexa. Nexata bajarpabota itsamonaе fariseovi Jesús naitaxutocaevetatssi.

² Nexata Jesús pitabarata eca pebi, daxitanë peyajinaenë.

³ Jesús nexata jumaitsi judíovi pecujarubivijabelia, fariseovijabelia ata:

—¿Penacueraevetsimatacabita ata tsaja piavitanevi vajajamatejemayaexanaenexa, Dioso nacatocopata? Jume. ¿Apo nacatocopatsi tsaja? jai Jesús judíovi pecujarubivijabelia, fariseovijabelia ata.

⁴ Itsia bajarapamonae moya ena. Nexata Jesús cobepita peyajinaenë. Jamatejemayaexana baja. Itoroba baja peponaenexa bajarapabovecua.

⁵ Jesús nexata jumaitsi judíovi pecujarubivijabelia, fariseovijabelia ata:

—Itsa panijaburro, panijabaca ata, pacatojopaejitsipareca meramëthëareca, nexata penacueraevetsimatacabita ata, bepabajajaputarëcëpaejitsipame. ¿Baja tsabaitsi jane? jai Jesús judíovi pecujarubivijavabelia, fariseovijavabelia ata.

⁶ Nexata bajarapamonae acuenebi pejumecanaviatsijava Jesúsjavabelia.

Pacuenia Jesús jivi muxujioba peyaiyataevitsi penaenexa petsinubijavanëta penaenexa penatsiitapetsiyaniyalabara pelivaisi

⁷ Fariseonë pijabota Jesús tane fariseonë pejunatsivi. Bajarapamonae natsiitapeta peyaiyataevitsi penaenexa petsinubijavanëta penaenexa mesa muxuneneta. Nexata Jesús muxujioba bajarapamonae beveliajamatabëcuenevi penaenexa. Jesús jumaitsi daxitajivijavabelia mapacueniaje:

⁸ —Itsa pacajunata panenanabaninexa penacasabifiestajavabelia, pëtsa panatsiitapetame paneenaenexa peyaiyataevitsi penaenexa petsinubijavanëta. Tsipaji itsanë ayajamatabëcuenenë paxamë matatoxenetsia itsa najunatatsi, napatsipa.

⁹ Nexata papecajunatsinë pacacujitsiparena. Nexata pacajumai tsipae: “Tocopare bajaraxua maponë peecaenexaje,” pacajai tsipae. Nexata paxamë pauramë tsipae itsa pacanatixitsiaexana paneecaenexa beveliajamatabëcuenevi penaenexa petsinubijavanëta.

¹⁰ Itsa pacajunata, paenaename beveliajamatabëcuenevi penaenexa petsinubijavanëta.

Matapania papecajunatsinë itsa pacajumai tsane: “Natixiremena. Peyaiyataevitsi penaenexa tatsinubijavanëta ecare,” itsa pacajai tsane, paenaename bajaraxuanëta. Nexata bajarapacuenia daxita mesa muxuneneta panenajuaenaevi pacataena papecayaiyataejava papecajunatsinë.

¹¹ Pajivi ayajamatabëcuenejivi natane, bajarapajivi beveliajamatabëcuenejivi taenatsi Dioso. Pajivi pijinia beveliajamatabëcuenejivi natane, bajarapajivi ayajamatabëcuenejivi taenatsi Dioso, jai Jesús judíovi pecujarubivijavabelia, fariseovijavabelia ata.

¹² Nexata Jesús icatsia jumaitsi pejunatsi fariseonëtsijavabelia:

—Itsa junatame itsamona nebarënabaninexa nijabota matonejepijijava, itsa jume, caniviyopijijava ata, pëtsa junatame ëneyapëtaevi. Pëtsa junatame nebarënabaninexa ënijamona. Pëtsa junatame ënijamonaeviriavi ata. Pëtsa junatame ëricovi, pamona nijabo muxuneneta jinavanapa. Tsipaji bajarapamona juya canamatamojunatsipa pijabota pecabarënabaninexa. Nexata bajarapacuenia canamatamotsipa bajarapamona.

¹³ Itsa junatame itsamona fiesta nebarëexanaenexa, junatsianame bepejiobivi, penabejenaevi ata, pejayujayunaevi ata, bitso pitaxutotsëcënaevi ata.

¹⁴ Nexata bajarapacuenia pepacuene jamatatabëcuenebarëyamë tsane. Tsipaji bajarapitsivi acuenebi juya pecanamatamojunatsijava tsane. Nexata nijamatamo xainaename

pamatocabi icatsia Dioso asaëyaexanaena pamonae tëpa, pexaniajamatabëcuenevimi, jai Jesús pejunatsifariseonëtsijavabelia.

*Pacuenia Jesús jivi livaisi tsipaeba pinijifiesta pexanaenë pelivaisicuenia yabara pelivaisi
(Mt 22.1-10)*

15 Daxita mesa muxuneneta penaevi jumetane Jesús petsipaebilivaisi. Nexata fariseoviyajuvënënë jumaitsi Jesúsjavabelia:

—Jamatabëcuenebarëya tsane pajivi nanabaniana Dioso pijanacuatatsia, jai fariseoviyajuvënënë.

16 Nexata fariseovi peyapëtaenexa itsamonaе Dioso apo pejumecovënëtsijava, junatsi atatsi, Jesús jumaitsi comparacióncuenia mapacueniaje:

—Fiesta pexanaenë pijajivi itoroba ayajiva pexaejava pexanaenexa. Nexata tajëvelia junatsi-aexana jivi ayaubitsaëtoxaneto petopatsinexatsi.

17 Bajaraxuacujinae pexaejava baja itsa vereta, fiesta pexanaenë itoroba pijajivitonë peponaenexa pejunatsivijavabelia: “Naxanitsia baja. Pexaejava rabaja vereta,” pejainexa.

18 Itsiata baitsi jane daxita pejunatsivi apo topatsitsirena. Itsanë saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë aeconoxaeta comuatabajë ira. Nexata ponaejitsianë bajarabelia tataenexa bajarapairia. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta.

19 Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë comuatajë diez ponëbeje bueyu tanetoroborobocaevinexa. Nexata ponaejitsianë taëjëtsinexa bajarapabueyu. Pexaniacuene netoexanaenamé. Pëtsa jamatabëcueneanaepanamé xanëjavaberena,” pejailivaisi tonajumeitorobarenatsi pijajivitonëta.

20 Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë raja a econoxaeta nacasabajë. Bajaraxuata acuenebi tapona/java,” pejailivaisi tonajumeitorobarenatsi pijajivitonëta. Bajarapacuenia daxita pamonae picani fiesta pexanaenë junata, peponaeyaniva saya tonajumeitorobarenatsi pijajivitonëta.

21 Nexata fiesta pexanaenë pijajivitonë naviarena pijatuxanenëjavaberena. Tsipaeba pijatuxanenëjavabelia daxita pacuénia najumerubatsi. Nexata fiesta pexanaenë anaepana. Jumaitsi pijajivitonëjavabelia: “Naxanitsiayo liamëre tomarabelia. Junatanajetarucaenamé jivi pinijicallexanetonëjava, tsiquiricallexijava ata. Junatsianamé bepejibivi, penabejenaevi ata, pejayujayunaevi ata, bitso pitaxutotsécénaevi ata, penanabaninexa tajabota,” jai fiesta pexanaenë pijajivitonëjavabelia. Nexata baja pijajivitonëpona pejunatsinexa jivi.

22 Jivi pebarëpatsicujinaerena, jumaitsi pijatuxanenëjavabelia: “Tajatuxanenë, exanajë rabaja taneitorobicueniamë. Itsiata abaxë sajinanubena itsamesanë itsamonaenexa,” jai bajaraponë pi-

jatuxanenëjavabelia.

23 Nexata petuxanenë icatsia jumaitsi pijajivitonëjavabelia: “Liamëre icatsia carreteranëjavabelia, namutonëjavabelia ata. Junatanajetarucaename asaëyata carreterajava peponaevi, namutojava ata peponaevi, penanabaninexa tajabota pevënëcaenexa tajabo.

24 Pamonae picani copiata junatajë penanabannexa, caenë ata bajarapamonaeyajuvënénë, apo naxae tsane bajarapapexaejava,” jai petuxanenë pijajivitonëjavabelia, jai Jesús fariseoviayajuvënénëjavabelia jivi peyapëtaenexa itsamonaes Dioso apo pejumecovënëtsijava, junatsi atatsi.

Pacuenia Jesús tsipaeba jivijavabelia, pajivi Jesús jamatabëpënaponatsi, copiaya penajamatabëcueneveretsinexa Jesús pepënaponaevajënaeyatsi yabara pelivaisi

(Mt 10.37-38)

25 Jivibitsaëtoxaneto Jesús pënajinavanapatsi. Nexata Jesús napënëyorota bajarapamonaejavabelia. Jesús jumaitsi mapacueniaje:

26 —Ponë xanëjavaberena patsi ata, itsiata itsa apo niasiva tsane daxita pijamona matatoxenetsia, nexata bajaraponë apo tajajivitonë tsane. Bajaraponë itsa apo niasiva tsane paxa, pena ata, pematiwijivi ata, pejuyapijivi ata, piassivajava matatoxenetsia, nexata apo tajajivitonë tsane. Bajaraponë itsa apo niasiva tsane pijava, pexi ata, pijacata penaasivajava ata, matatoxenetsia, nexata bajaraponë apo tajajivitonë tsane.

27 Ponë xanë yabara itsamonaе ja-matabëpebeyaxuabixaetsi, jamatabëpebejiobiaexanaexaetsinua, nexata pecajunavi itsa apo nepénaponae tsane, bajaraponë apo tajajivitonë tsane.

28 Paxamëyajuvënënë itsa jamatabëexana bo, athëbëabetsia piapiaboxanetotsia, nexata copiaya najamatabëcueneveretsipa pacuenia exanaejitsia. “¿Netocaëjëpa tsamëra baja tajapalatata taveretsinexa tajabo?” jamatabëjai tsipae copiaya.

29 Itsa apo najamatabëcueneveretsi tsipae copiaya, nexata bo pexanaejava taxuxuabi ata, apo veretsi tsipae itsa apo tocaëjëpaetsi pijapalata. Nexata pijabo petotaevitsi, capocaponaejitsipatsi.

30 Baracuaicuajaitsi tsipae: “Bajaraponë picani taxuxuaba pijabo pexanaejava. Itsiata apo tocaëjëpaetsi pijapalata peveretsinexa pijabo,” jaitsi tsipae capocaponaeya petotaevitsi.

31 Nacuaevetsinë pijinia, itsanacuaverena itsa sivanavajabitsaëtsijitsatsi, nexata copiaya najamatabëxainaejitsipa. Jamatabëjumaitsi tsipae mapacueniaje: “Tajajivi saya diez mil ponëbeje. Tanebarëtsimaxëponaevinexa, veinte mil ponëbeje. ¿Baja tsamëra tajajivi nebarëcuenecaëjëpaena tabarëbenexa tajavajabitsaënë pijajivi, veinte mil ponëbejejavabelia?” jamatabëjai tsipae copiaya.

32 Nexata bajarapacuenia penaja-matabëxainaecujinae, bajaraponë yapëtaejitsipa apo pebarëcuenecaëjëpaejavatsi pebarëbenexa pijavajabitsaënë pijajivijavabelia. Itsa abaxë tajë pevajënae pepatsijavarena pijavajabitsaënë, nexata najumexuabijitsipalia pijajivita penabarajamatabëcuene xanepanaenexabeje

vajabitsaëcuene pexanaeyanivabeje.

³³ Bajara pijinia pacuenia paxamëyajuvënëvi ata itsa apo najamatabëcueneveretsi copiaya penajamatabëcuenepeñëyorotsinexa daxita pexaina/javavecua, nexata acuenebi tajajivi taexanaenexa, jai Jesús jivi ayaibitsaëtoxanetojavabelia.

Pacuenia Jesús jivi livaisi tsipaeba comparacióncuenia pacuenia jamatabëcueneitsi tsipae Jesús pijajivitonë itsa copatsipa Jesús pejumecovënëtsijavami yabara pelivaisi

(Mt 5.13; Mr 9.50)

³⁴ Jesús icatsia comparacióncuenia jumaitsi jivi ayaibitsaëtoxanetojavabelia mapacueniaje:

—Yajo abaxë itsa xaica, xanepana. Itsiata yajo pexaicaejavami itsa ajibi tsipae, ¿detsa pacuenia icatsia naxaicaeyaexanaejitsipa? Acuenebi.

³⁵ Itsacuenejavayonexa ata baja apo xanepanae tsipae. Nexata peubijava petsibacaothocaenexa ata, apo xanepanae tsipae. Tsipaji pacuenia peubijava petsibacaothocaebeno, itsa tsibacaothoca, peubijava naxaniabiaexana, bajara apo itsi tsipae bajarapayajomi. Pacuenia bacatasi ata itsa tsibacaothoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabënejumeyapëtane patacatsipaebilivaisi, nemuxunaevetsi xaniavaetsia, jai Jesús comparacióncuenia bajarapamonaejavabelia.

Bajarapacuenia Jesús jumaitsi comparacióncuenia jivi peyapëtaenexa pacuenia jamatabëcueneitsipae Jesús pijajivitonë itsa

copatsipa Jesú斯 pejumecovënëtsijavami. Nexata Diosovecua naxuabijitsipa.

15

*Pacuenia Jesú斯 jivi livaisi tsipaeba oveja penaxu-abinë pelivaisicuenia yabara pelivaisi
(Mt 18.10-14)*

¹ Gobierno pejamatabëcuene impuestomatamo pemamatoyanijobabiabivi, pata Jesúsjavaberena. Yajavaparenanua piajamatabëcuenebejevi. Bajarapamonae pata penamuxunaevetsinexa Jesú斯 petsipaebilvai.

² Nexata fariseovibeje judíovi pecujarubivibeje itsa tane gobierno pejamatabëcuene impuestomatamo pemamatoyanijobabiabivi pepatsijava Jesúsjavaberena, itsa tanenua piajamatabëcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesú斯 baracuaicuajaitsi. Bajarapamonae najumaitsi mapacueniae:

—Mara ponëje naneconita Diosojavabelia. Tsipaji copiapitabiaba piajamatabëcuenebejevi ata. Naxaeyabiabanua pexaejava bajarapamonaeta, najai fariseovibeje judíovi pecujarubivibeje Jesú斯 yabara jamatabëcuenenavëxaniabiaya.

³ Nexata Jesú斯 pebaracuaicuajaixaetsi, Jesú斯 bajarapamonaejavabelia livaisi tsipaeba mapacueniae:

⁴ —Paxamëyajuvënëñë xainaejitsipa cien ponëbeje oveja. Nexata itsa toyajuvënëñaxuabijitsipatsi caenë, oveja pexainaenë petusatota puenetsipa noventa y nueve ponëbeje.

Nexata jaitsipa petonaxuabinëtsi matapania pecaxitajarabijavabelianexa.

⁵ Nexata oveja pexainaenë itsa baja caxitajara-bijitsipa petonaxuabinëmetsi, barëyataejitsipa. Boyaberena vëtacarapatsipa petonaxuabinëmetsi.

⁶ Nexata oveja pexainaenë petonaxuabinëmetsi itsa capatsipa boyaberena, junatsipa peyapëtaevitsi. Junatsipa pijabo muxuneneta imoxoyo penaevi ata. Nexata oveja pexainaenë jumai tsipae bajarapamonaejavabelia: “Panecobenabarëyamëre. Tsipaji tajaovejayo, tanetonaxuabinëyomi picani, caxitajarabajë baja,” jai tsipae oveja pexainaenë bajarapamonaejavabelia.

⁷ Xaniajanë pacuenia pacatsipaebijitsatsi. Mapanacuataje Dioso pitabarata pijaneconi pexainaejivi ata, itsa copatsiana pibisiacuene pexanabiabijava, itsa najamatabëcuene pënëyorota Diosojavabelia, bajara pijinia pacuenia sivabarëyatsi tsane athëbëtatsia pejinavanapaevi. Bajarapajivi, athëbëtatsia pejinavanapaevi, sivabarëyatsi tsane noventa y nueve pajivibeje Dioso pitabarata pianeconijibitsavanapaevi pesivabarëyatsabiabijava matatoxenetsia, jai Jesús fariseovijavabelia, judíovi pecujarubivijavabelia ata.

Pacuenia Jesús livaisi tsipaeba penaxuabipalatanëyo pelivaisicuenia yabara pelivaisi

⁸ Icatsia Jesús jumaitsi fariseovijavabelia, judíovi pecujarubivijavabelia ata:

—Petiriva xainaejitsipa diez ponëbeje palatanëanë, bitso penamatamotsinëanë. Nexata

itsa toyajuvënënaxuabijitsipatsi caenë, itanojotsipa lámpara. Bo ira cajuetsipa xaniavaetsia pejaitsinexa. Matapania itsa pitabuatsipa petonaxuabipalatanëtsi, copatsipa pejaitsijava.

⁹ Itsa baja caxitajarabijitsipa petonaxuabipalatanëmitsi, nexata junatsipa peyapétaevitsi. Junatsipa pijabo muxuneneta imoxoyo penaevi ata. Bajarapova nexata jumai tsipae bajarapamonaejavelia: “Panecobenabarëyamëre. Tsipaji ta-japalatanëyo, tanetonaxuabinëyomi picani, caxitajarabajë baja,” jai tsipae petiriva bajarapamonaejavabelia.

¹⁰ Xaniajanë pacuenia pacatsipaebijitsatsi. Pajivi copatsiana pibisiacuene pexanabiabjavami, itsa najamatabëcuene pénëyorotsiananua Diosojavelia, bajara pijinia pacuenia athëbëtatsia ángelevi sivabarëyatsi tsane, jai Jesús fariseovijavelia, judíovi pecujarubivijavelia ata.

Pacuenia picani juyapijinë paxavecua naxu-abaponapona yabara pelivaisi

¹¹ Icatsia Jesús livaisi tsipaeba fariseovijavelia, judíovi pecujarubivijavelia ata. Jesús jumaitsi mapacueniaje:

—Pebi xaina anijanëbeje pexënatabeje.

¹² Nexata juyapijinë jumaitsi paxajavelia: “Axa, xuanë picani netocopatame tapitsinexa nevënamuto, bajaraxuanë abaxë apo tēpae atamë, nerajure baja tajajavanexa,” jai juyapijinë. Nexata pexënatabeje pexainaenë pexënatabejejavabelia rajuta daxita pexainaejavanëmi.

13 Nexata paxa perajutsicujinaetsibeje, caemat-acabibejecujinae, juyapijnë canajeta daxita pexainaejavanëmi pecaetuatsinexa palata. Bajaraxu-acujinae jane baja pona tajënacuayabelia. Bajarajotalia pibisiacuene exanaponapona. Nexata vereta daxita paxa perajutsijavanëmitsi.

14 Nexata daxita bajarapanacuapijivi janibocuene tsipatatsi. Bajaraponë peveretsicujinae daxita pijapalatami, bitso namatavenona pexaejava.

15 Nexata jaita penacuenebinexa bajara-panacuata peecaenëjavabelia. Bajaraponë itorobatsi pijairanëjava petoeventaponaponaenexa pijamarrano.

16 Nexata bajaraponë bitso piajanixae, pepenenexa picani ayaijava jamatabëxaeyabiaba bopocuai, marrano pexaeyabiabijava. Bajarajota itsajivi ata apo rajutsitsi pexaejavanexa. **17** Nexata belia bajaraponë xaniavaetsia najamatabëxaina. Jamatabëjumaitsi mapacueniaje: “Taxa pijabota pexaejava ayaijava xaina pijajivi ayaibtsaëto piabatsinexa. Tonacopatabiabatsi ayaijava pexaejava. Itsiata xanë majotaje tēpaejitsianë baja tajani.

18 Nexata taxajavabelia naviatsianajë. Jumaitsinë meta tsane taxajavabelia: ‘Axa, pibisiacuene exanajë Diosojavabelia, xamëjavabelia ata.

19 Abejenë raja. Auranë baja rovia xamëjavabelia: “Taxënato,” tanejamëjava. Nexata saya nijajivitonënë nexanare,’ janë meta tsane taxajavabelia,” jamatabëjai juyapijnë.

20 Nexata baja naviata paxajavabelia.

'Itsa abaxë tajëverena najetaruca, pexënato pexainaenë copiatane. Nexata bajaraponë pexënato itaxutobejiobiatane. Mataenetsia cujinaejinalia pexënato. Nacoxivaetabarucapona. Copiapitsiaya itabaratsutsunexuaba pexënato.

21 Nexata bajaraponë jumaitsi paxajavabelia: "Axa, pibisiacuene raja exanajë Diosojavabelia, xamëjavabelia ata. Abejenë raja. Nexata baja rovia auranë xamëjavabelia: 'Taxënato,' tanejamëjava," jai paxajavabelia.

22 Itsiata baitsi jane pexënato pexainaenë bajarajota jumaitsi pijajivijavabelia: "Naxanitsia. Bepijiayo taxënato patocaponaremena daxita matatoxenetsia pexaniapana, penajumaxuabipana. Pajumaacare bajarapapanata. Anillonua pacobesixatare. Zapatonua pataxuxatare.

23 Penasitsinë becerro papiremelia. Pabeyaxuabianame vajaxaenexa. ¡Fiesta exanaenatsi vjabarëyanexa!

24 Tsipaji raja maponë taxënatoje: 'Tëpa meta baja,' sivajamatabëjanë picani. Itsiata tsaena ponapona. 'Naxuaba meta baja,' sivajamatabëjanë picani. Itsiata baja icatsia patajopa," jai pexënato pexainaenë pijajivijavabelia. Nexata taxuxuaba fiesta pexanaejava.

25 'Bajarapamatacabí matapijinë pabiabelia nacuenebaponapona. Nexata penaviatsinë bo itsa imoxoyotanajetaruca, jumetane música. Jumetanenua peyavajibijava.

26 Nexata bajaraponë junata paxa pijajiviayuvënënë. Jumaitsi: "¿Detsa pitsicuene yabara fiesta paexaname?" jai matapijinë.

²⁷ Nexata paxa pijajivitonë jumaitsi: “Nejuyapi-jinë baitsi patajopa. Axa nexata paneitoroba patabeyaxuabinexa becerro, penasitsinë. Jamate-jema tsaena ponapona nejuyapijinë,” jai bajara-ponë matapijinëjavabelia.

²⁸ Nexata matapijinë bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaitsi pexënatojavabelia: “Naxanitsia. Najonemeya,” jai pexënatojavabelia.

²⁹ Nexata matapijinë jumaitsi paxajavabelia: “Jume. Bajayajebi baja rovia catonacuenebaponaponatsi xanë. Caeto ata cajena apo cajumeapajejaitsi. Itsiata baitsi jane caeto ata apo nerajutsimë chivoyo ata fiesta tabarëexanaenexa tayapëtaevi.

³⁰ Itsiata aeconoxae patajopa baja nexënato, ponë vereta nijapalatami petiriavijavabelia. Nexata tobeyaxuabame becerro, penasitsinë,” jai matapijinë paxajavabelia.

³¹ Nexata bajaraponë jumaitsi pexënatojavabelia: “Taxënato, xamë cajena xanëjavata ponaponame daxitamatocabi. Nexata daxita xua taxainaevaja nijajava baja cajena.

³² Itsiata aeconoxae namatavenonatsi vajabarëyanexa. Tsipaji nejuyapijinë: ‘Tëpa meta baja,’ tasivajamatabejainëmi, itsiata tsaena asaë. Penaxuabaponaponaenëmi icatsia baja patajopa,” jai bajaraponë pexënatojavabelia, jai Jesús mapalivaisije fariseovijavabelia, judíovi pecujarubivijavabelia ata.

16

Pacuenia pijatuxanenë pecobecovë petoevetsinë

toveretapona pevetsiaexanaejavanëtsiyabara pelivaisi

¹ Jesùs pijajivijavabelia livaisi tsipaeba. Jumaitsi mapacueniae:

—Petuxanenë, bitso pexainaenë, ponapona. Bajaraponë xaina pijajivitonë petoevetsinexatsi pecobecovë. Itsiata pepëya pijajivitonë pecobecovë toveretaponatsi. Nexata itsamonaе tsipaebatsi pepëya pijajivitonë pecobecovë petoveretaponaejavatsi.

² Nexata petuxanenë pijajivitonë junata. Jumaitsi pijajivitonëjavabelia: “Xamë pina tapëya netoveretaponame tacaevetsiaexanaejava. Pabaxutojavabelia matamoyaquinarubame xuanë canajetaponame tacobecovë, xuanënuа netocomuataponame, bajarapabaxuto netocanaviatsianame. Nexata baja itsa netocanaviatsianame bajarapabaxuto, matavëjëa apo netoevetsimë tsane tacobecovë,” jai petuxanenë pijajivitonëjavabelia.

³ Nexata pijajivitonë sivapona bajarapabaxuto petocanaviatsinexa pijatuxanenë. Nexata bajarapabaxuto petocanaviatsivajënae jamatabëjumaitsi: “¿De tsaeta xua exanaenajë? Tajatuxanenë baja necapitsapaejitsia pecobecovë tattoevetaponaponaejavavecua. Apo necaëjëpae tsane tanacuenebinexa pabi tajacuata tanaevetsinexa. Bitso auranënuа tsipae itsamonaеjavabelia amoneya tavajëtaponaenexa palata tanamitsacomuatabiabinexa taxaejava.

⁴ Taneamoneyabivi meta abaxë, xua niamoneyaba, bevelia tovënëjonaponaenajë. Nexata tajatuxanenë tanecapitsapaecujinae,

bajarapamonae pijaboyabelia itsa ponaenajë,
xaniavaetsia necopiapitsiana. Nexata
bajarapamonaejavata naponaponaenajë,”
jamatabéjai bajaraponë.

⁵ Nexata bajaraponë junata daxita pamonae abaxë amoneyabatsi. Nexata pamonae amoneyabatsi, bajarapamonaes, caenë canacujitsia, patapona bajaraponëjavaberena. Nexata bajaraponë copiaya petopatsinëtsijavabelia jumaitsi: “¿Detsa pacuenia niamoneyabame abaxë, xua tajatuxanenë pijajava catsicopatatsi? jai bajaraponë.

⁶ Nexata ponë amoneyabatsi, jumaitsi: “Camoneyabatsi abaxë tacarajutsinexa aceiteranë ochocientos pagalónbeje,” jai. Nexata bajaraponë jumaitsi piامoneyabinëtsijavabelia: “Bevelia saya catocopatsianatsi. Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya cuatrocientos pagalónbejenexa bepijia yaquinarure. Nexata saya bajarapacuenia tajatuxanenë rajutsianame,” jai bajaraponë piامoneyabinëtsijavabelia.

⁷ Bajaraxuacujinae icatsia itsanë topatatsi. Nexata icatsia jumaitsi bajaraponëjavabelia: “¿Jica xamë? ¿Detsa pacuenia niamoneyabame?” jai. Nexata bajaraponë jumaitsi: “Camoneyabatsi abaxë tacarajutsinexa cien pabultobeje trigoxubultonë,” jai. Nexata bajaraponë jumaitsi piامoneyabinëtsijavabelia: “Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya ochenta pabultobejenexa yaquinarure. Nexata saya bajarapacuenia

tajatuxanenë rajutsianame," jai bajaraponë piamoneyabinëtsijavabelia. Bajarapacuenia exanpona daxita piamoneyabivitsijavabelia pesivajamatabëcuene xanepanaenexatsi, xaniavaetsia pecopiapitsinexatsi pijabota penaponaponaenexa, pijatuxanenë itsa navecuacapitsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitanetuarutaponae baxutonëtsi.

⁸ Bajaraxuacujinae pijatuxanenëjavabelia pona perajutsinexa jane baja bajarapabaxutonë. Nexata pijatuxanenë jumaitsitsi: "Xamë baja rovia pibisiacuene exaname. Itsiata baitsi jane niaitatsacaxae, exaname pacuenia catoxanepanaejitsia nevajënaeyabelia," jaitsi pijatuxanenë. Nexata pacuenia pijatuxanenë pepëya pecobecovë petocanajetabiabinë ajamatabëcueneitatsaca, bajara pijinia pacuenia Dioso apo pejumecovënëtsivi ajamatabëcueneitatsaca Dioso pejumecovënëtsivi matatoxenetsia mapanacuapijicuene yabaraje, jai Jesús pijajivijavabelia.

⁹ Icatsia Jesús jumaitsi pijajivijavabelia:

—Pacamuxujiobatsi xaniavaetsia. Mapanacuapijipalatata payavenonare itsamonaë. Nexata pacuenia pijatuxanenë pecobecovë petoevetsinë, pesivajamatabëcuene xanepanaevitsi xaina, xaniavaetsia pecopiapitsinexatsi pijabota penaponaponaenexa pijatuxanenë pecapitsapaecujinaetsi, bajara pijinia pacuenia paxamë ata athëbëtatsia paxainaename papecasivajamatabëcuene xanepaenaevi. Nexata pamatacabí patëpame, itsajota apo pana-

matavenonaemë palata, Dioso pacacopiapitsiana apo pevereverecaebonëjavatatsia, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

—Pajivi xaniavaetsia toeveta tsiquirijavayo ata itsanë pecobecovë, bajarapajivi xaniavaetsia toevetsipa ayaijava ata. Pajivi bijiaya toeveta tsiquirijavayo ata itsanë pecobecovë, bajarapajivi bijiaya toevetsipa ayaijava ata.

¹¹ Itsanë pecobecovë, mapanacuapijicueneje, palata ata, xaniavaetsia itsa apo patoevetsimë tsipae, nexata itsajivi ata apo pacaevetsiaexanae tsipae Dioso pijacuene, xua bitso namatamota mapanacuapijicuene matatoxenetsiaje.

¹² Itsa xaniavaetsia apo patoevetsimë tsipae itsanë pecobecovë, nexata pitsijava picani pacaevetsiaexana, bajarapitsijava itsajivi ata apo pacarajutsi tsipae pepo panijajavanexa, jai Jesús pijajivijavabelia.

¹³ Icatsia Jesús jumaitsi pijajivijavabelia:

—Itsajivi ata acuenebi caecuenia petonacuenebijava anijanëbeje pijatuxanenëbeje. Caenëjavabelia jitsipaejitsipa petonacuenebijava. Itsanëjavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

¹⁴ Fariseovi, bitso palata pejitsipaevi, jumetaeyena Jesús petsipaebilivaisi pijajivijavabelia. Nexata fariseovi jumecapocaponatsi Jesús.

¹⁵ Jesús nexata jumaitsi fariseovijavabelia:

—Paxamë pajitsipabiabame jivi peju-maitsinexa paxamë yabara: “Fariseovi raja pexaniajamatabëcuenevi,” pejainexa. Itsiata baitsi jane Dioso pacajamatabëcueneyapëtane pexaniajamatabëcuene apo panexainaevicuene. Pacuene bitso jivi tsitapexaniacuenetsi, bajarapacuene Dioso apo tsitapexaniacuenetsi, jai Jesús fariseovijavabelia.

Pacuenia Jesús tsipaeba fariseovijavabelia bajayata Dioso Moiséspijinëta penajumecopatsilivaisi, pacuenia ata Dioso pijajivi evetsijitsia, yabara pelivaisi

¹⁶ Icatsia Jesús jumaitsi fariseovijavabelia:

—Juanpijinë jivibautisabinëmi pepatsivajënaeya, jivi xaina Dioso Moiséspijinëta penajumecopatsilivaisi pejumecovënëtsinexa. Bajayata Diosojumepaebivi profetavi ata petsipaebilivaisianë ata, xaina jivi pejumecovënëtsinexa. Itsiata Juanpijinë pepatsicujinae, pexanialivaisi tsipaebaponajë. Tsipaebaponajë Dioso pijajivi pevetsijavanexa. Nexata daxitajivi bitso jitsipa penajonenexa Dioso pijanacuayabetsia, jai Jesús fariseovijavabelia.

¹⁷ Icatsia Jesús jumaitsi fariseovijavabelia:

—Mapanacuaje, itaboxo yajava, jemata vereverecaena. Itsiata baitsi jane palivaisi Dioso Moiséspijinëta najumecopata, bajarapacuenia apo vereverecae tsane. Nexata daxita pacuene yabara tajëvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

*Pacuenia Jesús livaisi tsipaeba penacojiobinë pi-java pexuabiyana vaya yabar a pelivaisi
(Mt 19.1-12; Mr 10.1-12)*

18 Icatsia Jesús jumaitsi fariseovijavabelia:

—Ponë pijava xuaba, nexata icatsia itsava itsa pita, bajaraponë pibisiacuene exana pevitota. Nexata naneconita Diosojavabelia. Tsipaji pepo pijavavecua jaita itsava. Dioso cajena abaxë bajaraponë pexuabiva pepo pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Nexata naneconita Diosojavabelia. Tsipaji itsanë pijava yacajérëta, pov a abaxë Dioso tanetsi itsanë pepo pijavacuenia, jai Jesús fariseovijavabelia.

Bitso riconë Lázarobeje yabar a pelivaisi

19 Icatsia Jesús livaisi tsipaeba fariseovijavabelia. Jesús jumaitsi mapacueniaje:

—Bitso pexainaenë, riconë, ponapona. Daxitamatamacabi naxatababiaba bitso pexaniaviriajavänë. Pexaejava, pexaniaviriajava, xaeyabiaba.

20 Riconë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejiobinë, Lázaro vënénë, boquecabiaba. Lázaro daxitanë perabëtsabana.

21 Lázaro picani jamatabëxaeyabiaba riconë pexaeyabiabijavata piothopaepëre mesa bëxëpanareca. Avirixi ata patabiaba itsajota Lázaro bocabiaba. Petsabanaejava raebabiabatsi.

22 Nexata baja belia Lázaro tēpa. Petēpaecujinae Lázaro ángelevi caponayatsi Dioso pijanacuayabetsia, itsabetsia Abrahampijinë petēpaecujinae ponapona. Bajaraxuacujinae riconë ata tēpa. Mëthëtatsi.

23 Riconëmi petēpaecujinae pata petēpaevi pepatabiabinacuayabelia. Nexata bajara-panacuata riconëmi bitso navixaetaeya bejiobi tsaponaponae. Nexata riconëmi athëbëa benaëcotsia. Tajëtatsia taenuta Abraham penucaejava. Lázaro nucaya Abraham pemuxunenetatsia.

24 Nexata riconëmi vavajai. Jumaitsi Abraham-javabelia: “Amo Abraham, nitaxutotsoniataema. Netoitorobimica Lázaro. Nacobeupijabutsi merata neebarëtocainejibiaexanaejitsia. Bitsو jamatabëfaenajë mapatajutaje,” jai riconëmi.

25 Nexata Abraham jumaitsi riconëmijavabelia: “Tamomo, najamatabënapire. Pamatacabí pinaena abaxë asaëmë tsaponaponae nenaexanaeirata, épexaniacuene picani xainame. Lázaro pijinia pamatacabí abaxë asaë tsaponaponae, bitso picani bejiobi. Itsiata juya mapamatocabije pexaniacuenia majotaje catsuponapona. Xamë biji navixaetaeya ponapiname.

26 Itsajivi jamatabëponae ata bajarabereca, acuenebi itsiata pepanepaenexa bajarabereca. Tsipaji bitso ayaiitapajanitoxanetoreca. Bajaraxuata paxamë ata apo pacacaëjëpae panepanepaenexa mabetsinaje,” jai Abraham.

27 Nexata icatsia riconëmi jumaitsi Abrahamjavabelia: “Amo Abraham, pexaniacuene cavajëtatsi. Tonajumeitorobianame Lázarota taxa pijaboya-

belia.

²⁸ Bajarajotalia xainajë cinco ponëbeje tajuyapijivi. Xaniavaetsia Lázaro tsipaebiana. Muxujibiana bajarapamonae ata peponaeyaniva mapanavixaetaeyabiabinacuaya berenaje,” jai riconëmi Abrahamjavabelia.

²⁹ Nexata icatsia Abraham jumaitsi riconëmijavabelia: “Bajarapamonae baja xaina Moisëspijinë peyaquinaelivaisianë. Diosojumepaebivimi profetavi ata peyaquinaelivaisianë ata, xaina baja. Nexata nejuyapijivi itsa apo jitsipae tsane peponaenexa bajarapanacuayabelia, nexata nejuyapijivi jumecovënëtsiana bajarapamonaemi peyaquinaelivaisianë,” jai Abraham riconëmijavabelia.

³⁰ Riconëmi icatsia jumaitsi Abrahamjavabelia: “Jume raja. Apo jumecovënëtsi tsane cajena bajarapalivaisianë. Itsiata itsajivi itsa asaë tsane petëpaecujinae penaviatsinexa pecovëyabelia, tsipaebiana tajuyapijivijavabelia. Nexata tajuyapijivi copabiana pibisiaciune pexanabiabijava. Njamatabécuenepënëyorotsiana Diosojavabelia,” jai riconëmi Abrahamjavabelia.

³¹ Nexata icatsia Abraham jumaitsi riconëmijavabelia: “Nejuyapijivi itsa apo jumecovënëtsi Moisëspijinë peyaquinaelivaisianë, Diosojumepaebivimi profetavi peyaquinaelivaisi ata, nexata pajivi asaë petëpaecujinae, mavelia ponae ata tsipaeje petsipaebinexa nejuyapijivijavabelia, itsiata nejuyapijivi apo jumecovënëtsi tsipae bajarapajivi ata,” jai Abraham riconëmijavabelia, jai Jesús fariseovijavabelia.

17

Pacuenia Dioso pijajivixae, itsamonaе ja-matabëcueneëjëbijiitsatsi pibisiacuene pexanaenexa yabara pelivaisi

(Mt 18,6-7, 21-22; Mr 9,42)

¹ Jesùs jumaitsi pijajivijavabelia:

—Xanë tajajivixae, itsamonaе ja-matabëcueneëjëbabianatsi pibisiacuene pexanaenexa. Nexata itsamonaе pejamatabëcuene tajajivi pibisiacuene exanaena. Nexata pajivi pejamatabëcuene tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pinijicuenia Dioso naneconitsiaexanaenatsi.

² Itsamonaе Dioso pejumecovënëtsivi, abaxë bepejevaxijamatabëcuene xaina Dioso pejumecovënëtsijava yabara. Nexata apo ajamatabëcuenesaë. Nexata pajivi tajajivijavabelia pibisiacuene jamatabëexanaeyaexana, abaxë tajajivijavabelia pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapacuenia bexuarecatsi, tajajivijavabelia pibisiacuene itsa exanaeyaexana bitso penaneconitsiyaniva Diosojavabelia.

³ Nexata xania. Panayajivitaema pibisiacuene, jai Jesùs pijajivijavabelia.

Icatsia Jesùs jumaitsi pijajivijavabelia:

—Itsanë Dioso panenajuajumecovënëtsivi pibisiacuene itsa pacaxanaena paxamëjavaberena, bajaraponë xaniavaetsia paitavetsianame.

Nexata baja itsa aura tsane pibisiacuene papecaexanaejava yabara, nexata pexaniajaijumeta itsa pacanavajunupaebiana pecopatsijavanexa bajarapacuene, pajamatatabëcuenecaevianame pibisiacuene papecexanaejava. Pabarajamatabëcuenexanepanaename bajaraponë.

⁴ Caematacabita siete xuabeje pibisiacuene pacaexanae ata tsane, itsiata siete xuabeje itsa aura tsane pibisiacuene papecexanaejava yabara, nexata pexaniajaijumeta itsa pacanavajunupaebiana pecopatsijavanexa bajarapacuene, itsiata pajamatatabëcuenecaevianame. Pabarajamatabëcuenexanepanaename bajaraponë, jai Jesús pijajivijavabelia.

*Pacuenia Jesús jumaitsi pijapóstolevijavabelia
yabara pelivaisi*

⁵ Jesús pijapóstolevi jumaitsi Jesúsjavabelia:

—Patajatuxanenë, paneyavenonare: “Xanë cajena necaëjëpa daxitacuene taexanaenexa,” nejaitsabiabijava orijibia patacajumecovënëtsinexa, jai Jesús pijapóstolevi.

⁶ Nexata Jesús jumaitsi pijapóstolevijavabelia:

—Tsiquirijavayo ata xanë yabara itsa pajamatatabëjumaitsimë tsipae: “Xaniajai cajena. Jesús caëjëpatsi daxitacuene pexanaenexa,” itsa pajamatatabëjamë tsipae, nexata paxamë ata pacacäjëpaejitsipa ayaicuene paneexanaenexa. Nexata itsa pajumaitsimë tsipae mapanaejavaxanetjavabeliaje: “Yatabutopaya natixire. Nucaename pucaxaneto tuuatujétalia,” itsa pajamë tsipae, nexata naejava ata pacajumecovënëtsipa cajena, jai Jesús pijapóstolevijavabelia.

*Pacuenia itsajivi pijatuxanenë pitorobicueni-
atsi toexanabiaba yabara pelivaisi*

⁷ Jesús icatsia jumaitsi pijapóstolevijavabelia:

—Paxaméyajuvënënë xainaejitsipa pijajivitonë. Nexata itorobijitsipa petonacuenebaponapon-aenexatsi. Nexata bajaraponë pijatuxanenë ira petocueponaponaecujinae, patsipa pijatuxanenë pijaboyaberena. Itsa jume, baca petoevetaponaponaecujinae patsipa. Nexata paxaméyajuvënënë petuxanenëxæ, pijajivitonëjavabelia apo jumai tsipae: “Jonemena baja. Ecäre nexaejava tacarajutsinexa,” apo jai tsipae pijajivitonëjavabelia.

⁸ Jume baja cajena. Biji rajane jumai tsipae pijajivitonëjavabelia: “Netoexanare taxaejavanaxa. Nexata abaxë nevetanucaename tanabanijavata. Bajaraxuacujinae xamë nabanianame,” jai tsipae pijajivitonëjavabelia.

⁹ “Xanepana rabaja. Pexaniacuene bitso netoexaname,” apo jai tsabiabinua pijajivitonëjavabelia petonacuenebabijavatsi yabara. Bajarapacuenia apo jumai tsabiabi tsipae tsipaji saya pijajivitonë tsaponapona. Nexata pacuenia pijatuxanenë itorobatsi, bajaraponë exanabiabijitsipa.

¹⁰ Bajarapacuenia paxamë ata patoexanare Dioso papecaitorobicuenia. Itsa patoveretsianame Dioso papecaitorobicuenia panetoexanavanapaejava, nexata saya namataenetsia panajumaitsimë tsane: “Vaxaitsi saya vajatuxanenë pijajivitsi. Nexata vajanacaitorobicuenia toexanavanapatsi,” panajamë tsane. Pëtsa panajumaitsimë:

“Itsajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamë pëtsa, jai Jesús pijapóstolevijavabelia.

Pacuenia Jesús jamatejemaya exana diez ponëbeje, bajayajebi bitso peperabëtsabanaevi, yabara pelivaisi

¹¹ Jesús pona Jerusalén tomarabelia. Itsajota Samaria nacuabeje Galilea nacuabeje namux-unenecaxitajarababeje, bajaraxuayo Jesús najetaruka.

¹² Itsa baja Jesús patsijitsia tsiquiritomarayojavelia, mataenenatsi diez ponëbeje bajayajebi bitso peperabëtsabanaevi. Itsiata tajyo bajarapamonae vecuanubenaothopatsi.

¹³ Bajarapamonae ayaijumeta jumaitsi Jesúsjavabelia:

—¡Jesús, paneitaxutotsoniataema! jai.

¹⁴ Nexata Jesús itsa tane bajarapamonae, Jesús jumaitsi bajarapamonaejavabelia:

—Panaitajëtsianame sacerdotevijavabelia papecaperabëtaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaejavata pepatsinexa sacerdotevijavabelia, namutua baja perabëxanepananajetarubena.

¹⁵ Daxita bajarapamonae peperabëxanepanaejava itsa tane, nexata caenë saya bajarapamonaeyajuvënëñë naviateca Jesúsjavabelia. Bajaraponë namutua ayaijumeta Diosojavabelia jumai tsanajetarucae: “¡Diosomë,

bitso ayaijamatabëcuenenëmë! ¡Tavitanejavami
baja vecua, nejamatejemayaexaname!” jai
tsanajetarucae bajaraponë Diosojavabelia.

16 Bajaraponë itsa pata Jesúsjavabelia, pemataba-
cabëta irataeya bocajunua Jesúsjitabara.

—Pexaniacuene netoexaname. Nejamateje-
mayaexaname baja tavitanejavamivecua, jai
Jesúsjavabelia.

Bajaraponë Samaria nacuapijinë.

17 Nexata Jesúsjitabara bajarajota penubenaevi-
vijavabelia:

—Diez ponëbeje bitso peperabëtsabanaevi
jamatejemayaexanajë. ¿Detsa meta xuajitsia
daxita apo najuapatsi?

18 Maponëje caenë saicaya nacuapijinë,
apo judionë ata, naviateca Diosojavabelia
pejumaitsinexa: “¡Diosomë, bitso ayaija-
matabëcuenenëmë! ¡Tavitanejavami baja vecua,
nejamatejemayaexaname!” pejainexa Diosojav-
abelia, jai Jesúsjitabara penubenaevijavabelia
Samaria nacuapijinë yabara.

19 Nexata Samaria nacuapijinëjavabelia Jesúsjit-
maitsi:

—Nonotapunare. Ponare baja. Jamatejemamë
rabaja tanejumecovënëtsixaemë tacajamateje-
mayaexanaejavanexa, jai Jesúsjitabara.

*Pacuenia Jesúsjitabara pijajivijavabelia,
fariseovijavabelia ata, pecopiapatsijava baja
Dioso pijajivi pevetsijava mapanacuataje yabara
pelivaisi*

(Mt 24.23-28, 36-41)

20 Fariseovi jumaitsi Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaitsi fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajaitaxutota.

²¹ Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotalaje Dioso pijajivi pevetsijava mapanacuataje,” apo jainua tsane. Dioso rabaja capanepaeya aeconoxae evetapona pijajivi paxamë tuatuajéta, jai Jesús fariseovijavabelia.

²² Nexata Jesús itsamatacabi mapanacuaje pevetsijavanexa, tajévelia navajunupaeba pijajivijavabelia. Jesús jumaitsi mapacueniae:

—Itsamatacabi xanë, Daxitajivi Pematapijinënë, mapanacuaje taevetsinë tsane. Nexata paxamë picani bitso pajitsipaename patanetaenexamë mapanacuaje taevetsicuene. Itsiata baitsi jane apo pataemë tsane mapanacuaje taevet-sicuene.

²³ Nexata itsamona pacajumai tsane: “Bajarajotalia eca mapanacua pepo pevetsinëje,” pacajai tsane xanë yabara. Itsa jume, pacajumai tsane: “Majota ecaje, mapanacua pepo pevetsinëje,” pacajai tsane xanë yabara. Itsiata pëtsa paponame. Pëtsa pamuxunaponamenua bajarapamonae pepëta.

²⁴ Pacuenia yamaxë itsa nivejai tsajuni athëbëvetsica, caecuenia jivi cotiatane daxitajava, bajara pijinia pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë.

25 Itsiata copiaya ayaicuenia navixaetaeya bejiobinë tsane. Mapanacuataje pejinavanapaevi apo nejumecovënëtsinua tsane Dioso athëbëvetsica taneitorobinëcuenetsica.

26 Pacuenia bajayata jemata itsi pamatacabí Noépiginë ponapona, bajara icatsia jemata itsane pamatacabí xanë, Daxitajivi Pematapijinënë, jemata icatsia patsianicajë.

27 Bajayata pamatacabí Noépiginë ponapona, jivi picani xaniavaetsia jamatejema pexaejava xaevanapa. Apaevanapanua. Nacojobapona itsamona. Itsamona pexënatoyonë pebijavabelia canajetapona petonacojobinexatsi. Bajarapamona jematejema saya jinavanapa. Nexata bajarapamatacabí Noépiginë épijamona pinijibarcojavabelia barëjunua. Nexata daxitajivi merata bubuna jemata ira itsa bubuta.

28 Bajara pijinia itsi bajayata pamatacabí Lotpijinë ponapona. Jivi saya jamatejema jinavanapa. Pexaejava xaevanapa. Apaevanapanua. Comuacapona. Canajetapona. Ubapona pijapabianë. Pijabonë ata exanapona.

29 Itsiata baitsi jane pamatacabí Lotpijinë Sodomatomara vecuapitsapa, jemata athëbëvetsica pinijicuenia isotonë othopaica. Othopaica pitarutsiibotonënua. Nexata daxita Sodoma tomarapijivimi tajuatsi. Nexata baja verebiabatsi.

30 Bajara pijinia pacuenia icatsia jemata itsane pamatacabí xanë, Daxitajivi Pematapijinënë, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

31 Icatsia Jesú斯 jumaitsi pijajivijavabelia:

—Pamatacabi xanë jemata patsianicajë, itsajivi ata pëtsa sivanajamatabëxaina mapanacuapijicueneje. Nexata pajivi athëbëyo bojumatatsia ecaya, perunaecujinaetsica, pëtsa sivanajamatabëxaina pijaboënëalia pebobenaejavane pejutsinexa. Pajivi pijinia pijapabita nacuenebaponapona, pëtsa najamatabëxaina penaviatsinexa pijaboyabelia.

32 Panajamatabënapire pacuenia bajayata Lot-pijinë pijavami exanatsi. Lotpijinë pijavami pesivanajamatabëxainaexae mapanacuapijicuene, napijivitaejojopa. Nexata baja tēpa.

33 Pajivi exanaponapona penatojitsipaecuenia, apo xainae tsane matacabi apo peverevere-caejava. Itsiata baitsi jane pajivi xanë tajamatabëcueneta copatsiana penatojitsipaecuenia pexanabiabijavami, bajarapajivi xainaena matacabi apo peverevere-caejava, jai Jesú斯 pijajivijavabelia.

34 Icatsia Jesú斯 jumaitsi tajëvelia pijajivijavabelia:

—Xaniajanë pacuenia pacatsipaebijitsiatsi. Patmatacabu patsianicajë, bajarapameravi anijanëbeje majitanucaenabeje caecamata. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë. Apo tanejumecovënëtsinë copatabuatsianatsi.

35 Anijavabeje pijinia najuacuabanucaenabeje caejavata. Nexata tanejumecovënëtsiva pitsianatsi. Apo tanejumecovënëtsiva copatanutsianatsi.

36 Anijanëbeje pijinia najuanacuenebanucaenabeje pabita. Nexata tanejumecovënëtsinë pitsianatsi. Apo tanejumecovënëtsinë copatanutsianatsi, jai Jesús tajëvelia pijajivijavabelia.

37 Jesús nexata pijajivi itsa jumetane bajarapacuenia Jesús pejumaitsijava, bajarapamonaejumaitsi Jesúsjavabelia:

—Patajatuxanenë, ¿detsa jota bajarapacueniayajuvënëptsianatsi? jai Jesús pijajivi.

Nexata Jesús jumaitsi tajëvelia pijajivijavabelia:

—Pacuenia quequeremonae bepijia yapëtane itsajota petuxutsaebinë boca bajarajota penacaetuatsinexa, bajara pijinia pacuenia daxita tajajivi bepijia yapëtaena tapatsijavatsica penacaetuatsinexa xanëjavaberena, jai Jesús pijajivijavabelia.

18

Pacuenia Jesús pijajivijavabelia livaisi tsipaeba jueznë pelvaisicueniayabara pelvaisi

1 Jesús pijajivi livaisi tsipaeba mapacueniaeje Jesús pijajivi jamatabécuenecueranaenejeva pevajëtabiabinexa Diosojavabelia.

2 Nexata Jesús jumaitsi pijajivijavabelia:

—Tomarata ponapona jueznë. Bajaraponë pevetsinë jivi penaneconitsiaexanaecuene. Bajaraponë Dioso apo cujunavi. Jivi ata apo cujunavi.

3 Bajarapatomarata ponapona pamona pevecuatëpaevatsi. Bajarapova ponabiaba jueznëjavabelia pejumaitsabiabinexa: “Naneconitsiaexanare ponë xanëjavaberena naneconita. Naneconitsiaexanare pacuenia caitoroba nijatuxanenë

bajarapitsivi nenaneconitsiaexanaenexa,"
 pejaitsabiabinexa, bajarapova ponabiaba
 jueznéjavabelia.

⁴ Itsiata abaxë bajayajebi jueznë apo
 jamatabëcuneyavenonae bajarapova. Belia
 baja bexëa jueznë jejai. Nexata jueznë
 jamatabëjumaitsi: "Dioso picani apo cujunavinë.
 Jivi ata picani apo cujunavinë.

⁵ Itsiata mapovaje tanejamatabëitonotabiabixae,
 yavenonaenajë pacuenia nitorobabiaba. Nexata
 baja bajarapova matavëjëa apo patabiabirena
 tsane xanëjavaberena tanecueranaeyaex-
 anaenexa," jamatabëjai jueznë, jai Jesús
 pijajivijavabelia.

⁶ Jesús icatsia jumaitsi pijajivijavabelia:

—Bajara jamatabëcueneitsi jueznë, pibisiaja-
 matabëcuenenë ata. Yavenona bajarapova asaëya
 pevajécabiaabixaetsi.

⁷ Bajara pijinia pacuenia Dioso ata pijajivi
 yavenonaena itsamonae pibisiacuene itsa ex-
 anatsi. Bajarapacuenia Dioso pijajivi yavenon-
 aena bajarapamonae itsa vajëtabiabiana Diosojav-
 abelia matacabijebi, meravi yajava. Dioso cajena
 apo cuenenajematsi tsane itsa yavenonaena pijajivi.

⁸ Xaniajanë pacuenia pacatsipaebijitsiatsi.
 Dioso apo cuenenajematsi tsane itsa
 yavenonaena pijajivi itsamonae pibisiacuene
 pexanaeyanivatsi. Pamatacabí xanë, Daxitajivi
 Pematapijinënë, icatsia patsianicajë, ¿caxitarabi-
 anajë tsaja abaxë tanecopiaevetavanapaevi? jai
 Jesús pijajivijavabelia.

Pacuenia itsanë fariseonë, itsanë impuestomatamo gobierno pejamatabëcuene pemamatoyanijobinë, vajétabeje Diosojavabelia yabara pelivaisi

9 Itsajota Jesús pijajivijavabelia livaisi tsipaeba, bajarajota nubena itsamona. Bajarapamonae jamatabëjumai tsabiabi: “Vaxaitsi cajena pexaniajamatabëcuenevitsi itsamonaevectua. Itsamona bitso nacavecuapibisiajamatabëcuenevi,” jamatabëjai tsabiabi. Nexata bajarapamonaejavabelia Jesús livaisi tsipaeba. Jumaitsi mapacueniae:

10 —Anijanëbeje tsiabeje templobojavabetsia pevajëtsinexabeje Diosojavabelia. Caenë fariseonë. Itsanë gobierno pejamatabëcuene impuestomatamo pemamatoyanijobabiabinë.

11 Nexata fariseonë nuca. Fariseonë pevajëtsijavata Diosojavabelia, bitso bepexaniajamatabëcuenenë nataeya jumaitsi mapacueniae: “Diosomë, pexaniajamatabëcuene carajutatsi. Tspaji pacuenia itsamona jamatabëcueneitsi tsenae, bajara xanë apo jamatabëcueneitsinë. Yamaxëitojorobiaya jivi apo tavecuanacobetoxotsinë. Apo tacujirubejenë cajena. Apo tajaitsinë itsava tajavavecua. Pacuenia maponëje gobierno pejamatabëcuene impuestomatamo pemamatoyanijobabiabinë jamatabëcueneitsije, bajara xanë apo tajamatatabëcueneitsinë.

12 Caesemana canacujiitsia, anijamatocabibeje, najamatatabëcuenexaniavaetsiaya ponaponabiabajë xaenejevanë taxaejava tacavajëtsinexa xamëjavabelia. Daxita pacuene nacanabajë, diez xuabejeyajuvënëjava, caejava, xamëjavabelia carajutabiabatsi ofrendacuenia,” jai mapacue-

niaje fariseonë templobota pevajëtsijavata Diosojavabelia.

¹³ Nexata ponë gobierno pejamatabëcuene impuestomatamo pemamatoyanijobabiabinë, pevajëtsijavata Diosojavabelia tajyo nucalia piauraxae. Athëbëabetsia ata penavëyotsijava cujunava. Namëpabëbenuca pecobeta pejamatabëbëjaixae pibisiacuene pexanaeneconi yabara. Nexata bajaraponë Diosojavabelia pevajëtsijavata jumaitsi mapacueniaje: “¡Diosomë, nitaxutotsoniataema! ¡Pibisiacuene cajena bitso xanë exanabiabajé!” jai bajaraponë templobota pevajëtsijavata Diosojavabelia, jai Jesús mapacueniaje bepexaniajamatabëcuenevi penataevijavabelia.

¹⁴ Icatsia Jesús jumaitsi bajarapamonaejababelia:

—Xaniajanë pacuenia pacatsipaebijitsatsi. Ponë gobierno pejamatabëcuene impuestomatamo pemamatoyanijobabiabinë, bajarapacuenia pevajëtsixae Diosojavabelia, Dioso baja vecuaajibiaexanatsi pibisiacuene pexanaeneconimi. Nexata baja bajaraponë naviata pijaboyabelia pianeconijibinë. Ponë fariseonë, navajëtsi ata Diosojavabelia, itsiata pijaneconi yajava naviata pijaboyabelia. Tsipaji beayaijamatabëcuenenë natane pevajëtsijavata Diosojavabelia. Bajaraxuata pajivi beayaijamatabëcuenejivi natane itsamonaeveucua, bajarapajivi beveliajamatabëcuenejivi exanaenatsi Dioso. Pajivi saya beveliajamatabëcuenejivi natane itsamonaeveucua, bajarapajivi ayaijamatabëcuenejivi exanaenatsi Dioso, jai Jesús

bepexaniajamatabëcuenevi penataevijavabelia.

*Pacuenia Jesús jumaitsi pejevaxijivixijavabelia
yabara pelivaisi*

(Mt 19.13-15; Mr 10.13-16)

15 Itsamonaе pejevaxijivixi tocapataponatsi Jesús pecobeta pejayataponaenexa. Nexata Jesús pijajivi itsa tane bajarapacuene, Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavabelia, jai.

16 Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeaebinejeva xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovënëta Dioso pejumelivaisi.

17 Xaniajanë pacuenia pacatsipaebijitsatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeaebinejeva. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovënëta Dioso pejumelivaisi. Nexata pamonaе jumeaebinejeva xaniavaetsia jumecovënëtsiana Dioso pejumelivaisi, bajarapamonaе jonena Dioso pijanacuayabetsia. Itsiata baitsi jane pamonaе Dioso pejumelivaisi jumeaebinejeva xaniavaetsia apo jumecovënëtsi

tsane, apo jone tsane Dioso pijanacuayabetsia, jai Jesús pijajivijavabelia.

*Pacuenia pevëjäato, bitso pexainaenë, cuaicuai-jai Jesúsjavabelia yabara pelivaisi
(Mt 19.16-30; Mr 10.17-31)*

18 Pevëjäato, judíovi pevetsinë, yanijoba Jesúsjavabelia. Pevëjäato jumaitsi mapacueniaje:

—Petuxanenë, pexaniajamatabëcuenenëmë, ¿detsa pitsicuene exanaenajë taxainaenexa matacabi apo pevereverecaejava? jai pevëjäato.

19 Nexata Jesús jumaitsi pevëjäatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë.

20 Xamë baja yapëtaneme pacuenia Dioso pejumelvaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsapetiriva nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Axa yaiyataema. Ena ata yaiyataema,” jai Dioso pejumelvaisita. Xamë baja yapëtaneme bajarapalivaisi, jai Jesús pevëjäatojavabelia.

21 Nexata pevëjäato jumaitsi Jesúsjavabelia:

—Daxita rabaja bajarapalivaisianë jumecovënëtajë pejevaxinënëjavaveliacujinae, jai pevëjäato.

22 Itsa Jesús jumetane bajarapacuenia pejumecanaviatsijavatsi, nexata icatsia jumaitsi pevëjäatojavabelia:

—Abaxë raja catosaica caejava nexanaenexa. Canajere daxita nexaina/javami. Bajarapamata-momi tsicobetsanaename bepejiobivi. Bajaraxu-acujinae nepénaponaename. Nexata bajarapacue-nia xainaename bitso nexainaecuene Dioso pi-janacuatsatsia, jai Jesús pevëjéatojavabelia.

²³ Bajarapacuenia Jesús itsa jumaitsi pevëjéatojavabelia, nexata pevëjéato bitso bejamatabëjobi tsanajetsireca. Tsipaji pevëjéato daxitacuene bitso pexainaenë. Nexata pevëjéato apo jamatabëjumecovënëtsi palivaisi Jesús tsipaeba.

²⁴ Itsa Jesús tane pevëjéato bepejamatabëjobi tsanajetsijavareca, nexata pevëjéato pecovëta ju-maitsi pijajivijavabelia:

—¡Pamonae bitso daxitacuene pexainaevi, tsi-ayapëbejetsi bitso penajamatabëcuene copatsinexa Diosojavabelia pecapanepaenexatsi Dioso pijanacuayabetsia!

²⁵ Pacuenia camello acuenebi pejonejava palutaetoitaxutovojojitalia, bajara pijinia pacuenia bitso pexainaenë acuenebi tsane pejonejava Dioso pijatomarabetsia, jai Jesús pijajivijavabelia.

²⁶ Nexata Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia, bitso pexainaevi ata, itsa apo panepae tsane Diosojavabelia? jai Jesús pijajivi.

²⁷ Jesús nexata jumaitsi pijajivijavabelia:

—Pacuenia jivi apo caëjëpaetsi pexanaenexa, bajarapacuenia Dioso caëjëpatsi pexanaenexa, jai Jesús pijajivijavabelia.

28 Nexata Pedro jumaitsi Jesúsjavabelia:
—Patajatuxanenë, paxanë rabaja pacopatajë daxitacuene pataxainaejavami. Nexata baja pacapénajinavanapatsi, jai Pedro.

29-30 Jesús nexata jumaitsi:
—Xaniajanë pacuenia pacatsipaebijitsiatsi. Pajivi Dioso pijacuene petonacuenebinexa pueneta pijabomi, paxa ata, pena ata, pematapijivi ata, pejuyapijivi ata, pijava ata, pexi ata, nexata bajarapajivi mapanacuataje pepuenetsijavami mata-toxenetsia Dioso rajutsianatsi. Nexata bajarapajivi bexëajavabelia petëpaecujinae ata Dioso rajutsianatsi matacabi apo peverevererecaejava, jai Jesús pijajivijavabelia.

*Pacuenia icatsia Jesús tajëvelia navajunupaeba
pebeyaxuabijavanexatsi yabara pelivaisi*

(Mt 20.17-19; Mr 10.32-34)

31 Jesús itsamonaevecta épabajivi, doce ponëbeje, junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

—Panejumetaema. Mara Jerusalén tomarabelia ponatsije. Bajayata Diosojumepaebivimi profetavi, xanë, Daxitajivi Pematapijinënë, talivaisi tajëvelia yaquina. Pacuenia nexanaejitsia, daxita bajarapalivaisi bajayata profetavimi tajëvelia yaquina. Nexata daxita pacuenia xanë talivaisi bajayata tajëvelia profetavimi yaquina, daxita Jane baja bajarapacuene Jerusalén tomatalia netocopiapatsiana.

32 Itsanacuaverena pepatsivi pecobeyabelia necanajetsiana tanebeyaxuabinexa. Bajaramponae necanecaponaena. Nebijataena pibisiacuenia. Nesuabiana.

33 Nejumatitibabena penaneconitsivi pejumaconitabiabimacata. Bajara-xuacujinae nebeyaxuabiana. Itsiata baitsi jane tanebeyaxuobicujinae, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

34 Itsiata Jesús pijajivi apo jumeyapëtae pajamatabëcuene yabara Jesús jumaitsi.

Pacuenia Jesús itaxutoxanepanaeyaexana bitso pitaxutotsécënaenë, Jericó tomarapijinë, yabara pelivaisi

(Mt 20.29-34; Mr 10.46-52)

35 Jesús imoxoyotanajetaruca Jericótomara. Nexata namuto muxuneneta eca bitso pitaxutotsécënaenë, apo petaenë. Bajaraponë amoneya palata vajëcabiabeca jivijavabelia.

36 Nexata bitso pitaxutotsécënaenë itsa jumetane jivibitsaëtoxaneto pecuaicuajai tsanajetarubenaejava namutua, bajaraponë epajunateca.

—¿Detsa xua pajaitame? jai tsecae bajaraponë.

37 Nexata jivi jumaitsi bajaraponëjavabelia:

—Jesús raja, Nazaret tomarapijinë, maxuayo na-jetaruaje, jai jivi.

38 Nexata pitaxutotsécënaenë vavajai tsecae.

—¡Jesús, Davidpijinë pemomomë, nitaxutotsoni-ataema! jai tsecae bajaraponë.

39 Nexata picani itsamona, Jesú斯 pevajënaeya penajetarubenaevi, jumeitaveta bajaraponë pemoyanexa. Itsata biji bitsoyo orijibia vavajai tsecae.

—¡Davidpijinë pemomomë, nitaxutotsoniataema! jai tsecae pitaxutotsécënaenë.

40 Nexata Jesú斯 muxunanucojopa. Jumaitsi pijavabelia:

—Panetocomacaponaremena pitaxutotsécënaenë, jai Jesú斯.

Itsa baja imoxoyo tocanajetarubenatsi, Jesú斯 jumaiti pitaxutotsécënaenëjavabelia:

41 —¿Detsa xua jitsipame tacaexanaenexa? jai Jesú斯.

Nexata bitso pitaxutotsécënaenë jumaiti Jesúsvavabelia:

—Jesú斯, jitsipajë taitaxutoxanepanaejava, jai pitaxutotsécënaenë.

42 Jesú斯 nexata jumaiti pitaxutotsécënaenëjavabelia:

—Itaxutoxanepaname rabaja. Tsipaji nesivajamatabëjumaitsimë mapacueniaje: “Jesú斯 nitaxutoxanepanaeyaexanaena,” nesivajamatabëjamë, jai Jesú斯 pitaxutotsécënaenëjavabelia.

43 Bajarapacuenia Jesú斯 pejumaitijavata, bitso pitaxutotsécënaenëmi xaniavaetsia baja tane. Nexata bajaraponë napona baja Jesú斯 pepëta. Bajaraponë namutua jumai tsanajetarucae Diosovavabelia:

—¡Diosomë, bitso pexaniacuene netoexaname! jai tsanajetarucae bajaraponë.

Pamonae ata tane bajaraponë pitaxutox-anepanaejava baja, daxita bajarapamonae ata Diosojavabelia jumai tsanajetarubena:

—¡Diosomë, bitso ayajamatabëcuenenëmë! jai tsanajetarubena Diosojavabelia.

19

Pacuenia nabarëcuaicuajaibeje Jesúsbeje Zaqueobeje yabara pelivaisi

¹ Jesús najetaruca Jericó tomarajava.

² Jericó tomara ponapona Zaqueovënë. Bajaraponë gobierno pejamatabëcuene impuestomatamo pemata moyani jobabiabivi penamatata caitorobinë. Zaqueo bitso pexainaenë pexainaejava.

³ Nexata Zaqueo jamatabëtane Jesús. Itsiata apo caëjëpaetsi petaejava. Tsipaji Zaqueo petoyae-caenëyo. Jivibitsaëtoxaneto matatoyerotsia nubennatsi Jesús Zaqueo pevajënae.

⁴ Nexata Zaqueo cujinaeponalia jivibitsaëtoxaneto pevajënaeyabelia Jesús peponaenamutuabelianexa. Junaya naejavatsia athëbëvetsica petaenucaenexa Jesús penajetarucaejava.

⁵ Nexata Jesús namutua itsa imoxoyotanajetaruca, itsa poneta Zaqueo athëbëyo nucaya, bajaraponaejavatsia Jesús naëcotsia. Nexata Jesús taenutsia Zaqueo. Jesús nexata jumaitsi Zaqueo-javabelia:

—Zaqueo, naxanitsiayo runaimica. Nijaboya-belia raja patsijitsianë, jai Jesús.

6 Nexata Zaqueo naxanitsiayo runajopaica. Barëyaya copiapita pijaboyabelia pebarëponaenexa Jesús.

7 Daxita pamonae Jesús matatoyorotsia najetarubenatsi, itsa tane bajarapacuene, Jesús baracuaicuajaitsi tsanajetarubena. Ëpamonae najumaitsi tsanajetarubena Jesús yabara:

—Jesús raja naponaponaejitsia Zaqueo pijabota, caranata pibisiacuene pexanaenë pijabota, najai tsanajetarubena bajarapamona Jesús yabara.

8 Nexata Zaqueo pijabota Jesús eca mesa mux-uneneta. Bajarajota Jesús pitabarata Zaqueo nonotapuna. Jumaitsi Jesúsjavabelia:

—Tajatuxanenë nejumetaema. Tsatsianejë namatajëpaeya taxainaijava tarajutsinexa bepe-jibivijavabelia. Pamonae yamaxëitojorobiaya vecuanotajë tamatamoyanijobijavata impuestomatamo, bajarapamona tocnaviabi-anajë. Nexata tayamaxëitojorobijamatabëcuene bajarapamona rajutsianajë juya cuatro xuabeje tsaponai caijavayomijamatabëcuene, jai Zaqueo Jesúsjavabelia.;

9 Nexata Jesús jumaitsi Zaqueojavabelia:

—Zaqueo, ajena rabaja pamatacabi, caxitarabame, nijamonaе yajava, nijaneconivecua pecacapanepaejavanexa Diosojavabelia. Tsipaji baja nijamonaе barëjumecovënëtame Dioso. Zaqueo, xamë Abrahampijinë pemomo atamë, abaxë picani Dioso apo catae Abrahampijinë pemomomëcuenia. Itsiata baitsi jane ajena baja Diosojavabelia nenajamatabëcuene copatsixae,

Dioso jane baja catane pepacuene Abrahampijinë pemomomëcuenia.

10 Xanë, Daxitajivi Pematapijinënë, sivapatajopajë tajaitsinexa Diosovecua penaxuabivi tacapanepaenexa pijaneconivecua, jai Jesús Zaqueojavabelia.

*Oro palatanëanë, diez ponëbeje, yabara pelivaisi
(Mt 25.14-30)*

11 Zaqueo pijabota itsamonaе namuxunaevetena Jesús petsipaebilivaisi Zaqueojavabelia. Pamonaе namuxunaevetena, jamatabëcuenenavëxaniabiaya jamatabëjumai tsenae: "Imoxoyo rabaja ecalia Jerusaléntomara. Nexata Jesús itsa patsialia Jerusalén tomarabelia, copiajopaena jane baja daxita Dioso pijajivi pevetsijava," jamatabëjai tsenae bajarapamonae. Bajarapacuenia jamatabëjumai tsenae tsipaji baja Jerusaléntomara imoxoyo ecalia Jesús pepatsinexa.

12 Bajaraxuata Jesús livaisi tsipaeba bajarapamonaejavabelia. Jesús jumaimatabëcuenenavëxaniabiaya jamatabëjumai tsenae: "Imoxoyo rabaja ecaliatsi mapacueniaje:

—Petuxanenë ponapona pijanacuata. Nexata pepo nacuaevetsinë tonajumeitorobarenatsi tajënacuaverena. Petonajumeitorobiujumsirena jumaitsirena mapacueniaje: "Ponaename maber-enaje nacua nevetsinënëtacaexanaenexa nijanacua nevetsinexa. Bajaraxuacujinae naviatiaremilia nijanacua jane baja nevetsinexa," jait-sirena petonajumeitorobiujumsirena.

13 Nexata petuxanenë peponaevajënae, junata pijajivi, diez ponëbeje. Nexata petuxanenë pijajivi evetsiaexana pijapalatanëanë, oronëanë, bitsø penamatamotsinëanë. Caenë canacujitsia caepalatanë evetsiaexanapona. Nexata petuxanenë pijajivi jumaitsi pijajivijavabelia: “Bajarapapalatata pacomuataponaename. Xua pacomuataponaename, icatsia pacanajetaponaename. Nexata bajarapacuenia netoayaijava tsaponae tsane tajapala,” jai petuxanenë pijajivijavabelia. Bajaraxuacujinae pona jane baja.

14 Itsiata baitsi jane pevetsinacuatanexa pejnavanapaevi, bitsø itoyatsi petuxanenë. Nexata bajarapamonae petuxanenë pecovëvelia itsamonae itorobalia, itsajotalia petuxanenë nacua pevetsinënexa exanaejitsiatsi, bajarajotalia pejumaitsinexa: “Apo pajitsipaenë bajaraponë patan-evetsinënexa patajanacuata,” pejainexa petuxanenë yabara.

15 Itsiata baitsi jane petuxanenë pijanacula baja pevetsinënexa exanatsi. Nexata baja naviarena pijanacuayaberena pevetsinexa jane baja pijanacula. Nexata baja parena. Nexata petuxanenë pepatsicujinaerena, junata icatsia pijajivi peyapëtaenexa jane baja pacuenia caenë canacujitsia pijapalatanëanë pijajivi tocanacuenebatsi pecovëta.

16 Copiaya pepatsinë jumaitsi pijatuxanenëjavabelia: “Tajatuxanenë, nijapalatanë, taneevetsiaexanaenëmë, catopitsapa baja diez ponëbeje. Nexata baja daxitata once ponëbeje,” jai.

17 Nacuaevertsinë nexata jumaitsi pijajivitonëjavabelia: “Xanepana rabaja. Xaniavaetsia

netoevetaponapona. Tsiquirijavayo ata xaniavaetsia netoevetame. Nexata icatsia diez patomarabeje netoevetaponaponaename,” jai nacuaevetsinë pijajivitonëjavabelia.

18 Icatsia itsanë pijatuxanenë pijapalatanë petoevetsinë pata. Nexata bajaraponë jumaitsi: “Tajatuxanenë, nijapalatanë, taneevetsiaexanaenämë, catopitsapa baja cinco ponëbeje pematatsënäa,” jai.

19 Nacuaevetsinë nexata jumaitsi pijajivitonëjavabelia: “Xamë icatsia cinco patomarabeje netoevetaponaponaename,” jai nacuaevetsinë pijajivitonëjavabelia.

20 Nexata icatsia itsanë pijatuxanenë pijapalatanë petoevetsinë pata. Jumaitsi pijatuxanenëjavabelia: “Tajatuxanenë, mara nijapalatanëje, taneevetsiaexanaenämë. Pañuelopanayota yamatacëtsiaya catoevetatsi.

21 Bajarapacuenia catoevetatsi tsipaji cacujunavatsi. Niajamatabëcuenesaënë. Xamë apo itaxutobejiobiataeyabiabimë nijajivi, pamonae catoeveta nijajava. Itorobabiabame nijajivi pecatopitsinexa apo nijajava ata. Itorobabiabamenua pecatonotsinexa apo neubiaexanaejava ata,” jai pijatuxanenë pijapalatanë petoevetsinë.

22 Nexata nacuaevetsinë jumaitsi pijajivitonëjavabelia: “¡Acujirubejemë xamë! Bijiaya netoevetame. Naneconitame bajarapacuenia tanejumaitsijavamë yabara. Xamë baja cajena yapëtaneme tajamatabëcuenesaënëjava tajajava yabara. Pacuenia itorobabiabajë tajajivi tanetopitsinexa apo tajajava ata, yapëtaneme baja. Pacuenia ata itorobabiabajë tanetonotsinexa apo

taubiaexanaejava ata, yapētaneme baja.

23 Xanepanaejitsipa xamē banco pevetsivi itsa netocanacuenebiaexanaejitsipame tajapalatanë. Nexata banco pevetsivi aeconoxae tajapalatanë netocanaviatsipa. Nexata pecacovaetsijamatabécuene itsajava palata netoyajavacanaviatsipa,” jai nacuaevetsinë pijajivitonëjavabelia.

24 Nexata nacuaevetsinë jumaitsi pijajivijavabelia: “Tajapalatanë panetovecuapire maponëje. Nexata juya parajure ponë xaniavaetsia netoeveta tajapalatanë. Bajaraponë xaniavaetsia netocanacueneba. Nexata baja pematatsënëa diez papalatanëbeje netopitsapaeyaexana. Nexata taevetsiaexanaenëta once ponëbeje,” jai nacuaevetsinë.

25 Nexata nacuaevetsinë pijajivi jumaitsi pi-jatuxanenëjavabelia: “Patajatuxanenë, bajaraponë xaina baja ayaijava. ¿Detsa xuajitsia rajutsijitsiamë pematatsënëa?” jai pijajivi.

26 Nexata nacuaevetsinë jumaitsi pijajivijavabelia: “Pacatsipaebatsi rabaja. Pajivi baja ayaijava xaina, pematatsënëa icatsia itsajava rajutsianatsi. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi.

27 Tajavajabitsaë, pamonae picani apo jitsipae mapanacua taevetsijavaje, bajarapamonae pacaponaremena maberенaje patanevecuaverebiabinexamë taitabëta,” jai nacuaevetsinë pijajivijavabelia, jai Jesús livaisi petsipaebijavata Zaqueo pijabota.

Pacuenia Jesús pata Jerusalén tomarata yabara

pelivaisi

(Mt 21.1-11; Mr 11.1-11; Jn 12.12-19)

28 Jesús baja itsa najumerreta livaisi petsipaebijava Zaqueo pijabota, pona baja Jerusalén tomarabelia.

29 Jerusalén tomaravecua imoxoyo eca petsuto. Bajarapatsutojumata nubena olivonaenë. Bajarapatsuto canacujitsita anijatomarayobeje ecabeje, Betfagé tomarayobeje Betania tomarayobeje. Jesús itsa imoxoyotanajetaruca bajarapatomarayobeje, nexata itoroba pijajivitonëbeje bajarapatomarayobejejavabelia.

30 Jesús jumaitsi pijajivitonëbejejavabelia:

—Paponarebeje mapatomarayo ecaliaejavabelia. Itsa rabaja papatsiaremeliaabeje, pataenutsianamebeje burro pecétanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane.

31 “¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona,” pajamëbeje tsane, jai Jesús pijajivitonëbejejavabelia.

32 Nexata Jesús pijajivitonëbeje liabeje. Pacuenia Jesús jumaitsi, bajarapacuenia caxitajara-banucabeje burro.

33 Nexata itsa isinabeje, burro pexainaevi jumaitstsibeje:

—¿Detsa xuajitsia paisinamebeje burro? jaitsibeje.

34 Nexata Jesús pijajivitonëbeje jumaitstsibeje burro pexainaevijavabelia:

—Vajatuxanenë raja namatavenona. Bajaraxuata paisinajëbeje, jaibeje.

35 Nexata jane baja burro capatabeje Jesúsjavaberena. Nexata Jesús pijajivi burro tsijumajeba pijacamisajumavelia penaxatabijavanë. Jesús baja bajarapaburrojumata ecaya.

36 Jesús itsa yanajetaruca burrota, panamutovelia Jesús patsijitsia Jerusalén tomarabelia, bajarapanamutua jivi pijacamisajumavelia penaxatabijavanë namutua tsivajënaeyerequejebaponatsi yaiyataeya pecopia pitsinexatsi.

37 Patsutojumata olivonaenë nubena, bajarapatsutojavatsica namuto namatononocarucaica. Nexata bajarapanamutuatsica Jesús imoxoyotanajetaruca pepatsinexa Jerusalén tomara. Nexata jivi ayaubitsaëtoxaneto, Jesús pijajivi yajava, vavajai tsanajetarubena. Sivabarëyaya vavajai Diosojavabelia:

—¡Diosomë, bitso ayajamatabëcuenenëmë! jai tsanajetarubena bajarapamona.

Bajarapacuenia vavajai tsanajetarubena tsipaji bajarapamona cujirutaeyabiaba Jesús Dioso pesaëta ayaicuene pexanaponaejavanë.

38 Bajarapamona jumai tsanajetarubena Jesús yabara:

—¡Maponë najetaruaje, bitso ayajamatabëcuenenë Dioso pejamatabëcueneta najetaruca jivi pevetsinénexa! ¡Jamatatabëcuenexanepanaeya jinavanapa daxita pamona athëbëtsia jinavanapa! ¡Pinijicuene rabaja exana Dioso! jai tsanajetarubena namutua daxita Jesús pijajivi.

39 Nexata fariseovi najetarubena bajarapajivibitsaëtoxaneto tuatuajëta. Nexata fariseovi jumaitsi Jesúsjavabelia:

—Jesús, jumeitavere baja nijajivi bajarapacuenia pejumaitsiyaniva xamë yabara, jai fariseovi.

40 Nexata Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Mapamonaejé moyá itsa najetarubenaejitsipa, nexata juya ibotonë vavajai tsenae tsipae, jai Jesús fariseovijavabelia.

41 Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi.

42 Jesús pesivanuejavata Jerusalén tomarapijivi, Jesús jumaitsi Jerusalén tomarapijivi yabara mapacueniaje:

—¡Bitsó picani jitsipajé Jerusalén tomarapijivi mapamatacabitaje peyapëtaenexa pacuenia Dioso pepacuene jamatabëcuene xanepanaeyaexanaejitsipatsi, itsa nejumecovënëtsipa! Abaxé raja aecinoxae Dioso apo tocopatsitsi peyapëtaeyaniva bajarapacuene.

43 Nexata tocopiapatsianatsi pibisiamatocabi. Pijavajabitsaë tsimaxëpatsianatsi. Nexata pijatomara matatoyorotsia foto yacaranatsia cuerutsianatsi petsimaxënenubenaenexatsi bajarapafotota. Pijatomara matatoyorotsia peyacaranatsiibopanaxanetopënëya, pijavajabitsaë foto matatoyorotsia cuenatsi. Bajarapacuenia yacaranatsianatsi pijavajabitsaë.

44 Nexata irabetsica topenetsianatsi pijabonëmi. Nexata daxita Jerusalén tomarapijivi benatsi.

Pijatomara matatoyorotsia peyacaranatsii-bopanaxanetomi ata tosarababenatsi. Nexata itsaibopana ata apo bocae tsane itsaibopana jumavereca. Bajarapacuenia itsane tsipaji xanë apo neyapëtae Dioso athëbëvetsica taneitorobinëtsica, Daxitajivi Pematapijinënë, jai Jesús pesivanuejavata Jerusalén tomarapijivi.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi

(Mt 21.12-17; Mr 11.15-19; Jn 2.13-22)

45 Jesús pepatsicujinae Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacabiabivinua. Nexata daxita bajarapamonae Jesús pitsapaeyaexana templobovecua.

46 Jesús jumaitsi bajarapamonaejabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueni-aje: “Tajabo raja jivi xanëjavaberena penavajëcaebo tsane,” jai Dioso pejumelivaisibaxutota. Itsiata baitsi jane paxamë yamaxëítotorobiaya panenacobetoxotsinexa, panacaetuatabiabame mapabotaje, jai Jesús templobota pecanajetabiabivijabelia.

47 Bajaraxuacujinae caematacabí canacujitsia Jesús jivi livaisi tsipaebabiaba bajarapatemplobota. Nexata sacerdotevi penamatacaitorobivi, judíovi pecujarubivinua, tomaraevetsivinua, na-jumejaita picani Jesús pebeyaxuabinexatsi.

48 Itsiata acuenebi Jesús pebeyaxuabijavatsi. Tsipaji Jesús itsacueneneconi ata apo xainae. Daxitajivi yaiyatanetsi. Jesús jivi petsipaebilivaisianë xaniavaetsia namuxunaevetabiabatsi.

20

*Pacuenia Jesús caejepatsi daxitacuene pexanaenexa yabara pelivaisi
(Mt 21.23-27; Mr 11.27-33)*

1 Itsamatacabí Jesús templobota jivi livaisi tispaeba. Tspaeba pexanialivaisi jivi pecapanepae-livaisinexatsi pibisiacuene pexanaeneconivecuá. Nexata bajarajota pata sacerdotevi penamata-caitorobivi, judíovi pecujarubivinua, judíovi pi-jaancianovinua.

2 Nexata bajarapamonae jumaitsi Jesúsjavabelia:
—Panetsipaebare cajena. ¿Jipatsa pejamatabécuena pecanajetabiabivi, pecomuacabibavinua, capitsapame mapatemplobovecuaje? jai.

3 Jesús nexata jumaitsi bajarapamonaejavabelia:
—Xanë copiaya caejumeyo pacayanijobianatsi patanejumecanaviatsinexamë.

4 ¿Jipatsa Jane pejamatabécuena Juanpijinë jivi bautisabaponapona? ¿Dioso tsaja pejamatabécuena? Itsa jume, ¿jivi tsaja pejamatabécuena? jai Jesús bajarapamonaejavabelia.

5 Nexata ëpamonae nabarëcuaicuajai. Naju-maitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja

pejamatabëcueneta,” itsa jai tsipaetsi, nexata Jesùs nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisianë?” nacajai tsipae.

⁶ “Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata daxitajivi anaeya ibotonëta nacatseconaejitsipa vajanacabeyejebinexa. Bajarapacuenia nacabeyejibjitsipa tsipaji daxitajivi Juanpijinë yabara sivajamatabëjumaitsi: “Juanpijinë raja pepacuene Diosojumepaebinëmi,” sivajamatabëjai, najai sacerdotevi penamat-acaitorobivi, judíovi pecujarubivinua, judíovi pijaancianovinua.

⁷ Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponanexa, jai.

⁸ Nexata Jesùs jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba tacapitsapaenexa bajarapamonae templobovecua, jai Jesùs.

*Pacuenia exana piajamatabëcuenabejevi, itsanë pijauvabacabo petoevetsivi yabara pelivaisi
(Mt 21.33-44; Mr 12.1-11)*

⁹ Jesùs taxuxuaba livaisi petsipaebijava jivijavelia. Jumaitsi mapacueniaje:

—Pijaira pexainaenë pijairata uba ayaibacoboxaneto uvavënëjava. Bajaraxuacujinae itsamonae evetsiaexana pijauvabacabo. Jumaitsi bajarapamonaejavabelia: “Pamatocabi

cuainaveretsiana, natsicobetsanaenatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa," jai uvabacabo pexainaenë petoevetsivitsijavabelia. Nexata uvabacabo pexainaenë tajénacuayabelia pona bajayajebi piajibitsarucaenexa.

¹⁰ Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoevetsivitsijavabelia petsicobetsatsinexatsi. Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi.

¹¹ Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajara-ponë ata icatsia pibisiacuenia tobijatanetsi. Toconibabiatsi. Peconibabecujinaetsi cobesa naviatsiaexanaliatsi.

¹² Itsiata uvabacabo pexainaenë icatsia itoroba itsanë pijajivitonë. Icatsia bajaraponë ata tomata-jorobiabiatsi. Uvabacabopënëyabelia xuabatsi.

¹³ 'Nexata uvabacabo pexainaenë ja-matabëjumaitsi: "¿Detsa nexata xua exanaenajë? Itorobianajë cajena taxënato, tasivanë. Itsa raeta itorobianajë taxënato, bajarapamonae netoyaiyataena," jamatabëjai uvabacabo pexainaenë.

¹⁴ Itsiata baitsi jane uvabacabo petoevetsivitsi, uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonae najumaitsi: "Mara ponëje it-

samatacabi paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane," najai uvabacabo petoevetsivitsi.

15 Nexata uvabacabo pexainaenë pexënato ata tovaetabatsi. Caponaliatsi bajarapauvabacabo pepënëyabelia. Bajarapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipae-bivijavabelia. Jumaitsi:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia?

16 Uvabacabo raja pexainaenë, patsiarena. Verebiabiana daxita bajarapamonaemi. Nexata icatsia itsamonaevetsivitsi itsa jumetane bajarapacuenia Jesús pejumaitisijava, bajarapamonaevetsivitsi jumaitsi:

—¡Dioso pëtsa copata bajarapacuenia pexanaenexa paxanëjavaberena! jai bajarapamonaevetsivitsi jumaitsi:

17 Nexata Jesús asaëyata naëcota bajarapamonaevetsivitsi jumaitsi:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniae:

Paiboto itsamonaevetsivitsi jumaitsi: boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibototsa matatoxenetsia,

jai tajëvelia Dioso pejumelivaisibaxutota xanë yabara.

'Bajarapacuenia tajëvelia Dioso pejumelivaisibaxutota itsa jumaitsi, judíovi penamatacaitorobivi apo tanejumecovënëtsijavanexa yabara jumaitsi. Dioso taneitapetsijava daxitajivi tacapanepaenënexa yabara ata jumaitsi, jai Jesús.

18 Icatsia Jesús jumaitsi mapacueniaje:

—Pamonae apo nejumecovënëtsi Dioso pexënatiocuenenë, bajarapamonae bitso bejamatabëjiobi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonae naneconitsiaexanaenajë, bajarapamonae pepacuene naxuabiana daxitamatocabijavabelianexa. Pacuenia iboto pematacënëbinëtsi apo asaë, bajara itsane, jai Jesús bajarapamonaejavabelia.

Pacuenia Jesús jamatabëcueneëjëbiaya yanijobatsi impuestomatamo pemamatotsijava yabara pelivaisi

(Mt 22.15-22; Mr 12.13-17)

19 Palivaisi Jesús tsipaeba templobota, bajarapalivaisi sacerdotevi penamatacaitorobivi, judíovi pecujarubivi ata, jumeyapëtane. Nexata bajarapamonae najumaitsi:

—Vaxaitsi raja Jesús nacajai, najai.

Nexata picani bajarajota bajarapamonae Jesús jamatabëvaetabatsi. Itsiata bajarapamonae abaxë apo vaetabitsi. Tsipaji cujunava jivi.

20 Nexata itsamatacabi bajarapamonaे itorobarena pijajivi yaenebiaya petonamuxunaevetsinexatsi Jesùs. Nexata bajarapamonaе pijajivi bepxaniajamatabëcuenevi itajara jinavanapa Jesùsjavata. Bajarapamonaе namuxunaevetena Jesùs jivi livaisi petsipaebijavata. Bijiaya Jesùs jivi livaisi itsa tsipaeba, bajarapalivaisi yabara picani Jesùs pecaponaenexatsi nacuaevetsinëjavabelia peneconitsinexatsi.

21 Nexata bajarapamonaе ja-matabëcueneëjëbiaya jumaitsi Jesùsjavabelia mapacueniaje:

—Jesùs, pacayapëtanetsi jivi pepacuene pexanajailivaisi netsipaebijava. Daxitajivi, ricovi ata, bepejiobivi ata, najëpaeya yaiyataeya pexaniajailivaisi tsipaebabibame bajarapamonaе pejinavanapaenexa pacuenia Dioso jitsipa.

22 Panetsipaebare. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonaе ja-matabëcueneëjëbiaya Jesùsjavabelia.

23 Itsiata baitsi jane Jesùs jamatabëcueneÿtane bajarapamonaе jamatabëcueneëjëbiaya peyanijobijavatsi peneconitsinexatsi picani. Nexata Jesùs jumaitsi bajarapamonaejavabelia:

—¿Detsa xuajitsia panejamatabëcueneëjëbame?

24 Panetsitajëre palatanëyo, jai Jesùs.

Nexata bajarapamonaе tsitajëtatsi palatanëyo. Nexata Jesùs jumaitsi bajarapamonaejavabelia:

—¿Jipatsa mapitaraje, pevënënu, ruca mapapalatanëyojumataje? jai Jesùs.

Nexata bajarapamonae jumaitsi Jesúsjavabelia:
 —Romanonacua raja pepo pevetsinë pitabara,
 pevënëua, jai.

²⁵ Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

²⁶ Nexata bajarapamonae ajibi Jesús peyabaravaetabijavatsi jivijavabelia livaisi petsipaebijava yabara. Tsipaji xaniavaetsia Jesús jumecanaviata bajarapamonae jamatabëcueneëjëbiaya peyanijobijavatsi. Caranata bajarapamonae jamatabëcuenenabenajaca xaniavaetsia Jesús pejumecanaviatsixae bajarapamonaejavabelia. Moya baja nexata ena bajarapamonae.

*Pacuenia Jesús tsipaeba jivi petëpaecujinae icatsia
 piasaëjavanexa yabara pelivaisi
 (Mt 22.23-33; Mr 12.18-27)*

²⁷ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, apo asaë icatsia tsane,” jai tsabiabi. Nexata saduceovi imoxoyobatsi Jesús. Saduceovi jumaitsi Jesúsjavabelia mapacueniaje:

²⁸ —Jesús, Moiséspijinë bajayata vajanacatoy-aquinaelivaisi, jumaitsi mapacueniaje: “Ponë pematapijinë pepua penacojobinë baja, itsa tëpa

pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavelia. Nexata pexi itsa xainabeje, bematapijinëmi pexi petaenexa daxitajivi," jai Moiséspijinë bajayata vajanacatoy aquinaelivaisi.

²⁹ Nexata jinavanapa ënacaemonae, siete ponëbeje. Pepo matapijinë copiata nacojoba. Nexata bajaraponë pijava vecuatëpa pexi xainaenejeva.

³⁰ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavelia.

³¹ Nexata icatsia itsanë tuatuajëmatapijinë pita bajarapova. Bajara icatsia ponë ata tëpa pexi xainaenejeva bajarapovajavelia. Bajarapacuenia daxita baja siete ponëbeje, nacaemonaemi, pitaponae ata bajarapova, itsiata itsanë ata pexi apo xainae bajarapovajavelia. Bajarapacuenia daxita siete ponëmibeje tëpa. Verevereca baja.

³² Belia baja bajarapova ata tëpa.

³³ "Jivi raja petëpaecujinae, Dioso icatsia asaëyaexanaenatsi," jamë. ¿Detsa nexata ponë, bajarapamonaeyajuvënënë, pijava tsane bajarapova bajarapamatocabi? Daxita pamonaem siete ponëmibeje, nacaemonaemi, pitapona picani bajarapovami, jai saduceovi Jesúsjavelia.

³⁴ Nexata Jesús jumaitsi saduceovijavelia:

—Aeconoxae mapanacuataje pebijivi, petiriavi ata, nacojobapona. Itsamonaem pexënatoyonë

pexainaevi pebijavabelia canajetapona petonaco-
jiobinexatsi.

³⁵ Itsiata baitsi jane pamonae Dioso itapetatsi, apo pevereverecaenacuatatsia jinavanapaena. Bajarapamonaes petëpaecujinae, Dioso icatsia asaëyaexanaenatsi. Bajarapamonaes bajarapanacuatatsia apo nacojiobi baja tsane. Bajarajotatsia itsajivi ata pexënatoyo apo canajetsi tsane pebijavabelia petonacojoibinexatsi.

³⁶ Bajarapamonaes acuenebi tsane petëpaejava. Tsipaji bajarapamonaes jinavanapaena athëbëtatsia pacuenia ángelevi jinavanapa. Bajarapamonaes baja Dioso pexi tsane. Tsipaji baja petëpaecujinae Dioso icatsia asaëyaexanaenatsi.

³⁷ Moisëspijinë bajayata yaquina pacuenia Dioso tsipaebatsi tsiquirinaemëyo petajueye-caecotiajavaverena. Nexata Moisëspijinë peyaquinaelivaisita, jumaitsi pacuenia Dioso icatsia asaëyaexanaejitsia petëpaevimi. Nexata Moisëspijinë nacayapëtaeyaexana Dioso icatsia piasaëyaexanaejavanexa petëpaevimi. Tsipaji baja Abraham pepuatëpae, Isaac ata baja pepuatëpae, Jacob ata baja pepuatëpae, bajarapamonaes yabara bajayata Moisëspijinë peyaquinaelivaisita jumaitsi mapacueniaje: “Xanë rabaja Abraham pijadiosonë, Isaac ata pijadiosonë, Jacob ata pijadiosonë,” jai baja cajena Dioso bajayata Moisëspijinëjavabelia.

³⁸ Bajarapacuenia Dioso pejumaitsixae, nayapëtane bajarapamonaes bajayata tëpae ata, Diosovecua apo penaxuabijava. Aeconoxae ata bajarapamonaes Dioso yajavajinavanapa athëbëtatsia. Daxita petëpaevi Dioso cajena apo

tsitatëpaetsi, jai Jesús saduceovijavabelia.

39 Nexata judíovi pecujarubivi jumaitsi Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

40 Bajaraxuacujinae saduceovi cujunava baja icatsia peyanijobijava Jesúsjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai yabara pelivaisi (Mt 22.41-46; Mr 12.35-37)

41 Jesús pijacuata nayabarajumaitsi judíovi pecujarubivijavabelia mapacueniaje:

—¿Detsa xuajitsia jivi apo canaëjëtsi Cristo Dioso pexënatoocene? Jivi saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, saya Davidpijinë pemomo tsane,” jai tsabiabi.

42 Davidpijinë bajayata tajëvelia pejumaitsijava Cristo yabara Salmosvënëbaxutota, jumaitsi mapacueniaje:

Dioso jumaitsi tajatuxanenëjavabelia: “Ecäre abaxë tacujuanenia.

43 Vecatsivajënae jumecovënëtsiaexanatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai Salmosvënëbaxutota Davidpijinë bajayata pejumaitsijava Cristo yabara.

44 'Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi

pecujarubivijavabelia, judíovi pecujarubivi pecanaëjëtsinexa Cristo Dioso pexënatoocuene.

Pacuenia Jesús tsipaeba pijajivijavabelia judíovi pecujarubivi penaneconitsijava Diosojavabelia yabara pelivaisi

(Mt 23.1-36; Mr 12.38-40; Lc 11.37-54)

⁴⁵ Itsa abaxë daxitajivi namuxunaevetatsi Jesús petsipaebilivaisi, Jesús jumaitsi pijajivijavabelia:

⁴⁶ —Xania, panayajivitaema palivaisi judíovi pecujarubivi tsipaebapona panejume-covënëtsiyaniva. Bajarapamonae jitsipabiaba tomara tuatuajëjava piapiajavanë penaxatababi-abavanapaenexa jivi peyaiyataenexatsi. Jitsipabiabanua bitso yaiyataeya pebajacobinexatsi callejava. Bajarapamonae itsa najoneyabiaba judíovi penacaetuatabiabibonëjava, jitsipabiaba penaenexa pexaniaviriajavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta.

⁴⁷ Bajarapamonae yamaxëitojorobiaya vecuan-otabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajaijamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabí Dioso naneconitsiaexanaena daxita pamonaes Dioso

apo pejumecovënëtsivi, jai Jesús pijajivijavabelia judíovi pecujarubivi yabara.

21

*Pacuenia ofrenda rajuta Diosojavabelia
pamona pevecuatëpaevatsi yabara pelivaisi
(Mr 12.41-44)*

¹ Templobota Jesús cobetane bitso pexainaevi ayaïjava palata pejeponaejava cajonijavabelia. Bajarajota jivi palata jeyabiaba ofrendacuenia perajutsijava Diosojavabelia.

² Bajarajota Jesús cobetanuela pamona pevecuatëpaevatsi, bepejiobiva, penajejava anijapalatanëyobeje. Bajarapova najia anijapalatanëyobeje piamatamobinëyobeje. ³ Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenebarëya daxita xua itsamonaе jia bajarapacajonita matatoxenetsia.

⁴ Tcipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

*Pacuenia Jesús tajëvelia tsipaeba pijajivi itsamatacabí itsanacuapijivi pexuabijavanexatsica templobo yabara pelivaisi
(Mt 24.1-2; Mr 13.1-2)*

5 Jerusalén tomarata templobo itabëtsiaya exaneta pexaniaviriaibotonëta. Jivi Diosojavabelia ofrendacuenia perajutsijavanë ata, templobota itabëtsiaya ruba templobo pitaitabëtsecaenexa. Nexata Jesús pijajiviyajuvënëvi nabarécuaicuajai tsaponae templobo pitabëtetsijava yabara. Nexata Jesús tajëvelia vajunupaeba pacuenia itsamatacabí itsanacuapijivi xuabijitsiatsica templobo, daxita bajarapaaitabëcuene yajava. Jesús jumaitsi pijajivijavabelia mapacueniaje:

6 —Itsamatacabí itsanacuapijivi xuabianica mapatemplobomije. Nexata daxita xua pataneme, pitabëcuene yajava, penetsianica. Nexata templobopijiibotonë caeiboto ata pejumavereca apo bocae tsane, jai Jesús pijajivijavabelia.

*Pacuenia itsijitsia Jerusalén tomarata, daxitanacuanëjava ata, mapanacua pecopiaru-caevajënaeje yabara pelivaisi
(Mt 24.3-28; Mr 13.3-23)*

7 Jesús pijajivi jumaitsi:
—Patajatuxanenë, pajitsipajë patanetsipaebijavamë patayapëtaenexa paepatota copiapatsijitsia xua vajunupaebame. ¿Detsa pitsicuene peneta pataenajë itsa copiapatsijitsia xua jumaitsimë templobo yabara? jai Jesús pijajivi.

8 Jesú斯 nexata tajévelia vajunupaeba pacuenia itsamatacabi itsijitsia mapanacuataje. Jesú斯 pijajivjavabelia jumaitsi mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. Tsipaji raja peyamaxëitojorobinexa, ayaubitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. “Imoxoyo rabaja pevajënae nacua pevereverecaenexa,” jai tsane itsamonae. Itsiata pëtsa pajumecovënétame bajarapamonae. Pëtsa papénaponamenua.

9 Vajabitsaë pexanaejava imoxoyonacuanëjava, tajénacuanëjava ata, pavënélivaisitaename. Itsiata pëtsa pajunavame. Peneta bajara itsane mapanacua pevereverecaevajënaeje. Itsiata baitsi jane bepilia bajarapamatocabi mapanacuaje abaxë apo vereverecajuni tsane, jai Jesú斯 pijajivjavabelia tajévelia pevajunupaebijavata pacuenia itsamatacabi itsijitsia mapanacuata.

10 Jesú斯 icatsia tajévelia vajunupaeba pacuenia itsamatacabi itsijitsia mapanacuataje. Jesú斯 jumaitsi pijajivjavabelia mapacueniaje:

—Mapanacuaje pevereverecaevajënae, peneta copiaya itsaviriavi nabena itsaviriavijavabelia. Itsanacuanëpíjivi pijinia nabena itsanacuanëpíjivjavabelia.

11 Ira najëabiana ayaicuenia nacuanëjava. Nacuanëjava ayaijaniboxaneto najetarucaena, piavitanecuene yajava. Itaboxotatsia pitsapaena piayaijunavicuene, pinijicuene pexanaejavanë yajava, jai Jesú斯 pijajivjavabelia.

12 Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Bajarapacuene pecopiajopaevajënaeya patajajivixaemë, pacataicaena. Pacabejiobiaexanaena. Pacacaponaena judíovi penacae-tuatabiabibonëjavabelia papecaneconitsinexa. Penaneconitsivi pejebabiabibota pacajebiana. Patajajivixaemë, pakanubiana presidentevi pitabarata, nacuaevetsivi pitabarata ata.

13 Nexata bajarajota xanë talivaisi, pexaniali-vaisi, patsipaebianame xaniavaetsia.

14 Nexata pëtsa tajëvelia panatsinaja-matabëxainame pacuenia panayajivicuaicuajamëjitsia bajarapamonaejavabelia.

15 Tcipaji paepatota panayajivicuaicuajamëjitsia, bitso peyapëtaevicuenia pacacuaicuajaiyaexanaenatsi. Nexata caenë ata panijavajabitsaënë apo caëjëpaetsi tsane papecajumecanaviatsinexa.

16 Bajarapamatacabí patajajivixaemë, panacaemonae atamë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, panijabanajivi ata, bitso papecayapëtaejivi ata, bajarapamonae caranata pacacanajetsiana. Nexata pacayajuvënëbeyaxuabiana.

17 Daxitajivi pacaitoya tsabiabi tsane patajajivixaemë.

18 Itsiata baitsi jane pepo panejamatabëcuenelivaisi bajarapamonae apo itsacueniabi tsane.

19 Itsa pajamatabëcuenesaëmë tsavanapae tsane, nexata matacabi apo peverevereca/java paxainaename, jai Jesús pijajivijavabelia tajëvelia pevajunupaebijavata pacuenia itsamatacabì itsijitsia mapanacuataje.

20 Icatsia Jesús tajëvelia vajunupaeba papiayaicuene itsamatacabì copiapatsijitsia Jerusalén tomarata, Jesús jumaitsi pijajivijavabelia mapacueniae:

—Itsa pataename vajabitsaë, itsanacuaverena pepatsivi, Jerusaléntomara matatoyorotsia peyacaranatsijavatsi, nexata pajamatabëtsimë tsane: “Imoxoyo rabaja pevajënae Jerusaléntomara pevereverecaenexa,” pajamatabëjamë tsane.

21 Nexata bajarapamatocabì Judea nacuata pejinavanapaevi, itsa tane bajarapacuene, berëcëpeca cajena ibotsutonëjavabelia. Jerusalén tomarapijivi ata berëcëpeca pijatomaravecua. Itsamonaë pijinia, Jerusalén tomarapijivi, bajarapamatocabì Jerusalén tomarapënëyabelia itsa jinavanapa, apo benaviabirena pijaboyaberena.

22 Bajarapacuenia Jerusalén tomarapijivi itsa tocopiajopaenatsi, tocopiajopaenatsi jane baja Dioso penaneconitsiaexanaematacabitsi. Nexata jane baja tocopiajopaenatsi daxita pacuenia baja cajena pepo bajayatami tajëvelia vajunupaeba Diosojumelivaisibaxutota.

23 Bajarapavabajitsaëmatacabì bitso ayaicuenia bejiobi tsane mapanacuapijivije. ¡Papetiriavi penacueto yacotajinavanapa, bitso bejiobi tsane bajarapamatocabì bitso nabejiobitsiaya peponaexae tsane! ¡Papetiriavi ata mitoapaenacuetoxi

isajinavanapa, bitso bejiobi tsane bajarapamata-cabi! Bajarapacuenia daxita mapanacuapijivije pinijicuenia Dioso naneconitsiaexanaenatsi.

²⁴ Bajarapavajabitsaëmatacabi itsanacuaver-ena Jerusalén tomarapijivi vajabitsaë tsimaxëpatsianatsi. Nexata itsabitsaëtomi, Jerusalén tomarapijivimi, beyejebianatsi. Itsabitsaëtomi pijinia, Jerusalén tomarapi-jivimi, caponaenatsi itsanacuanëjavabelia. Nexata bajaraxuacujinae itsanacuanëpijivi patsiana Jerusalén tomara. Nexata juya bajarapamonae jinavanapaena Jerusalén tomara. Nexata itsanacuaverena pepatsivi evetsiana Jerusaléntomara. Matapania daxita itsanacuaverena pepatsivi vecuapitsapaena Jerusaléntomara, copatsiana baja bajarapamonaе pevetsijava Jerusaléntomara, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia Jerusalén tomara.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

(Mt 24.29-35, 42-44; Mr 13.24-37)

²⁵ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniae:

—Xanë tapatsivajënaetsica, jivi taena pecujunaviciene. Matacabipijijuametotatsia, xua naitajëtsiana, meravipijijuametotatsia ata, xua naitajëtsiana, tulupujavatatsia ata, xua naitajëtsiana, bajaraxuanë jivi bitso cujunaviana.

Daxita nacuanëpójivi bitso najunaviacaena itsa jumetaena manuameneta pinijimalataca bitso penajumetsijava.

²⁶ Daxitanacuanëjava bitso jivi naja-matabëxainaena itsa taena piayaicuene petocopijopaejavatsi. Nexata daxita nacuanëjava jivi tēpjoneyabiabiana pecajunavi. Daxita xua athëbëtatsia rubena, najëabiana. Xaniavaetsia apo rubenae tsane.

²⁷ Nexata bajarapaepatota jivi netaena, Daxitajivi Pematapijinënë, athëbëvetsica itarérëbota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajë.

²⁸ Itsa pataename pecopiajopaejava bajara-pacuene, nexata panajamatabëcuenesaëtsianame. Tsipaji rabaja imoxoyo pevajënae tsane papecacapanepaenexa jivi papecabejiobia ex-anäebiabijavamivecua, jai Jesús pijajivijavabelia tajëvelia penavajunupaebijavata itsamatacabiciatsia pepatsijavanexatsica.

²⁹ Icatsia Jesús tajëvelia vajunupaeba pacuenia itsamatacabí itsijitsia mapanacuataje. Jesús ju-maitsi pijajivijavabelia mapacueniaje:

—Pacanaëjëre pacuenia itsi higueranae, itsavirianaenë ata.

³⁰ Itsa baja imoxoyo pevajënae tsaponae vai pejonejavanexa, bajaraponaenë pejanabaxu juva. Nexata bajarapacuenia payapétaneme vai baja imoxoyo pevajënae pejonejavanexa.

³¹ Bajara pijinia pacuenia peneta itsa pataename pecopiapatsijava xua yabara pacatsipabatsi, nexata payapétaename imoxoyo baja pe-

vajënae pecopiapatsijavanexa tsane pamatacabí daxita Dioso pijajivi evetsijitsia mapanacuataje, jai Jesús pijajivijavabelia tajévelia pevajunupaebijavata pacuenia itsamatacabí itsijitsia mapanacuataje.

32 Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pitsijamatatabëcuenevi aeconoxae mapamatacabitaje jinavanapa, bajarapitsijamatatabëcuenevi abaxë, bexëajavabelia ata, apo verevererecae tsane. Matapania xua yabara pacatsipaebatsi itsa baja copiapatsiana, bajarapamonae jane baja vereverecaena.

33 “Itaboxo, ira yajava, tsitecaena daxitamatocabijavabelianexa,” jamatabëjai ata tsane itsamona, itsiata jamatabëcuenenavëxaniabiana. Tspaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

34 Icatsia Jesús jumaitsi pijajivijavabelia:

—Nayajivitaeya pajinavanapaename. Pëtsa panajamatatabëxainame pibisiacuene paneexanaenexa, paneaitajibinxexa ata. Pëtsa pasivanajamatabëxainame maëpanacuapijjamatatabëcueneje. Belia bajarapacuenia paneexanavanapaejavata, jemata copiapatsipa tapatsimatacabinexatsica.

35 Pacuenia dujuai peyamatajucaejava, meniareca jemata jivi xuareca dujuai peyamatajutsinexa, bajara pijinia pacuenia xanë tapat-

simatacabinexatsica, jemata daxitanacuanëjava copiapatsiana.

³⁶ Bajaraxuata nayajivitaeya pajinavana-paename. Daxitamatacabi canacujitsia panayajivivajëcabianame Diosojavabelia paneajamatabëcuenesaë tsaponaenexa, panevecuapanepaponaenexa daxita papibisi-acuene pacatocopiapataponaena. Daxita bajarapapibisiaciue ne panevecuapanepaecujinae ata, pavajëcabianame Diosojavabelia. Nexata pamatacabi xanë, Daxitajivi Pematapijinënë, pat-sianicajë, papecacaëjëpaenexa panenubenaejava taitabarata, jai Jesús pijajivijavabelia.

³⁷ Caematacabi canacujitsia Jesús livaisi tsipae-babiaba templobota. Nexata icatsia caemeravi canacujitsia Jesús tomaravecua pitsapabiaba pemajitabiabinexa petsutojumabelia. Nexata petsutojumata olivonaenë nubena, bajarapatsutojumata Jesús majitabiaba.

³⁸ Daxita bajayacunua canacujitsia jivi patabi-aba templobota penamuxunaevetabiabinexatsi Jesús petsipaebilivaisi.

22

Pacuenia Judas pona Jesús pijavajabitsaë pecobeyabelia pecanajetsinexatsiyabara pelivaisi (Mt 26.1-5, 14-16; Mr 14.1-2, 10-11; Jn 11.45-53)

¹ Imoxoyo baja pevajënae pejonenexa pascuavënëfiesta. Bajarapafiestamatacabi jivi baxane levadurata matajërëabinejeva pexanaepan.

² Sacerdotevi penamatacaitorobivi, judíovi pecujarubivinua, najumejaita pacuenia picani

bajarapamonae Jesús beyaxuabijitsatsi. Itsiata abaxë bajarapamonae Jesús apo beyaxuabitsi. Tsipaji bajarapamonae jívi cujunava.

³ Nexata dovathi tsijamatatabejunuatsi Judas. Judas, ponë vénérubatsi itsavënë, Iscariote. Bajara-ponë Jesús pijajivi, doce ponébejeyajuvënënë.

⁴ Judas yapétane itsajota nacaetuata sacerdotevi penamatacaitorobivi, templobopijipolicíavi pena-matacaitorobivi yajava. Nexata bajarabelia Judas pona pebarëcuaicuajainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia.

⁵ Nexata bajarapamonae barëya. Rajutsiapae-batsi palata.

⁶ Jejai Judas. Nexata Judas Jesús naitaxutocaevetsia ponapona. Paepatota Judas toy-apëxanepanatsi, perajutsinexa jane baja Jesús bajarapamonae pecobeyabelia. Bajarapacuenia Judas najamatabëxaina pexanaenexa itsajota bitso jivi apo navitsi.

Pacuenia Jesús barënabane pijajivi pecopi-arutsinabani baja pebeyaxuabivajënaetsi yabara pelivaisi

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Junua jane baja pascuavënëfiesta, pa fiestamat-acabi jivi baxane levadurata matajëréabinejeva pexanaepan. Bajarapamatocabi ovejaxi babia pexaenexa pascua fiestamatocabi.

⁸ Nexata Jesús itoroba pijajivitonëbeje, Pedrobeje Juanbeje. Jesús jumaitsi pijajivitonëbejeyavabelia:

—Paponarebeje paneexanaenexabeje vajaxae-javanexa. Xua jivi baxane pascua fiestamatacabí, bajaraxua vajaxaenexa paexanaenamebeje, jai Jesús pijajivitonëbejejavabelia.

⁹ Nexata Pedrobeje Juanbeje jumaitsibeje Jesúsjavabelia:

—¿Detsa jota jitsipame bajaraxua pataex-anaenexabeje? ¿Detsajota bajaraxua xaenatsi? jaibeje.

¹⁰ Jesús nexata jumaitsi pijajivitonëbejejavabelia:

—Tomarabelia itsa papatsianamebeje, pacaxi-tajarabianamebeje mera canalito pecanajetaru-caenë. Bajaraponë papënajanajetarucaenamebeje. Pabota bajaraponë joneyojopaena, bajarapabota panapatsianamebeje.

¹¹ Nexata pajumaitsimëbeje tsane bajarapabo pexainaenëjavabelia: “Vajanacacujarubinë raja Jesús jumaitsi: ‘¿Detsa jota pënëyatuuucsibo eca, pabota tajajivi barëxaejitsianë xua jivi baxane pascua fiestamatacabí?’ jai raja Jesús,” pajamëbeje tsane bajarapabo pexainaenëjavabelia.

¹² Nexata athëbëabetsia anijairabeje pexainaebøjavata, pacatsitajëtsianabeje. Bajarapaboënëta, athëbëyotsia paira, ayaiënëtuatuajë tsane. Daxitacuene bajarajota xainaena. Nexata xua jivi baxane pascua fiestamatacabí, bajarajota paex-anaenamebeje vajaxaenexa, jai Jesús pijajivitonëbejejavabelia.

¹³ Nexata jane baja bajaraponëbeje ponabeje. Caxitajarababeje daxita pacuenia Jesús jumaitsi. Nexata xua jivibaxane pascua fiestamatacabí, daxita Jesús pijajivi

pebarëxaenexa, bajaraponëbeje exanabeje jane baja.

¹⁴ Itsa baja copiajopa pexaeepatotanexa, Jesùs, pijajivi doce ponëbeje, apóstolevi, yajava, eca mesa muxuneneta.

¹⁵ Nexata Jesùs jumaitsi pijajivijavabelia:

—Tatëpaevajënae bitso jitsipajë patacayajavaxaueva mapapascua fiestamatacabi pexaejavaaje.

¹⁶ Xaniajanë pacuenia pacatsipaebijitsatsi. Matavëjëa rabaja mapanacuataje apo xaenë tsane pascua fiestamatacabi pexaejava. Matapania daxita patajajivimë Dioso itsa pacacapanepaena panijaneconivecua, bajara jane icatsia matapania taxa Dioso pijanacuatsatsia xaenajë pascua fiestamatacabi pexaejava, jai Jesùs pijajivijavabelia.

¹⁷ Nexata Jesùs copavënëjavata yapita pijajivi pebarëapaeranexa. Jesùs jumaitsi Diosojavabelia:

—Pexaniacuene panetoexaname. Panerajutame maporaje, jai Jesùs.

Bajaraxuacujinae pijajivijavabelia jumaitsi:

—Maporaje payapire. Papaema padaxitamë mapacopataje.

¹⁸ Xaniajanë pacuenia pacatsipaebijitsatsi. Matavëjëa rabaja mapanacuataje apo apaenë tsane uvacuaira. Matapania itsa copiajopaena daxita Dioso pijajivi pevetsimatacabi, apaenajë icatsia, jai Jesùs pijajivijavabelia.

¹⁹ Bajaraxuacujinae Jesùs pita panbë. Jesùs jumaitsi Diosojavabelia:

—Pexaniacuene panetoexaname. Panerajutame pan, jai Jesùs.

Bajaraxuacujinae epatsënëquejeba bajara-papanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, patacasi-vatëpaejava paxamënexa. Tatëpaecujinae mapacuenia paexanabiabianameje pata-nenajamatatabënapitabiabinexamë, jai Jesús pijajivijavabelia.

20 Nexata jane baja daxita Jesús pijajivi barënabane. Penabanicujinae Jesús icatsia yapita pijajivi pebarëapaeranexa. Jesús jumaitsi pijajivijavabelia:

—Dioso baja cajena najumecapanepaeya jumaitsi pejanalivaisi papecacapanepaenexa bajaraponëjavabelia. Bajarapacuenia pacacapanepaena tajana pejamatabëcueneta. Tajana raja runaena papecacomuatsinexa pibisiacuene paneexanaeneconimivecua. Mapacapaejavataje padaxitamë papaema panenajamatatabënapitabiabinexa pacuenia Dioso bajarapapejanalivaisita najumecapanepaeya jumaitsi papecacapanepaenexa bajaraponëjavabelia, jai Jesús pijajivijavabelia.

21 Icatsia Jesús jumaitsi pijajivijavabelia:

Panejumetaema. Ponë necanajetsijitsia tajava-jabitsaë pecobeyabelia, bajaraponë naeca mapamesa muxunenetaje.

22 Xanë, Daxitajivi Pematapijinënë, tēpaenajë pacuenia tajëvelia Dioso netocopata. Itsiata baitsi jane ponë necanajetsiana tajavajabitsaë pecobeyabelia, bitso bejiobi tsane, jai Jesús.

23 Nexata Jesús pijajivi najumai tsenae:

—¿De meta ponë vaxaitsiyajuvënënë, canajetsiana Jesús pijavajabitsaë pecobeyabelia? najai tsenae Jesús pijajivi.

Pacuenia Jesús pijajivi: “¿Detsa ponë vaxaitsiyajuvënënë nacavecuaayaijamatabëcuenenë bitso?” najai yabara pelivaisi

²⁴ Jesús pijajivi anaeya najumenotsiaya nali-vaisita. Najumaitsi:

—¿Detsa ponë vaxaitsiyajuvënënë nacavecuaayaijamatabëcuenenë? najai Jesús pijajivi.

²⁵ Nexata Jesús jumaitsi pijajivijavelia:

—Nacuaevertsivi pacuenia jamatabëpacaitoroba panetoexanaenexa, ajumesaëya pacaitoroba-biaba papijajivimë, bajarapamonae pevetsi-nacuanëjava panejinavanapaevi. Itsiata baitsi jane bajarapacuenia pacabeiobiaexanabiabiata, bajarapamonae jitsipabiaba paxamë bajarapamonae yabara panejumaitsinexa: “Bajaraponë vajanacayananacuaevertsinë, bitso pexaniacuene nacatoexanabiaba,” panejainexa.

²⁶ Pëtsa paxamë bajarapamonae cuenejëpaeya bepaayaijamatabëcuenevimë panataneme. Ponë raja peneta paxamëyajuvënënë daxita paxamë pacavecuaayaijamatabëcuenenë, bajaraponë peneta daxitajivi bepijajivitonëcuenia yavenonaena.

²⁷ Mapanacuata petuxanenë itsa xaeyeca mesata, petuxanenë jamatabëcuenevetatsi pijajivitonë. Tsipaji petuxanenë ayaijamatabëcuenenë pijajivitonë matatoxenetsia. Itsiata xanë bajarapitsijamatabëcuene apo xainaenë. Ponaponajë paxamëjavata daxita paxamë

bepanijajivitonënëcuenia patacayavenonaenexa, jai Jesús.

28 Icatsia Jesús jumaitsi pijajivijavabelia:

—Pacuenia jivi nitoya, nebejiobiaexananua, bajarapacuenia paxamë ata patajajivixaemë, pacaexana. Bajarapacuenia pacaexanae ata tsane, itsiata apo panenavecuacopabimë tsane. Tsitecaeya paneyajavajinavanapame.

29 Bajaraxuata nexata pacuenia taxa Dioso nitoroba jivi taevetsinexa, bajara pijinia pacuenia juya xanë ata paxamë pacaitorobatsi jivi paneevetsivinexa.

30 Nexata paxamë pacajamatatabëcuenecaëjëpaena taevetsinacuatsatsia tajamesata panenanabaninexa, panenamatavëjëaapaenexanua. Paenaename jueznëcuenia panenaneconitsiaexanaenexa pijaneconi pexainaevi. Nexata pananeconitsiaexanaename Israelpijinëmi pexi, doce ponëmibeje, pemomoxiyajuvënëvi, jai Jesús pijajivijavabelia.

*Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonënemë,” jai yabara pelivaisi
(Mt 26.31-35; Mr 14.27-31; Jn 13.36-38)*

31 Jesús jumaitsi Pedrojavabelia:

—Simón, dovathi baja cajena jamatabëcapita xanëvecua. Bitsó cajamatatabëcueneejëbiana tanenavecuacopatsinemë. Pacuenia arrozxainaenë arrozzu jëaba pesi pevecuaxuabinexa, bajara pijinia pacuenia pecaxuabinexa xanëvecua cajamatatabëcueneejëbiana dovathi.

³² Itsia baitsi jane catovajëtatsi Diosojavabelia necopatsiyaniva tanejumecovënëtsijavamë. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabëcuene babataponaponaename Dioso pejumecovënëtsivi, jai Jesús Pedrojavabelia.

³³ Pedro nexata jumaitsi Jesúsjavabelia:

—Tajatuxanenë, najamatabëcueneveretajë baja. Penaneconitsivi pejebabiabibota caetsi ata, tanaponaponaenexa xamëta. Najamatabëcueneveretajë baja tacayajavatëpañexanua, jai Pedro Jesúsjavabelia.

³⁴ Nexata icatsia Jesús jumaitsi:

—Pedro, xaniajanë pacuenia catsipaebijitsiatsi. Ajena, mapameravitaje, vacara pefiabivajënaeya nayavajunuaxainaename tajajivitonëcuenemë. “Xanë cajena apo yapëtaenë bajaraponë,” jamë tsane acueyabi xuabeje xanë yabara, jai Jesús Pedrojavabelia.

Pacuenia baja itsa imoxoyo pevajënae Jesús pebeyaxuabinexatsi, tsipaeba pijajivijavabelia yabara pelivaisi

³⁵ Jesús yanijoba pijajivijavabelia. Jesús jumaitsi mapacueniaje:

—Imata panamuto itsa pacaitorobatsi Dioso pejumelvaisi jivi daxitanacuanëjava panetsipaebanajetarubenaenexa, pacaitavetatsi panecapon-aeyaniva doro, palata ata, zapato ata. ¿Bajaramatacabí panamatavenoname tsaja itsacuenejava? jai Jesús pijajivijavabelia.

Nexata Jesús pijajivi jumaitsi:

—Jume. Apo panamatavenonaenë cajena it-sacuenejava ata bajarapamatacabi, jai.

36 Jesús nexata jumaitsi:

—Baja rajane aeconoxae panamuto, pajivi doro xaina, bajarapajivi caponae pijadoro. Palata ata caponae. Pajivi espada apo xainae, bajarapajivi penajumaxuabipana canajetsi. Comuatsi espada.

37 Xaniajanë pacuenia pacatsipaebijitsiatsi. Pacuenia xanë yabara Diosojumelivaisibaxutota tajëvelia jumaitsi, bajarapacuenia netocopiapat-siana. Dioso pejumelivaisibaxutota tajëvelia xanë yabara jumaitsi mapacueniae: “Naneconitsiaex-anaenatsi bepibisiacuene pexanaenëcuenia,” jai tajëvelia xanë yabara Diosojumelivaisibaxutota. Nexata bajarapacuene imoxoyo baja pevajënae tanetocopiapatsinexa, jai Jesús pijajivijavabelia.

38 Nexata Jesús pijajivi jumaitsi:

—Tajatuxanenë, mara anijaespadebejeje, jai Jesús pijajivi.

Nexata Jesús jumaitsi pijajivijavabelia:

—Xanepana rabaja, jai Jesús.

*Pacuenia Jesús vajëta Diosojavabelia
Getsemanívënëjavata yabara pelivaisi*

(Mt 26.36-46; Mr 14.32-42)

39 Jesús pitsapa bovecua. Pacuenia ponabi-aba, bajarapacuenia icatsia pona petsutojumabelia. Patsutojumata olivonaenë apaaxayo, bajarapatsutojumabelia pona. Nexata Jesús pijajivi pënaponatsi.

40 Jesús pijajivi itsa barëpata bajarapatsutojumabelia, Jesús jumaitsi pijajivijavabelia:

—Pacajamatabëcueneëjëbiana raja dovathi pejamatabëcueneta. Pavajëtaponare aeconoxae Diosojavabelia paneajamatabëcuenesaënexa panecopabiyaniwa patanejumecovënëtsijavamë, jai Jesús.

41 Nexata Jesús pijajivi vecuanatixilia bejamatabëcuene treinta metro. Jesús nucajunua pematabacabëta pevajëtaponaenexa Diosojavabelia.

42 Jesús pevajëtsijavata jumai tsaponaes Diosojavabelia:

—Taxa Diosomë, netocopatame picani tanebeyaxuabinexa betajiobicueneta. Itsa jitsipame, necapanepare bajarapabejiobicuenecuua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

43 Nexata Jesús athëbëpijiángel tsitanaitajëtatsi pejamatabëcuene asaëyaexanaenexatsi.

44 Jesús pebeyaxuabijavanexatsi yabara, bitso natsinajamatabëxaina. Nexata Jesús bitso orijibia asaëyata vajëtaponaenexa Diosojavabelia. Jesús bitso janetatsi. Pacuenia itsi pijana, bajara itsi Jesús pejanetsibarëmenetsi. Topitopijai irabereca.

45 Jesús pevajëtsicujinae itsa nonotapuna, lia pijajivijavabelia. Nexata Jesús pijajivi caxitajaraba pemajitanubenaevi. Tsipaji Jesús pijajivi bitso penajamatabëxainaejava, cuerana.

46 Nexata Jesús jumaitsi pijajivijavabelia:
—¿Detsa xuajitsia pamajitanubename?
Panonobapunare. Pavajëtaponare Diosojavabelia, dovathi pejamatabëcueneta pacajamatabëcueneëjëbi ata paneajamatabëcuenesaënexa, jai Jesús pijajivijavabelia.

*Pacuenia Jesús vaetabatsi pijavajabitsaë yabarapelivaisi
(Mt 26.47-56; Mr 14.43-50; Jn 18.2-11)*

⁴⁷ Jesús pijavajabitsaë pevaetabijavatanexatsi, cuaicuajai tsanucae pijajivijavabelia. Nexata bajarapaepatota jivi ayaubitsaëtoxaneto, Jesús petsimaxëponaevitsi, najetarubena. Ponë vënérubatsi Judas, Jesús pijajivi doce ponëbejeyajuvënénëmi, matacanajetaruca bajarapamonae. Nexata Judas najetabalia Jesúsjavabelia. Itabaratsutsuniaya bJacobatsi.

⁴⁸ Nexata Jesús bajarajota jumaitsi Judasjavabelia.

—Judas, ¿matsa pacuenia nitabaratsutsuniaya nebjacobame xanë, Daxitajivi Pematapijinënë, tanecanajetsinexamë tajavajabitsaë pecobeyabeliale? jai Jesús.

⁴⁹ Jesús pijajivi itsa tane pacuenia Jesús exanaejitsiatsi, nexata bajarapamonae jumaitsi Jesúsjavabelia:

—Tajatuxanenë, ¿namaxëvanitsianatsi tsaja espadata? jai Jesús pijajivi.

⁵⁰ Nexata caenë Jesús pijajiviyajuvënénë namaxëvanita. Sacerdotevi pepo penamatacaitorobinë pijajivitonë muxuyoropaebiaxuaba pecujuanenia pamuxuyoroto.

⁵¹ Nexata Jesús jumaitsi pijajivitonëjavabelia:

—Copabare baja, jai Jesús.

Nexata Jesús bajaraponë muxuyorojayataba. Jesús baja muxuyororuta icatsia bajaraponë.

⁵² Pamonae Jesús tsimaxëpatatsi, itsamonaesacerdotevi penamatacaitorobivi, itsamonaetemplobopijipolicíavi penamatacaitorobivi,

itsamonae judíovi pijaancianovi. Bajarapamonae caponaejitsiatsilia Jesús. Nexata Jesús jumaitsi bajarapamonaejavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë.

⁵³ Xanë caematacabí canacujitsia Dioso pe-jumelivaisi paxamëjavabelia pacatsipaebabiabatsi templobota. Itsíata bajarapamatocabí apo panevaetabimë. Nexata mapaepepatotaje panetsimaxëpatame dovathi, jivi piájamatabécuene itaquiriyaexanaenë, papecaitorobixae, jai Jesús petsimaxëpatsivitsijavabelia.

*Pacuenia Jane baja Pedro nayavajunuaxaina
Jesús pijajivitonécuene yabarapelivaisi*

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jesús pevaetabicujinaetsi, caponaliatsi sacerdotevi pepo penamatacaitorobinë pijaboyabelia. Nexata Pedro bajarapamonae pecovëvelia tajiyó pënajanajetaruca.

⁵⁵ Nexata pabota Jesús capatatsi, bajarajota, panabo tuatuajéta, vajabitsaë isoto itajuruteta. Bajarapamonae isoto matatoyorotsia ena. Pedro nexata naitaxutocaevetsiaya naeca bajarapamonaejavata.

⁵⁶ Nexata bajarapabota penacuenebiva, Pedro itsa taeyetatsi penanonopecaejavata isoto muxuneneta, naitaxutbabatsia asaëya taenucatsi. Nexata itsamonaejavabelia bajarapova jumaitsi Pedro yabarapova:

—Mara ponë ata Jesús pijajivitonëje, jai bajaranpova.

⁵⁷ Nexata Pedro jumaitsi bajarapovajavabelia:

—Jume raja. Xanë cajena apo yapëtaenë bajaranponë, jai Pedro bajarapovajavabelia Jesús yabara.

⁵⁸ Bajaraxuacujinae icatsia itsajivi Pedro taeyetatsi. Bajarapajivi ata icatsia jumaitsi Pedrojavabelia:

—Xamë ata rabaja cajena Jesús pijajiviyajuvënénëmë, jai.

Nexata Pedro jumaitsi bajarapajivijavabelia:

—Jume raja. Xanë raja cajena apo Jesús pijajiviyajuvënénëmë, jai Pedro.

⁵⁹ Bejamatabëcuene caehoracujinae, icatsia itsanë jumaitsi:

—Xaniajai rabaja cajena. Maponëje Jesústa naponaponaje. Tsipaji rabaja bajaraponë ata Galilea nacuapijinë, jai bajaraponë Pedro yabara.

⁶⁰ Nexata Pedro nayajumetane. Pedro nexata jumaitsi bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaitsijavata, vacara baja fiaba.

⁶¹ Nexata Jesús boverena namuxufeta Pedrojavaberena. Taeyerenatsi Pedro. Nexata bajarapaepatota Pedro najamatabënapitajaraba Jesús pejumaitsijavatsi: “Pedro, ajena, mapameravitaje, vacara pefiabivajënaeya nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijavatsi Jesús, najamatabënapitajaraba Pedro.

62 Nexata baja Pedro pitsapalia bopanabovecua. Pinijicuenia nua.

Pacuenia Jesús pijavajabitsaë capocaponatsi yabara pelivaisi

(Mt 26.67-68; Mr 14.65)

63 Pamonae Jesús vaetabatsi, capocaponatsi. Itabaratsaquibabeponatsi pecobethaitonëta.

64 Papaëbérëpanata itaxutocëtatsi. Pitaxutocëtsicujinaetsi icatsia itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—¡Vénëjonare ponë caitabaratsaquibaba! jai tsaponae.

65 Pibisiacuenianua bajarapamonae jumai tsaponae Jesúsjavabelia.

Pacuenia Jesús nutatsi judíovi penamatacaitorobivi pitabarata yabara pelivaisi

(Mt 26.59-66; Mr 14.55-64; Jn 18.19-24)

66 Ajena baja matacabí tsarucapona, nacaetuata judíovi pijancianovi, sacerdotevi penamatacaitorobivi yajava, judíovi pecujarubivi yajava. Nexata Jesús caponarenatsi bajarapamonae penacaetuatsijavaberena. Bajarajota bajarapamonae jumaitsi Jesúsjavabelia:

67 —Panetsipaebare. ¿Xamë tsabaja rovia Cristomë, athëbëvetsica Dioso pecaitorobinëtsica jivi necapanepaenënexa? jai bajarapamonae.

Nexata Jesús jumaitsi bajarapamonaejavabelia:

—“Xanë rabaja Cristonë, athëbëvetsica Dioso taneitorobinëtsica jivi tacapanepaenexa,” pacajai atatsi tsipae, itsiata apo panejumecovënëtsimë tsipae.

68 Itsalivaisiyo pacayanijobi atatsi tsipae, itsiata apo panejumecanaviatsimë tsipae. Apo panecopatsimënu tsipae.

69 Itsiata baitsi jane tavajënaeyabelia xanë, Daxitajivi Pematapijinënë, ecaenajé taxa Dioso pecujuanenia patanajuaevetsinexabje daxitacuene. Bajaraponë pecaëjëpaenëtsi daxitajamatabëcuene, jai Jesús bajarapamonaejavabelia.

70 Nexata daxita bajarapamonae jumaitsi Jesúsjavabelia:

—¿Xamë tsabaja Dioso pexënatomë? jai bajarapamonae.

Nexata Jesús jumaitsi bajarapamonaejavabelia:

—Jäjä, xanë rabaja pacuenia panejumaitsimë. Bajaraponënë, jai Jesús.

71 Nexata bajarapamonae najumaitsi:

—Ajibi rabaja abaxë vajaevetaponaejava jivi neconitsiaya vajanacatsipaebaponaenexa pacuenie yabara naneconitsiaexanaejitsiatsi maponëje. Vaxaitsi rabaja vajacuata jumetanetsi pacuenia maponëje cuaicuajai Dioso apo pejitsipaecuenia. Tsipaji beDioso pexënato natane, najai bajarapamonae.

23

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Mr 15.1-5; Jn 18.28-38)

1 Daxita judíovi pijsancianovi nonobapuna. Sacerdotevi penamatacaitorobivi ata nonobapuna. Judíovi pecujarubivi ata nonobapuna. Nexata bajarapamonae Jesús caponaliatsi itsaboyabelia, Judeanacua pevetsinë Pilato pijaboyabelia.

2 Bajarajota Pilato pitabarata bajarapamona neconitsiaya jumaitsi Jesús yabara:

—Mara ponëje naneconita. Tsipaji muxubi-jiapenetapona jivi pianaepanaenexa nacuaevesivijavabelia. Paneitavetaponanua patamata-motsiyaniva Romanonacua pepo pevetsinë pejamatabécueneta impuestomatamo pataneyanijobi-java. Jumai tsaponauela: “Xanë raja Cristonë, nacua taevetsinë,” jai tsaponaemaponëje, jai bajarapamona Jesùs yabara neconitsiaya Pilatojavabelia.

3 Nexata Pilato jumaitsi Jesúsjavabelia:

—¿Xamë tsaja judíovi pepo nevetsinë? jai.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

4 Pilato nexata jumaitsi sacerdotevi penamatacaitorobivijavabelia, jivi ayaibit-saëtoxanetojavabelia ata:

—Apo caxitarabinë cajena itsacujiruneconi ata pexinaejava maponëje, paneconi yabara naneconitsijitsia, jai Pilato.

5 Itsiata bajarapamona ajumesaë. Orijibia neconitsia jumaitsi Jesús yabara:

—Bajaraponë daxita Judea nacuapijivi muxubijiapenetapona bajarapamona pianaepanaenexa Judeanacua pevetsivijavabelia. Taxuxuaba cajena bajaraponë bajarapacuene pexinaejava Galilea nacuata. Nexata maberena ataje bajarapacuenia icatsia exanapona, jai bajarapamona Jesùs yabara Pilatojavabelia.

*Pacuenia Jesús nutatsi Herodes pitabarata
yabara pelivaisi*

6 Pilato itsa jumetane bajarapamonae peneconitsijavatsi Jesús, nexata Pilato jumaitsi bajarapamonaejavabelia:

—¿Matsa ponëje Jesús, Galilea nacuapijinëje? jai Pilato.

7 Nexata bajarapamonae tsipaeba Pilatojavabelia Jesús Galilea nacuapijinëcuene. Nexata Pilato itoroba pijajivi Jesús pecaponaenexatsilia Herodesjavabelia. Tsipaji Herodes Galileanacula pevetsinë. Bajarapamatacabi Herodes ponapona Jerusalén tomarata.

8 Nexata Herodes itsa tane Jesús, barëya. Tsipaji Herodes vënëlivaisitaeyabiaba Dioso pesaëta Jesús pinijicuene pexanaponaejavanë. Nexata Jesús pinijicuene pexanaejava Dioso pesaëta jamatabétane Herodes.

9 Nexata Herodes ayaicuenia yanijobapona Jesúsjavabelia. Itsiata Jesús apo jumeptsicaejumeyo ata.

10 Bajarajota nubena sacerdotevi penamatacaitorobivi, judíovi pecujarubivi yajava. Bajarapamonae ayajumeta neconitaponatsi Jesús Herodesjavabelia.

11 Nexata Herodes, pijajivi yajava, Jesús capocaponatsi. Bitso pexaniajava, xua nacuaevertsinë banaxatata, bajaraxua Jesús quenetsiataeya xatatatsi. Bajarapacuenia Jesús quenetsiataeya xatatatsi pepo nacuaevertsinëcuenia petaenexatsi. Bajaraxuacujinae icatsia canaviabarenatsi Pilatojavaberena.

12 Pilatobeje Herodesbeje naitoyabeje picani. Itsiata bajarapamatacabi nabarajamatabëcuenexanepanabeje. Naxaniababeje baja.

Pacuenia baja Pilato tocopata Jesús pebeyaxu-abinexatsiyabara pelivaisi

(Mt 27.15-26; Mr 15.6-15; Jn 18.39-19.16)

13 Pilato junata penacaetuatsinexa sacerdotevi penamatacaitorobivi. Junata penacaetuatsinexa judíovi pevetsivi ata. Junata penacaetuatsinexa bajarapatomarata pejinavanapaevi ata.

14 Nexata Pilato jumaitsi bajarapamonaejavabelia Jesús yabara:

—Paxamë panetocapatame maponëje. “Mara ponëje naneconita. Tsipaji muxubijiapenetaponá jivi pianaepanaenexa nacuaevetsivijavabelia,” panejamë. Itsiata baitsijane xanë picani tajacuata yanijobajë xaniavaetsia paneitabëta. Nexata xua yabara paneconitame, ajibi picani. Maponëje itsacujiruneconi ata apo xainae, paneconi yabara naneconitsijitsia.

15 Herodes ata apo naneconitsiaexanaetsi. Saya icatsia nacatocanaviarena. Pataneme rabaja. Itsacujiruneconi ata apo xainae maponëje, paneconi yabara beyaxuabijitsiatsi.

16 Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajë, jai Pilato bajarapamonaejavabelia.

17 Caevai canacujitsia, pascuavënë fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabibabivecua. Pilato copatabiaba ponë jivi

vajëtatsi pecopatsinexa. Nexata bajarapacuenia copatabiaba jivi pesivajamatabëcuene xanepanaenexatsi.

18 Nexata bajarapamonae itsa jumetane Pilato picani Jesús pecopatsiapaebijava, nexata daxita bajarapamonae caecuenia vavajai Jesús yabara. Bajarapamonae pevavajaijavata, Jesús yabara jumaitsi Pilatojavabelia mapacueniaje:

—¡Majane ponë beyaxuareje! ¡Barrabás jane panetocapitsapare! jai bajarapamonae.

19 Bajaraponë Barrabás Jesús pevajënaeya bajarapatomarata barënabia gobierno pijajivijavelia. Nexata Barrabás jivitonë beyaxuuba. Bajaraxuata nanconitsiaponapona penaneconitsivi pejebabiabibota.

20 Pilato picani jamatabëcopata Jesús. Bajaraxuata picani icatsia Pilato tsipaebijitsia jivijavelia Jesús baja pecopatsinexa.

21 Itsiata baitsi jane bajarapamonae orijibia vavajai.

—¡Cruzajavelia cobematabiabarutsiaexanare! ¡Cruzajavelia cobematabiabarutsiaexanare! jai tsaponae bajarapamonae Pilatojavavelia.

22 Icatsia Pilato jumaitsi bajarapamonaejavavelia:

—¿Detsa xuajitsia? ¿Detsa papibisiacuene exana maponëje? Apo caxitajarabinë cajena itsacujiruneconi ata, paneconi yabara beyaxuabijitsatsi. Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajë peponaenexa baja, jai Pilato.

23 Itsiata bajarapamonae ajumesaë. Vavajai tsaponae.

—¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

Nexata bajarapamonae, sacerdotevi penamat-acaitorobivi yajava, bitso pevavajaitsaponaexae, belia baja Pilato jejai.

24 Nexata baja Pilato tocopata pacuenia bajarapamonae vajétatsi.

25 Nexata Pilato itoroba pijajivi Barrabás, ponë jivitonë beyaxuaba, pecapitsapaenexatsi pepitsapaenexa baja penaneconitsivi pejebabi-abibovecua. Caranata Jesús, pianeconijibinë, pebeyaxuabinexatsi Pilato itoroba pijajivi.

Pacuenia Jane baja Jesús cruzajavabelia cobematabiabarutatsiyabara pelivaisi

(Mt 27.32-44; Mr 15.21-32; Jn 19.17-27)

26 Vajabitsaë itsa caponaliatsi Jesús cruzajavabelia pecobematabiabarutsinexatsi, Simón pijinia najetaruca vayafoverena. Nexata vajabitsaë vaetabatsi Simón. Simón Cirene tomarapijinë. Nexata Simón vajabitsaë itorobatsi, pacruzajavabelia Jesús cobematabiabarutsijitsiatsi, petocaponaenexa. Nexata bajarapacruza Simón tovëtacaranajetaruca Jesús pecovëya.

27 Jesús pënajanjetarubenatsi, jivi ayaubitsaëtoxaneto. Bajarapamonaeyajuvënëvi, petiriavi ayaubitsaëto, Jesús bitso pënueyababuatonatsi ayaijumeta.

28 Nexata Jesús napënëyorota. Jumaitsi bajarapapetiriavijavabelia:

—Paxamë petiriavi, paJerusalén tomarapijivimë, pëtsa panepënueyabame xanë. Paxamë jane panatsinuema. Panexi ata patsinuema.

29 Itsa copajopaena piayaimatacabí, jivi bitso beiobi tsane. Nexata jivi jumai tsane: “Mavecovi itsiata bevelia nacatsunabejiobitane pexi apo pexainaexae,” jai tsane jivi bajarapamatocabí mavecovi yabara.

30 Nexata bajarapamatocabí jivi bitso itsa nabejiobiaena, belia jitsipaena petëpaejava. Nexata jivi najumai tsane: “Vajatëpanexa, nacatoxanepanaejitsipa pinijiibotsutonë itsa nacamatacënëbajarabijitsipa,” najai tsane jivi.

31 Xanë itsacujiruneconi apo xainae atanë, nebejiobiaexanaena itsa necobematabarutsiana cruzajavabelia. Nexata pamonae pibisiacuene pexanaevi bitso xanë matatoxenetsia, bejiobiaexanaenaenatsi itsa tocopiapatsianatsi piayaimatacabí, jai Jesús bajarapapetiriavijavabelia.

32 Itsabelia vajabitsaë Jesús caponatsi, bajarabelia anijanëbeje penaneconitsinëbeje, Jesús yajava, caponatsi. Bajaraponëbeje piajamatabécuenebejenëbeje vajabitsaë caponatsibeje Jesús peyajavabeyaxuabinexatsibeje.

33 Itsa baja capaliatsi Jivimatasiipavënë tsutojavabelia, nexata cruzajavabelia Jesús yajavacobematabarutatsi bajaraponëbeje. Itsanë rutatsi itsacruzata Jesús pecujuanenia. Itsanë rutatsi itsacruzata Jesús petsavenonenia.

34 Jesús baja cruzajavabelia pepuacobematababarutsi, jumaitsi paxa Diosojavabelia:

—Axa, mapamonaе itaxutotsoniataema. Vencuaxuare paneconi xaina pibisiacuene tanexanaexae mapacueniaje. Tsipaji raja apo yapëtae. Bajaraxuata mapacuenia nexanaje, jai Jesús paxa Diosojavabelia.

Nexata vajabitsaë, pamonaе Jesús cobematabiabarutatsi cruzajavabelia, bajarajota namuxusita. Penamuxusitsijavaxi irata natsipenepeneta. Bajarapacuenia vajabitsaë penamuxusitsijavaxi canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona.

³⁵ Bajarajota daxitajivi taenubena. Judíovi pevetsivi Jesús capocaponatsi. Bajarapamonae capocaponaeya jumaitsi Jesús yabara:

—Ēitsamonae yabara jumai tsabiabi: “Capanepaenajë jivi,” jai tsabiabi. Baja rajane pijacuata nacapanepae itsa xaniajai pepacuenе Cristo, Dioso athëbëvetsica pitorobinëtsitsica jivi pecapanepaenexa, jai judíovi pevetsivi Jesús yabara.

³⁶ Vajabitsaë ata Jesús capocaponatsi. Nexata capocaponaeya cujibarenatsi. Rajutsijitsatsi piatuvinora piapaenexa Jesús.

³⁷ Nexata vajabitsaë jumaitsi Jesúsjavabelia:

—Itsa xamë judíovi pepo nevetsinë, nexata nacapanepare nijacuata, jai vajabitsaë Jesúsjavabelia.

³⁸ Bajarajota Jesús pematabocoto matatsënëyo tablapajumata, Pilato pijajivi yaquinaruta acueyabi paviriavibeje pijajumeta. Itsaitane yaquinaruta griegojumeta. Itsaitane yaquinaruta latínjumeta. Itsaitane yaquinaruta hebreojumeta.

Peyaqinarubiitane jumai tsarubi mapacueniaje: “Mara ponëje judíovi pepo pevetsinëje,” jai tsarubi Jesús yabara.

39 Itsanë piajamatabëcuenebejenë cruzajabelia pecobematabiabarutsinëtsi, Jesús anaeya bijataerucatsi.

—Itsa xamë Cristomë, athëbëvetsica Dioso pecaitorobinëtsica jivi necapanepaenexa, nijacuata nacapanepare. Paxanëbeje ata panecapaneparebeje, jai tsarucae Jesúsjavabelia.

40 Itsanë pijinia itsacruzajavelia pecobematabiabarutsinëtsi, jumeitavetaruca. Jumai tsarucae penajuananeconitsinëbejejavabelia:

—¿Dioso tsaja apo cujunavimë netëpaenexa, cabobematabiabi ata nijaneconi yabara mapacueniaje?

41 Vaxaibeje rabiji vajaneconi xainatsibeje vajatëpaenexabeje. Nacarutabeje mapacueniaje pibisiacuene vajaexanaexaabeje. Mabiji ponëje caeto ata pibisiacuene apo exanae, jai tsarucae bajaraponë jumeitavetsiaya penajuananeconitsinëbejejavabelia.

42 Icatsia xuacujinae bajaraponë jumaitsi Jesúsjavabelia:

—Jesús, xanë nenajamatabënapitsianame pamatacabí xamë evetsianame mapanacuaje, jai bajaraponë Jesúsjavabelia.

43 Nexata Jesús jumaitsi bajaraponëjavabelia:

—Xaniajanë pacuenia catsipaebijitsiatsi. Ajena, pamatacabí, neyajavaponaponaename paraísojavatatsia, jai Jesús bajaraponëjavabelia.

*Pacuenia baja Jesús tēpa yabara pelivaisi
(Mt 27.45-56; Mr 15.33-41; Jn 19.28-30)*

44 Jesú斯 baja itsa tēpaejitsia, matonejeepatota, daxita nacuanéjava aitaquiri tsajuni. Matapania acueyabi pahorabejecujinae, caniviyojavabelia, nacua napebeta icatsia.

45 Paepatota Jesú斯 tēpanajereca, bajarapaepatota templobo énëtuatuajéalia pënëyatutuarutsipana, ayaipapaëbérëpana, tuatuajéatsica titititicaica.

46 Nexata Jesú斯 ayajumeta jumaitsi Diosojavelia:

—Axa, xamëjavabelia daxita tajamatabëcuene carajutatssi, jai Jesú斯.

Itsa baja Jesú斯 najumevereta bajarapajume, tēpanajereca jane baja.

47 Nexata Romano nacuapijinë, vajabitsaë pijacapitán, itsa tane daxita bajarapacuene, bajaronë Diosojavelia jumaitsi:

—Diosomë, bitso ayajamatabëcuenenëmë. Xani-ajai tsaena baja. Maponë tēpaje, pianeconijibinë, jai vajabitsaë pijacapitán.

48 Daxita pajivibitsaëtoxaneto taenubena pacuenia Jesú斯 jumaliververereca, bajarapamonae bitso najamatabëxainaeya naviaba pijabonëjavabelia.

49 Daxita pamonae Jesú斯 peyapëtaevitsi, pebijivi, petiriavi ata, pamonae Galilea nacuaverena pënaponatsi, tajiyojavaverena taenubena, petaenexa Jesú斯 pebeyaxuabijavatsi.

*Pacuenia Jesú斯 petëpaenë buatatsi ibovajualia
yabara pelivaisi
(Mt 27.57-61; Mr 15.42-47; Jn 19.38-42)*

50 Jerusalén tomarata ponapona José, Arimatea tomarapijiné. Bajaraponé pexaniajamatabécuenené, xaniavaetsia peponaponaené Dioso pitabarata. Bajaraponé judíovi pevetsiné.

51 José copiaevetaponapona pecopiajopaejava pamatacabí caené Dioso evetsijitsia daxita pijajivi mapanacuataje. Nexata José apo jamatabécuenejépae pacuenia judíovi exana Jesúsjavabelia.

52 José nexata lia nacuaevetsiné Pilatojavabelia. Vajéta petocopatsinexatsi peméthëtsinexa petëpaené Jesús.

53 Bajaraxuacujinae José cruzajavavetsica pitsica Jesús petëpaené. Daxitanëreca mataquionaeaya matacacéba pexaniaviria piapiasábanapanata. Nexata cajena itsajota José iboitapajanitojavata pinijiibovaju toexanabuatatsi petëpaevi pebuataponaenexa, bajarapaibovajuala buata Jesús petëpaené. Bajarapavajuala abaxé itsajiviyo ata petëpaejiviyo José apo buatsi.

54 Pamatacabí José bajarapacuenia vajéta Pilatojavabelia Jesús petëpaené peméthëtsinexa, bajarapamatacabí judíovi penacuenebijava banacuenevereta baja pecopiajonevajénaeya penacueraevetsimatacabinexa. Nexata paepatota José ibovajuala buata Jesús petëpaené, bajarapaepatota José baja tocopiapataponatsi penacueraevetsimatacabinexa.

55 Papetiriavi Jesús pënaponatsi Galilea nacuaverena, bajarapapetiriavi tajyo José pecovëya najetarubena. Nexata bajarapapetiriavi tane Jesús petëpaené José pebuatsijava

bajarapaibovajuala.

⁵⁶ Bajaraxuacujinae bajarapapetiriavi naviaba baja pijaboyabelia. Nexata pepatsicujinae pijaboyabelia, bajarapapetiriavi xaniavaeta pexaniapetuxujuvira, pexaniapetuxujuvitsapato yajava, Jesús petépaenë peperabéexabinexa. Nexata abaxë bajarapapetiriavi nacueraeveta judíovi penacueraevetsimatacabita pacuenia itorobatsi Dioso Moiséspijinëta bajayata penajumecopatsilivaisi.

24

Pacuenia Jesús petépaecujinae icatsia asaëyabara pelivaisi

(Mt 28.1-10; Mr 16.1-8; Jn 20.1-10)

¹ Judíovi baja penacueraevetsimatacabí verevereca. Nexata meravia pitsijavata, ajena juameto pitsapaina, papetiriavi xaniavaeta pexaniapetuxujuvijava, icatsia ponalia Jesús petépaenë pebuatsiibovajutsijavabelia. Patuxujuvijava xaniavaeta Jesús petépaenë peperabéexabinexa, caponalia Jesús petépaenë peperabéexabinexa Jane baja picani. Itsapetiriavi yajava ponalia peyanabinezatsi.

² Itsa baja palia, nexata bajarapapetiriavi tane Jesús petépaenë pebuatsiibovajutsi peyavépaacatsiibopanaxanetomi petixitanutsijavalia.

³ Bajarapamonae joneya picani Jesús pebuatsiibovajutsijavalia. Itsiata baitsi Jane apo caxitajarababuatsi petépaenë, pepo petuxanenë Jesús.

⁴ Nexata bajarapapetiriavi bitso jamatatabécuenenajunaviaca. Apo yapëtae pacuenia

exanaejitsia. Bajarajota nexata bajarapapetiriavi taenuta anijanëbeje ángelnëbeje. Bajaraponëbeje penaxatatsijavabeje nivenivena bitso.

⁵ Bajarapapetiriavi bitsó cujunava bajarapaángelnëbeje. Nexata pecajunavi pematabacabéta irataeya bobena. Nexata bajarapaángelnëbeje jumaitsi petiriavijavabelia:

—¿Detsa xuajitsia petépaenë pebuatsijavatatsi, pajaitame? Bajaraponë asaë baja icatsia.

⁶ Bajaraponë majotaje ajibi baja tsarucae. Dioso rabaja icatsia asaëyaexanatsi. Panajamatabënapire pacuenia pacatsipaeba Galilea nacuata pamatacabi abaxë asaë tsaponaponae.

⁷ Bajaraponë baja cajena tajëvelia pacajumaitsi: "Xanë, Daxitajivi Pematapijinënë, necanajetsiana pibisiajamatabëcuenevi pecobeyabelia. Nexata bajarapamonae cruzajavabelia necobematabiabarutsiana tanebeyaxuabinexa. Itsita baitsi jane tanebeyaxuabicujinae, acueyabi matacabita, icatsia asaënë tsane," pacajai baja cajena tajëvelia Jesús itsa abaxë pamatacabi pacayajavaponapona, jai ángelnëbeje petiriavijavabelia.

⁸ Nexata bajarapapetiriavi najamatabënapita pacuenia Jesús tajëvelia jumaitsi.

⁹ Nexata baja bajarapapetiriavi naviabarena Jesús petépaenë pebuatsiibovajutsijavaverena. Nexata bajarapapetiriavi tsipaeba daxita bajarapacuene yabara once ponëbeje, Jesús pijapóstolevijavabelia. Tsipaebanua daxita itsamonae Jesús pijajivijavabelia ata.

¹⁰ Bajarapapetiriaviyajuvënëvi itsava

Maríavënëva. Bajarapova Magdala tomarapijiva. Itsava pijinia Juanavënëva. Itsava pijinia icatsia Maríavënëva. Bajarapova Santiago pena. Itsapetiriavi yajava tsipaeba bajarapacuene yabara apóstolevijavabelia.

11 Bajarapapetiriavi apóstolevijavabelia tsipaebi ata bajarapacuene yabara, itsiata apóstolevi apo jumexaniataetsi. Apóstolevi saya bajarapalivaisi yabara jamatabëjumaitsi: “Saya meta bajarapapetiriavi pijacuata exana bajarapalivaisi,” jamatabëjai apóstolevi.

12 Itsiata baitsi jane Pedro pitsapalia bovecua. Nexata cujinaejinalia Jesús petëpaenë pebuatsiibovajutsijavabelia. Nexata Pedro bajarapaibovajualia itsa naécola, taeyejeba pebobenaejava bajarajota daxitanëreca Jesús mataquionaeya pematacacëbipanamitsireca. Nexata baja Pedro naviata boyaberena. Najamatabëxaina bajarapacuene yabara.

Pacuenia Jesús petëpaecujinae icatsia itsa asaë, pijajivitonëbeje pëcaxitajarabaxuaba, Emaús tomarabelia peponaenëbeje, yabara pelivaisi

(Mr 16.12-13)

13 Pamatacabí bajarapapetiriavi tane ángelnëbeje, bajarapamatacabí Jesús pijajivitonëbeje Jerusalén tomaravelia naropotabeje. Ponabeje Emaús tomarabelia. Bajarapatomara eca once pakilómetrobeje Jerusalén tomaravecua.

14 Bajaraponëbeje baracuaicuajaiabeje tsanajetarucae daxita pacuene copiapata.

15 Itsa abaxë bajarapalivaisi cuaicuajai tsanucaponaebje, Jesús pëcaxitarabalia. Nexata Jesús muxunenianajetaruca bajaraponëbeje.

16 Bajaraponëbeje tae atabeje Jesús, itsiata apo yapëtaebje Jesúscuene.

17 Nexata Jesús yanijoba bajaraponëbejejavabelia. Jesús jumaitisi:

—¿Detsa pitsicuene pabaracuaicuajamëbeje tsanucapona namutua? ¿Detsa xuajitsia bepajamatatabëcuenejiobimëbeje? jai Jesús bajaraponëbejejavabelia.

18 Bajaraponëbeje itsanë pevënë Cleofas. Nexata Cleofas jumaitisi Jesúsjavabelia:

—Daxitajivi baja cajena yapëtane pacuene copiapata Jerusalén tomarata mapamatamacabitaje. ¿Xamë tsaja caenëmë apo nijanayapëtae bajarapacuene, naponaponae atamë bajarapatomarata? jai Cleofas caranata Jesúsjavabelia.

19 Nexata Jesús jumaitisi bajaraponëbejejavabelia:

—¿Detsa pitsicuene copiapata? jai.

Nexata icatsia bajaraponëbeje jumaitisi Jesúsjavabelia:

—Jesúspijinë raja, Nazaret tomarapijinëmi, profetanëmi. Pinijicuene exanapona Dioso pesaëta. Bitsø xaniavaetsia jivi pexanialivaisi tsipaebapona. Nexata daxitajivi sivajamatatabëcuenebarëya bajaraponëmi. Dioso ata sivajamatatabëcuenebarëyatsi.

20 Nexata sacerdotevi penamatacaitorobivi, vajanacaevetsivi yajava, canajetatsi Jesúspijinëmi. Canajetaxuabatsi Jesúspijinë cruzajavabelia

pecobematabiabarutsinexatsi pebeyaxuabinexatsi.

²¹ Paxanë picani bajaraponëmi yabara pajamatabejumaitsinë: “Bajaraponë nacavecuacapitsapaena itsanacuaverena pepatsivi, pamonae apo judíovi, vajanacayanacuaevetsijavavecua pepitsapaenexa,” pajamatabejanë tsavanapae picani Jesúspijinë yabara. Nexata Jesúspijinë pebeyaxuobicujinaetsi, ajena baja xaina acueyabi pamatacabibeje.

²² Paxanëyajuvënëvi, petiriavi, ajena, bajayacunua, panenabenajacaeyaexana. Bajarapamonae bajayacunua, ajena juameto pitsapaina, ponalia Jesús petëpaenë pebuatsiibovajutsijavabelia.

²³ Itsiata apo caxitajarababuatsi bajarajota Jesús petëpaenë. Nexata bajarapapetiriavi naviabarena. Bajarapamonae panetsipaeba pacuenia bemajitsinaebota tane ángelnëbeje. Angelnëbeje pina nexata jumaitsibeje petiriavijavabelia: “Jesús rabaja asaë tsaponaponae icatsia,” jai pina.

²⁴ Nexata itsamonae paxanëyuvënëvi pona Jesús petëpaenë pebuatsiibovajutsijavabelia. Nexata tane pacuenia baja petiriavi panetsipaeba. Jesús itsiata petëpaenë apo taeyabuatsi, jaibeje Jesúsjavabelia Emaús tomarabelia peponaenëbeje.

²⁵ Nexata Jesús jumaitsi bajaraponëbejejavabelia:
— ¡Paxamëbeje! sayá paneaja-matabécuenetajanëbeje! Apo pajume-covënëtsimëbeje daxita profetavi peyaquinaelivaisianë.

²⁶ Nexata apo payapëtaemëbeje pacuenia Cristo, Dioso athëbëvetsica pitorobinëtsitsica jivi

pecapanepaenexa, copiaya bitso bejiobiaexanaejitsiatsi peponaevajënaeya paxa Diosojavabetsia athëbëtatsia paxa pemuxuneneta peecaenexa, nayabarajai Jesús bajaraponëbejejavabelia.

27 Nexata Jesús xaniavaetsia navajunupaeba bajaraponëbejejavabelia daxita pacuenia Dioso pejumelivaisibaxutota tajëvelia jumaitsi Jesús yabara. Taxuxuaba jane baja penavajunupaebijava pacuenia Moiséspijinë peyaquinaebaxutota tajëvelia jumaitsi Jesús yabara. Bajaraxuacujinae icatsia navajunupaeba pacuenia daxita itsaprofetavi peyaquinaebaxutonëta ata jumaitsi Jesús yabara.

28 Itsa baja imoxoyotanajetarubena patomarata bajaraponëbeje patsijitsiabeje, Jesús itajara rovia bepeponaejitsia bajaraponëbejevecua.

29 Nexata bajaraponëbeje bitso asivabeje Jesús penajuamajitsinexa bajarapatomarata. Jumaitsibeje bajaraponëbeje Jesúsjavabelia:

—Namajire abaxë mapatomarataje. Caniviyo rabaja bitso. Meravijitsia rabaja, jaibeje bajaraponëbeje Jesúsjavabelia.

Nexata baja Jesús najoneya pabota bajaraponëbeje patabeje.

30 Itsa bajaraponëbeje yajavaecabeje mesa muxuneneta, Jesús pita panbë. Jumaitsi paxa Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba panbë. Rajutatsi bajaraponëbeje.

31 Bajarajota matapania bajaraponëbeje yapëtanebeje Jesúscuene. Itsiata baitsi jane bajarajota vecuacaevatsibeje Jesús. Apo taebeje baja matavëjëa.

32 Nexata bajaraponëbeje najumaitsibeje:

—Namutua vajanacanavajunu paebanu-caponaejavatabeje pacuenia jumaitsi Dirosojumelivaisibaxutota, bitso muxu-najamatabëcuenebarëyatsibeje, najaibeje bajaraponëbeje.

33 Nexata bajarajota bepija naropotabeje Emaús tomaravecua. Naviatabeje baja Jerusalén tomarabelia. Nexata Jerusalén tomarabelia itsa patabeje, caxitajarababeje penacaetuatsijavata once ponëbeje apóstolevi, itsamonaе yajava Jesús pijajivi.

34 Nexata penacaetuatsivi jumaitsi bajaraponëbejejavabelia:

—Xaniajai baja cajena. Vajatuxanenë icatsia asaë tsaponaponaе. Simón baja tsitanaitajëtsi, jai bajarapamonaе.

35 Nexata ponëbeje Emaús tomaraverena patabeje, tsipaebabeje bajarapamonaejavabelia pacuenia namutoepatualia pëcaxinatsibeje Jesús. Tsipaebabejenua pacuenia matapania yapëtanebeje Jesúscuene, pitabëta itsa epatsënëquejeba panbë.

Pacuenia Jesús petëpaecujinae tsitanaitajëta pijajivijavabelia yabara pelivaisi

(Mt 28.16-20; Mr 16.14-18; Jn 20.19-23)

36 Ponëbeje Emaús tomaraverena patabeje, tsipaebabeje Jesús pijajivijavabelia pacuenia

tanebeje Jesús Emaús tomaratalia. Nexata bajara-paepatota Jesús tsitanaitajéta pijajivijavabelia. Jesús jemata nuca pijajivi tuatuajéta. Jesús bajacoba pijajivi.

37 Nexata Jesús pijajivi bitso nabenajaca.

—Petëpaenëmi raeta pejumape maje, jamatabejai bajarapamonae Jesús yabara.

38 Nexata Jesús jumaitsi pijajivijavabelia:

—¿Detsa xuajitsia pajunavame? ¿Detsa xuajitsia panejamatabëéthétota pajumeaebame icatsia tasaëjava?

39 Panecobetaema. Tataxubeje ata pataema. Xanë rabaja maje. Panejayabare. Paneyorobarenuia xaniavaetsia. Petëpaenëmi raja peneta pejumape avijibi. Asijibinua. Apo perabëitsi ca-jena pacuenia xanë perabëitsinë, jai Jesús pijajivijavabelia.

40 Jesús itsa jumaitsi mapacueniae, nacobeitajéta pijajivijavabelia. Nataxuitajéta yajava.

41 Jesús pijajivi bitso tsitapexaniacuenetsi. It-siata baitsi jane Jesús pijajivi abaxë apo jumexaniatae xaniavaetsia Jesúscuene. Jesús nexata jumaitsi pijajivijavabelia:

—¿Paxainame tsabaja itsacuenejavayo patanera-jutsinemexamë taxaanexa? jai Jesús.

42 Nexata Jesús pijajivi rajutatsi pesebidujuai-javayo, jabëperiyo yajava.

43 Pita baja Jesús. Nexata Jesús pijajivi pitabarata xane.

44 Nexata Jesús jumaitsi pijajivijavabelia:

—Mapacuene taneexanaejavanexa yabaraje, pacatsipaebabiabatsi baja cajena tajëvelia pamatacabí abaxë pacayajavaponaponatsi. “Pacuenia bajayata tajëvelia xanë ybara jumaitsi Moisëspijinë peyaquinaebaxutota, Diosojumepaebivimi profetavi peyaquinaebaxutota ata, Salmosvënëbaxutota ata, bajarapacuenia netocopiapatsiana,” pacajaitsi tsabiabi baja cajena pamatacabí abaxë pacayajavaponaponatsi. Daxita rabaja bajarapacuene netocopiapata jane baja, jai Jesús pijajivijavabelia.

⁴⁵ Nexata Jesús pijajivi jamatabëcuñecaëjëpaeyaexana Jesús pijajivi xaniavaetsia pejumeyapëtaenexa pacuenia Dioso pejumelivaisibaxutota tajëvelia jumaitsi Jesús ybara.

⁴⁶ Jesús jumaitsi pijajivijavabelia mapacueni-aje:

—Dioso pejumelivaisibaxutota tajëvelia jumaitsi pacuenia xanë, Cristonë, athëbëvetsica Dioso taneitorobinëtsica jivi tacapanepaenexa, nebejiobitsiaya nebeyaxuabijitsia. Jumaitsinua pacuenia tatëpaecujinae, acueyabi matacabita, icatsia Dioso niasaëyaexanaejitsia tatëpaejavavecua.

⁴⁷ Jumaitsinua pacuenia patajajivimë tajumelivaisi patsipaebaponaejitsiamë daxitajivijavabelia. Nexata tajumelivaisi patsipaebaponaename daxitajivi penaja-matabëcuñepënëyorotsinexa Diosojavabelia, pibisiacuene pexanaeneconimi pevecuaajibiaexanaenexatsi Dioso. Copiaya Jerusalén tomarata pataxuxuabianame panetsipaebijava. Ba-

jaraxuacujinae patsipaebanajetarubenaename daxitanacuanëjava.

48 Paxamë rabaja pataneme daxita pacuene netocopiapata. Nexata jivi patsipaebaponaename daxita bajarapacuene yabara.

49 Espíritu Santo, ponë taxa Dioso najumecapanepaeya pacarajutsiapaeba, pacatoitorobianicatsi papecatsijamatatabëjonenexa. Abaxë pajinavanapaename majotaje Jerusalén tomarata. Matapania Dioso athëbëvetsica pacajamatatabëcuene caëjëpaeyaexanaena pinijicuene paneexanaponaenexa, paponaename jane baja tajumelivaisi jivi panetsipaebanajetarubenaenexa daxitanacuanëjava, jai Jesús pijajivijavabelia.

Pacuenia Jesús petëpaecujinae icatsia itsa asaë, tsia baja athëbëabetsia yabara pelivaisi

(Mr 16.19-20)

50 Jesús pijajivi matacalia Betania tomarabelia. Jesús nacobeyotsiaya pijajivi tovajëcanuca Diosojavabelia Jesús pijajivi peyavenonaenexatsi Dioso.

51 Nexata saya bajarajota Jesús pijajivi athëbëabetsia baja vecuapona. Jesús baja Dioso caponatsi athëbëabetsia.

52 Jesús pijajivi jamatabëjumaitsi:

—¡Vajatuxanenë bitso ayaijamatabëcuenenë! jamatabëjai.

Bajaraxuacujinae Jesús pijajivi barëyaya naviaba Jerusalén tomarabelia.

53 Templobojavabelia Jesús pijajivi joneyabi-
aba pevajëcabiabinexa Diosojavabelia. Jesús pijajivi
pexaniajamatabëcuene rajutabiaba Diosojavabelia.

Dios pejumelivaisibaxuto pejanalivaisibaxuto New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files
dated 29 Jan 2022
bc03f416-faf8-5000-bfb5-5ca8a3fa98cf